

Barcode - 9999990000739

Title - dosoi bavan vaishnavn ki varta khand ii

Subject - literature

Author - sharma,braj bhusan

Language - hindi

Pages - 433

Publication Year - 1952

Creator - Fast DLI Downloader

<https://github.com/cancerian0684/dli-downloader>

Barcode EAN.UCC-13



9 999999 000073



गो. श्रीहरिरायजी ग्रणीत

# दोसौ बावन वैष्णवन की वार्ता

[ तीन जन्म की लीला भावना वाली ]



द्वितीय खण्ड



सम्पादक :

गो. श्रीब्रजभूषण शर्मा

द्वारकादास परीख



प्रकाशक :

शुद्धद्वैत एकेडमी, कांकरौली

प्रकाशक द्वारकादास परीख  
सत्री :  
अष्टछाप स्मारक समिति, कांकोली



प्रथम संस्करण  
संवत् २००९ विक्रम  
वसुधाब्द ४७६


सर्वाधिकार प्रकाशक  
के  
स्वाधीन हैं

मूल्य •  
रु ८-०-०




मुद्रक • रामलाल नानालाल शाह  
अशोक प्रिन्टरी-रावपुरा, वडोदा





श्रीगिरिधर गोपाल



## ❀ अर्पणपत्रिका ❀

सारंग

जयति बल्लभ-सुवन, श्रुति उद्धार, फेरि नंद के भवन की केलि ठानी ।  
इष्ट गिरिवरधरन, सदा सेवत चरन, द्वार चारों वरन भरत पानी ॥ १  
वेद-पथ व्याससे, हनुमान दाससे, ज्ञान कों कपिलसे कर्मयोगी ।  
साधु लच्छमन निपुन, मनहु ब्रजगज-सुत, प्रगट सुखरास मानो इन्द्रभोगी ॥ २  
सिंधुसम गंभीर, विमलमन अति धीर, ग्रीति कों जल-क्षीर, ब्रज-उपासी ।  
ध्यान कों सनक से, भक्ति कों फनिगसे, याही तें सद्य किये ब्रज में वासी ॥ ३  
मनहु इन्द्रियजीति, कृष्ण सों करी ग्रीति, निगम की चली नीति अति विसेखी ।  
रहित अभिमान तें, बड़े सन्मानतें, सीरु और दाम गोविंद टेकी ॥ ४  
सदा निर्मल बुद्धि, अष्ट सिद्धि नव निधि, द्वार सेवत नहां मुक्ति दासी ।  
'समराय' गिरिधरन जानि आयो सगनि, दीन के दुःख हरन योग्य वासी ॥ ५

ऐसैं 'सर्वलक्षण संपन्न', नंदनंदन सम बल्लभ-नंदन के चरणकमलों में आप के तदीय जनों की यह यशगाथा सादर समर्पित है ।

आपके,  
'स्वकीय जन'





श्रीमत्प्रभुचरण की असीम दया से तीन जन्म की भावनावाली ' २५२ वैष्णवों की वार्ता ' का यह द्वितीय खण्ड सम्प्रति प्रकाशित हो रहा है। जिस में ८५ से लेकर १६८ तक के महानुभाव वैष्णवों की वार्ताओं का संकलन है। स्वप्न में भी यह ध्यान न था कि प्रस्तुत खण्ड इतनी शीघ्रता से प्रकाशित हो सकेगा। परन्तु सम्प्रदाय में वार्ताओं प्रति वर्तमान अद्वितीय अनुराग अखण्ड रूप में चला आ रहा है उसी का ही यह फल है, कि— विपुल धनराशि द्वारा संपन्न होनेवाला यह महत्कार्य इतना शीघ्र संपन्न हो सका। अस्तु.

प्रथम खण्ड के ' आमुख 'में यह स्पष्ट किया गया है, कि वार्ताओं का सर्वांगीण अध्ययन अन्तिम खण्ड अर्थात् तृतीय खण्ड में किया जायगा। अतः प्रस्तुत खण्ड में उस विषय की चर्चा सम्प्रति आवश्यक नहीं है।

हम परम कारुणिक श्रीमद् विठ्ठलेश्वर प्रभुचरण से यह प्रार्थना करते हैं कि— जिस प्रकार इस द्वितीय खण्ड का कार्य सरल और शीघ्र प्रकार से सम्पन्न हो गया उसी प्रकार इस का अवशेष कार्यरूप तृतीय खण्ड भी उतना ही शीघ्र एवं सुंदर रूप से प्रकाशित हो जाय, ऐसी अनुग्रह—दृष्टि करें। तदुपरांत हम भगवदीय वैष्णवों से भी प्रार्थना करते हैं, कि— वे इस अद्वितीय ग्रन्थ को विशेष रूप में खरीद कर इस के अवशेष कार्य की पूर्ति में सहायक हों।

प्रस्तुत द्वितीय खण्ड के मुद्रण में प. भ. ललितावेन चुनीलाल पटेल, अहमदाबाद ने रु. २००) की सहायता दी है, एतदर्थ उनका सहयोग स्मरणीय है।

श्रीसूरजयन्ती (वै. शु. ५) }  
सं. २००९, बड़ौदा }

—प्रकाशक





# २५२ वैष्णवों की वार्ताओं की सूची

( क्रमशः — २ )

वार्ता सं.	नाम	जाति	पृष्ठ सं.	प्रसंग सं.
८५	एक गूजर के वेटा की घट्ट ..	..(गूजर) ..	... १	... २
८६	एक वैष्णव भ्रष्टी, चंद्रनधारी	...(क्षत्री) .	. ६	. १
८७	गोपालदाम भीतरिया ..	.. (साँचोरा ब्राह्मण)	. ९	. १
८८	एक क्षत्री, आत्मनिवेदन धारो	..(क्षत्री) ...	.. १३	. १
८९	खंडन ब्राह्मण .. ...	.. (सनोदिया ब्राह्मण)	... १८	.. १
९०	कुनवी पटेल, जाने प्रेतकों पांच ताल की पुन्य दियो ... ..	...(कुनवी) ...	.. २५	.. २
९१	एक साहूकार (आम की मडलीवारी) (वैश्य)	...	. ३१	... १
९२	एक बनिया, जाने अपनी वेटी जैन धर्मों की दीनी .. ...	.. (वैश्य) ...	३६	. १
९३	तीन तृयाधारी शिक्त वैष्णव	...(ब्राह्मण) ...	.. ४२	. १
९४	परमानंद सोनी ...	..(सोनी) ..	... ५२	.. २
९५	रामदास खभाइच के .	..(ब्राह्मण) ...	. ५५	... १
९६	रंडा . .. .	. (उद्वर ब्राह्मण)	.. ६१	. ३
९७	स्त्री-पुरुष, नाडी वेचि के सामग्री लयाये (क्षत्री)	..	... ७२	. १
९८	अजय कुशरि .. ...	...(क्षत्री) ...	... ७९	... २
९९	एक ब्राह्मण पंडित, जिनने जनेऊ तौरि बुहारी बाधो .. ...	(ब्राह्मण) .	... ८३	... १
१००	एक कुनवी पटेल, चोख्राधारी	...(कुनवी) .	.. ८६	... ३
१०१	देवा भाई... ..	..(कुनवी) ...	.. ८९	.. २
१०२	एक वैष्णव बनिया की वेटी, जाको गमानंदी सों व्याह भयो ..(वैश्य) .	..(वैश्य) .	... ९०	... २
१०३	दोई भाई साँचोरा, जिनने वैष्णवन को मसाधान कियो .. ..	. (ब्राह्मण) ...	... ९८	... १
१०४	एक राजा, दोई भाई साँचोरा के संग तें वैष्णव भयो ... ..(क्षत्री) ...	..(क्षत्री) ...	... ९९	.. १
१०५	स्त्री-पुरुष, हीरान की धरती पहचानते (क्षत्री)	..	..१०१	. १
१०६	एक ब्रजवासी, जाको श्रीगुमाईजी ने परे कयो ... ..	.. (सनाढ्य ब्राह्मण)	...११२	.. १
१०७	जन-भगवानदाम दो भाई ..	... (गौरवा क्षत्री)	...१२३	... १
१०८	कल्याण भट्ट, गंभालिया के ..	...(गिरनारा ब्राह्मण)	...१२९	... ५
१०९	दोई भाई पटेल, राजनगर के ..	.. (पटेल) ...	...१३६	... २
११०	एक ब्राह्मणी, उपराधारी ...	...(ब्राह्मण) ...	...१४०	. १
१११	मा-वेटा, जिनने श्रीगुमाईजी की सेवा करी ... ..	...(ब्राह्मण) ..	...१४५	... १

## II

११२	एक चोर दिल्ली की	.. ( ? )	..	१५०	...	१
११३	तानसेन, पात्माह की गवैया	(ब्राह्मण)	..	१५४	..	२
११४	एक दलाल, निन्यानवे हजार रुपयावारी (वैश्य)		..	१५८	...	१
११५	बेनीदास, दामोदरदास, सूरत के	(वैश्य)	..	१६१	..	३
११६	जनार्दनदास आगरे के	(क्षत्री)	..	१६७	..	२
११७	ताराचदभाई	(वैश्य)	..	१७१	...	२
११८	एक म्लेच्छ, महाधन की	(म्लेच्छ)	..	१७३	..	१
११९	एक क्षत्रानी, आगरे की	(क्षत्री)	..	१७५	..	१
१२०	दोई भील	...(भील)	..	१७८	...	१
१२१	एक ब्रजवामी की छोहरा, सकरवा की (गृजर)		..	१८१	...	१
१२२	एक सन्यासी, कासी की	( ? )	...	१८३	..	१
१२३	राजा आसकरन, नरघरगढ के	(क्षत्री)	...	१८६	..	६
१२४	एक मोची	(मोची)	..	२०५	..	१
१२५	एक सेठ खरवृजा वारी	(वैश्य)	..	२०७	...	१
१२६	एक वैष्णव, जाकी श्रीगुमाईजी ईश्वर की महिमा कहे	( ? )	..	२१४	..	२
१२७	दामोदर झा बडनगर की	(नागर ब्राह्मण)	..	२१५	..	१
१२८	मधुसूदनदास	(क्षत्री)	..	२१७	..	१
१२९	एक राजा, पूरष की, जो वैष्णव बिना काहू तें रिझतो नाहीं (क्षत्री)		..	२२१	...	१
१३०	मुरारी आचार्य	(ब्राह्मण)	..	२२३	..	४
१३१	एक बनिया वैष्णव, जाने भोग में चेली धरी	...(वैश्य)	..	२३१	..	१
१३२	एक क्षत्री, जाकी द्रव्य श्रीयमुनाजी में पधरायो	(क्षत्री)	...	२३२	..	१
१३३	दोई भाई पटेल, जिनने देवी की कुआँ में पटकी	(पटेल)	...	२३४	...	१
१३४	एक विरक्त गोकुल की, जाकी एक क्षत्रानी सौ स्नेह हतो	( ? )	..	२३९	..	१
१३५	एक क्षत्री वैष्णव आगरे की, वख की गाठि वारी	(क्षत्री)	..	२४५	...	१
१३६	मेढा धीमर	...(धीमर)	..	२५०	...	३
१३७	हृषिकेश आगरे के	(क्षत्री)	..	२६७	...	२
१३८	एक पटेल, दराति वेत्रि कै टका भेट कियो	(पटेल)	..	२८३	..	१
१३९	छी-पुरुष, राजनगर के, गौहन्या वारे	( ? )	...	२८६	...	१
१४०	हरिदास, मोहनदास	(वैश्य)	...	२९१	...	१
१४१	देवजीभाई, पोरबंदर के	(वैश्य)	..	२९५	...	१
१४२	एक डोकरी, जाने दांतिन भोग में धरो	(वैश्य)	...	२९७	...	१

### III

१४३	स्त्री-पुरुष, मथुराजी के, जो मढलों में चना बांटते . . . . .	...(क्षत्री) ...	३०१	...	१
१४४	एक डोकरी, जाने आठ बर काल को फेरयो ... . . . . .	.. ( ? ) ..	३०४	..	२
१४५	एक विरक्त, गुजरात को जाने वैष्णव के वेरा को जिवायो ... ( ? ) ...	...	३०६	..	१
१४६	एक नाऊ .. .. .	.. (नाऊ) ...	३०९	..	१
१४७	एक पठान को वेरा .. .	.. (पठान) ...	३११	..	१
१४८	स्त्री पुरुष, आगरे के, जिनके मालिग्राम में ते श्रीठाकुरजी भए .. . . .	...(कनोजिया ब्राह्मन) ..	३१३	..	२
१४९	एक साहकार, सूरत को, जाके वेरा को वहू को म्लेच्छ ले चलयो .. . . .	.. (वैश्य) ...	३३३	..	१
१५०	उद्धव प्रवाडी . . . . .	...(नागर ब्राह्मन) ..	३५०	..	१
१५१	मीनावाई, अचलवाई .. .. .	.. ( " ) .	३५२	..	१
१५२	एक श्रोता एक वक्ता ... . . . .	...(वैश्य) ...	३५५	..	१
१५३	एक कायस्थ, आगरे को ... . . . .	...(कायस्थ) ..	३५९	..	१
१५४	एक ब्रजवासी एक मोची, एक ब्राह्मन (ब्राह्मन, मोची, ब्राह्मन)		३६२	..	१
१५५	एक धनिया, एक ब्राह्मन, देवी के किवाह उतारे . . . . .	...(धनिया, ब्राह्मन) .	३६८	...	२
१५६	एक वीनकार, श्रीनाथजीठार में रहतो (मनादय ब्राह्मन)		३७८	..	१
१५७	प्रेमजी .. .. .	.. (लुहाणा) ...	३७८	...	१
१५८	वृन्दावनदास, छवीलदास .. . . .	.. (क्षत्री) ...	३८०	..	१
१५९	स्त्री-पुरुष ब्राह्मन, स्त्री रुख के नीचे ब्रह्म लेइवे गई . . . . .	.. (ब्राह्मन) ..	३८४	..	१
१६०	एक भगवदीय, एक तहसी, जिनने परीक्षा करो . . . . .	.. ( ? ) ..	३८७	..	१
१६१	एक वैष्णव, जो गिरिराज ऊपर चढयो (वैश्य)		३९३	..	१
१६२	एक विरक्त ब्राह्मन, गुजरात को, जाको श्रीगुसाईजीने सात स्वरूपन को भाषना कही . (ब्राह्मन) .		३९५	..	१
१६३	एक क्षत्री, पूरव को, जाको श्रीनाथजी झारी बटा दिए ... .. .	.. (क्षत्री) ...	४०४	..	१
१६४	एक अन्यमारगी, जाने स्मशान में बैठि के खायो .. . . .	.. ( ? ) .	४०८	..	२
१६५	एक राजा, पूरव को, जाने स्मशान में जूठनि खाई .. .. .	.. (क्षत्री) ...	४१३	..	१
१६६	रूपा पोरिया . . . . .	.. (मनादय ब्राह्मन) ..	४१७	...	२
१६७	एक चूहडा ... . . . .	.. (चूहडा) ...	४२१	...	१
१६८	स्त्री-पुरुष, राजनगर के, जिनके पांच रतन निहले .. .. .	.. ( ? ) ..	४२६	...	१

द्वितीय खण्ड समाप्त

## आवश्यक शुद्धि-पत्र

प्रस्तुत ग्रन्थ पढ़ने से पूर्व कृपया इन स्थानों को सुधार लें ।

पृष्ठ	पक्ति	अशुद्ध	शुद्ध
३६	१६	वरस सोरह कौ भयो । तव इनको व्याह कियो । पाछे वा बनिया के	वरस सोरह कौ भयो । पाछे वा बनिया के...
६३	७	ताते रेंडा कौ श्रीगुसाईजी	ताते रेंडा कौ श्रीगुमाईजी
८५	२	बिनती कियो, जो-महाराज!	बिनती कियो जो-महागज !
९९	५	सो गौरोचनी बल्लभी की	सो गौरोचनी 'बल्लभा' की
११५	९	जा भाव सों वाको अनुसरत	जा भाव में वाको अनुसरत
१३९	११	वार्ता करते होंई	वार्ता करत होंई
१४५	१७	ये सात्विक भक्त हैं	ये राजस भक्त हैं
१५६	६	भक्ति मुक्ति देत सवन कों कृपा प्रेम ...	भक्ति मुक्ति देत सवन कों निज- जन पै कृपा प्रेम
१६५	२१	घटतीन करते	घटती न करते
१८१	१०	दस कौ हुतो	द्वादस कौ हुतो
१८७	२६	समुझत है के नाही ।	समुझत है के नाही ।
१९०	१४	के चरनारविंद पर	के चरनारविंद पर
१९१	१७	यह प्रभाव अब आप ही कौ है ।	यह प्रभाव सब आप ही कौ है ।
१९३	१८	सोंक रन लागे ।	सों करन लागे ।
१९५	२४	तुम चढिबे कै	तुम चढि कै
२१७	१६	ये तामस भक्त हैं ।	ये तामस भक्त हैं ।
२९२	५२	मोहनदास कों	मोहनदास सों
३०१	१५	ये सात्विक भक्त हैं ।	ये तामस भक्त हैं ।
३०९	२०	तव स्वामिनीनी क्रोध करि कै	तव स्वामिनी क्रोध करि कै
३५२	२३	ये सीताबाई सात्विक भक्त हैं ।	ये सीताबाई तामस भक्त हैं ।
३६८	६	ये बनिया सात्विक भक्त हैं ।	ये बनिया राजस भक्त हैं ।
३९६	२३	ननु ते दैव निहताः..... ।	नूनं दैवेन विहताः ... । हित्वा शृण्वन्त्य सदगाथाः पुरीषमिव . . . . . ॥

ह्रस्व, दीर्घ, एवं मात्राओं की त्रुटियों को पाठक स्वयं सुधार लें ।

॥ श्रीहरि ॥

❀ श्रीकृष्णाय नम ❀ श्रीगोपीजनवल्लभाय नम ❀

## दो सौ बावन वैष्णवन की वार्ता



( क्रमश - २ )



अब श्रीगुसाईजी के सेवक एक गुजर के बेटा की बह, आन्योर में रहती, जाकी भैंसि श्रीगोवर्द्धननाथजी आप मिलाइ दिये, तिनकी वार्ता की भाष कहत हैं-

भावप्रकाश—ये तामस भक्त हैं। लीला में इनको नाम 'परमेशुरी' है। सो पहिले ये द्वारिका लीला में 'विमला' की सखी ही। विमला तें प्रगटी हैं। सो विमला श्रीरुक्मिणीजी की अंतरंग सखी हैं। तिनके ये भावरूप हैं।

सो एक समै द्वारिकाजी में श्रीठाकुरजी श्रीरुक्मिणीजी सौ ब्रजलीला की वार्ते कहत हे। ता समै 'परमेशुरी' कछ कार्यार्थ तहां आई। सो इन दूरि तें सब बात श्रीठाकुरजी के मुखकी सुनी। तब याके मन में यह आई, जो-हों ब्रजलीला को अनुभव करों ऐसो भाग्य मेरो कब होइगो ? सो इनको बोहोत आरति भई। तब सब खानपान हू छूटयो। चित्त में रात्रि-दिन खेद रहे। कछ सुहाइ नहीं। काहू कार्य में मन लागे नहीं। सो श्रीठाकुरजी तो आप अंतर्यामी हैं। तातें इनके मन की जानी। तब श्रीठाकुरजी परमेशुरी को बुलाइ, आज्ञा किये, जो - तू ऐसो खेद क्यों करति है ? श्रीयमुनाजी को भजन करि। काहेतें, जो - श्रीयमुनाजी ब्रजलीला की अधिष्ठात्री हैं। ब्रजलीला को सौभाग्य तो इन्हीं की कृपा तें प्राप्त होत है। तातें तू उन को भजन करि। तेरो मनोग्य सिद्ध होइगो। या प्रकार श्रीठाकुरजी याको बर दे के श्रीरुक्मिणीजी के पास पधारे। ता पाछें परमेशुरी विरह-ताप करि के श्रीयमुनाजी को भजन करन लागी। सो कछक दिन में श्रीयमुनाजी प्रसन्न रहै याको दरसन दिये। और कहें, जो - तू बर मांगि !

मैं तो पर प्रसन्न हों । तब परमेशुरी ने ढोऊ हाथ जोरि कै विनती करी, जो - अहो श्रीमहारानीजू ! जैसे आपने कुमारिकान को मनोरथ पूरन कियो, ता भांति मेरो हू मनोरथ है, सो कृपा करि पूरन कीजिये । हों आप की सरनि हूं । तब श्रीयमुनाजी कृपा करि वासों पूछे, जो-तेरो कहा मनोरथ है ? मो तू कहि । तब परमेशुरीने कछो, जो - अहो श्रीमहारानीजू ! आप ब्रज की अधिष्ठात्री हो, ऐसो श्रीठाकुरजी आप मोसों कहे हैं । तातें आप म दीन पर ऐसी कृपा कीजिए, जो-मेरो ब्रजलीला में अंगीकार होंई । और मोकों कछु चाहना नाहीं है । तब श्री-यमुनाजी प्रसन्न व्है आज्ञा किये, जो - तथास्तु ! ऐसैं ही होइगो । या प्रकार श्रीयमुनाजी वाको वर दे कै अंतर्धान भए । पाछें कछुक दिन में परमेशुरी का ब्रज में जनम भयो ।

सो 'सखीतरा' में एक गुजर के जन्मी । सो बरस बारह की भई । तब याको व्याह एक ब्रजवासी के लरिका सों भयो । सो वह गुजर हतो । श्रीगुसाईजी के पास कुटुंब सहित विनती करि कै नाम पायो हतो ।

वार्ता प्रसंग—१

सो वह ब्रजवासी आन्धोर में रहतो । सो एक समे वह अपने बेटा को विवाह कै अपने घर बहू ले कै आयो । सो वह बहू बड़ी हुती । सो वाके सास-ससुरने वाको श्री-गुसाईजी सों नाम दिवायो । तब वह श्रीगुसाईजी की सेवकिनी भई । ता दिन तें वह बहू नित्य श्रीगोवर्द्धननाथजी के दरसन को जाँइ । सो वाको श्रीगोवर्द्धननाथजी में आसक्ति भई । सो श्रीगोवर्द्धननाथजी के दरसन किये विनु अन्न-जल न ले । ऐसी याकी टेक । सो वह बहू बड़ी भगवदीय भई ।

वार्ता प्रसंग—२

और जब तें वह बहू घर में आई ताके थोरेइ दिन पाछें वा ब्रजवासी की एक भैंसि खोइ गई । तब घर के मनुष्य तो सगरे भैंसि को खोजन गए । सो एक वा बहू की सास बृद्ध हुती । सो घर की रखवारी द्वारें बैठि करति हुती । और वह बहू भीतर को काम-काज करति हुती । तब वा बहू की

सास को परोसिनिन कही, जो-तुम्हारी वह कौ पाँव आछौ नाहों । जो-याकों देखो ! घर में आवत थोरैई दिन भए और भैंसि खोई गई । तब यह बात वा वहू ने अपने कानन सुनी । तब वह वहू भीतर जाँइ वोहोत संताप करि के रोवन लागी । ता पाछे वा वहू ने श्रीगोवर्द्धननाथजी सां विनती कीनी, जो-महाराज ! अब तो इहां कोई तुम विनु मेरे हे नाहीं । जो-मेरी पुकार सुन । तातें हे गाढ़ दिन के मीत गोपाल ! अब मेरे माता-पिता तो दूरि भए । और इन सगरेन तो मेरे माथे कलंक धरयो हे । तातें आजु जो ए अपने घर भैंसि लेके आवेंगे तो मैं एक दिन कौ माखन आरोगाउंगी । ऐसैं कहिके वा ब्रजवासिनी ने श्रीगोवर्द्धननाथजी को सुद्ध भाव सां वोहोत ही प्रार्थना करि के दंडवत् करि कही, जो-हे देवदमन ! या संकट में तें तू छुटावेगो तो हों छूटूंगी । नांतरु अपने घर में प्रानत्याग करोंगी । सो याकी विनती सां श्रीगोवर्द्धननाथजी ने उन ब्रजवासिन को भैंसि मिलाइ दीनी । सो वे ब्रजवासी सब अपने घर भैंसि लेके अति आनंद सां आए । तापाछे भैंसि को तो बांधि दीनी । और वह ब्रजवासी सगरे आपस में बतरान लागे, जो-भाई ! यह वहू कौ पाँव वोहोत आछौ हे । जो-गई भैंसि पाई । या प्रकार सगरे ब्रजवासी वहू की उपमा करन लागे । परि वह वहू तो अपने मन में कहें, जो-यह भैंसि तो श्रीगोवर्द्धननाथजी के प्रताप सां पाई हे । सो वह वहू ऐसी भगवदीय हती । बाकी ऐसी सरल सुभाव हती ।

भावप्रकाश—या वार्ता में यह जतायो, जो-वैष्णव को कर्मो हू कलंक आइ लगे तोऊ श्रीगोवर्द्धननाथजी को आश्रय न छोडो । कातें, जो-श्रीगोवर्द्धन-

नाथजी अपने जनकी लाज आपु राखत हैं। तातें वैष्णव कों एक श्रीगोवर्द्धननाथजी कौ आश्रय राखनो। और जो - कदाचित् जीव कों घीरज न रहे, और वह प्रार्थना करे तोऊ एक श्रीगोवर्द्धननाथजी सों करे। और सों सर्वथा न करे। और कछ मानता हू करे तोऊ देवदमन की करे। और की न करे। काहेतें ? जो-गोकुल के कुलदेवता श्रीगोवर्द्धननाथजी आप हैं। सो गोकुल कहियत हैं, जो-भक्तकुल, ताके नाथ आप ही हैं। तासों उन के विनु और कौ आश्रय सर्वथा न करनो। काहेतें ? ये देवदमन हैं। सो इन सब देवन कौ दमन कियो है। उन तें यम-काल हू डरपत हैं। सो सूरदासजी गाए हैं, सो पद -

राग . विलावल

गोकुल कौ कुलदेवता प्यारो श्रीगिरिधरलाल ।  
 कमलनयन घनसाँवरौ वपु बाहु विसाल ॥  
 बेगि करो मेरे कहे तुम पकवान रसाल ।  
 बलि मघवा बल लेत हैं कर करि घृत गाल ॥  
 इनके दिये बाढ़ी हैं गैया बच्छ वाल ।  
 संग मिलि भोजन करत हैं जैसे पसुपाल ॥  
 गिरि गोवर्द्धन सेइये जीवन श्रीगोपाल ।  
 'सूर' सदा डरपत रहे जातें यम-काल ॥

तातें देवदमन तें और कोऊ बड़ो देव नाही। सो वैष्णव कों एक इन ही कौ आश्रय करनो, यह सिद्धांत भयो।

ता पाछें वह बहू दूसरे दिन तें थोरो थोरो माखन भेलो करति जाती, सो न्यारौ एक वासन में धरति जाती। पाछें पांच-सात दिन में भैंसि कौ माखन भेलो भयो। तब वा भैंसि कौ एक दिन कौ सब माखन न्यारो काढ़ि राख्यो। और वह बटोरयो माखन सब एकठो करि कै घी तायो। पाछें वा दिन मन में निश्चय करी, जो-आजु यह सब माखन श्रीगोवर्द्धननाथजी कों आरोगाउंगी। सो बेगि बेगि रसोइ करि कै सास-ननद कों तो छाक देन कों पठाई। ता पाछें वह अपने घर तें माखन लेकै निकसन लागी। परि अपने



मन में तो डरपन लगी । जो-मति कोऊ मोकों माखन लेके जाँत देखि लै । और जो-कहूँ कहूँ ने देख्यो तो वह कहा कहेंगो ? जो तू वह माखन लेके कहां जात है ? तो हों वासों कहा उत्तर करोंगी ? सो या प्रकार आंगन में लिये वह वह माखन कौ सोच करन लगी । तापाछें वाने वह माखन घर में पाछौ जाय धरयो । सो ताही समै श्रीगोवर्द्धननाथजी एक हाथ में लाल छरी लेके वा ब्रजवासिनी के आगें आइ कै ठाढ़े रहे । सो श्रीगोवर्द्धननाथजी सात वरस के लरिका कौ स्वरूप करि कै आइ ठाढ़े रहे । तव वा ब्रजवासिनी सों श्रीगोवर्द्धननाथजी कहे, जो-मेरो माखन अमूकी ठौर आज कौ तू अब ही आंगन ताई ल्याइ कै पाछें धरयो है, सो लोंदा मेरो ल्याऊ । तव वा ब्रजवासिनी ने विचारयो, जो-यह प्राकृत वालक होंइ तो यह भेद की बात कहा जानें ? तासों ये सर्वथा श्रीगोवर्द्धननाथजी ही मेरी दया विचारि कै आए हैं । सो श्रीगोवर्द्धननाथजी कृपा करि पधारे हैं । तव वह वह वह माखन कौ लोंदा ल्याइ कै श्रीगोवर्द्धननाथजी के श्रीहस्त में दीनो । सो श्रीगोवर्द्धननाथजी याही के हाथ सों वह माखन आरोगे । ता पाछें श्रीगोवर्द्धननाथजी अपने मंदिर पधारे तव वा ब्रजवासिनी ने श्रीगोवर्द्धननाथजी सों विनती करी. जो-लाल ! मोसों तुम्हारे पास आयो जाँत नहीं । तासों हों जा समै दधिमंथन करति होंहि ता समै जो आप इहां पधारे तो हों तुमकों एक माखन कौ लोंदा सब करि कै नित्य आरोगायो करों । तव श्रीगोवर्द्धननाथजी या ब्रजवासिनी सों यह आज्ञा करी, जो-हों तेरे घर नित्य आयो कहेंगो ।

ईजी कौ सेवक हुतो । सो श्रीगुसांईजी आगरे पधारे तव याने अपने वेटा कों श्रीगुसांईजी पास नाम-निवेदन करवायो । ता पाछें वह क्षत्री अपनो कुटुंब ले श्रीगोकुल आइ रह्यो । तहां कछ्क दिन में इन की देह छटी । पाछें वेटा श्रीगोकुल ही में रह्यो । सो वैष्णव कौ संग करे । कथा-वार्ता नित्य सुने । सो वाकी प्रीति श्रीगुसांईजी में बढ़ी । सो वह श्रीगुसांईजी की सेवा में नित्य तत्पर रहतो ।

वार्ता प्रसंग—१

सो एक दिन श्रीगुसांईजी आधु उष्णकाल में मंदिर सों पहोंचि भोजन करि कै बैठक में विराजे हते । तव मध्याह्न समै प्रभु अपने श्रीअंग में चंदन लगावते । सो वैष्णव अपने अपने घर तें एक एक दिवस अति सुगंध कौ अरगजा ल्यावते । सो प्रभु अंगीकार करते । सो एक दिवस या वैष्णव कौ ओसरा आयो । तव वह अपने हाथ सों श्रीगुसांईजी के श्रीअंग कों अरगजा समर्पन लाग्यो । ता समै वा वैष्णव के मन में आई, जो-सगरे वैष्णव श्रीनाथजी कौ और श्रीगुसांईजी कौ एक स्वरूप कहत हैं । और ये तो मनुष्य देह धरि दरसन देत हैं ! सो यह मेरे मन कौ संदेह कौन भांति सों निवृत्त होइगो ? यह वाके मन की बात श्रीगुसांईजी जानें । तव वह वैष्णव चंदन लगाइ कै दंडवत् करि कै घर कों जान लाग्यो । तव श्रीगुसांईजी पोंढते समै वासों यह आज्ञा करे, जो-वैष्णव ! तुम थोरी सी बार पंखा करि कै पाछें घर कों जइयो । तव वह वैष्णव श्रीगुसांईजी कों पंखा करन लाग्यो । और श्रीगुसांईजी अति झीनो उपरेना ओढ़ि कै पोंढ़े । पाछें वा वैष्णव कों प्रभुन उपरेना भीतर साक्षात् श्रीनाथजी के दरसन पंखा करत समै दिये । तव तो वह वैष्णव अपने मन में विचार करन लाग्यो, जो-यह मोकों सपनो सो कहा होत है ? सो

वह आंखि मींड़ि मींड़ि कै फिरि फिरि कै देखन लाग्यो,  
जो - मोकों यह भ्रम तो नहीं भयो ? सो जहां लगि वाके  
मन में संदेह रह्यो, तहां लगि वाकों श्रीगुसांईजी श्रीनाथजी  
कौ दरसन दिये । तंव जान्यो, जो-सब वैष्णव कहत हते सो  
साँची बात है । तव वा वैष्णव ने वाही समै दंडवत् करी ।  
तव ही वाके मन में विस्वास आयो । तव ही श्रीगुसांईजी  
उठि बैठें । पाछें श्रीगुसांईजी यह वैष्णव की ओर देखि कै  
याकों पूछे, जो-वैष्णव ! तेरे मन कौ संदेह निवृत्त भयो ?  
तव तो यह वैष्णव दोरि कै दंडवत् करि प्रभुन आगे विनती  
कियो, जो-राज ! आप की कृपा तें आप कौ स्वरूप अब  
जान्यो । तातें अब मेरं मन कौ संदेह निवृत्त भयो ।

भावप्रकाश—या वार्ता कौ अभिप्राय यह है, जो -वैष्णव कों श्रीगुसांईजी  
और श्रीगोवर्द्धननाथजी में भिन्न बुद्धि सर्वथा न करनी । सो गोपालदाम  
बह्मभाख्यान में गाये हैं, सो कारिका—

‘ रूप वैऊ एक ते भिन्न थई विस्तरं विविध लीला करे भजन सारं । ’

सो श्रीगुसांईजी और श्रीगोवर्द्धननाथजी एक-रूप हैं । परि स्वामी सेवक  
भाव प्रगट करनार्थ आप दोइ रूप धरि लीला करत हैं । तातें वैष्णव कों  
श्रीगुसांईजी कौ स्वरूप अलौकिक करि जाननो ।

सो यह वैष्णव श्रीगुसांईजी कौ ऐसो कृपापात्र भगवदीय  
हतो । तातें इनकी वार्ता कौ पार नहीं, सो कहां ताई कहिए ।

वार्ता ॥८६॥



अब श्रीगुसांईजी के सेवक गोपालदाम भीतरिया, नांचोरा ब्राह्मण, गुजरात के  
वासी, तिनकी घाता कौ भाव कहत हैं—

भावप्रकाश—ये सात्विक भक्त हैं । लीला में इन कौ नाम ‘सहोदरी’ है ।  
ये पहिले दारिका लीला में ‘विमला’ है, ताकी बसती ही । सो विमला तें प्रगटी  
हैं, तातें उन के भावरूप हैं ।

ये भ्रमिता के संग 'गोपीतलैया' पै आई ही । सो इन हू कों पुष्टि-लीला कौ अनुभव भयो है । तातें ये ब्रजलीला कों प्राप्त भई । सो बात ऊपर कहि आए हैं ।

सो गोपालदास भगवद् ईच्छा तें गुजरात में एक साँचोरा ब्राह्मन के प्रगटे । सो ये बरस बीस के भए तब इन के माता पिता मरे । ता पाछें केतेक दिन में श्रीगुसांईजी द्वारिकाजी श्रीरनछोरजी के दरसन कों पधारे । सो गोपालदास के गाम में डेरा किये । तब गाम के वैष्णव सब मिलि कै श्रीगुसांईजी के दरसन कों आए । सो उनके साथ गोपालदास हू आए । सो गोपालदास ने श्रीगुसांईजी के दरसन किये । तब श्रीगुसांईजी गोपालदास की ओर देखि कै आज्ञा किये, जो गोपालदास ! श्रीगोवर्द्धननाथजी की सेवा में कब आवेगो ? तब तो गोपालदास चक्रत से व्है रहे । सो अपने मन में विचारे, जो—ये कोई महापुत्र्य हैं । नाँतर मेरो नाम कैसे जानें ? तातें इनकी सरनि जाँड़ अपनो जनम :कृतारथ करों, तो आछौ है । पाछें गोपालदास दोऊ हाथ जोरि कै विनती किये, जो—महाराज ! हों आपकी सरनि हू । तातें कृपा करि कै अपनो सेवक कीजिए । तब श्रीगुसांईजी प्रसन्न व्है गोपालदास कों नाम-निवेदन कराए । तापाछे गोपालदास ने विनती कीनी, जो—महाराज ! कृपा करि कै मोकों अपने चरनारविंद की टहल दीजिए तो आछौ । तब श्रीगुसांईजी गोपालदास सों कहे, जो—गोपालदास ! तुम श्रीगोवर्द्धननाथजी की सेवा करो । और हमारी हू टहल करो । तब गोपालदास विनती किये, जो—महाराज ! मेरी हू यही इच्छा है, तातें आप मोकों अपने जानि चरनारविंद के निकट राखिए ।

पाछें गोपालदास श्रीगुसांईजी के संग द्वारिकाजी गये । सों मारग में श्रीगुसांईजी के वस्त्र नित्य धोवे । और श्रीगुसांईजी की आज्ञा तें रसोई की परचारगी हू करे । ऐसे करत कछुक दिन में श्रीगुसांईजी द्वारिकाजी तें श्रीनाथजी-द्वार पधारे । सो गोपालदास हू श्रीगुसांईजी के संग श्रीनाथजीद्वार आए । पाछें श्रीगोवर्द्धननाथजी के दरसन किये ।

वार्ता प्रसंग—६

सो गोपालदास कौ सुभाव सरल बोहोत । तातें श्रीगुसांईजी आप इन कों श्रीगोवर्द्धननाथजी की रसोई की सेवा दीनी । सो ये बोहोत प्रीति सों करन लागे । सो कछुक दिन में इन कों सानुभावता जनाए । सो गोपालदास सों

श्रीनाथजी प्रत्यच्छ वार्ता करें। ये समाचार श्रीगुसांईजी आछी भांति सब जानें, जो - गोपालदास ऊपर श्रीनाथजी की ऐसी कृपा भई है। ता पाछें गोपालदास सों श्रीगुसांईजी कव हू श्रीनाथजी की वार्ता पूछते। सो सर्व गोपालदास श्रीगुसांईजी आगें आछी भांति कहते।

सो एक समै श्रीगुसांईजी श्रीनाथजीद्वार हते। तव एक दिन श्रीगुसांईजी आप भोजन करि कै अपनी बैठक में वीरा आरोगत हते। सो आधौ वीरा तो आरोगे हते, और आधौ वीरा प्रभुन के हस्त में हतो। ता समै गोपालदास श्रीगुसांईजी की बैठक में धोवती सुकाइ कै आइ कै दंडवत् करि कै श्रीगुसांईजी सों विनती किये, जो - राज ! मैं अपछरा कुंड तें धोवती धोइ कै आवत हतो, सो श्रीनाथजी पूछरी की ओर विराजे हुते। सो मोकें देखि कै श्रीनाथजी कहे, जो - हम भूखे हैं। तासों सीतल भोग की सामग्री तहां मँगाई हैं। तव श्रीगुसांईजी वाही समै स्नान करि पर्वत ऊपर पधारि सामग्री सर्व सिद्ध करि परात में धरि ऊपर वस्त्र लपेटि कै अपने कांधे पर धरि लेकै उरहाने पांइन पधारे। सो धर्मदास ग्वाल उत तें आवत हुतो। सो धर्मदास श्रीगुसांईजी कों मार्ग में मिल्यो। तव श्रीगुसांईजी सों धर्मदास ने पूछी, जो - महाराज ! तुम या समै उरहाने पगन कहां चले हो ? तव श्रीगुसांईजी ने धर्मदास सों कही, जो - हम इहां श्रीनाथजी बेटे सुने हैं। सो तुम हम कों बताइ देहु। तव श्रीगुसांईजी कों धर्मदास ने मरौली (वरौली ?) कौ ढाक दूरि तें दिग्वाइ दियो। जो - वा ढाक के नीचे श्रीनाथजी विराजे हैं। तव

श्रीगुसाईजी वा ढाक के पास पधारे । ता ठौर श्रीनाथजी श्रीदाऊजी सहित सखा-मंडल में विराजे केलि करत हैं । सो श्रीगुसाईजी जाँइ दरसन किये । पाछें श्रीगुसाईजी सामग्री कौ थाल सब श्रीनाथजी आगें जाँइ भोग समप्यो । तव श्रीनाथजी और श्रीदाऊजी और सगरे सखान सहित अति आनंद सों आरोगे । पाछें श्रीनाथजी श्रीगुसाईजी कों आज्ञा दिये, जो - तुम वोहोत श्रमिंत भए हो, तातें अब घर पधारे । और आज पाछें काहू कौ कह्यो मति मानो । और या भांति आओ मति । मोकों जो - कछू चहियेगो सो होंही तुम सों आप तें मांगि लेहुंगो । यों कहि कै श्रीनाथजी श्रीगुसाईजी ऊपर अति प्रसन्न भए । पाछें श्रीगुसाईजी तो अपने घर पधारे । और श्रीनाथजी आप वन में खेलिवे कों पधारे । या प्रकार श्रीनाथजी श्रीवृंदावन में खेलते और श्रीगुसाईजी या भांति श्रीनाथजी की सेवा में तत्पर रहते ।

भावप्रकाश—या वार्ता में यह संदेह होई, जो - पहिले तो श्रीनाथजी आप गोपालदास पास सामग्री की कहवाये । और अब श्रीगुसाईजी सों ऐसैं क्यों कहे, जो - “आज पाछें काहू कौ कह्यो मति मानो, और या भांति आओ मति ।” तहां कहत हैं, जो - श्रीनाथजी आप गोपालदास सों सामग्री की कहवाये । तामें श्रीगुसाईजी कों ल्याइवे की नहीं कही । श्रीगुसाईजी आप गोपालदास द्वारा सामग्री भेजते तोऊ श्रीनाथजी आप आरोगते । परि श्रीगुसाईजी कौ श्रीनाथजी में घनो ममत्व हैं । तातें आप लेकै पधारे । सो या भांति दास भाव प्रगट किये । सो या प्रकार तो पहिले हू आप स्यामढाक में सामग्री आरोगाई हैं । सो ऊपर गोपीनाथदास की वार्ता में कहि आए हैं । तातें बास्वार श्रीगुसाईजी पधारे तो उन कों श्रम होई । सो श्रीनाथजी सों सह्यो न जाई । क्यों ? जो यह स्नेह की रीति है, जो - अपने स्नेही कों तनक हू श्रम होई तो महाकष्ट होई । तातें श्रीनाथजी आप श्रीगुसाईजी कों या भांति बरजे । यह भाव जाननो ।

सो वे गोपालदास श्रीगुसांईजी के ऐसं कृपापात्र भगवदीय हते । तातें इनकी वार्ता कौ पार नाहीं, सो कहां ताई कहिए ।  
वार्ता ॥८७॥



अब श्रीगुसांईजी कौ मेवक एक क्षत्री, पूरव कौ, जाकों आत्मनिवेदन करवायो, तिनकी वार्ता कौ भाव कहत हैं—

भावप्रकाश—ये सात्त्विक भक्त हैं । लीला में इनकौ नाम 'कृष्णप्रिया' है । इन में कृष्ण की उनिहार है । तातें सब कोऊ इनकों 'कृष्णप्रिया' कहत हैं । सो इनकौ स्वभाव सरल बोहोत है । ये 'गुनचूडा' ते प्रगटी हैं. ताते उन के भाव-रूप हैं ।

ये पूरव में श्रीजगन्नाथरायजी तें उरे कोस बीस पर एक गाम है । तहां एक द्रव्यपात्र क्षत्री के जन्मयो । सो बालपने तें इन की कथा-वार्ता में रुचि बोहोत हुती । सो जहाँ कहूँ कथा-वार्ता होंई तहां ये जाँई । और साधु संत जो कोऊ गाम में आवे तिनकी प्रीतिपूर्वक टहल करे । पाछें यह बग्स अठारह कौ भयो तब इन के माता पिता मरे । तब यह क्षत्री और हूँ मन लगाय के संत-महंत महापुरुषन की टहल करन लाग्यो । जो - कोऊ साधु-संत गाम में आवे नयो. ताकौ यह क्षत्री आछी भांति समाधान करे । जाकों खाइवे कौ न होंई ताकों खाइवे कौ देई । कपड़ा न होंई ताकों कपड़ा देई । या प्रकार समाधान करे । रात्रि कौ संत-महंतन के पाँउ दावे । या भांति बोहोत भक्ति-भाव संयुक्त व्हें सेवा करे । सो या क्षत्री कौ जस बोहोत फैल्यो । सो सब कोऊ जस मुनि के इनके यहां-आवते ।

सो एक समै एक वैरागी या क्षत्री के द्वार पर आधी रात्रि कौ आयो । सो सातकाल के दिन हते । सीत बोहोत हुती । सो बाके पास ओटिवे विछायवे कौ कछु हतो नाहीं । तातें वह सीत में कांपन लाग्यो । तब जाने वा क्षत्री कौ बर खटखटायो । सो वह क्षत्री वा दिन बर हतो नाहीं । कछू कार्यार्थ बाहिर गयो हुतो । सो वह वैरागी निराम व्हें उहांई द्वार पर परयो ग्यो । सो मारे सीत के बाके प्रान निकसि गए । पाछें नवंगे भयो तब वह क्षत्री अपने बर आयो । सो देखें तो द्वार पर वैरागी पग्यो है । सो बाके प्रान निकसि गए हैं । तब या क्षत्री ने अपने मन में विचारयो. जो - देखो ! यह विचारो मंगे नाम मुनि के मेरे द्वार पर

आयो होइगो । सो हों तो हतो नहीं । सो सीत में याके प्रान गए । सो यह मोकों भारी अपराध लग्यो । तातें अब कहा करनो । या भांति वह क्षत्री चिंता करघो करे ।

वार्ता प्रसंग—१

सो एक समै श्रीगुसांईजी आप पूर्व देस श्रीजगन्नाथ-  
रायजी के दरसन करिवे कों पधारे हते । तहां वा क्षत्री कों  
श्रीगुसांईजी के दरसन भए । तव वा क्षत्री के मन में विचार  
भयो, जो — मैं इन की सरनि जाउंगो । तव वा क्षत्री वैष्णव  
ने श्रीगुसांईजी सों विनती कीनी, जो — महाराजाधिराज !  
कृपा करि कै मोकों नाम सुनाइए । और मेरो अपराध क्षमा  
करिए । तव श्रीगुसांईजी ने श्रीमुख तें आज्ञा कीनी, जो —  
तू स्नान करि आउ । तव वह क्षत्री वैष्णव स्नान करि आयो ।  
तव श्रीगुसांईजी आप वा क्षत्री के ऊपर कृपा करि कै नाम  
सुनायो । तव वा क्षत्री वैष्णव ने यथासक्ति भेंट करी । ता  
पाछें श्रीगुसांईजी आप उहांई रसोई करि कै श्रीठाकुरजी कों  
भोग धरयो । पाछें भोग सराय आप भोजन किये । और  
सब ब्रजवासी टहलुवान कों महाप्रसाद लिवायो । और वा  
क्षत्री वैष्णव कों पातरि धरी । तव वा क्षत्री वैष्णव ने महा-  
प्रसाद लियो । और रात्रि कों उहांई सोई रह्यो । पाछें श्री-  
गुसांईजी आप पोंढ़े । ता पाछें प्रातःकाल आप उहां तें विजय  
किये । सो पुरुषोत्तम क्षेत्र जगन्नाथरायजी के दरसन कों आप  
पधारे । सो केतेक दिन उहां रहि कै दरसन किये । ता पाछें  
श्रीजगन्नाथरायजी सों विदा होइ कै चले । सो कितनेक दिन में  
श्रीगोकुल पधारे । सो श्रीनवनीतप्रियजी के दरसन किये ।

ता पाछें एक समै वह क्षत्री वैष्णव के साथ में श्रीगोकुल



आयो। तव श्रीगुसाईजी के दरसन करे, साष्टांग दंडवत् करचो। पाछें सब वैष्णवन नें श्रीनवनीतप्रियजी के दरसन करे। पाछें सब वैष्णव श्रीगुसाईजी के दरसन कों आए। सो दरसन करि दंडवत् करि बैठें। ता पाछें श्रीगुसाईजी आप भोजन कों पधारे। सो भोजन करि मुख सुद्धार्थ आचमन करि ता पाछें प्रसादी वीरा आरोगि कै पाछें श्रीगुसाईजी आपनें सब वैष्णवन कों महाप्रसाद की पातरि पठाई। सो सब वैष्णवन कों महाप्रसाद लिवाए। ता पाछें श्रीगुसाईजी आप पोंढे। सो छिनक विश्राम करि कै जागे। सो उत्थापन तें पहिले जागे। सो कथा कहन लागे। तव और हू वैष्णव बैठे हते। तव वह क्षत्री वैष्णव हू कथा में बैठचो हतो। ताही समे श्रीगुसाईजी आपने आत्मनिवेदन कौ प्रसंग चलायो। तामें कह्यो, जो—सुद्ध मन पूर्वक जो जीव आत्मनिवेदन करत है। और गुरु जो सुद्ध मन पूर्वक निवेदन करावत है। तिनकों श्रीआचार्यजी महाप्रभुजी की कृपा तें दृढ आश्रय तत्काल होंइ। और अलौकिक (वस्तू) हू दृढ होंई। और पुष्टिमार्ग की लीला कौ दान होंइ। और मारग कौ सब अनुभव होंई। और अलौकिक दृष्टि होंई। तव या क्षत्री वैष्णव ने मन में विचार कियो, जो—श्रीगुसाईजी आप कृपा करें तो मैं आत्मनिवेदन करों। पाछें श्रीगुसाईजी उत्थापन किये। पाछें सेन पर्यंत की सेवा पहान्चि कै माला वीरा लेके श्रीनवनीतप्रियजी के मंदिर कों दंडवत् करि कै श्रीगुसाईजी बाहिर पधारे। पाछें श्रीगुसाईजी आप भोजन करि कै इकेले ही गादि तकियान के ऊपर विराजे हते। तव वा क्षत्री वैष्णव ने श्रीगुसाईजी सों विनती कीनी. जो—

महाराज ! एक मेरी विनती है । सो आप तो श्रीप्रभुजी हो सो सर्व करन समर्थ हो । और मैं तो जीव हों । सो याही तें मेरो मनोरथ पूरन कर्ता हो । तव श्रीगुसाईजी आप कहे, जो - तू कहा कहत है ? और कहा मनोरथ है ? सो मोसों कहि । तव वा वैष्णव नें श्रीगुसाईजी सों विनती कीनी, जो - महाराज ! मोकों पुष्टिमार्ग कौ लीला संबंधी दान कीजिये । सो आप कृपा करि कै मोकों आत्मनिवेदन करवाइये । और मेरी आरति पूरन करिए । ता पाछें श्रीगुसाईजी आप श्रीगिरिधरजी सों बुलाई कह्यो, और श्रीमुख तें आज्ञा दिये, जो - काल्हि या क्षत्री वैष्णव कों आत्मनिवेदन करावो । जो - श्रीनवनीतप्रियजी के मंदिर में श्रीआचार्यजी महाप्रभुन की पलंगडी के सानिध्य पुष्टिमार्ग की लीला संबंधी दान कराओ ।

भावप्रकाश—यामें संदेह बोहोत हैं, जो - श्रीगुसाईजी आपु वा क्षत्री कों आत्मनिवेदन क्यों नहीं कराए ? श्रीगिरिधरजी सों क्यों कहे ? और श्रीआचार्यजी महाप्रभुन की पलंगडी के सानिध्य निवेदन की क्यों कहे ? यह तो रीति नहीं । काहेतें ? जो - श्रीआचार्यजी कों तुलसी कैसें समर्पों जाय ? तहां कहत हैं, जो - श्रीगुसाईजी अपने अनुरूप पुत्रन कों प्रगट किये हैं । तातें श्रीरघुनाथजी 'नामरत्नाख्यस्तोत्र' में श्रीगुसाईजी आप कौ नाम 'स्वानुरूपसुतप्रसुः' ऐसें कहे हैं । तासों आत्मनिवेदन बड़े पुत्र श्रीगिरिधरजी द्वारा आपु ही कराये यह भाव जाननो । और श्रीगिरिधरजी आप धर्मों रूप हैं । सो उनमें विप्रयोग झलकत हैं । तातें विप्रयोग कौ दान दै या क्षत्री वैष्णव कों लीलान कौ अनुभव तत्काल करावनो है । यातें श्रीगिरिधरजी कों आज्ञा किये । यहू अभिप्राय है ।

और श्रीआचार्यजी के पलंगडी सानिध्य आत्मनिवेदन की- आज्ञा किये, सो यातें, जो - श्रीआचार्यजी महाप्रभु आप साक्षात् स्वामिनीरूप हैं । सो पादुकाजी के स्वरूप करि आप श्रीठाकुरजी के पास नित्य विराजत हैं । सो श्रीस्वामिनीजी की कृपा विनु लीला संबंधी दान न होंइ । सो वात आगे कृष्णभट की वार्ता में कहि आए हैं । तातें श्रीगुसाईजी आप पलंगडी के सानिध्य आत्म-

निवेदन करायवे की कहे । यामें स्वामिनी-भाव जतायो । जैसे इलम्मागारुजीकों श्रीनवनीतप्रियजी ने ब्रह्मसंबंध दियो । तब दूसरे स्वरूप के चरनारविन्द में तुलसी समर्पिये । यह भाव जाननो । सो यह असाधारण प्रमेय कार्य है ।

पाछें दूसरे दिन वा वैष्णव कों श्रीगिरिधरजी ने वोहांत प्रीति सों आत्मनिवेदन करवायो । तब वह क्षत्री वैष्णव श्रीगुसाईजी के पास आयो । सो साष्टांग दंडवत् करयो । पाछें श्रीगुसाईजी आप के सन्मुख वह वैष्णव बैठ्यो । तब श्रीगुसाईजी आप श्रीमुख तें वचन कह्यो, जो — पुष्टिमार्ग कौ लीला संबधी तो दान नाहीं भयो है । ता पाछें श्रीगिरिधरजी कों बुलाय के पूछ्यो, और खीझे, जो — तुम याकों कहा दान करवायो है ? सो याकों पुष्टिमार्ग की लीला संबधी दान तो भयो नाहीं है । सो याही ते याकों एक व्रत करवाओ । पाछें सुद्ध मन सों दान करवाइयो । तब एक व्रत या क्षत्री वैष्णव सों करवायो । ता पाछें सुद्ध मन होइ श्रीआचार्यजी के सन्मुख निवेदन मार्ग की रीति सों करवायो । पाछें श्रीगुसाईजी पास आय के वा वैष्णव ने साष्टांग दंडवत् करी । तब फेरि श्रीगुसाईजी आप वैष्णव के साम्हे देखि के श्रीमुख सों कहे, जो — आत्मनिवेदनेन तो सुद्ध भयो नाहीं है । तब श्रीगुसाईजी फेरि श्रीगिरिधरजी कों बुलाय के कह्यो, जो — तुम एक व्रत या क्षत्री वैष्णव कों और हू करवाओ । और देह सुद्धि के लिये एक उपवास तुम हू करियो ।

भावप्रकाश—सो यातें, जो — तुम इ कों विप्रयोग कों अनुभव होई ।

ता पाछें मोकों पूछि के दान करवाइयो । तब एक व्रत और हू वा क्षत्री वैष्णव ने कियो । और एक उपवास श्रीगिरिधरजीने कियो । ता पाछें दूसरे दिना श्रीगिरिधरजी

और वह क्षत्री वैष्णव श्रीगुसांईजी के पास आइ दंडवत् किये । तब श्रीगुसांईजी आप वा क्षत्री वैष्णव सां कहे, जो — अज हू तेरो अंतःकरन सुद्ध भयो नाही है । तब एक उपवास और करवायो । तब श्रीगिरिधरजी कों आज्ञा किये, जो — अब इन कों आत्मनिवेदन करवाओ । तब श्रीगिरिधरजीने श्री-आचार्यजी की पलंगडी के सन्निधान वा क्षत्री वैष्णव कों आत्मनिवेदन करायो । ताही समै श्रीगिरिधरजी कों और वा क्षत्री वैष्णव कों पुष्टिमार्ग की लीला संवंधी ब्रजभक्तन के संग श्रीठाकुरजी कौ दरसन भयो । सो ता दिन वह क्षत्री वैष्णव देहानुसंधान भूलि गयो । सो बैठक ही में परचो रह्यो । जो — महाप्रसाद लेवे की सुधि रही नाही । ऐसो रसाविष्ट भयो । ता पाछे उन के कान में श्रीगुसांईजी अष्टाक्षरमंत्र कहे । सो इतने ही में सावधानता भई । ता पाछे महाप्रसाद लियो । पाछे वा क्षत्री वैष्णव कों अलौकिक ज्ञान भयो । सो सदैव भगवद्-रस में छक्यो रहतो ।

सो वह क्षत्री वैष्णव श्रीगुसांईजी कौ ऐसो कृपापात्र भगवदीय भयो । ताते इनकी वार्ता कौ पार नाही, सो कहां ताई कहिए ।

वार्ता ॥८८॥



अब श्रीगुसांईजी कौ सेषक एक खंडन सनोदिया ब्राह्मण सिंहनद कौ वासी, तिनकी वार्ता कौ भाव कहत हैं —

भावप्रकाश—ये राजस भक्त हैं । लीला में इनकौ नाम 'कृसोदरी' है । ये 'गुनचूडा' तें प्रगटी हैं, ताते उनके भावरूप हैं ।

सो ये सिंहनंद में सनाढ्य ब्राह्मण के जन्म्यो । सो यह बरस पांच कौ भयो । तब याकी माता मरी । पाछे पिता ने वाकौं एक पंडित के उहां पढ़िबे कों

बैठायो । सो वह पढ्यो बोहोत । तापाछे यह बरस तीस कौ भयो । तब याकौ पिता मरयो । तब यह घर में इकलो रहे । याकौ ब्याह भयो नाहीं । सो जो - कोऊ पांच मनुष्य मिलि गाम में कछु वार्ता-कीर्तन करें, तहां ये जाई । और सबन सों वाद-विवाद करे । सो मारे विद्या के मद सों यह काहू कों बदे नाहीं । जो - कोऊ कछु कहे ताकौ यह ब्राह्मण खंडन करे । सो सब लोग याकौ खंडन ब्राह्मण कहन लागे । सो सिंहनंद में वैष्णव बोहोत हुते ।

वार्ता प्रसंग—१

सो वह खंडन ब्राह्मण वैष्णव की बोहोत ही निंदा करतो । और वह वैष्णवन के पास ही रहतो । परि वैष्णव गोप्य वार्ता कीर्तन करते । सो एकांत में बैठि कै करते । सो एक समे श्रीगुसाईजी कौ जन्मदिवस आयो । तब उहां के सब वैष्णव जुरि कै कीर्तन करत हते । सो यह खंडन ब्राह्मण कीर्तन सुनि कै आयो । तब वैष्णव तो श्रीआचार्यजी महाप्रभुजी के तथा श्रीगुसाईजी के कीर्तन करत हते । तब वा खंडन ब्राह्मण ने कह्यो, जो - तुम हों गाऊं तैसें कीर्तन करो । तब वैष्णवन ने कह्यो, जो - हम कों तो तुम्हारे जैसें कीर्तन आवन नाहीं । तब वह खंडन ब्राह्मण बोल्यो, जो - मैं गाऊं । तुम मेरे संग गावो । और मोकों तो सब आवत है । तब वह खंडन ब्राह्मण और देवतान के गावन लाग्यो । और वैष्णव तो श्रीठाकुरजी के मिलि कै गावत हते । तब ऐसें कीर्तन सुनि कै एक वैष्णव कों क्रोध आयो । तब वा वैष्णव ने खंडन ब्राह्मण सों कह्यो, जो - तुम कों किनने बुलायो है ? और तुम बिना बुलाए पराए घर क्यों आये हो ? और तू कहा समझे, कहा जाने ? ताते तू यहां तें उठि जा । नाँतरु दोऊ हाथ पकरि कै तोकों उठाय देउंगो । तब तू बुरो मानेगो । तब वह खंडन ब्राह्मण

बोल्यो, जो - कहा तुम्हारे मार्ग संसार तें न्यारे है ? सो ऐसे संसार में नहीं है ? तब वा वैष्णव ने खंडन ब्राह्मण सों कह्यो, जो - हम गनेस, देवी, सिव काहू देवता कों नहीं मानत । सब देवता तो श्रीठाकुरजी की विभूति हैं । तब वा खंडन ब्राह्मण ने कह्यो, जो - सब एक ही हैं । जो - चलो पंडित ब्राह्मण सों पूछो । जो - मेरी बात सत्य है । तब उन वैष्णव ने खंडन ब्राह्मण सों कह्यो, जो - हमारे पंडित ब्राह्मण सों और देवतान सों कहा काम है ? जो - हम तो नंदनंदन विनु और काहू कों जानत नहीं । सो याही तें तू काहे कों माथो उठावत है ? तातें यहां तें जात रहि । सो ऐसे कहि कै वा खंडन ब्राह्मण कों हाथ पकरि कै उठाय दियो । तब खंडन ब्राह्मण बाहिर जाँइ कै दस-पांच ब्राह्मणन सों मिलि कै उन वैष्णवन की निंदा करन लाग्यो । ता पाछें सब वैष्णव बैठे हते तहां जाँइ के ऊपर तें भाठान की मार करन लाग्यो । ता पाछें सब वैष्णव उठि कै अपने घर गए । और कीर्तन तो रहि गए । ता पाछे सब वैष्णव सोय रहे । सो जब अर्द्धरात्रि भई तब कोऊ चारि जनें आय कै वा खंडन ब्राह्मण कों खाट तें ओंधो करि कै बोहोत मारयो । और सगरे सरीर की खाल और हाड़ न्यारे किये । ऐसे बोहोत मारयो । तब वह खंडन ब्राह्मण तो बोहोत ही बिलबिलायो । और बोहोत रोवन लाग्यो, और कह्यो, जो - तुम मोकों क्यों मारत हो ? तब उनन कही, तेनें श्रीगुसाईजी के सेवकन की निंदा क्यों करी ? और कीर्तन में विघन क्यों कियो ? सो याही तें हम तोकों मारत हैं । और वैष्णव तो परम कृपापात्र भगवदीय हैं । और श्री-

गुसाईंजी तो साक्षात् पूरन पुरुषोत्तम हैं । ताते अब जो - तू वैष्णवन तें बोलेगो तो हम तोकों नित्य याही भांति मारेंगे । ऐसैं कहि कै वे तो गए ।

भावप्रकाश—या वार्ता में यह जतायो, जो - भगवदीय वैष्णवन को अपराध श्रीठाकुरजी सहि नहीं सके । और जहां कहैं भगवद् वार्ता कीर्तन होई तहां श्रीठाकुरजी आप रहत हैं । सो श्रीभागवत में नारद प्रति प्रभुन के वचन हैं । सो श्लोक—

नाहं व्रसामि वैकुंठे योगिनां हृदये न च ।

मद्भक्ता यत्र गायन्ति तत्र तिष्ठामि नारद ।

ताते जो कोऊ भगवद् वार्ता कीर्तन में विघ्न करे और वैष्णव को दुःख देइ ताको प्रभु आप या भांति सिखा देत हैं ।

ता पाछें वा खंडन ब्राह्मन को सरीर वोहोत ही पीड़ा करन लाग्यो । सो याही तें निद्रा तो आवे नहीं । सो इत को उत लोटत फिरे । जो - कव सवारो होई ? और कव मैं जाँय कै उन वैष्णवन सों विनती करों । और मेरो दुःख निवृत्त होई । सो ऐसैं करत सवारो भयो । तव वह हरुवे हरुवे उठि कै वैष्णवन के पास गयो । तव उन वैष्णवन के पावन परचो । और कह्यो, जो - मैं जैसे तुम सों बोल्यो तैसो ही फल पायो । जो - तुम तो बड़े ही कृपापात्र भगवदीय हो । और हों तो महा अधम पापी हों । ऐसैं कहि कै अपनो सरीर दिखायो । और रात्रि के सब समाचार कहे । और मार ग्वाई सो सब कहे । और कहे, जो - मेरे सरीर में पीड़ा वोहोत होत है । तव वा खंडन ब्राह्मन को देखि कै वैष्णवन को बोहोत ही दया आई । तव घर में तें चरनोदक ल्याय कै वाके सरीर में लगायो । और कह्यो, तू मुख में डारि । श्रीआचार्यजी श्रीगुसाईंजी का नाम लीनो । तव वा खंडन ब्राह्मन सों कह्यो, जो - अब तुम

अपने घर जाऊ । तब वा खंडन ब्राह्मन ने कह्यो, जा - मोकों कहुँ ठौर नाहीं । सो अब तुम कृपा करि कै मोकों वैष्णव करो । तब उन वैष्णवन ने खंडन ब्राह्मन सों कह्यो, जो - श्रीगुसांईजी कृपा करें तब ही ये बात होई । सो यातें तुम्हारे मन में जो - ऐसी आई है तो तुम श्रीगोकुल जाउ । तुम्हारी मनोरथ पूरन होइगो । ता पाछें वह खंडन ब्राह्मन वैष्णव सों विदा मांगि कै चलयो । सो केतेक दिन में श्रीगोकुल आय पहोंच्यो । तब वा खंडन ब्राह्मन ने श्रीगुसांईजी के दरसन किये । पाछें श्रीगुसांईजी सों विनती करी, और कह्यो, जो - महाराजाधिराज ! मोकों नाम सुनाइए । जो - आप तो भक्तवत्सल हो । सो जीवन के अपराध साम्हें कहा देखत हो ? तब वा खंडन ब्राह्मन के बचन सुनि कै वाके ऊपर कृपा करि कै नाम सुनायो । तब श्रीगुसांईजी आप खंडन ब्राह्मन कों आज्ञा किये, जो - तुम एक उपवास करो । पाछें तुम कों निवेदन करावेंगे । ता पाछें एक उपवास करवाय कै वा खंडन ब्राह्मन कों दूसरे दिन आत्मनिवेदन करवायो । पाछें वा खंडन ब्राह्मन ने यथासक्ति भेंट करी । ता पाछें वह खंडन ब्राह्मन थोरे से दिन श्रीगोकुल में रह्यो सो मार्ग की सब रीति सीखी । और हू सब श्रीगुसांईजी आप कृपा करि कै वा खंडन ब्राह्मन सों कहे । ता पाछें श्रीगुसांईजी आप वा खंडन ब्राह्मन कों ग्रन्थ पढ़ाए । सो सब मार्ग की रीति हृदयारूढ भई । सो ऐसैं करत कितनेक दिन ताई वह श्रीगोकुल में रहि कै श्रीनवनीतप्रियजी आदि सातों स्वरूपन के दरसन किये । पाछें एक दिन श्रीगुसांईजी आप प्रातःकाल उठि कै देहकृत्य करि दंतधावन करि स्नान करि



श्रीनवनीतप्रियजी के मंगला के दरसन करि कै श्रीगोवर्द्धन-  
नाथजी के दरसन कौ विचार कियो । सो वह पंडित ब्राह्मण  
हू अपने संग लियो । और सब वैष्णवन कों अपने संग लेके  
श्रीगोवर्द्धननाथजी के दरसन कों पधारे । सो श्रीगिरिराज जाँइ  
पहोंचे । सो श्रीगोवर्द्धननाथजी के राजभोग कौ समे हतो ।  
सो श्रीगोवर्द्धननाथजी कों राजभोग समर्प्यो । पाछे भोग सराय  
श्रीगोवर्द्धननाथजी के दरसन सब वैष्णवन कों करवाए । तव  
वह खंडन ब्राह्मण हू दरसन करि कै वोहोत प्रसन्न भयो । और  
अपने मन में कह्यो, जो - धन्य मेरो भाग्य है । जो - मोकों  
ऐसे दरसन भए । ता पाछे श्रीगुसांईजी आप श्रीगोवर्द्धननाथजी  
की राजभोग-आर्ति करि सब सेवा तें पहोंचि के अनोसर  
करवाय कै माला वीड़ा लेके श्रीगिरिराज तें नीचे पधारे ।  
सो अपनी बैठक में गादी तकियान के ऊपर विराजे । तव  
खंडन ब्राह्मण हू दरसन करि कै नीचे आयो । सो श्रीगुसांईजी  
कों साष्टांग दंडवत् कियो । ता पाछे श्रीगुसांईजी आप सब  
वैष्णवन कौ समाधान करि कै विदा किये । ता पाछे श्रीगुसांई-  
जी आप वा खंडन ब्राह्मण कों महाप्रसाद की आज्ञा करी, जो-  
आज महाप्रसाद यहाँई लीजियो । पाछे श्रीगुसांईजी आप  
भोजन कों पधारे । सो भोजन करि कै वा खंडन ब्राह्मण कों  
महाप्रसाद की पातरि धरी । सो महाप्रसाद लियो । पाछे  
श्रीगुसांईजी आप पोढ़े । सो छिनक विश्राम करि कै जागे ।  
पाछे उत्थापन कौ समय भयो । तव स्नान करि कै श्रीगिरि-  
राज ऊपर पधारे । सो श्रीगोवर्द्धननाथजी कों उत्थापन किये ।  
पाछे सेन पर्यंत की सब सेवा सो पहोंचि के अनोसर करवाय

कै श्रीगुसांईजी श्रीगिरिराज तें नीचे पधारे । तब वह खंडन ब्राह्मन हू दरसन करि कै सोय रह्यो । सो ऐसैं केतेक दिन तांई श्रीगोवर्द्धननाथजी के दरसन किये । पाछें श्रीगुसांईजी आप श्रीगोकुल पधारे । सो साथ सब वैष्णव आए । तब वह खंडन ब्राह्मन हू साथ आयो । सो श्रीनवनीतप्रियजी के दरसन किये । और महाप्रसाद लिये । पाछ वा खंडन ब्राह्मन नें श्रीगुसांईजी सों विनती कीनी, जो - महाराजाधिराज ! आज्ञा होइ तो मैं ब्रजयात्रा करि आउं । तब श्रीगुसांईजी आप खंडन ब्राह्मन सों कहे, जो ब्रजयात्रा तो अवस्य करी चहिए । तब वह खंडन ब्राह्मन विदा होइ कै चल्यो । सो कितनेक दिन में संपूरन ब्रजयात्रा करि कै श्रीगोकुल आयो । सो श्रीगुसांईजी श्रीनवनीतप्रियजी के दरसन कियो । पाछें केतेक दिन श्रीगोकुल में और रह्यो । ता पाछें श्रीगुसांईजी सों विदा होइ कै वह खंडन ब्राह्मन सिंहनंद अपने घर आयो । ता पाछें उन वैष्णवन सों मिलि भेट्यो । पाछें सब समाचार श्रीगुसांईजी के कहे । पाछें मार खायवे की बात श्रीगुसांईजी सों नाहीं कही हती सो हू बात उन वैष्णवन सों कही । तब उन वैष्णवन में एक मुखिया हतो । सो उहां पाग उतारि दोऊ हाथ जोरि कै पाछें वा खंडन ब्राह्मन के पाँवन परचो । और कह्यो, जो - धन्य है । साँची बात कहि दीनी । तुरत ही अपराध कौ दंड हू भयो । सो यह दैवी जीवन कौ लक्षण है । सो - उनके निकट ही श्रीप्रभुजी बिराजत है । और आसुरी जीवन कौ तो लक्षण यह है, जो - ज्यों ज्यों अधर्म करें त्यों त्यों भलो होई । सो याही तें यह तो ऐसी बात है । ता पाछें

खंडन ब्राह्मन भलो वैष्णव भयो । सो सब वैष्णवन कों मिलि के चलतो । और जो वैष्णव अपने घर आवे ताकों वोहोत ही दीनता सों अपने घर राखतो । सो सब वैष्णवन की वह खंडन ब्राह्मन वोहोत ही मर्यादा राखे । पाछें वह खंडन ब्राह्मन अपनी बुद्धि तें कीर्तन करतो । सो कीर्तन मार्ग की रीति सों श्री-भागवत के अनुसार करतो । और कोई वैष्णव बड़ाई करे तब कहें, जो — यह प्रताप तुम्हाराई है । तुम्हारी कृपा तें वह कार्य सिद्ध भयो है । और वैष्णवन कौ सब काम करतो । वैष्णवन सों दीनता राखतो ।

सो वह खंडन सनोड़िया ब्राह्मन श्रीगुसांईजी कौ ऐसो परम कृपापात्र भगवदीय हतो । तातें इनकी वार्ता कौ पार नाहीं, सो कहां ताई कहिए । वार्ता ॥ ८९ ॥



अब श्रीगुसांईजी कों सेवक एक कुनवी पटेल, गुजरात में एक छोटे न्वेरा में रहतो. तिनकी वार्ता कौ भाष फहत है —

भावप्रकाश—ये तामस भक्त हैं । लीला में इन कौ नाम 'सत्यव्रता' हैं । ये 'गुनचूडा' तें प्रगटी हैं । तातें उन के भावरूप हैं ।

वार्ता प्रसंग—१

सो एक समै श्रीगुसांईजी आप गुजरात पधारे हते । तब वा कुनवी पटेल कों श्रीगुसांईजी के दरसन भए । तब वा कुनवी ने श्रीगुसांईजी सों विनती करी, जो-महाराज ! मोकों सरनि लीजिए । तब आप श्रीमुख तें आज्ञा किये, जो-तू स्नान करि आऊ । तब वह कुनवी पटेल स्नान करि आयो । पाछें श्रीगुसांईजी सों विनती कीनी. जो-महाराज ! मैं स्नान करि आयो हूं । तातें मो पर कृपा करि के नाम दीजिए । तब



खंडन ब्राह्मन भलो वैष्णव भयो । सो सब वैष्णवन कों मिलि के चलतो । और जो वैष्णव अपने घर आवे ताकों वोहोत ही दीनता सों अपने घर राखतो । सो सब वैष्णवन की वह खंडन ब्राह्मन वोहोत ही मर्यादा राखे । पाछें वह खंडन ब्राह्मन अपनी बुद्धि तें कीर्तन करतो । सो कीर्तन मार्ग की रीति सों श्री-भागवत के अनुसार करतो । और कोई वैष्णव वड़ाई करे तब कहें, जो — यह प्रताप तुम्हाराई है । तुम्हारी कृपा तें वह कार्य सिद्ध भयो है । और वैष्णवन कौ सब काम करतो । वैष्णवन सों दीनता राखतो ।

सो वह खंडन सनोढ़िया ब्राह्मन श्रीगुसांईजी कौ ऐसो परम कृपापात्र भगवदीय हतो । तातें इनकी वार्ता कौ पार नहीं, सो कहां तांई कहिए । वार्ता ॥ ८९ ॥



अब श्रीगुसांईजी कों लेखक एक कुनवी पटेल, गुजरात में एक छोटे न्वेरा में रहतो तिनकी वार्ता कौ भाव कहत हैं —

भावप्रकाश—ये तामस भक्त हैं । लीला में इन कौ नाम 'सत्यव्रता' है । ये 'गुनचूडा' तें प्रगटी हैं । तातें उन के भावरूप हैं ।

वार्ता प्रसंग—१

सो एक समै श्रीगुसांईजी आप गुजरात पधारे हते । तब वा कुनवी पटेल कों श्रीगुसांईजी के दरसन भए । तब वा कुनवी ने श्रीगुसांईजी सों विनती करी, जो-महाराज ! मोकों सरनि लीजिए । तब आप श्रीमुख तें आज्ञा किये, जो-तु स्नान करि आऊ । तब वह कुनवी पटेल स्नान करि आयो । पाछें श्रीगुसांईजी सों विनती कीनी, जो-महाराज ! मैं स्नान करि आयो हूं । तातें मो पर कृपा करि के नाम दीजिए । तब

श्रीगुसाईजी कृपा करी कै वाकों नाम सुनाए । दूसरे दिन उपवास करवाय कै वा कुनवी कों निवेदन करवाए । तब कुनवी वैष्णव ने यथासक्ति भेंट कीनी । ता पाछें श्रीगुसाईजी आप रसोई करि कै श्रीठाकुरजी कों भोग समर्प्यो । समय भये भोग सराय आचमन मुखवस्त्र कराय आप भोजन किये । ता पाछें आचमन करि वीरा आरोगि कै गादी-तक्रियान के ऊपर विराजे । और सब ब्रजवासी टहलुवान नें महाप्रसाद लियो । और वा पटेल ने हू लियो । सो महाप्रसाद लेत मात्र ही वा पटेल कों मार्ग कौ ज्ञान भयो । सो मार्ग हृदयारूढ भयो । ता पाछें श्रीगुसाईजी आप श्रीसुबोधिनीजी की कथा कहें । सो वा कुनवी वैष्णव ने सुनी । सो ऐसैं केतेक दिन ताई आप वा खेरा में विराजे । ता पाछें श्रीगुसाईजी आप द्वारिका कों पधारे । सो श्रीरनछोरजी के दरसन किये । पाछें कछूक दिन उहां विराजे । ता पाछें श्रीरनछोरजी सों विदा होइ कै चले । सो श्रीगोकुल आय पहुँचे । श्रीनवनीतप्रियजी के दरसन किये ।

वार्ता प्रसंग—२

और वा कुनवी पटेल के गाम के पास एक बड़ो गाम हतो । तामें वैष्णव कौ बोहोत ही समाज हतो । और वैष्णव-मंडली, वार्ता-कीर्तन नित्य होते । सो वा गाम में एक तादसी वैष्णव मुखिया हतो । सो वाके पास यह कुनवी जातो । सो यह कुनवी वैष्णव श्रीठाकुरजी की सेन-आर्ति करि कै अपने घर तें चलतो । सो रात्रि घरी छह गए पाछें उहां जाय पहुँचतो । सो सब वैष्णवन सों श्रीकृष्ण-स्मरण करि कै बैठतो । ता पाछें कथा-वार्ता सुनतो । पाछें रात्रि सवा पहर बाकी रहती तब

सब वैष्णवों तें जेश्रीकृष्ण करि के चलतो । सो अपने घर आय के श्रीठाकुरजीकी सेवा करतो । सो ऐसैं करत वोहोत दिन बीते । तव एक एकादसी आई । तव वह कुनवी पटेल अपने श्रीठाकुरजी की सेवा सां पोहोंचि के रात्रि कों चल्यो । सो अंधियारे में मार्ग भूल गयो । और मेह बरसत हतो । तव आगें चलि के एक तलाव आयो । सो वा तलाव के ऊपर रुख वोहोत हे । सो एक रुख पै तें एक प्रेत उतरि के याके मार्ग में आड़ो आय ठाढ़ो भयो । तव या कुनवी वैष्णव ने कह्यो, जो-तू कौन हे ? जो-या मार्ग में ठाढ़ो हे ? तव वह बोल्यो, जो-हैं प्रेत हों । वोहोत दिनान कौ भूखो हूं । तातें मैं तोकों खाऊंगो । तव वा कुनवी वैष्णव ने कही, जो-आज एकादसी के जागरन में जात हों और सवारे याही मार्ग आऊंगो । तव तू मोकों सुखेन खाइयो । तव वा प्रेत ने या पटेल सां कह्यो, जो-तेरो विस्वास नाहीं । जो तू फेरि या मारग काहे कों आवेगो ? तू मेरे काल के मुख में काहे कों आवेगो ? तव वा कुनवी ने कही, जो-यह मेरो वचन हे । जो-सवारे आयके तोकों पुकारूंगो । तव तू मोकों सुखेन खाइयो । तव वा ब्रह्म राक्षस ने कही, जो-भूल, विस्वास हे । परि तू सवारे वेगो आईयो । तव वा प्रेत ने वचन ले के जान दीनो । तव वह पटेल वैष्णव वा गाम में वार्ता-कीर्तन-मंडली में गयो । तव सावधानी सां कथा सुनी । और मन हुलास सां कीर्तन किये । और वा पटेल कुनवी वैष्णव ने अपने मनमें विचार कियो, जो-सवारे तो वह राक्षस खायगो । जो-मैं उहां त निश्चय करि के आयो हूं । सो यातें भगवद् नाम जितनो

लियो जाँई सो आछौ है । तव वह कुनवी वैष्णव बाहोत आनंद पाइ कै भगवद् वार्ता करन लाग्यो । सो ऐसैं करत रात्रि तो व्यतीत भई । ता पाछें सवारे वैष्णवन सों जैश्रीकृष्ण करि कै चल्यो । सो वाही तलाव पै आयो । सो वा राक्षस के पास आयो । तव वा कुनवी पटेल ने वा प्रेत सों कह्यो, जो—अरे भाई, ब्रह्म राक्षस ! तू आउ । सो वह कुनवी वैष्णव पांच बेर पुकार्यो । और कह्यो, जो—तू बेगि आय के मोकों खाउ । तव वह प्रेत तो कछू बोल्यो नाहीं । और वाने अपने मनमें विचार कियो, जो देखो ! यह मरिवे कों आयो है । जो - यह मेरे काल के मुख में तें निकसि के फेरि आयो है । परि देखो ! वचन कौ सांचो है । परि ये तो आपही हरिजन है, भगवद्भक्त है । सो ये वचन सत्य करिवे कों आयो है । और इन कों मृत्यु कौ डर नाहीं । तव कह्यो, जो ऐसैं भगवद् भक्त कों तो मैं नाहीं खाउंगो । सो वैष्णव कौ दरसन करि कै फिरि गयो । तव वह कुनवी वैष्णव फेरि बोल्यो, अरे प्रेत ! तू बेगो आउ । जो—मोकों भगवत्सेवा कों अवेर होत है । तव वह राक्षस आयो । और बड़ो रूप कियो । तव वा कुनवी ने कह्यो, जो—अब तू मोकों सुखेन खा । तव वा राक्षस ने कह्यो, जो—अब तो मैं तुम कों नहीं खाउंगो । जो—तुम तो हरिजन वैष्णव हो । सो तुम्हारो वचन तो सांचो है । अपने धर्म के लिये तुम ने मृत्यु कौ भय नाहीं कियो । तातें हों तुम पास एक वस्तु मांगत हों । सो मोकों दीजिए । ऐसैं कहि वह प्रेत वा कुनवी वैष्णव के पाँवन पर्यो ।

भावप्रकाश—यामें यह जतायो, जो - जाकों श्रीआचार्यजी महाप्रभुन कों



दृढ़ आश्रय है, तासों काल हू डरपत है । तहां प्रेतादिक की कहा चले ? तानें हरिजन सदा निर्भय रहत हैं । काहंतें, जो - ये सर्व तें अधिक हैं । तीन लोक इन की बंदना करत हैं । सो सूरदासजी गाए हैं, सो पद—

राग : विलावल

हरि के जन की अति ठकुराई ।  
 महाराज ऋषिराज, महामुनि, देखत रहे लजाई ।  
 दृढ़ विश्वास कियो सिंघासन ता पर बैठे भूप ।  
 हरि गुन विमल छत्र सिर राजत, सोभा परम अनूप ।  
 निस्पृह देस कौ राज करे, ताकौ लोक परम उन्साह ।  
 काम क्रोध मद लोभ मोह तहां, भये चोर तें साह ।  
 बने विदेक विचित्र पोरिया औसर कोऊ न पावे ।  
 अर्थ काम तहां रहें दूरि दुरि मोक्ष धर्म सिर नावे ।  
 अष्टसिद्धि नवनिधि द्वारे ठाढ़ी, कर जोरें उर लीनी ।  
 छड़ीदार वैराग्य विनोदी, झटकी बाहर कीनी ।  
 हरिपद पंकज प्रेम परम रूचि ताही सों रंग राते ।  
 मंत्री ज्ञान औसर नहीं पावत करत बात सकुचाते ।  
 माया काल व्यापे नहीं कवहूं जो या रीतै जाने ।  
 'सूरदास' यह नर तन पायो, गुरु प्रसाद पहचाने ।

सो भगवदीय वैष्णव कौ स्वरूप या भांति कौ जाननो ।

तव वा कुनवी वैष्णव ने कह्यो, जो - तू कहा मांगत है ?  
 तव वा प्रेत ने पटेल सों कह्यो, जो - तुम आज कीर्तन किये  
 हो ताकौ फल मोकों दीजिये । तव मेरो उद्धार हांडगो । और  
 मैं प्रेत योनि तें छूटंगो । तव पटेल वैष्णव ने कह्यो, जो -  
 कीर्तन कौ फल तो मैं नहीं देउंगो । तोकों खानो हांड तो  
 सुखेन खाऊ । तव वा प्रेत ने कह्यो, जो - आधौ तां फल  
 दीजिए । तव वा पटेलने कह्यो, जो - आधौ हू नहीं देउंगो ।  
 तव एक घरी कौ फल मांग्यो, सो हू नहीं कीनी । तव आधी  
 घरी कौ फल मांग्यो तो हू नहीं कीनी ।

भावप्रकाश—यहां यह संदेह होई, जो — पुष्टिमार्ग में तो सब कार्य कामना रहित व्हे करिवे कौ कह्यो है । तातें फल की ईच्छा तो इहां है नाहीं । तव या वैष्णव फल देन की नाहीं क्यों कियो ? तहां कहत हैं, जो — कीर्तन कौ फल तो महा अलौकिक है । ता करि साक्षात् श्रीगोवर्द्धनधर की प्राप्ति होत हैं । सो लीला सहित प्रभु हृदय में आय रहत हैं । ऐसो फल या राक्षस कों कैसे दियो जाय ? काहेतें ? यह दैवी तो है नाहीं । तातें नाहीं कियो ।

तव वा राक्षस ने कह्यो, जो — वैष्णव ! मोकों पांच ताल कौ पून्य तो देऊ । ताही समै आकास—वानी भई, जो — वैष्णव तुम तो हरिजन हो । तातें दया करि याकों पांच ताल कौ पून्य दीजिए । तातें याकी गति होइ । याकों तुम्हारे वैष्णव के दरसन तें यह ज्ञान भयो है । तव कुनवी वैष्णव ने तलाव में तें जल ले कै वा राक्षस के हाथ में दियो । और कह्यो, जो — मैंने तोकों पांच ताल कौ पून्य दियो । सो इतनो कहत ही वा राक्षस की देह छूटी । प्रेत योनि तें मुक्त भयो । ता पाछें स्वर्ग तें विमान आयो । तव वह राक्षस सुंदर दिव्य देह धरि कै वा कुनवी वैष्णव की परिक्रमा करि पाँवन परि कै वा विमान में बैठि कै स्वर्ग कों गयो । सो भगवदीय कौ ऐसो ही प्रताप है । पाछें वह पटेल अपने घर आयो ।

भावप्रकाश—सो या वार्ता में यह जतायो, जो — वह कुनवी वैष्णव सत्संग के लिये इतनी दूर आवतो । सो सत्संग ऐसो पदार्थ है । तातें भगवदीय वैष्णव कौ संग अवस्य करनो । जातें धर्म की हानि कबहू न होई ।

सो वह कुनवी वैष्णव श्रीगुसाईजी कौ ऐसो कृपापात्र भगवदीय हतो । तातें इनकी वार्ता कहां ताई कहिए ।

वार्ता ॥९०॥



अब श्रीगुसांईजी को सेवक एक साहूकार, मथुराजी में रहती, तिनकी घात की भाव कहत हैं—

भावप्रकाश—ये राजस भक्त हैं। लीला में इन का नाम 'मनोरूपा' है। सो मनोरूपा श्रीयमुनाजी के गृह की हैं। ये 'छविशिधि' तें प्रगटी हैं, तातें उनके भावरूप हैं।

ये मथुराजी में एक द्रव्यपात्र साहूकार के घर जन्म्यो। सो उह साहूकार सराफी की दुकान हू करतो। सो वाकौ बेटा बरस बारह का भयो। तब वाकौ व्याह कियो। पाछें केतेक दिन में वह साहूकार मरयो। तब वह दुकान पै जान लाग्यो। परि यह देवी जीव हतो। तातें वाके मन में यह चिंता रहे, जो—श्रीठाकुरजी की प्राप्ति कैसे होई? सो जो कोऊ वाकी दुकान पै आवतो तासों यह पूछतो।

सो एक दिन एक मथुरिया चोबे या साहूकार की दुकान पै आयो। सो वह पंडित हुतो। तिन सों यह साहूकार पूछ्यो, जो—तुम बड़े पंडित हो। तातें हम कों श्रीठाकुरजी कौन प्रकार मिले सो उपाय कृपा करि कहिये? हम कों श्रीठाकुरजी के मिलिये की बोहोत उत्कंठा रहत है। तब वह मथुरिया चोबे ने क्यो, जो—सुनि! श्रीठाकुरजी तो घर छेरि एकांत बन म जाई भजन करे तब मिलत हैं। ता उपरांत जो—तोको कुछ पूछ्यो होई तो तू श्रीगोकुल जा। तहां श्रीविठ्ठलनाथजी गुसांई रहत हैं। तिनसों पूछि। वे बड़े पंडित हैं। बोहोत लोग उनके सेवक हैं। यह कहि मथुरिया चोबे तो अपने घर गयो। पाछें दूसरे दिन वह साहूकार श्रीगोकुल आयो। सो ता समै श्रीगुसांईजी आप ठकुरानी घाट पर संध्यावंदन करत हुते। सो तहां यह साहूकार कों श्रीगुसांईजी के दरसन भए। सो महा अलौकिक तेजपुंज ऐसैं दरसन भए। सो वह एक घरी लों उहां ठाढ़ी रह्यो। पाछें श्रीगुसांईजी या साहूकार की ओर देखे। तब वा साहूकार सों आप कृपा करि कहे, जो—तू कहा पूछिये आयो है? सो सोसों कहि। तब तो यह साहूकार विस्मित होइ रह्यो। क्यो, जो—देखो! विनु कहे इन मेरे हृदय की जानी। तातें निश्चय यह ईश्वर हैं। ऐसैं अपने मन में निर्द्वारि कियो। पाछें यह साहूकार दोऊ हाथ जोरि विनती कियो, जो—महागज! आप ईश्वर हो, मेरे मन की जानें। तातें अब सोकों कृपा करि के सरनि लाजिये। हों आप के मगनि आयो हूं। तब श्रीगुसांईजी कहें, जो—तू पहिले वा बात कों पूछि। पाछें ताकों सरनि लेट्यो। तब वा साहूकार ने विनती करी, जो—महागज! मेरे मन में बोहोत

दिनन तें यह अभिलाषा ही, जो - श्रीठाकुरजी कौन भांति मिले ? सो महाराज ! मैंने बोहोत से पंडितन कों पूछी । परि मैं जिन सों पूछयो वह यह कहें, जो - संसार छोरि कै विरक्त होऊ तो श्रीठाकुरजी मिले । सो महाराज ! यह कार्य तो बोहोत कठिन है । या काल में स्त्री, द्रव्य, घर कैसे छोरे जाई ? देह के अध्यास तो छूटे नहीं हैं । तासों मैं आप सों पूछिवे आयो हो । तव श्रीगुसांईजी आज्ञा किये, जो - तू साँच कहत है । जहाँ ताई देहाध्यास न छूटे तहाँ ताई गृह-त्याग सर्वथा बाधक है । ता उपरांत जो कोऊ विनु विचारे गृह छोरे तो दुसंग करि निश्चय भ्रष्ट होई । और ठाकुर तो काहू साधन किये तें मिलत नाही । वे तो अपनी कृपा ही तें जीव कों मिलत हैं । तातें जीव कों भगवत्सेवा ही कर्तव्य है । जातें उनकी कृपा होई । यह सुनि कै साहूकार बोहोत प्रसन्न भयो । पाछें विनती कियो, जो - महाराज ! अब मोकों वेगि सरनि ले भगवत्सेवा पधराय दीजिए । तो हों सेवा करों । तव श्रीगुसांईजी वाकों आज्ञा किये, जो - तू श्रीयमुनाजी में न्हाइ ले, हम तोकों यहां ई सरनि लेइंगे । तव वह साहूकार श्रीयमुनाजी में स्नान करि श्रीगुसांईजी के पास आयो । तव श्रीगुसांईजी वाकों नाम-निवेदन कराई सरनि लिये । पाछें वामों आज्ञा किये, जो - तू हमारे संग मंदिर में चलि । श्रीनवनीतप्रियजी के दरसन करि । पाछें तोकों भगवत्सेवा पधराइ देइंगे । तव वह साहूकार श्रीगुसांईजी के संग श्रीनवनीतप्रियजी के मंदिर में आयो । पाछें राजभोग आर्ति के दरसन कियो । सो श्रीनवनीतप्रियजी वाकों अलौकिक दरसन दिये । तव वह दरसन करत ही थकित व्है गयो । ता पाछें श्रीगुसांईजी श्रीनवनीतप्रियजी कों अनोसर करि अपनी बैठक में पधारे । तव यह साहूकार हू बैठक में आयो । पाछें श्रीगुसांईजी कों दंडवत् करि बैठ्यो । तव श्रीगुसांईजी वा साहूकार कों आज्ञा किये, जो - अब तेरी कहा ईच्छा है ? तव वह साहूकार विनती कियो, जो - महाराज ! मोकों भगवत्सेवा पधराइ दीजिए । और सेवा कौ प्रकार हू कृपा करि समझाइए । तव श्रीगुसांईजी कृपा करि कै वा साहूकार कों एक लालजी कौ स्वरूप पधराय दिये । ता पाछें वा साहूकार सों श्रीगुसांईजी आप कहे, जो - तू इनकी सेवा मन लगाय कै करियो, भावप्रीति पूर्वक । और इन कों तू साक्षात् करि कै जानियो । जैसे तू अपने सरीर कौ सीत, उष्ण, भूख, दुःख, आदि सों जतन करत हैं ताही भांति इन कौ करियो । जो - कछू खान-पान करे सो इन कों समर्पि कै करियो । और श्रीठाकुरजी आप उत्तम वस्तु के भोक्ता हैं । तातें जगत में जो कछू उत्तम पदार्थ देखे तिनकों तू श्रीठाकुरजी की

सेवा में विनियोग कराइयो । ता पाछे वाकों अपने कारज में लीजियो । ताते, अन्य संबंध की निवृत्ति होइगी । तब सरन दृढ़ होइगो । सरन दृढ़ भए विनु श्रीठाकुरजी की कृपा होत नाहीं । ताते घर में गृहि कै मारग की रीति प्रमान सेवा करियो । और मथुराजी में अम्के स्त्री-पुरुष वैष्णव निष्किचन रहत है ताकों मंग करियो । सो वे तोकों सेवा का प्रकार समझावेंगे । सो ता प्रकार तू सेवा करियो । ताते तेरे ऊपर वेगि कृपा होइगी ।

ऐसे कहि श्रीगुसाईजी आप भोजन का पधारे । तब आप या साहूकार का आज्ञा किये, जो — आज तू यहां महाप्रसाद लीजियो । पाछे श्रीगुसाईजी आप भोजन करि वीरी ले बाहिर पधारे । तब या साहूकार को आप जठन की पातरि धरे । सो यह साहूकार महाप्रसाद लियो । पाछे वह साहूकार श्रीगुसाईजी का आज्ञा मांगि मथुराजी आयो । ता पाछे वाने अपनी स्त्री का एक वैष्णव के संग श्रीगोकुल पठाई । और स्त्री का कह्यो, जो — तू वेगि श्रीगुसाईजी की सेवक होऊ । तब दोऊ मिलि कै सेवा करे । सो स्त्री हू श्रीगोकुल जाई श्रीगुसाईजी की सेवकिनी होई आई । तब दोऊ मिलि कै सेवा करन लागे । पाछे वह निष्किचन स्त्री-पुरुष का संग करन लाग्यो । सो याकाँ भगवद्भाव बढ़यो । तब यह साहूकार ऋतु अनुसार मनोरथ करन लाग्यो । ता पाछे सब वैष्णवन का बुलाइ मंडली करे । या प्रकार प्रीति पूर्वक सेवा करतो । सो श्रीठाकुरजी थोरै दिन में वाकों मानु-भावता जनावन लागे ।

वार्ता प्रसंग—१

सो एक दिन साहूकार वैष्णव ने आम के दिन में समस्त गाम के वैष्णवन की मंडली कीनी । सो आम के रस की मंडली करी । सो मथुराजी में श्रीगुसाईजी के सेवक निष्किचन स्त्री-पुरुष दोइ वैष्णव हते । सो उन वैष्णवन के यह नेम हुतो, जो — अपने श्रीठाकुरजी आरोगे सोई लेनो । और वैष्णव-मंडली में न्योतौ आवे तब जो सामग्री मंडली में होइ सो अपने श्रीठाकुरजी का आरोगावते । तब मंडली में जाते ।

भावप्रकाश—काहेते, जो — यह पतिव्रता का धर्म है, जो — म्यामी आगेने सोई लेनो । और समाज राखिबे का वैष्णव-मंडली में जाइ । परि उहां जो सामग्री

होंई सो अपने घर श्रीठाकुरजी कों प्रथम आरोगावे । पाछें उहां महाप्रसाद लेई । यह मारग की रीति है । सो यह पुष्टिमार्ग में पतिव्रता-धर्म मुख्य है । और श्रीगुसांईजी 'श्रीसर्वोत्तम स्तोत्र' में श्रीआचार्यजी कौ नाम कहे हैं, जो - "पतिव्रता पतिः" सो पतिव्रता, जो - अनन्य भक्त, तिनके आप पति हैं । यह कहि यह जतायो, जो - पुष्टिमार्ग में पतिव्रता-धर्म की नाई जो - कोऊ वैष्णव ठाकुर की सेवा करत है ताकों स्वामिनीवत् सौभाग्य की प्राप्ति होत है ।

और ये लीला में 'रति' 'गति' दोऊ जसोदाजी की सखी हैं । सो नंदा-लय में श्रीठाकुरजी की सेवा में सदा तत्पर रहति हैं । नई नई सामग्री सिद्ध करति हैं । सो श्रीजसोदाजी दोऊन कों धार कौ महाप्रसाद नित्य देति हैं, सोई लेति है । और कछु लेति नहीं । ऐसी दोऊ अनन्य हैं ।

सो वा दिना मंडली में रस हतो । सो सब आम तो वा सेठ के घर लै गए हते । और यह वैष्णव आंवा लैन कों बजार में गयो । सो बजार में कहुं आंवा न मिले । तव यह वैष्णव कों अत्यंत ताप भयो । तव ताही समै एक माली बजारमें आंवान कौ टोकरा लै कै आयो ।

भावप्रकाश—यह कहि यह जताए, जो - ताप-भाव सों सर्व मनोरथ तत्काल सिद्ध होत हैं ।

तव इन वैष्णव ने पूछी, जो - हम कों दोइ पैसा के आंवा देइगो ? तव उन माली ने कही, जो - सगरो टोकरा लेउ तो देउं ! तव इन वैष्णवने कही, जो - सबन कौ कहा लेउगे ? तव मालीने कही, जो - एक रुपैया लेउंगो । तव वैष्णवने कही, जो - रुपैया कहां तें ल्याऊं ? ऐसैं कहि कै पाछें कही, जो - दोइ चारि दिना ताई मांगियो मति, पाछें देईगे । ऐसैं कहि कै वह वैष्णव श्रीयमुनाजी के किनारें आयो । तहां एक-एक आम धोय धोय कै श्रीठाकुरजी कों मानसी में भोग धरत गयो । सो श्रीठाकुरजी ने वाही ठौर सब आम आरोगे ।

इतने में वा सेठ के घर भोग आयो । सो सब आंवान कौ रस ही निकासे । समंगल आम कोई न हतो । तव वजार में सेठ ने मनुष्य पठाये, जो-आम ले आउ । सो वह वैष्णव वैठ्यो हतो तहां आए । तव माली त पूछ्यो, जो-आम बेचेगो ? तव उन माली ने कही, जो-आम तो इन वैष्णव ने लिये हैं । तव इन वैष्णव ने उन मनुष्यन सों कही, जो-चहिए तो ले जाऊ । एक रुपैया में ठहराए हैं । तव उन मनुष्यन ने कही, जो-चलो रुपैया हम दिवावें । ऐसैं कहि के वे मनुष्य तो आम ले गए । और वह वैष्णव अपने घर आयो । तव सेठ के घर वे आम खासा करि कै श्रीठाकुरजी कों भोग धरिवे लगें । तव श्रीठाकुरजी नें सेठ सों कही, जो-ये आम तो फलाने वैष्णव ने अपने श्रीठाकुरजी कों धराए हैं । तातें प्रसादी आम तो मैं न आरोगूंगो । तव सेठ ने उन वैष्णव कों बुलाय कै पूछी, जो-ये आम तुमने श्रीठाकुरजी कों भोग धरे हैं ? तव उन वैष्णव ने कही, जो धरे तो खरे, कहा करें ? पास रुपैया नाहीं । तातें ऐसैं किये । पाछें वैष्णव-मंडली प्रसाद लेवे बैठी । तव वह एक-एक आम सवन कों धरे । पाछें सब महाप्रसाद लेवे लगे । तव वा सेठ के घर की रस-पूरी लेवे लगे । ता पाछें उह समंगल आम लिये । सो वह अत्यंत अलौकिक स्वाद लगे । काहेतें, जो वह वैष्णव ने ताप-भाव करि कै श्रीयमुनाजी के तट पै श्रीठाकुरजी कों आम समर्पे । सो उहांई श्रीठाकुरजी ने अति प्रसन्न होई आरोगे ।

भावप्रकाश—या वार्ता कौ अभिप्राय यह है, जो - वैष्णव प्रीतिपूर्वक जा ठौर जैसे प्रकार सों श्रीठाकुरजी कों भोग धरत है, ता ठौर तैसे प्रकार सों श्री-

ठाकुरजी आप श्रीआचार्यजी, श्रीगुसाईजी की कानि सों साक्षात्, श्रीमुख में अंगीकार करत हैं। तातें वैष्णव कों उत्तम वस्तु जा भांति वनि आवे ता भांति श्रीठाकुरजी कों समर्पनी। यह सिद्धांत भयो।

सो वह सेठ और वह वैष्णव ऐसे परम कृपापात्र भगवदीय हते। तातें इनकी वार्ता कहां ताई कहिए। वार्ता ॥९१॥



अब श्रीगुसाईजी की सेवक एक बनिया, गुजरात में रहतो, तिनकी वार्ता की भाव कहत हैं—

भावप्रकाश—ये तामस भक्त हैं। लीला में इनकी नाम 'आनंददायिनी' है। ये 'छविसिंधि' तें प्रगटी हैं। तातें उनके भावरूप हैं। और आनंददायिनी की एक सखी है। वाकी नाम 'सुलोचना' है। इन के नेत्र बड़े सुंदर है। तातें श्रीठाकुरजी इनकी ओर टकटकी लगाई कै देखत हैं। सो आनंददायिनी तो यहां बनिया भयो। और इनकी बेटी सो 'सुलोचना' की प्रागट्य जाननी।

सो यह बनिया गुजरात में एक गाममें एक जैनी के जन्म्यो। सो वाकी पिता द्रव्यपात्र हुतो। सो वह या बेटा कों बोहोत लाड़ करे। सो बेटा वरस सोरह की भयो। तब इन की व्याह कियो। पाछे वा बनिया के बेटा कों एक वैष्णव की संग भयो। तब जाने वा वैष्णव की आचार देख्यो। तब वाकी रूचि वैष्णव धर्म पै भई। सो वाके मन में आई, जो - हों वैष्णव होऊं तो आछौ। पाछे या बनिया के बेटा ने वा वैष्णव सों कह्यो, जो - तुम मोकों वैष्णव करो तो आछौ। तुम्हारी आचार-विचार मोकों बोहोत रूचत है। हमारे यहां तो कोऊ नित्य न्हात हु नाहीं। सब मलीन रहत हैं। कहत हैं, जो - जादा पानी खर्च कियो न जाई। जीवजंतु मरे तो पाप होई। सो मोकों तो वह धर्म रूचत नाहीं। तातें हों तो वैष्णव होऊंगो। तातें तुम मोकों सेवक करो। तब वा वैष्णवने कही, जो - भाई! हम तो काहू कों सेवक करत नाहीं। परि तेरे वैष्णव होना होई तो दोइ चारि दिन में यहां श्रीगुसाईजी पधारेंगे। उन की सरनि जइयो। वे साक्षात् ईश्वर हैं। सो उनके सरनि गये तें तेरो कल्याण होइगो। तब वह बनिया के बेटा ने कह्यो, जो भलो, श्रीगुसाईजी पधारे तब तुम मोकों कहियो। हों उनको सेवक होऊंगो। मेरे मन में वैष्णव होइवे की बोहोत उत्कंठा है। तब वा वैष्णवने कह्यो, जो - भले, मैं तोंसों कहोंगो। पाछे वह तो अपने घर



गयो । परि वाके मन में बोहोत आरति रहे, जो - कब श्रीगुसाईजी यहाँ पधारे और हों उनको सेवक होऊँ । ऐसँ करत कछुक दिन में श्रीगुसाईजी वा गाम में पधारे । तब वा वैष्णव ने वा बनिया के बेटा सो क्यो, जो - श्रीगुसाईजी इहाँ पधारे हैं, तेरी ईच्छा होई तो वैष्णव होऊ । तब तो बनिया का बेटा प्रसन्न वह श्रीगुसाईजी के दरसन काँ आयो । और विनती कियो, जो - महाराज ! मोको कृपा करि अपनो सेवक कीजिए । हों आप के सरनि हूँ । ताते विलंब मति कीजिए । तब श्रीगुसाईजी वाकी बोहोत आरति देखि वाको नाम सुनाय सेवक किये । पाछे दूसरे दिन व्रत कराए । ता पाछे निवेदन कराए । तब वा बनिया के बेटा ने क्यो, जो - महाराज ! श्रीठाकुरजी पधराय दीजिए तो हों सेवा करों । तब श्रीगुसाईजी कहे, जो अब ही नहीं । काहेतें, जो - तेरे मा-बाप जैनी हैं । ताते तोसों अबही सेवा न बनि आवेगी । कछुक दिनमें तेरे मा-बाप मरेंगे । तब तू अडेल आईयो । तहां तोको सेवा पधराय देङ्गे । अबही तू वैष्णवन काँ संग करि । पाछे श्रीगुसाईजी आप तो उहां ते द्वारिकाजी काँ विजय किये । सो उहां कछुक दिन रहि पाछे अडेल पधारे । ता पाछे कछुक दिनमें वा बनिया काँ व्याह भयो । पाछे केतेक दिन पाछे वा बनिया के मा-बाप मरे । तब वह स्त्री काँ संग लेके अडेल आयो । सो स्त्री काँ श्रीगुसाईजी पास नाम-निवेदन करवायो । पाछे वह श्रीगुसाईजी सोँ विनती कियो, जो - महाराज ! अब मेरे कोई प्रतिबंध नहीं है । ताते कृपा करि भगवद् सेवा पधराय दीजिए । तब श्रीगुसाईजी वाकोँ एक लालजी काँ स्वरूप पधराय दिये । पाछे सेवा की सब रीति बतार्ड । ता पाछे वह बनिया श्रीगुसाईजी की आज्ञा मांगि श्रीठाकुरजी पधराय स्त्री काँ संग ले अपने देस आयो । सो भाव-प्रीति पूर्वक सेवा करन लाग्यो । नित्य वैष्णवन काँ संग करे । पाछे कछुक दिन में एक बेटा भई ।

घाता प्रसंग—२

सो वह बनिया परम भगवदीय हतो । सो वाके एक बेटा कुंवारी हती । सो कन्या के निमित्त वह बर दूँडन काँ गयो । परंतु कोऊ वैष्णव मिल्यो नहीं । तब एक जैन धर्मी ज्ञाति काँ मिल्यो । तब वासों अपनी बेटा काँ विवाह करि दीनो । सो वह वैष्णव की बेटा अपने घर काँ गइ । तब वह

लरिकिनी वाके घर में जैन धर्म अनाचार भ्रष्ट देखि कै मन में बोहोत दुःख करन लागी । घर में तो सब भ्रष्टाचार । और खाए बिना तो रह्यो न जाँय । तातें उन लरिकिनी ने अपनी सास तें कह्यो, जो-तुम्हें मोकों परोसनो होइ सो एक बेर ही परोस देहु । मैं तो कछू फेरि मांगोंगी नहीं । तव वाकी सास एक ही बेर वाकी पातरि में परोसे । तितनो ही वह लरिकिनी चरनामृत मिलाय कै खाँहि । परंतू दूसरी बेर न कछू खाँय न कछू लेय । या भांति साँ निर्वाह करें । सो ऐसे करत वोहोत दिन भए । सो वह लरिकिनी मन में वोहोत ही दुःख करे । और कहे, जो-या आपदा तें श्रीठाकुरजी कव छुटावेंगे । या भांति साँ वोहोत ही खेद करे । सो श्रीठाकुरजी तो परम दयाल हैं, भक्तवत्सल हैं । सो वह लरिकिनी कौ दुःख देखि कै श्रीनाथजी ने श्रीगुसाईजी साँ कह्यो, जो-वह बनिया वैष्णव की बेटी उह गाम में है । सो वाकौ दुःख मोतें सह्यो जात नहीं । तव श्रीगुसाईजी उह लरिकिनी कौ दुःख जानि कै थोरे से दिन में वह गाम में पधारे । सो वा गाम के बाहिर तलाव हतो । सो वा तलाव के ऊपर श्रीगुसाईजी ने डेरा किये । तव ता दिना वह बनिया वैष्णव की बेटी वा तलाव पर पानी भरन कों गई हती । तव उहां वा लरिकिनी ने श्रीगुसाईजी के ब्रजवासी देखे । तव उह लरिकिनी वा ब्रजवासी के ढिंग ठाढ़ी ठाढ़ी विचार किये । जो-ये ब्रजवासी तो मेरे बाप के घर नित्य आवत हते । तव वह लरिकिनी वा ब्रजवासी के ढिंग आय कै पूछ्यो, जो-तूम कौन हो ? और कहां तें आए हो ? तव उन ब्रजवासीन ने कही, जो-श्रीगुसाईजी श्रीगोकुल

तें पधारे हैं । सो हम सब ब्रजवासी उन के साथ हैं । सो श्रीगुसांईजी आज इहां उतरे हैं । सो आज तो इहां रहेंगे । और सवारे श्रीद्वारिकाजी कों पधारेंगे । तव वा लरिकिनी ने वा ब्रजवासी सों कही, जो - मैं तो फलाने वैष्णव की बेटी हों । और मेरे इहां तो मेरो पिता श्रीगुसांईजी कौ सेवक है । सो मोकों श्रीगुसांईजी के दरसन करावोगे ? मैं तो वैष्णव की बेटी हों । और इहां सुसरारि में तो जैन धर्मी हैं । तातें मोकों तो इहां परम दुःख है । सो श्रीगुसांईजी के दरसन करे तें मेरो दुःख निवृत्त होइगा । तव वह लरिकिनी ने उन ब्रजवासिन सों कहि कै वह जल कौ घड़ा तो वा तलाव पर धरि दीनो और आप वा ब्रजवासी के साथ जाँय कै श्रीगुसांईजी के दूरि तें दरसन किये । दंडवत् कीनी । तव श्रीगुसांईजी वा ब्रजवासी सों पूछे, जो - यह कौन है ? तव श्रीगुसांईजी सों वा ब्रजवासी ने विनती कीनी, जो - महाराज ! यह तो अमुके वैष्णव की बेटी है । तव वह लरिकिनी श्रीगुसांईजी कों दंडवत् करि कै पाछें वह तलाव पर आई कै जल कौ घड़ा भरि कै घर आई । सो घर में आई कै सोच करन लागी, जो - अब मैं कहा करों ? तव वाने अपनी सास सों कही, जो - मेरे पिता के गुरु श्रीगुसांईजी इहां पधारे हैं । सो तुम मोकों एक नारियल देऊ । तव वाकी सास ने कह्यो, जो - अरी वह ! तू कहं तो तेरे साथ आऊं, श्रीगुसांईजी के दरसन कों । तव वह ने कह्यो, जो - भलो, तुम हू चलो । तुम्हारी इच्छा हैं तो तुम हू चलो । सो घर तें वे दोउ जनीं एक-एक नारियल लै कै सास-वह चली । सो उहां श्रीगुसांईजी के पास गई । तव ब्रजवासिन ने

श्रीगुसाईजी साँ कही, जो महाराज ! अमूके वैष्णव की बेटी आई है । तब श्रीगुसाईजीने कह्यो, जो — कहो भीतर आवें । तब ये दोउ डेरा के भीतर जाँई कै श्रीगुसाईजी काँ दंडवत् किये । पाछे हाथ जोरि कै उहां ई ठाढ़ी होई रही । तब वहू ने अपनी विनती श्रीगुसाईजी साँ करी, जो मोकों नाम दीजिए । मैं आपकी सरनि आउंगी । तब श्रीगुसाईजी आज्ञा किये, जो — नाम देईगे । तब वाके सास हू के मन में नाम पाइवे कौ बड़ो उत्साह भयो । जो — ये तो साक्षात् ईश्वर हैं । मो पर कृपा करि कै नाम देईगे । तब सास ने वहू के हाथ विनती करवाई, जो — मोहू काँ नाम दे तो भलो है । तब वा वहू ने श्रीगुसाईजी साँ फेरि विनती करी, जो — महाराज ! मेरी सास हू नाम पायवे की विनती करति हैं । तब श्रीगुसाईजी ने कही, जो — भले । पाछे दोऊ जनीं श्रीगुसाईजी के आगे आय बैठीं । तब उन पर कृपा करि कै दोऊन काँ नाम दीनो । तब वे दोऊ नाम पाइ कै वैष्णव भई । पाछे श्रीगुसाईजी काँ नोरियल भेट धरि दंडवत् करि कै प्रसन्न मन साँ घर काँ गई । और उन के साथ वागाम की लुगाई पांच-सात जनीं और हू गई हती, श्रीगुसाईजी के दरसन काँ । सो वेऊ सब ताही समै श्रीगुसाईजी पास नाम पायो । सो वे नाम पाइ कै अपने अपने पति के आगे आइ कै सब समाचार कहे, जो — अब तो हम वैष्णव भई है । श्रीगुसाईजी पास नाम पाया है । ताते अब हमारो और तुम्हारो सब व्यवहार छूट्यो ।

पाछे वा लरिकिनी के सुसर ने अपनी स्त्री साँ कह्यो; जो — श्रीगुसाईजी मोहू काँ नाम देईगे । सो तू मोकों उहां ले

चलि । सो वह अपने बेटान सहित अपनी स्त्री तथा वह कों साथ लेंके श्रीगुसाईजी के पास जाई के नाम पाइवे की विनती कियो । तव श्रीगुसाईजी कृपा करि के उन सवन कों नाम दिये । पाछे वहने निवेदन की विनती कीनी । तव श्रीगुसाईजी वाकों निवेदन कराए । ता पाछे और सवनने निवेदन की विनती कीनी । तव उन कों एक व्रत कराई निवेदन कराये । तव वहने फेर विनती करि के कह्यो, जो—महाराज ! अब कछु सेवा पधराइ दीजिए । तव श्रीगुसाईजी वाकों श्रीनवनीतप्रियजी के वस्त्र की सेवा पधराये । तव वह वह सेवा पधराइ, अपने घर आई । सो वह के पाछे सब कुटुंब ने नाम-निवेदन पायो । ता पाछे गाम के और हू लोग वैष्णव भए, या भांति । पाछे दूसरे दिन श्रीगुसाईजी कों सवन विनती करि के उहां राखे । सो अपने अपने घर श्रीगुसाईजी कों पधराय के विनती करि के भेट धरी । या प्रकार श्रीगुसाईजीने वा वैष्णव की बंटी की कानि तें उन सवन कों अंगीकार कीने । तव वह लरिक्लिनी को दुःख गयो । या प्रकार श्रीठाकुरजी वाको दुःख सहि न सके । तातें थोरेसे दिन में वाको दुःख दूरि कीनो । पाछे श्रीगुसाईजी दूसरे दिन द्वारिका कों पधारं । पाछे लरिक्लिनी ने अपनी सास सों कह्यो, जो—अब हों रसोई करूंगी । तव सासने कह्यो, जो—भलेई, तू रसोई करि । पाछे वा लरिक्लिनी ने घर में तें सब अपरस काढ़ि के रसोई पोति, पात्र सब खासा करि, रसोई सिद्ध करि, पाछे श्रीठाकुरजी कों भोग धरयो । पाछे समे भये भोग सरायो । और घर के जा—नाम पाए हने तिन सों कह्यां, जो—जा प्रकार में करन हों

ताही प्रकार तुम करो । पाछें श्रीठाकुरजी कों अनोसर करि कै सवन कों महाप्रसाद लिवायो । या प्रकार आपु ही सव करि कै सवन कों आचार की विधि सिखाई । सो वे थारेसे दिन में परम भगवदीय भये । तब वह लरिक्निनी कौ सुसर तथा और हू लोग लुगाई कहन लागे, जो - हम पर श्रीगुसाईजी और श्रीठाकुरजी की कृपा भई है सो सव या वहू के प्रताप तें भई है । याही की कृपा तें हमारे अंगीकार भयो है । ता दिन तें वह वहू कों सव कोऊ भगवदीय करि कै जानन लागे । और घर में सव तें अधिक करि कै मानते ।

भावप्रकाश—या वार्ता कौ अभिप्राय यह है, जो - ताप करि प्रभु वेगि प्रसन्न होत हैं । तातें वैष्णव कों मन में ताप राखनो ।

सो वह वहू श्रीगुसाईजी की ऐसी कृपापात्र भगवदीय ही । तातें इनकी वार्ता कहां ताई कहिये । वार्ता ॥ ९२ ॥



अब श्रीगुसाईजी कौ सेवक तीन तृवा धारी वैष्णव, ब्राह्मन, सिद्धपुर कौ, तिनकी वार्ता कौ भाव कहत हैं—

भावप्रकाश—ये सात्विक भक्त हैं । लीला में इनकौ नाम 'जयश्री' है, सो जयश्री में श्रीस्वामिनीजी कौ अलौकिक सौंदर्य है । तातें श्रीठाकुरजी इनके अधीन व्है रहत हैं । ये 'छविसिंधी' तें प्रगटी हैं । तातें उन के भावरूप हैं ।

ये सिद्धपुर में एक ब्राह्मन के प्रगटे । सो जन्मत ही भगवन्नाम कौ उच्चार किये । 'श्रीकृष्ण' ऐसैं कह्यो । रुदन कियो नहीं । तब इनके माता-पिता आश्चर्य करन लागे । ता पाछें दिन तीन ताई माता कौ दूध पियो नहीं । तब माता कों बोहोत चिंता भई, जो - यह बालक जियेगो नहीं । तब माता ने गाँइ कौ दूध दियो, सो इन कछुक पियो । तब इन कों गाँइ कौ दूध देन लागे । पाछें बरस पांच कौ यह बालक भयो । ता दिन तें यह बालक श्रीकृष्ण नाम कौ जप करन लाग्यो । काहू सों बोले नहीं । काहू के पास बैठे नहीं । विरक्त सो रहे ।

माता - पिता जाने, जो - यह कोई लौकिक बालक नहीं। तातें कछु कहे नहीं। यह बालक कछु खान - पान करे नहीं। गौड़ कौ दूध पी के रहे। ऐसैं करत यह बरस पंद्रह कौ भयो। तब श्रीगुसांईजी सिद्धपुर पधारे। सो सरस्वती स्नान कौ पधारे। तब यह बालक सरस्वती में स्नान करत हतो। सो इनकों श्रीगुसांईजी के दरसन भए। सो साक्षात् पूरन पुरुपोतम के दरसन भए। तब यह विरक्त श्रीगुसांईजी सों दोऊ हाथ जोरि चिनती कियो, जो - महागज ! मैं आपकों पहिचाने हँ। सो अब कृपा करि मोकों सरनि लीजिये। बोहोत दिन भए विछरयो हँ। आप के दरसन आज पाए। तब श्रीगुसांईजी कहे, जो - तू देवी जीव है। तातें हम तोकों अंगीकार करिवे कौ यहां आए हँ। सो तू जलही में ठाढ़ो रहे। हम तोकों जलही में नाम निवेदन कराइ सरनि लेइंगे। पाछे श्रीगुसांईजी आप सरस्वती में स्नान करि वाको जलही में नाम - निवेदन कराये। सो निवेदन होत ही याकों सब लीला स्फुट भई। स्वरूप हृदयारूढ भयो। तब श्रीगुसांईजी आज्ञा किये, जो - तोको निरोध सिद्ध भयो। अब तोकों माया बाधा करेगी नहीं। तातें तू रसोइ करि भोग धरि महाप्रसाद ले। और चाहे जहां रहि। तोकों देस काल हू बाधा करेगो नहीं। पाछे श्रीगुसांईजी आप तो द्वारकाजी रत्नछोरजी के दरसन कौ पधारे। और यह विरक्त दसा में विचरन लाग्यो। चुकटी ल्याय रसोइ करि भोग धरि प्रसाद लेई। तब इन के मा-बाप कथ्यो, जो - बेटा ! अब तो तू अन्न खात है, तातें अपने घर में जेंयो करि। अलग रसोइ काहे कौ करत है ? तब इन कथ्यो, जो - हौं तो विरक्त हौं। मेरे तुम्हारे कछु संबंध नहीं। तातें मेरे में प्रमत्ता मति करो। नाँतरु दुःख पावोगे। इतनो कहि यह विरक्त तो घर तें निकसि गयो। सो अष्टाक्षर मंत्र कौ निरंतर जप करे। एक टौर कहूँ रहे नहीं। सदा भगवल्लीला के आवेस में छक्यो रहे। काहू सों कछु बोलै नहीं। या प्रकार रहे।

धार्ता प्रसंग—१

सो एक समे वह विरक्त श्रीनाथजी के दरसन कौ गुजरात तें आवत हतो। ताके पास तीन तृवा. कांधे पर तो ग्नासा कौ. पीछे कटि पर मर्यादी मेवकी कौ, आगे कटि पर बाहिर कौ. या भांति सों रहे आवें। सो जहां गाम जाँड तहां चुकटी मांगि के रसोइ करि श्रीठाकुरजी कौ भोग धरि

पाछे महाप्रसाद ले कै मजलि चले । सो ऐसे करत एक दिन मेह बोहोत बरस्यो । सो रसोई न बनि आई । पाछे दो दिन ओर हू मेह न खुल्यो । सो यह चल्यो । सो चल्यो न जाई । तब यह विचार कियो, जो—अब मैं कहा करों ? पानी तो रहत नहीं । और ऐसे में चुकटी कैसे मांगों ? कैसे रसोई करों ? ताते आजु तो कहू श्रीगुसाईजी को सेवक मर्यादी होइ तो ताके घर भली भांति सों महाप्रसाद लेऊ, पाछे सोऊं । तब मेरो सरीर आछी होइ । तीन रात्रि को भीज्यो हू ताते नीद न आई । ऐसे कहत चल्यो ।

भावप्रकाश—यहां यह संदेह होई, जो—यह वैष्णव तो तादसी है । ताते तादसी वैष्णव को भूखप्यास देहाध्यास तो बाधा करि सवत नहीं । देस-काल हू बाधा करत नहीं । सो या विरक्त वैष्णव को ऐसो कष्ट क्यों भयो ? और इनके मन में खानपानकी अपेक्षा क्यों भई ? तहां कहत है, जो—यह विरक्त चाहतो तो छिन एक में मेह खुलि जातो । और देहाध्यास भूख-प्यास हू बाधा न करती । परि आगे राजा की ऊपर कृपा करनी है । ताते प्रभुनने या भांति कौतुक कियो । सो तादसी वैष्णव को कुछ वस्तु की अपेक्षा होई नाही । और जो होई तो इन में भगवद् कृति जाननी । दूसरे की ऊपर कृपा करनार्थ । यह सिद्धांत जताए ।

सो एक बड़ो गाम हतो । तहां एक राजा हो । सो राजा ने अनेक व्याह किये । परंतु पुत्र काहू एक के न भयो । सो राजा वृद्ध होइवे में आयो । तहां एक ब्राह्मन सिव को उपासक आयो । ता ब्राह्मन को सिव दरसन देते । सो वह ब्राह्मन राजा के पास आयो । कह्यो, जो—मोको पांच हजार रुपैया देऊ तो मैं जतन करों । सो तुम्हारे अवस्य पुत्र होइगो । तब राजाने वा ब्राह्मन सों कह्यो, जो—मेरे भाग्य में पुत्र नहीं है ताते तू काहे को जतन करत है ?



तव यह ब्राह्मण ने कही, जो-मो पै महादेव सानुभाव है । तातें मैं महादेवजी सों कहि कै तुम कों पुत्र दिवाऊंगो । तव वा राजा ने वा ब्राह्मण कों पांच हजार रूपैया दिये । सो ब्राह्मणने रूपैया ले के बरूनी कराई । महादेव के नाम कौ जज्ञ कियो । वोहोत जतन किये । सो रूपैया सब व्यर्थ गए । कछु भयो नाही । तव तो वह ब्राह्मण महादेवजी पे मरन लाग्यो । तव महादेवजी प्रगट होई वा ब्राह्मण मों कहे, जो-तू हकनाक क्यों मरत है ? वाके भाग्य में पुत्र नाही । तव इन कही जो-एक लरिका राजा कों अवस्य दियो चाहिए । और महादेवजी सों कही, जो-मैं तुम्हारी वोहोत दिन सों सेवा करी हँ । तातें तुम या राजा कों एक लरिका तो देहु । तो मेरा वचन सत्य होई । नाही तो हों तुम्हारे ऊपर मरांगो । तव महादेव ने वा ब्राह्मण सों कही, जो-तू बैठयो रहे, मैं श्रीठाकुरजी सों पूछि आउं । यह कहिकै महादेव श्रीठाकुरजी सों जाँइ विनती करे, जो-महाराज ! मैं एक ब्राह्मण कौ वर दियो है । सो वह कहत है, जो-राजा कों एक पुत्र होई । जो-ऐसो न देउगे तो वह ब्राह्मण मेरे ऊपर मरत है । यह मुनि के श्रीठाकुरजी हँसि के कहे, जो-महादेवजी ! वह राजा के भाग्य में पुत्र सपने हूँ मैं नाही । तातें मैं कहां तें देउ ? तातें तुम जाँइ वा ब्राह्मण सों कहि देहु, जो-राजा के भाग्य में तो पुत्र नाही है । तोकों मरनो होई तो मरि । तव महादेवजी आइ के वह ब्राह्मण मों कहे, जो-मैं तेरे लिये श्रीठाकुरजी पे गयो हतो सो मैं श्रीठाकुरजी सों कही हतो । सो श्रीठाकुरजी ने अपने श्रीमुख तें कही, जो-राजा के भाग्य में पुत्र

नाहीं है । तातें तोकों मरनों होंइ तों मरि । हमारो दोष नाहीं । ऐसैं कहि कै महादेव तो चल गए । तव इहां ब्राह्मन राजा पास आयो । सो राजा सों कह्यो, जो — मैं तुम्हारी बात श्रीठाकुरजी ताई पहुंचाई । परंतु श्रीठाकुरजी अपने श्रीमुख तें कहे, जो राजा के भाग्य में पुत्र नाहीं है । तातें मैं कहा करों ? तव राजा ने कह्यो, जो — मैं तो प्रथम ही तुम सों कह्यो हतो, जो — मेरे भाग्य में पुत्र नाहीं है । पाछें वा राजाने वीस रुपैया दे कै वा ब्राह्मन कों विदाय कियो । और कह्यो, तुम आयो जायो करियो । कछू चिंता मति करो । मेरे भाग्य ही में नाहीं तों तुम कहा करो ? तव यह ब्राह्मन उठि कै अपने घर आयो ।

ताही गाम में एक और ब्राह्मन वैष्णव कौ घर हतो । सो वाकों यह नेम हुतो, जो — श्रीठाकुरजी के राजभोग सों पहुंचि कै पातरि ढांकि कै गाम के बाहिर एक तलाव हुतो तहां आइ कै जप करतो । और देखतो, जो — कोई वैष्णव मिले ताकों लिवाय ल्यावतो । महाप्रसाद प्रथम वाकों लिवाय कै पाछें आपु लेतो । जा दिन वैष्णव न मिलतो ता दिन एक पातरि ले गाँइ कों धरि कै महाप्रसाद आप लेतो । सो एक दिन वह तलाव पर बैठ्यो जप करत हुतो । इतने वह श्रीगुसाईंजी कौ सेवक विरक्त तीन दिन कौ भूख्यो सो वह तलाव परि आयो । सो यह वैष्णव कों देखि, तब तिलकमाला देखि कै जान्यो, जो — यह वैष्णव है । और उन हू जान्यो, जो विरक्त है, वैष्णव है । जो — और कोई होंइ तो ताकों एक तूबा सों काम चले । और यह

तो श्रीगुसांईजी को सेवक दीसत हैं । काहेतें ? तीन तृवा खासा, मर्यादी, वाहिर के हैं । पाछें श्रीकृष्ण-स्मरण कियो । परस्पर मिले, बड़ो आनंद भयो । तब वह वैष्णव - कह्यो, चलो ! घर महाप्रसाद लेऊ । पाछें इन को घर ले जाँइ के आछे महाप्रसाद लिवाए । कछु ता दिन उत्सव हतो । सो श्रीठाकुरजी आछी आछी सामग्री आरोगे हते । ताते महाप्रसाद भली भांति सों वा विरक्त वैष्णव ने लीनो । पाछें वा विरक्त ने वा वैष्णव सों कही, जो - मैं तीन रात्रि जाग्यो हूं । सो मोकों सोइवे को ठौर बतायां । तब याने एकांत आछे विछोना विछाय दिये । ता पर वह वैष्णव विरक्त बोहोत सुख पाय के सोयो । पाछें सेन-आरति के समै वा वैष्णव को जगायो । सो आय के दरसन करि के बैठयो । पाछें ब्यारू कराइ के भगवद्भार्ता करि फेरि सेन कियो । पाछें प्रातःकाल उठयो । तब वह विरक्त कह्यो, जो - अब मैं चलेंगो । तब वह वैष्णव ने कह्यो, जो - तुम को भूखे कैसें जान दीजिये ? ताते राजभोग-आर्ति करि के दरसन करि के महाप्रसाद लेके पाछें जइयो । पाछें राजभोग की आर्ति भई । ता पाछें आछी भांति सों महाप्रसाद लियो । पाछें वा विरक्त ने वा वैष्णव सों कहां, जो - मैं तुम्हारे घर बोहांत सुख पायो । ताते अब मैं बोहोत प्रसन्न हों । ताते तुम कछु मांगो । तब इन ब्राह्मन वैष्णव कह्यो, जो - श्रीगुसांईजी की कृपा तें मेरे सब कछु है । स्त्री. पुत्र सब सेवा में सानुकुल हैं । ताते मोकों तो कछु नहीं चाहिए । तब यह विरक्त कह्यो, जो - मैं तो अवश्य दे के जाउंगो । ताते स्त्री सों पृछो ।

तब वह वैष्णव ने अपनी स्त्री पुत्र सों पूछ्यो, और कह्यो, जो - अब कैसी करिये ? वैष्णव हठ परच्यो है । सो ये श्रीगुसांईजी कौ सेवक है । तातें ये कह्यो है सो सर्वथा देहिगो । परि अपने कछू चाहिए नहीं । और मांगनो कछू वैष्णव कौ धर्म नहीं । तब स्त्री ने कह्यो, जो - तुम अपने लिये कछू माँगों मति । या गाम कौ राजा वृद्ध भयो है । और या राजा के कोई पुत्र नहीं है । और आपुन या राजा के राज्य में सुख पायो है । तातें या राजा के मरें फिर कहा जानिये कैसो राजा बैठे । तातें या राजा के एक पुत्र मांगो । तब वह ब्राह्मण आइ कै कह्यो, जो - हम कों तो कछू नहीं चाहिए । परंतु या गाम के राजा के एक बेटा होंइ तो आछो है । तब वह वैष्णव प्रसन्न होंइ कै कह्यो, जो - एक कहा चारि बेटा होइंगे । ऐसं कहि कै वह विरक्त वैष्णव तो विदा होंइ कै गयो । पाछें वह ब्राह्मण महाप्रसाद लै कै राजा कों जाँइ कै आसीर्वाद कियो । पाछें राजा सों कह्यो, जो - राजा ! बधाई है । तिहारे चारि बेटा होइंगे । तब राजा हँस्यो । और कह्यो, जो - मैं हू कछूक दिन में मरुंगो । मेरे दांत हू टूट चूके, तू कहे के चारि बेटा होइंगे ! तब याने कह्यो, जो - राजा ! विस्वास राखिये । मेरे घर वैष्णव कहि गयो है । तातें तेरे सर्वथा पुत्र चारि होइंगे । तब इन कह्यो, जो - आछो । होइंगे तो हम नहीं कब कहत हैं ? तब ब्राह्मण आसीर्वाद दे कै आयो । पाछें चारि रानीन के गर्भ रह्यो । तब राजा ने कह्यो, जो - वह ब्राह्मण वैष्णव के बचन सत्य होत दीसत है । पाछें समय भए राजा के चारि पुत्र भए । सो राजा कों बड़ी आनंद भयो ।

नौवतखाना वाजन लाग्यो । तव वह सिव के उपासक ब्राह्मण ने पूछ्यो, जो - आजु राजा के घर कहा है ? जो - नौवत वाजत हैं ? तव सवन कह्यो, जो - राजा के चारि पुत्र भए हैं । तातें राजा कों वड़ो आनंद भयो है । सो नौवतखाना वाजत हैं । तव यह ब्राह्मण अपने मन में विचारि कियो, जो - मोकों तो महादेवजी पुत्रकी नाही कही, जो - श्रीठाकुरजी हू पुत्र की नाही करी हैं । सो मोकों राजा कें झुठो करायो । तातें मैं अब महादेव के ऊपर मरोंगो । पाछें एक तरवार लेकर महादेवजी के मंदिर में गयो । सो कह्यो, जो - मैं तुम्हारे ऊपर मरोंगो । मोकों तुम राजद्वार में झुठो करायो । ऐस कहि कै तरवार गरे में लगाय कै मरन लाग्यो । तेसही महादेवजी आय कै हाथ पकरि लियो । कह्यो, ब्राह्मण ! अब फेरि तू क्यों मरत है ? तव इन कही, जो - या राजा के भाग्य में पुत्र नाही है । सो अब चारि पुत्र याके कहां तें भए ? तव महादेवजी सुनि कै चक्रत होइ रहे । कहे, जो - मैं फेरि श्रीठाकुरजी पास पूछि आउं । तव महादेवजी फेरि आई के श्रीठाकुरजी सों कहे, जो - महाराज ! वह राजा कों आप कहे हते, जो - वाके भाग्य में पुत्र नाही है । सो अब उहां तो राजा के चारि पुत्र भए ? ताकौ कारन कहा है ? तव श्रीठाकुरजी कहे, जो - वा राजा के भाग्य में तो पुत्र नाही । परंतु तुम पूछो, जो - कौन प्रकार पुत्र भए ? कोंऊ वैष्णव कौ आसीर्वाद तो नाही भयो ? तव महादेवजी ने वा ब्राह्मण सों आइ कै कही, जो - तू राजा सों पूछि आउ, जो - चारि पुत्र एक संग ही कैसे भए ? तव यह ब्राह्मण राजा सों

आइ कै पूछ्यो, जो - तुम्हारे पुत्र कौन प्रकार सों भए ? मोसों तो महादेव ने कह्यो हतो, जो - राजा के भाग्य में पुत्र नहीं है । और श्रीठाकुरजी हू पुत्र की नहीं कीनी हती । सो अब ये पुत्र तुम्हारे कैसें भए ? सो कहो । तव राजा कहे, जो - हम तो जानत नहीं । जो - फलानो वैष्णव कहि गयो हतो । ताके वचन सत्य भए । तव उन कह्यो, जो - वाकों बुलावो । तव राजा ने वह ब्राह्मण वैष्णव को बुलाय कै पूछ्यो, जो - वैष्णव ! तुम पुत्र कहि गए हते सो मेरे चारि पुत्र भए । सो याकौ कारन कहो ? तुम कैसें जानें ? तव वह वैष्णव ने कही, जो - राजा ! हमारे घर एक श्रीगुसाईजी को सेवक विरक्त हमारो गुरु-भाई हुतो । सो तीनि दिन को भूखो हतो । सो मैं उन की सेवा करी । तव उन प्रसन्न होइ कै कह्यो, जो - तुम कछू मांगो ? तव मैं यह मांग्यो, जो - राजा के एक पुत्र होई । तव वाने कह्यो, जो - एक कहा चारि होइगे । सो श्रीगुसाईजी के सेवक झूठ बोले नहीं । यह सुनि कै राजा चक्रित होइ रह्यो । पाछें वह ब्राह्मण जाँइ कै महादेव सों कह्यो, जो - श्रीगुसाईजी के सेवक के आसीर्वाद तें पुत्र भए हैं । तव महादेवजी जाँइ कै श्रीठाकुरजी सों कहे, जो - श्रीगुसाईजी के सेवक के आसीर्वाद तें पुत्र भए हैं । तव श्रीठाकुरजी कहे, जो - वैष्णव ने मेरे ऊपर कृपा करी है । जो - वैष्णव यह कहतो, जो - राजा के घर श्रीठाकुरजी प्रगट होइगे तो मोकों प्रगट होनी परतो । यह तो पुत्र भए ताको कहा आश्चर्य है ? तव महादेवजी आइ कै वा ब्राह्मण सों कहे, जो - श्रीगुसाईजी को सेवक श्रीठाकुरजी

कों कहतो तो श्रीठाकुरजी कों प्रगट होनो परतो । यह तो पुत्र ही भए, ताको आश्चर्य कहा ? तव वा ब्राह्मणने आइ के राजा तें कह्यो. जो उन वैष्णव की आज्ञा तें श्रीठाकुरजी कों अवतार लेनो परतो । यह तो तुम्हारे पुत्र ही भए. ताको आश्चर्य कहा ?

भावप्रकाश—या वार्ता में यह संदेह है, जो - महादेव हू वैष्णव हूँ । तातें वे हू देते तो राजा कों पुत्र होतो । सो उन क्यों नहीं दिये ? तहां कहत है, जो - महादेव मर्यादा भक्त हूँ । तातें विधि अनुसार सब कार्य करत हूँ । सो राजा के भाग्य में पुत्र नहीं है ऐसो उन जान्यो तव वे चुप रहे । पाछें विष्णु के पास गए । सो विष्णु हू गुणावतार हूँ । सो उन हू नहीं कीनी । और वह विरक्त तो पुष्टिमार्गीय भक्त हूँ । कर्तुं, अकर्तुं, अन्यथा कर्तुं, ऐमें जो श्रोतृयोत्तम हूँ । सो या विरक्त वैष्णव के हृदय में विराजत हूँ । तातें इन में अलौकिक सामर्थ्य है. सो ये चाहे सो करि सकत हूँ ।

तव वा राजाने उह वैष्णव सों बुलाई कह्यो, जो - मोकों श्रीगुसांईजी कों सेवक करावो । तव वा वैष्णव ने श्रीगुसांईजी-कों विनती पत्र लिख्यो । जो - राज ! एक बेर यहां बेगि पधारोगे । तव श्रीगुसांईजी वा पत्र कों वांचि के केतेक दिन में राजा के गाम पधारे । तव उह राजा, महादेव कों उपासक ब्राह्मण आदि सब गाम श्रीगुसांईजी कों सेवक भयो ।

भावप्रकाश—यामें यह जतायो जो, वैष्णव के कहे कों विस्वास राखनो । वैष्णव उपगंत और कोई पदार्थ नहीं । वैष्णव की कृपा तें सब बात सिद्ध होत हैं ।

सो यह तीन तृवा वारों वैष्णव श्रीगुसांईजी कों ऐसो परम कृपापात्र भगवदीय हतो । तातें इनकी वार्ता कहां तांई कहिण् ?  
वार्ता ॥ १३॥



अब श्रीगुसाईजी के सेवक परमानंद सोनी, अडेल में रहते, तिनकी वार्ता की भाव कहत हैं —

भावप्रकाश—ये राजस भक्त हैं। इन की अलौकिक स्वरूप चौरासी वैष्णवन की वार्तान में आगे कहि आए है। लीला में इन की नाम 'चंद्रिका' है। सो चंद्रमा की उजियारी वत् इनकी कांति है। श्रीचंद्रावलीजी अनेक चंद्रमारूप है, तिन की यह अंतरगिनी सखी हैं। ये 'नागवेलिका' तें प्रगटी हैं, तातें इन के भावरूप हैं।

वार्ता प्रसंग—१

सो एक समै उन परमानंद सोनी ने श्रीगुसाईजी के पास नाम पायो हतो। सो वे परमानंद सोनी बड़े ही कृपापात्र भगवदीय भए। सो मार्ग के ग्रंथ श्रीसुबोधिनीजी में बोहोत ही रूचि हती। सो श्रीगुसाईजी आप नित्य कथा कहते, और पूछते तब उत्तर दे कै पूछते। और सुनते, कहते। सो सब परमानंद सोनी अपने हृदय में राखते।

और श्रीगुसाईजी के घर की गहनो होतो सो सब परमानंद सोनी गढ़ते। और कहते, जो - यह देव अंस है, गुरु अंस है। तातें मति कहूं अपने अंग लागे। और कहूं गिरे नाहीं। ऐसी सावधानी सों काम करते। और श्रीगुसाईजी आप श्रीमुख तें कहते, जो याकी गढ़ाई, मजूरी तुम लेऊ। काहेतें, जो - तेरे हू तो संसार लग्यो है। तब परमानंद सोनी श्रीगुसाईजी सों कहे, जो - महाराजाधिराज ! मोकों संसार में लेवे कों बोहोत ही ठौर है। आप की कृपा बल तें मेरे सब कछू सिद्ध है। और काहू बातकी न्यूनता नाहीं है। जो - आपकी कृपा ही बड़ो पदार्थ है। सो ऐसे कहे, कछू लै नाहीं। तब श्रीगुसाईजी ऐसी बात सुनि कै श्रीमुख तें कहे, जो - तुम्हारी ईच्छा होय सो करो।



तब परमानंद सोनी ने श्रीगुसांईजी सों विनती कीनी. जो — महाराजाधिराज ! आप की कृपा तें मेरे सब आनंद है । और मेरे कछू काहू बात कौ मनोरथ नाहों है । जो — आपकी कृपा ही बड़ो पदारथ है । और आप देन की कहत हो तो हों यह मांगत हूं. जो — आप मेरे ऊपर सदा प्रसन्न रहो । सो परमानंद सोनी के ऊपर आप सदा प्रसन्न रहतें । और कृपा करि के मार्ग के सिद्धांत-ग्रंथ, श्रीसुबोधिनीजी कौ गूढार्थ, सब समझाय के कहते । सो परमानंद सोनी के ऊपर श्रीगुसांईजी आप कृपा करि के इन के हृदय में भगवल्लीला स्थापें । सो परमानंद सोनी भगवद्द्रस में सदा मगन रहते ।

और कब हू वैष्णवन कों कथा में समुझ नाहीं परे तो वे सब श्रीगुसांईजी सों पूछते । तब श्रीगुसांईजी कहते, जो — तुम कों परमानंद सोनी कहेंगे । तब परमानंद सोनी के पास वैष्णव आय के पूछते । सो ताही कौ परमानंद सोनी वा वैष्णव कों उत्तर देते । सो वे परमानंद सोनी श्रीगुसांईजी के ऐसे कृपापात्र भगवदीय हते ।

भावप्रकाश—या वार्ता में यह जतायो, जो — वैष्णव कों श्रीठाकुरजी के द्रव्य सों और गुरु के द्रव्य सों सदा डरपत रहनो । और गुरु कौ कार्य निष्काम च्हे भक्ति भाव संयुक्त करनो, तब गुरु प्रसन्न होई । तानें मार्ग कौ सिद्धांत सगरो हृदयारूढ होई ।

वार्ता प्रसंग—२

और एक सभे कासी के और प्रयाग के पंडित श्रीगुसांईजी सों वाद करिवे कों आए । तब श्रीगुसांईजी आप तो सेवा में हते । तब परमानंद सोनी ने उन कौ समाधान करि के बेंठारे । पाछें परमानंद सोनी ने कह्यो. जो — तुम कहा पूछत हो ? तुम

अब श्रीगुसाईजी के सेवक परमानंद सोनी, अडेल में रहते, तिनकी वार्ता की भाव कहत हैं —

भावप्रकाश—ये राजस भक्त हैं। इन की अलौकिक स्वरूप चौरासी वैष्णवकी की वार्तान में आगे कहि आए हैं। लीला में इन की नाम 'चंद्रिका' है। सो चंद्रमा की उजियारी वत् इनकी कांति है। श्रीचंद्रावलीजी अनेक चद्रमारूप हैं, तिन की यह अंतरगिनी सखी हैं। ये 'नागवेलिका' तें प्रगटी हैं, तातें इन के भावरूप हैं।

वार्ता प्रसंग—१

सो एक समै उन परमानंद सोनी ने श्रीगुसाईजी के पास नाम पायो हतो। सो वे परमानंद सोनी बड़े ही कृपापात्र भगवदीय भए। सो मार्ग के ग्रंथ श्रीसुबोधिनीजी में बोहोत ही रूचि हती। सो श्रीगुसाईजी आप नित्य कथा कहते, और पूछते तब उत्तर दे कै पूछते। और सुनते, कहते। सो सब परमानंद सोनी अपने हृदय में राखते।

और श्रीगुसाईजी के घर की गहनो होतो सो सब परमानंद सोनी गढ़ते। और कहते, जो - यह देव अंस है, गुरु अंस है। तातें मति कहूं अपने अंग लागे। और कहूं गिरे नहीं। ऐसी सावधानी सों काम करते। और श्रीगुसाईजी आप श्रीमुख तें कहते, जो याकी गढ़ाई, मजूरी तुम लेऊ। काहेतें, जो - तेरे हू तो संसार लग्यो है। तब परमानंद सोनी श्रीगुसाईजी सों कहे, जो - महाराजाधिराज ! मोकों संसार में लेवे कों बोहोत ही ठौर है। आप की कृपा बल तें मेरे सब कछू सिद्ध है। और काहू बातकी न्यूनता नहीं है। जो - आपकी कृपा ही बड़ो पदार्थ है। सो ऐसैं कहे, कछू लै नहीं। तब श्रीगुसाईजी ऐसी बात सुनि कै श्रीमुख तें कहे, जो - तुम्हारी ईच्छ होय सो करो।

तब परमानंद सोनी ने श्रीगुसांईजी सों विनती कीनी. जो — महाराजाधिराज ! आप की कृपा तें मेरे सब आनंद है । और मेरे कछु काहू बात कौ मनोरथ नाहों है । जो — आपकी कृपा ही बड़ो पदारथ है । और आप देन की कहत हो तो हों यह मांगत हूं. जो — आप मेरे ऊपर सदा प्रसन्न रहो । सो परमानंद सोनी के ऊपर आप सदा प्रसन्न रहतें । और कृपा करि के मार्ग के सिद्धांत-ग्रंथ, श्रीसुबोधिनीजी कौ गूढार्थ, सब समझाय कै कहते । सो परमानंद सोनी के ऊपर श्रीगुसांईजी आप कृपा करि के इन के हृदय में भगवल्लीला स्थापे । सो परमानंद सोनी भगवद्‌रस में सदा मगन रहते ।

और कब हू वैष्णवन कों कथा में समुझ नाहीं परे तो वे सब श्रीगुसांईजी सों पूछते । तब श्रीगुसांईजी कहते, जो — तुम कों परमानंद सोनी कहेंगे । तब परमानंद सोनी के पास वैष्णव आय कै पूछते । सो ताही कौ परमानंद सोनी वा वैष्णव कों उत्तर देते । सो वे परमानंद सोनी श्रीगुसांईजी के ऐसैं कृपापात्र भगवदीय हते ।

भावप्रकाश—या वार्ता में यह जतायो, जो — वैष्णव कों श्रीगुरुजी के द्रव्य सों और गुरु के द्रव्य सों सदा डरपत रहनो । और गुरु कौ कार्य निष्काम व्है भक्ति भाव संयुक्त करनो, तब गुरु प्रसन्न होई । ततैं मार्ग कौ सिद्धांत सगरो हृदयारूढ होई ।

वार्ता प्रसंग—२

और एक समे कासी के और प्रयाग के पंडित श्रीगुसांईजी सों वाद करिवे कों आए । तब श्रीगुसांईजी आप तो मेवा में हते । तब परमानंद सोनी ने उन कौ समाधान करि के बेंठारें । पाछें परमानंद सोनी ने कह्यो. जो - तुम कहा पृच्छत हो ? तुम

कों मैं उत्तर देहूँ । जो - श्रीगुसांईजी तो आप सेवा में हैं । तब उन पंडितन परमानंद सोनी सों कह्यो, जो - तुम कों तो कहिवे कौ काम नाही है । जो - तुम वेद सास्त्रन की बात में कहा जानोगे ? तब परमानंद सोनी ने कह्यो, जो - भले ! तुम बैठो । श्रीगुसांईजी आप सेवा सों पहोंचि कै आवेंगे तब तुम कों उत्तर देइंगे । ता पाछें उन पंडित ब्राह्मणन सों परमानंद सोनी ने एक श्लोक 'श्रीभागवत' 'रास पंचाध्याई' कौ पूछ्यो । और कह्यो, जो - याकौ कहा अर्थ है ? तब उन पंडित ब्राह्मण ने कछू कौ कछू उत्तर दीनो । तब परमानंद सोनी ने याकौ अर्थ करयो । जो - ऐसे हैं । तब वे पंडित ब्राह्मण आपुस में मुख देखन लागे । उन आपुस में कह्यो, जो - भाई ! अब कछू पूछनो होई तो इन ही कों पूछि कै चलो । जिन के सेवक सूद्र ऐसैं हैं उन के गुरु की तो कहा कहनो ? जो तुम उन सों वाद करि कै जीति नाही सकोगे । ऐसैं आपुस में दतराय कै जो - कछू पूछनो हतो सो परमानंद सोनी सों पूछ्यो । ताकौ उत्तर वेद पुरान सास्त्र की रीति सों परमानंद सोनी दे कै उन कों निरुत्तर किये । तब वे पंडित हाथ जोरि कै कहे, जो तुम धन्य हो । जो - जाके सोनी सेवक सूद्र कों सरस्वती ऐसी स्फुर्त है तिन के गुरु की तो कहा कहनो ? तब उन पंडित ब्राह्मण अपने मन कौ समाधान करि कै उठि चले ।

ता पाछें घरी चारि में श्रीगुसांईजी आप बाहिर पधारे । सो गादी तकियान के ऊपर विराजे । तब एक वैष्णव ने सब समाचार कहे, जो - महाराजाधिराज ! कासी - प्रयाग के पंडित वाद करन कों आए हते । सो उन कों परमानंद सोनी ने

निरुत्तर कीने हैं । तब वे समाधान करि के पाछे फिरि गए । तब श्रीगुसांईजी आप श्रीमुख तें वा वैष्णव सों कह्यो, जो-या परमानंद सोनी कों श्रीआचार्यजी महाप्रभुन में और श्री-गोवर्द्धननाथजी में दृढ़ विस्वास हे । तातें या बात में कहा आश्चर्य ? सौ वैष्णव कों तो एक दृढ़ विस्वास चाहिए । और जाकों दृढ़ आश्रय होई ताकों जो चाहे सोई होइ । और जो अपने मन में विचार करे सोई कार्य करे । जा वैष्णव कों दृढ़ आश्रय नाही होई ताकों पश्चात्ताप क्लेश होई । सो ऐसे श्रीगुसांईजी आप श्रीमुख तें वा वैष्णव सों कहे, सो याही तें वह ऐसी बात है । तातें वैष्णव कों ऐसो ही चाहिए ।

सो वे परमानंद सोनी श्रीगुसांईजी के ऐसे परम कृपा-पात्र भगवदीय हं, तातें इनकी वार्ता कहां ताई कहिए ।

वार्ता ॥१४॥



अब श्रीगुसांईजी के लेशक रामदास विरक्त ब्राह्मण, खंभाइच के, तिनकी वार्ता कों भाव कहत हैं —

भावप्रकाश—ये सात्विक भक्त हैं । लीला में इनकी नाम ' कामेसुरी ' है । ये ' नागवेलिका ' तें प्रगटी हैं, तातें उनके भावरूप हैं ।

ये खंभाइच में एक ब्राह्मण के उहां प्रगटे । सो बालपने नों वैराग्य दसा में रहे । सो बरस पंद्रह के भए । तब खंभाइच तें एक मंग गुजगत के वैष्णवन कों श्रीगोवर्द्धननाथजी के दरसन कों चलयो । ता मंग में रामदास दृ चले । सो विरक्त दसा में रहे । चुकटी मांगि निर्वाह करे । गत्रि कों वैष्णवनकी मंडली में बैठे । सो भगवद् वार्ता सुने । ऐसे करत कलुक दिन में वा मंग के नाथ रामदास गोपालपुर आवे । सो श्रीगोवर्द्धननाथजी कों दरसन पाए ।

वार्ता प्रसंग—१

सो एक समे श्रीगुसांईजी श्रीनाथजीद्वार विराजत हुते । सो रामदास श्रीगुसांईजी के दरसन किये । तब इन श्रीगुसांई-

जी कों साष्टांग दंडवत् करि विनती कीनी, जो-महाराज ! कृपा करि कै नाम दीजिए । तव श्रीगुसाईजी आप आज्ञा किये, जो - स्नान करि आउ । तोकों नाम सुनावेंगे । तव रामदास तत्काल स्नान करि कै आये । पाछें श्रीगुसाईजी कों विनती किये, जो-महाराज ! मैं स्नान करि आयो हूं । तव श्रीगुसाईजी कृपा करि रामदास कों नाम सुनायो । पाछें श्रीगुसाईजी रामदास कों आज्ञा किये, जो-रामदास ! अब कहा मनोरथ है ? तव रामदास श्रीगुसाईजी सों विनती किये, जो - महाराज । मेरे परम भागि हैं, जो-आपने मेरे ऊपर कृपा करि मोकों सरनि लियो । अब अनत कहूँ जानो नाहीं है । आप जो आज्ञा करेंगे सो करोंगे । तव श्रीगुसाईजी रामदास कों आज्ञा किये, जो - तू 'दंडवती सिला' आगें बैठि छह महिना ताई अष्टाक्षर-मंत्र कौ जप करयो करि । पाछें तोकों और बात कहेंगे । तव तो रामदास प्रसन्न व्है दंडवती सिला आगें आय बैठें । सो नित्य नेम सों अष्टाक्षर की माला फेरें । ऐसें करत छह महिना वीते । तव रामदास श्रीगुसाईजी के पास आइ विनती किये, जो-महाराज ! आप की आज्ञा प्रमान छह महिना लों अष्टाक्षर कौ जप कियो । अब कहा कर्तव्य ह ? सो कृपा करि कै कहिए । तव श्रीगुसाईजी आप रामदास कों आज्ञा किये, जो - रामदास ! काल्ह तोकों ब्रह्म-संबंध करावेंगे, आज श्रीगोवर्द्धननाथजी के दरसन करो । पाछें श्रीगुसाईजी आप स्नान करि कै श्रीगिरिराज पर्वत ऊपर श्रीगोवर्द्धननाथजी के मंदिर में पघारे । सो उत्थापन-भोग धरें । पाछें दरसन खुले । तव सब वैष्णवन श्रीनाथजी के दरसन

किये । सो ता समै रामदास हू श्रीनाथजी के दरसन किये । सो महा अलौकिक दरसन भए । सो सरीर की सुधि रही नाहीं । सो दरसन के आवेस में मूर्छा खाय कै गिरि परे । तव घरी दोड़ में सुधि आई, तव उठे । तव ये समाचार सब भीतरिया ने आइ के श्रीगुसाईजी आगे कहे । तव श्रीगुसाईजी सेन-भोग धरि के वाहिर पधारे । तव रामदास सां पूछे, जो - रामदास ! कहा समाचार है ! तव रामदास श्रीगुसाईजी सां विनती किये, जो - महाराज ! आपकी कृपा सां श्रीगोवर्द्धन-नाथजी अलौकिक दरसन दिये हैं । सो तामें मन उरञ्जि रह्यो है । तव श्रीगुसाईजी रामदास सां कहे, जो - रामदास ! तुम्हारे अहो भाग्य है, जो - श्रीनाथजी ने या प्रकार दरसन दिये । ता पाछें समय भए सेन-भोग सराय वीरी अरोगाइ. सेन आरति करि अनोसर करि श्रीगुसाईजी पर्वत तें नीचे उतरे । तव रामदास हू श्रीगुसाईजी के पाछें आये । ता पाछें श्रीगुसाईजी अपनी बैठक में विराजे । तव रामदास श्रीगुसाईजी कां दंडवत् करि उठि चले, सो दंडवती सिला आगे आय बैठे । सो सगरी रात्रि श्रीगोवर्द्धननाथजी के स्वरूपानंद कां अनुभव किये । पाछें सबेरे वेगि न्हाइ के श्रीगुसाईजी के पास आय ठाढ़े रहे । तव रामदास श्रीगुसाईजी कां विनती किये, जो - महाराज ! कृपा करि ब्रह्मसंबंध कराइए । तव श्रीगुसाईजी रामदास सां कहे, जो - तोकां श्रीगोवर्द्धननाथजी के सन्मुख ब्रह्मसंबंध करावेंगे । सिंगार समै । तातें श्रीगोवर्द्धननाथजी के मंदिर में जाय बैठि । तव रामदास पर्वत ऊपर जाय श्रीगोवर्द्धननाथजी के मंदिर में बैठे । पाछें श्रीगुसाईजी हू स्नान करि

पर्वत ऊपर पधारे । सो श्रीनाथजी कों जगाय मंगल-भोग धरे । ता पाछें समै भए भोग सराय मंगला-आरति किये । पाछें सिंगार किये । ता पाछें रामदास कों बुलाय ब्रह्मसंबंध कराये । तब रामदासने श्रीगुसांईजी सों विनती कीनी, जो - महाराज ! अब कहा आज्ञा है ?

तब श्रीगुसांईजी आज्ञा किये, जो - रामदास ! छह महिना और हू तू दंडवती सिला आगें वैठि पंचाक्षर कौ जप करि । तब रामदास ने वाही प्रकार छह महिनालों पंचाक्षर कौ जप कियो । पाछें रामदास श्रीगुसांईजी पास आय दंडवत् किये । तब श्रीगुसांईजी आज्ञा किये, जो - अब तेरो मन सुद्ध भयो है । तातें और ठौर भटकेगो नहीं । तब रामदास विनती किये, जो - महाराज ! अब कछू सेवा दीजिये । तब श्रीगुसांईजी रामदास कों सागधर की सेवा सोंपे । सो जा दिन रामदास सागधर की सेवा में न्हाए ताही दिन श्रीगोवर्द्धननाथजी रामदास के पास पधारि रामदास कों आज्ञा किये, जो - रामदास ! हम 'गुलाल कुंड' पै पधारत हैं । सो तू सीतल भोग की सामग्री लेकै बेगि अइयो । तब रामदास बेगि बेगि फलफूल सिद्ध किये । ता पाछें सीतल सामग्री सिद्ध किये । सो एक टोकरा में आछी भांति धरी । पाछें गुलाल कुंड आए । तब श्रीगोवर्द्धननाथजी आपु रामदास सों कहे, जो - रामदास ! सामग्री ल्यायो ? तब रामदास विनती किये, जो - महाराज ! ल्यायो हूं । पाछें रामदास गांठि खोलि सब सामग्री आगें धरे । तब श्रीगोवर्द्धननाथजी सखा-मंडली समेत आरोगे । सो दरसन रामदास कों भयो । सो रामदास



अपने भाग्य कों सराहन लागे ।

और इहां श्रीगुसाईजी स्नान करि पर्वत पर पधारे ।  
सो सागघर में आए । सो रामदास कों देखे नाहीं । तव  
श्रीगुसाईजी आप फलफूल की सेवा किये । पाछें सागघर की  
सामग्री लेके आप मंदिर में पधारे ।

और रामदास के मन में बड़ो भय भयो, जो - देखो !  
आज ही तो सागघर की टहल मिली और आज ही मंदिर में  
नागा भई । सो श्रीगुसाईजी आप निश्चय खीझेंगे । पाछें  
रामदास वेगि वेगि सब पात्र समेटि अपरस में न्हाय मंदिर में  
आए । सो भोग के दरसन खुले हते । सो दरसन किये ।  
ता पाछें श्रीगुसाईजी संध्या-आरति करि श्रीनाथजी कौ  
सिंगार बड़ो करत हते । तव श्रीनाथजी श्रीगुसाईजी सों  
कहें, जो - रामदास मेरे संग गुलाल कुंड आयो हतो । सो  
वासों तुम कछू मति कहियो । पाछें श्रीगुसाईजी सेन-भोग  
धरि वाहिर पधारे । तव रामदास कों बुलाय एकांत में कह्यो,  
जो - रामदास ! तुम्हारे बड़े भाग्य हैं । जो - तुम कों आजही  
टहल मिली और आज ही श्रीनाथजी कृपा किये । तव  
रामदास विनती किये, जो - महाराज ! सब आप की कृपा तें  
भयो हे । नांतरु हों कहा लाइक हतो ? तव श्रीगुसाईजी  
आप रामदास सों आज्ञा किये, जो - आज पाछें तुम श्रीनाथ-  
जी की आज्ञा में रहियो । श्रीनाथजी तुम कों जहां ले जाँड़  
तहां जेयो । हम सागघर में दूसरो मनुष्य राखेंगे । और  
तुम कों अवकास मिलें तव तुम सागघर की सेवा करियो ।  
तव रामदास प्रसन्न वह कहें, जो - महाराज ! आपकी आज्ञा में

रहनो यह जीव कौ धर्म है। पाछें रामदास वोहोत प्रसन्नता सों सेवा करन लागे। ता पाछें श्रीआचार्यजी के ग्रंथन कौ एकांत में पाठ करते। अष्टाक्षर पंचाक्षर अहर्निस जपते।

भावप्रकाश—या वार्ता कौ अभिप्राय यह है, जो - अष्टाक्षर मंत्र कौ जप किये तें हृदय सुद्ध होत है। और पंचाक्षर के जप किये तें विरह कौ दान होत हैं। तव श्रीगोवर्द्धननाथजी अपनी लीलान कौ अनुभव करावत हैं। तातें वैष्णव कों अष्टाक्षर पंचाक्षर कौ जप अवस्य करनो।

और श्रीगुसांईजी आप रामदास कों दंडवती सिला आगे बैठि कै जप करन कों कहे, ताकौ आसय यह, जो - दंडवती सिला हरिदास वर्य के चरन हैं। तातें भक्तन के सानिध्य उन कौ आश्रय करि जप किये तें तत्काल भगवद्दरस की प्राप्ति निश्चय होइ यामें संदेह नाहीं, यह भाव जतायो।

और रामदास परम प्रीति सों श्रीगोवर्द्धननाथजी की सेवा करते। और राजभोग पाछें श्रीगोवर्द्धननाथजी की प्रसादी रसोई में जाय महाप्रसाद लेते। और इन कों श्रीगुसांईजी कौ जूठनि महाप्रसाद हू मिलतो। सो वह महाप्रसाद लेइ निर्वाह करते। पाछें सांझ कों सेन पाछें श्रीगुसांईजी की कथा सुनते। ता पाछें अपनी कोठरी में जाँइ भगवद्वार्ता कीर्तन करते। सो दोइ चारि वैष्णव होते सो सुनते। पाछें सब कों महाप्रसाद देते। ता पाछें आप चना चवेना खाँइ कै सोय रहते। सो घरी चारि सबेरे उठि कै देहकृत्य करि कै दंतधावन करि स्नान करि श्रीनाथजी की सेवा में जाते। सो सेवा सों पहोंचि गोविंद-स्वामी की 'कदमखंडी' में जाते। सो गोविंदस्वामी के पास बैठते। सो गोविंदस्वामी कीर्तन करते ता समय श्रीगोवर्द्धननाथजी नृत्य करते। सो रामदास दरसन करते। या प्रकार श्रीगोवर्द्धननाथजी रामदास पर कृपा करते।

सो केतेक दिन पाछें श्रीगुसाईजी आपु श्रीगोकुल पधारिवे की तैयारी करी । तव रामदास ने विनती करी, जो-महाराज ! कृपा करि कै फेरि कव पधारोगे ? तव श्रीगुसाईजी आज्ञा किये, जो-हम बेगि आवेंगे । और तुम सेवा श्रीनाथजी की भली भांति सां करियो ।

सो रामदास श्रीगुसाईजी के ऐसे कृपापात्र भगवदीय हें, तातें इन की वार्ता कहां ताई कहिए ? वार्ता ॥१५॥



अब श्रीगुसाईजी को सेवक रेंडा उद्वर ब्राह्मण, गुजरात में क्षपडधनज गाम है तहां रहतो, तिनकी वार्ता को भाव कहत हैं—

भावप्रकाश—ये तामस भक्त हैं । लीला में इन को नाम 'संज्ञिनी' है । 'नागवेलिका' तें प्रगटी हैं, । तातें उनके भावरूप हैं ।

वार्ता प्रसंग—१

सो वह अवधूत दसा में रहतो । व्याह जन्मही तें नाहीं कियो । सो एक समे श्रीगुसाईजी गुजरात पधारे हते तव वाकों नाम सुनायो हतो । तव रेंडा ने श्रीगुसाईजी सां विनती कीनी, जो-महाराज ! मेरे तो कछू संग्रह है नाहीं । मैं तो अवधूत दसा में रहत हूं । सां अब मोकों कहा आज्ञा है ? सां आप कृपा करि कै कहिये । तव श्रीगुसाईजी आज्ञा किये, जो-तू अपने हाथ सां रसोई करि भोग धरि महाप्रसाद लीजियो । और रसोई करिवे को अपने मन में सुख मानियो । दुःख मति मानियो । याही तें तेरा भलो होइगो । तव रेंडा ने विनती करी, जो-महाराज ! भोग धरिवे कां सेवा पधराय दीजिये । तव श्रीगुसाईजी रेंडा कां ब्रह्मसंबंध करवाय के पाछें एक श्रीनवनीतप्रियजी की कुन्ही लाल

जो-रेंडा ! अब निर्वाह कैसें होत है ? तव रेंडा ने कही,  
जो-राज ! श्रीठाकुरजी तो डोकरी के भेले विराजत हैं ।  
और मैं गाम में ते चुकटी माँगि ल्यावत हूं । तातें भलीभांति  
निर्वाह होत है । तव श्रीगुसाईंजी आप पूछे, जो-चुकटी  
कौन कौन के घर तें ल्यावत हो ? तव रेंडा ने कही, जो-  
तुम्हारी ज्ञाति के भट्ट हैं तथा सेवक लोग हैं और ब्रजवासीन  
के घरन तें ल्यावत हों । तव श्रीगुसाईंजी ने कह्यो, जो-आज  
पाछें भट्ट और सेवक तथा जहां हमारी सत्ता कौ द्रव्य होंइ तहां  
तें चुकटी मति लीजियो । गाम में ब्रजवासी हैं, और हैं, तहां  
तें लीजियो । तव यह सुनि कै रेंडा ने विनती करी, जो-  
महाराज ! आज पाछें ऐसें ही करुंगो । ता पाछें रेंडा भट्ट और  
सेवक भीतरियान के घर तें चुकटी न लेतो । सो रेंडा के ऊपर  
श्रीगुसाईंजी बोहोत प्रसन्न रहते ।

वार्ता प्रसंग—२

बोहोरि एक दिन अर्द्ध रात्रि के समै श्रीगुसाईंजी बोहोत  
प्रसन्नता में बैठे हते । सो ता समै रेंडा सां पूछ्यो, जो - तेरो  
मन श्रीगोकुल में लगत है ? तव रेंडा ने विनती करी, जो -  
महाराज ! मेरे तो सर्वस्व धन आप हो । और नित्य लीला  
यहां होत है । सो आपकी कृपा तें मन बोहोत लग्यो है ।  
परंतु कछू अनुभव नाहीं भयो । सो आप कृपा करोगे तव  
होइगो । तव आप आज्ञा किये, जो - काल्हि तू मंगलार्ति  
के दरसन करि अकेलो 'रमनरेती' जैयो । तहां कछू होइगो ।  
तव यह सुनि कै रेंडा बोहोत प्रसन्न भयो । सो रात्रिकों ऐसी  
आर्ति मन में भई, जो - नीद न परी । पाछें प्रातःकाल उठि

दहकृत्य करि श्रीयमुनाजी में स्नान करि. आइ. श्रीगुसांईजी कों दंडवत् करि पाछें श्रीअंग की कछु खवासी की सेवा कीनी। तव श्रीगुसांईजी कहे, जो-तृ मंगला पाछें 'गोप कूप' में स्नान करि रमनरेती जैयो। तहां कछु होयगो। पाछें समय भयो तव श्रीनवनीतप्रियजी के मंगला के दरसन करि रमनरेती कों चलयो। सो गोप कूप में न्हाय पंचाक्षर मंत्र कौ जप करन लाग्यो। सो पांच माला पूरन भई और मुरली कौ सब्द श्रवन में परयो। सो आर्ति करि व्याकुल भयो। ताही समै श्रीठाकुरजी, श्रीवलदेवजी पधारे। सो दरसन करत ही मूर्छा खाँप गिरयो। सो देहानुसंधान भूल्यो। तव श्रीठाकुरजी अपने गरें तें फूल की माला याके कंठ में डारि आप तो पधारे। सो दुपहेर ढरि गयो। तव वह डोकरी अपने श्रीठाकुरजी सों पहोंचि महाप्रसाद ढांकि के श्रीगुसांईजी पास आय के रेंडा कों सगरे ढूँढयो। परि कहुं पायो नहीं। तव डोकरी ने श्रीगुसांईजी सों पूछी, जो-महराज! में आज रेंडा कों सगरे ढूँढयो परि कहुं पायो नहीं। सो अब ताई महाप्रसाद लियो नहीं है। तव श्रीगुसांईजी आप कहे, जो-रेंडा तो रमनरेती में हे। तहां ते लियाय ल्याऊ। तव वह डोकरी तत्काल दंडवत् करि के रमनरेती गई। सो जाँय के देखें तो रेंडा कों कछु सरीर की सुधि नहीं। और सुंदर कुंद के पुष्प की माला याके गरे में देखी। तव डोकरी ने विचारयो, जो-आज रेंडा पै भगवद् कृपा भई है। सो यह माला श्रीठाकुरजी प्रसादी दिये हैं। तव डोकरी ने आधी माला तोरि के अपने आंचर में बांधी। पाछें रेंडा कों जगायो। सो तीन घरी पाछें

रेंडा जाग्यो । तब डोकरी ने कही, जो - अब कहा समाचार है ? तब रेंडा ने कही, जो - अब तोसां कहा छिपाऊं ? श्रीगुसाईजी की कृपा तें श्रीठाकुरजीने दरसन दिये । परि हां आछी भांति दरसन करि न सक्यो । तब डोकरीने कही, जो - रेंडा ! तेरो धन्य भाग्य है । जो - श्रीठाकुरजी के दरसन भए । अब चलो श्रीगुसाईजी की सेवा कौ समय भयो है । तब रेंडा और डोकरी घर में आय महाप्रसाद लिये । तब रेंडा कों सगरी सुधि आछी भांति सां भई । तब डोकरी ने कही, जो - यह माला फूल की आधी मेरे पास है सो तुम कहो तो मैं राखों । और चाहो तो लेओ । कृपा तो तुम्हारे ऊपर भई है । तुम्हारे पाछे मोकों मिली है । तब रेंडाने कही, जो - तुम हू राखो । पाछे उत्थापन कौ समय भयो । तब रेंडाने आय श्रीगुसाईजी कों दंडवत् करयो । तब श्रीगुसाईजी पूछे, जो - रेंडा कहा समाचार है ? तब रेंडाने सब प्रकार श्रीगुसाईजीके आगे कही । जो मोको दरसन होत मूर्छा आई । सो मैं गिरयो । पाछे जाग्यो तब मैं अपने गरे में फूल की माला देखी । तब श्रीगुसाईजी यह आज्ञा किये, जो - भगवद् सेवा करि कै अज हू भगवद् धर्म दृढ नहीं भयो । तातें दरसन मात्र ही भयो । और यह माला अपने कंठ की दै कै पधारे हैं । तब रेंडाने श्रीगुसाईजी सां विनती करी, जो - महाराज ! भगवद् धर्म दृढ होई सो प्रकार कृपा करि कहिए । ताही प्रकार मैं करों । तब श्रीगुसाईजी कहें, जो - कहूंगो, तू चिंता मति करे । ऐसे आज्ञा करि आप मंदिर में पधारि, श्रीनवनीतप्रियजी कों उत्थापन तें सेन पर्यंत की सेवा सां पहोंचि, अनोसर करवाय पाछे बैठक में

पधारि श्रीसुबोधिनी की कथा कहें । पाछें सब वैष्णव दंडवत् करि विदा भए । तव रेंडा अकेलो रह्यो । तव रेंडा ने कही, जो - अब मोकों कहा आज्ञा है ? सो मैं करों । तव श्रीगुसाईजी कहें, जो - तू अपना व्याह करि । तव रेंडा ने विनती करी, जो - महाराज ! मैं बालपने तें अवधूत दसा में रहत हों और अब मैं पचास बरस कौ भयो । मोकों अपनी लरिकिनी कौन देइगो ? और अब मैं आपके चरन छोरि कै कहां जाऊं ? तव श्रीगुसाईजी कहें, जो - मेरी आज्ञा है । तू अपने देस में जाइ कै व्याह करि । तोकों कछु बाधक न होइगी ।

भावप्रकाश—यहां यह संदेह होई, जो - श्रीगुसाईजी आप रेंडा कों या अवस्थामें व्याह करिये की आज्ञा कैसे किये ? और रेंडा कों तो भगवल्लीला कौ अनुभव है । तातें अब इनकों संसार में रहनो उचित नाहीं । तहां कहत हैं, जो - रेंडा नें संसार कौ अनुभव कियो नाहीं है । तातें वैराग्य दृढ भयो नाहीं है । सो वैराग्य दृढ भए विनु भगवद् रस की अवधारना होत नाहीं । सो रेंडा प्रभुनकी लीला के दर्शन करि कै मूर्च्छित होइ गयो । स्वरूप की ह अवधारना कर सक्यो नाहीं । याही तें श्रीगुसाईजी रेंडा कों व्याह करिये की आज्ञा किये । और दूसरो अभिप्राय यह है, जो - रेंडा की स्त्री देवी है । सो इन द्वाग स्त्रीकों अंगीकार करनो है । तातें रेंडा कों देस में जाइ कै व्याह करवेकी श्रीगुसाईजी आप आज्ञा किये ।

और तोकों आपही तें तेरी ज्ञानि कौ ब्राह्मण कथा देइगो । तव रेंडा ने कही, जो - आप आज्ञा देउगे ताही प्रकार मैं करुंगो । जो - प्रातःकाल कों मंगला के दर्शन करि कै देस कों जाउंगो । तव श्रीगुसाईजी एक मोहोर एक वीरा के भीतर धरि कै रेंडा कों दे कै यह आज्ञा किये, जो - जब तू अपनी स्त्री के पास जाय तव यह वीरा श्वालिक के आवो तू लीजो, आवो स्त्री कों दीजो । तव रेंडा वीरा लें दंडवत्

कियो । तव नेत्रनमें पानी भरि आयो । जो - अब मोकों श्रीगोकुल कौ दरसन कब होइगो ? तव आप कहे, जो - तू चिंता मति करे । तू फेरि आवेगो । यह सुनि कै रेंडा कों कछू धीरज भयो । पाछें श्रीगुसांईजी पोंठें । तव रेंडा कों मारे दुःख के रात्रि कों नीद न आई । सगरी रेनि विचार करत बीती । जो - अब श्रीगुसांईजी की आज्ञा तें देस कों तो अवस्य चलनो । पाछें होइगो सो सही । पाछें प्रातःकाल देहकृत्य करि न्हाय मंगला के दरसन किये । तव श्रीगुसांईजी आज्ञा किये, जो - राजभोग-आर्ति के दरसन करि कै जैयो । पाछें राजभोग-आर्ति भई सो दरसन करे । ता पाछें श्रीगुसांईजी अनोसर कराय बैठकमें पधारि भोजन करि जूठिन की पातरि रेंडा कों धरी । सो महाप्रसाद रेंडा ने लियो । पाछें श्रीगुसांईजी पास आय विनती करी, जो - राज ! व्याह करि स्त्री कों नाम सुनायवे कों यहां ल्याऊं ? तव आप कहे, जो - व्याह करि पहिले तू ही नाम सुनाइयो । पाछें मैं नाम सुनाउंगो । तव रेंडा दंडवत् करि अपने घर वा डोकरी पास आय सब समाचार कहे । जो - मैं देस जात हूं । तव वह डोकरी चुप व्है रही । पाछें भगवद् इच्छा जानि रेंडा अपने श्रीठाकुरजी कों संपुट में पधराय वह माला रमनरेती तें पाई हती, तामें तें आधी डोकरी ने राखी हती, सो लैकै डोकरी सों विदा होइ कै अपने देस कों चल्यो । सो जब कोस चारि गाम बाकी रह्यो तहां एक ' संजाइ ' गाम बीचम आयो । सो रात्रि होंइ गई । तव रेंडा ने विचार कियो, जो - गाम के बाहिर तलाव वोहोत सुंदर है । होंइ तो



रात्रि कों यहांई सोय रहों । काल्हि अपने गाम जाउंगो । सो उष्णकाल के दिन हते । सो वा तलाव पे रेंडा उतरयो । सो रेंडा की ज्ञाति कौ एक ब्राह्मण वा गाममें रहत हतो । सो वाके एक बेटी हती । सो एक दिन वा लरिकिनी कों खेलन में स्याँप ने काटी । सो वाके माता-पिता वोहोत दुःख करन लागे । गारुड़ी सों झराए । तव वा ब्राह्मण ने कही, जो - अब लरिकिनी आछी होइ तो कहू निष्कंचन गरीब ब्राह्मण कों विवाह करि देउंगो ! तव वा लरिकिनी की माताने कही, जो - मेरे हू मनमें ऐसी है । पाछे वह आछी भई । सो वह ब्राह्मण प्रातःकाल नित्य गाम तें निकरि के वा तलाव ऊपर आवे । सो जो कोई नयो मनुष्य तलाव ऊपर देखे तासों पूछे । जो तुम कौन ज्ञाति हो ? कहाँ रहत हो ? सो प्रातः काल रेंडा देहकृत्य करि दंतधावन करि स्नान करत हतो । तव वा ब्राह्मण नें गाममें तें आय रेंडा सों पूछ्यो जो - तुम कौन ज्ञाति हो ? कहा तुम्हारो नाम है ? कौन गाम में रहत हो ? तव रेंडा ने कही, जो - यहां सों चारि कोस पे कपडवनज गाम है । तहां में रहत हूं । उदंबर ब्राह्मण फलाने कौ बेटा हूं और रेंडा मेरो नाम है । और श्री-गोकुल तें मैं आयो हूं । अब मैं अपने घर कों जात हों । तव यह सुनि के ब्राह्मण ने प्रसन्न होइ के कह्यो, जो-यह तो मेरी ज्ञाति कौ ब्राह्मण है । तव वा रेंडा सों पूछ्यो जो - तुम्हारो व्याह कहाँ भयो है ? तव इन ने नाहीं कीनी । तव तो ब्राह्मण ने वोहोत विनती कीनी और कह्यो, जो - मेरे एक लरिकिनी है, सो मैं तुम कों देत हूं । और व्याह करि

तुम हू इहां रहो । और तुम्हारो मन होइ उहां जैयो । तव रेंडा ने कह्यो, जो - आछो । श्रीगुसाईजी की आज्ञा भई ही सोई भई । तव वा ब्राह्मन ने रेंडा को अपने घर लै जाँइ के पूछी, जो - खानपान की कैसें है ? तव रेंडा ने कही, जो - तुम्हारे हाथ की न खाउंगो । एक घर न्यारो देउ । तव वह ब्राह्मन उपर कौ घर खोलि कै आप नीचे रह्यो । तव रेंडा वा ब्राह्मन सां सीधो ले रसोई करि भांग धरि महाप्रसाद लियो । रेंडा कछुक दिन ऊहां रह्यो । सो वह ब्राह्मन रेंडा कौ आचार विचार देखि कै बोहोत प्रसन्न भयो । पाछे वा ब्राह्मन ने पंडित ब्राह्मन को बुलाय कै लग्न सोधि कै अपनी बेटी कौ रेंडा सां व्याह करि दियो । पाछे रेंडा उह ब्राह्मन के संग वाके घर बरस तीनि रह्यो । पाछे वा ब्राह्मन सां रेंडा ने कह्यो, जो - अब मैं घर जाउंगो । बोहोत दिन भए हैं । तव वा ब्राह्मन ने राखिवे को बोहोत जतन कियो । परि रेंडा ने नाहीं करी । तव ब्राह्मन ने एक सौ रुपैया और एक गाडा अन्न और कपड़ा अपनी बेटी को और रेंडा को देकै भली भांति सां विदा किये । तव रेंडा उन सां विदा होइ गाडा ले अपने गाम में आयो । सो रेंडा के माता पिता तो मरि गए हते । और ज्ञाति कौ ब्राह्मन रेंडा की जगह में आय रह्यो हतो । तव रेंडा गाम में आय कै पूछ्यो, जो - मेरो घर कहां है ? तव उन ब्राह्मन ने कही, जो - यह घर तुम्हारो है । तामें आय रहो । हम कहूं दूसरो घर ठीक करि कै जाय रहेंगे । तव रेंडा ने कही, सो कैसें होय ? तुम हमारो ज्ञाति के ब्राह्मन । तुमको निकासि कै हमें रहनो उचित नाहीं हैं । सो हम दूसरो- घर

वनाय लेङ्गे । तुम सुखेन रहो । तव उन ब्राह्मण ने कही, जो - घर बड़ो है । हम तुम को आधो घर खाली करि देत हैं तामें तुम रहो । हम तुम दोऊ जने मिलि के निर्वाह करंगे । पाछे रेंडा को उन ब्राह्मण ने आधो घर खाली करि दियो । तामें खासा करि रेंडा रह्यो । पाछे श्रीगुसाईजी की आज्ञा हती ताते स्त्री को नाम सुनाय के पानी, साग-पात मंगाय लेते । पाछे आप रसोई करि भोग धरि दोड़ पातरि करि थोरो सो गाँड़ को दे के पाछे स्त्री-पुरुष दोऊ जने महाप्रसाद लेते । स्त्री को ब्रह्मसंबंध नाही हतो । ताते वाके हाथ सो महाप्रसाद न लेते । ऐसे करत कळूक दिन वीते । तव श्रीगुसाईजी वीरा दिये हते सो रेंडा को सुधि आई । तव रेंडा ने अपनी स्त्री सो कह्यो, जो - यह घर में वैभव है, द्रव्य है सो सब तेरे बाप को दियो है । सो मैं यामें तें तोको कहा देहूँ ? । परंतु एक वीरा श्रीगुसाईजी मोको दिये हैं तामें तें आधो मैं तोका देत हूँ । या वीरा तें तेरो कल्याण होइगो । तव स्त्री ने कह्यो, जो - अब ताई तुम क्यों छिपाय राख्यो ? अब मोको बेगि देहु । तव रेंडा वह वीरा खोल । तव वामें तें एक मोहोर निकसी । तव वाने अपनी स्त्री सो छिपाई राखी । अपने मन में विचारयो, जो - स्त्री को द्रव्य में बोहोत लोभ होत है । और यह मोहोर श्रीगुसाईजी की है । सो उहां पहंचावनी है । पाछे वीरा खोलि के स्त्रीको आधो दियो । आधो आप लियो । ता दिन तें स्त्री को भक्तिभाव उपज्यो । और स्त्रीको गर्भ रह्यो । सो बेटा भयो । पाछे वह लरिका बड़ो भयो । तव रेंडाने वाको जनेऊ करयो ।

ताके दूसरे दिन श्रीगोकुलनाथजी श्रीगोकुल तें पधारे, गुजरात । सो कपडवनज में पधारे । तब रेंडा ने प्रथम सों सब समाचार श्रीगोकुलनाथजी आगें कहें । तब श्रीगोकुलनाथजी रेंडा के घर पधारे । उह फूलमाला के दरसन करे । नेत्र सों लगाए । पाछें रेंडा ने श्रीगोकुलनाथजी सों विनती करी, जो - राज ! स्त्रीकों और पुत्र कों ब्रह्मसंबंध करावो । तब श्रीगोकुलनाथजी स्त्री और पुत्र कों ब्रह्मसंबंध कराये । और वह रेंडा की ज्ञाति कौ ब्राह्मन घर में रहत हुतो । सो रेंडा के संग तें उन हू के मन में आई, जो - हम श्रीगोकुलनाथजी के सेवक होंइ । तब उन रेंडा सों कह्यो, जो - तुम हमारी ओर तें श्रीगोकुलनाथजी सों विनती करो । जो हम हू कों अंगीकार करे । तब रेंडा ने उन ब्राह्मन सों कही, जो - तुम हमारे संग चलो । तब ब्राह्मन दस-पांच मिलि कै रेंडा के संग चले । सो रेंडा ने श्रीगोकुलनाथजी सों विनती कीनी, जो - महाराज ! इन ब्राह्मनन कों कृपा करि कै नाम दीजे । तब श्रीगोकुलनाथजी उन कों न्हाय कै नाम सुनाये । पाछें श्रीगोकुलनाथजी श्रीद्वारिका पधारे । तब रेंडा ने अपनी स्त्री सों कह्यो, जो - अब मैं श्रीगोकुल जात हों । तब रेंडा ने अपनी स्त्री सों कह्यो, जो - मैं अकेली कैसे रहूंगी ? मैं तिहारे संग चलौंगी । तब रेंडा ने स्त्री सों कह्यो, जो - तू अब मेरे पाछें मति परे । एक पुत्र है, सो तेरो वंस चल्यो जायगो । तू सेवा भली भांति सों करियो । अब मोसों सेवा नाहीं होंई आवत । तातें श्रीगुसाईजी के घर जाइ रहंगो । तब स्त्रीने कही, जाऊ । तब रेंडा ने श्रीठाकुरजी कों अपनी स्त्री के माथे पधराय कै

माला बंटी में करि कै दियो । कह्यो, जो - सेवा में राखियो ।  
 और सेवा भली भांति सां करियो । और एक पुत्र को बंस  
 चलो जायगो । यह कहि कै रेंडा वह श्रीगुसाईजी की मोहोर  
 लेके तहां तें चले । सो रात्रि दिन कल न परे । ऐसी आरति  
 श्रीगुसाईजी के दरसन को भई । सो कछुक दिनमें रेंडा श्री-  
 गोकुल आय श्रीगुसाईजी के दरसन किये । सो श्रीगुसाईजी  
 गादी-तकिया पर विराजे हते । तव रेंडा आय के श्रीफल  
 आगे धरि दंडवत् किये । तव श्रीगुसाईजी रेंडा के ऊपर  
 वोहोत प्रसन्न भए । पृच्छ्यो, जो - रेंडा तरो व्याह भयो ?  
 तव रेंडा ने विनती करी, जो - महाराज ! व्याह भयो । और  
 एक लरिका हू भयो । और यह एक मोहोर आप ने वीरा में  
 धरि कै दीनी हती, सो राख्यो । पाछे कह्यो, जो - महाराज ! हम  
 तो जीव हैं । कहूं लोभ करि कै आप की मोहोर खरच करते तो  
 हमारो सगरो धर्म नष्ट होई जातो । तातें आप को मोहोर धरनी  
 ऊचित नाही हती । तव श्रीगुसाईजी कहे, जा - हमको  
 विश्वास हैं । जो - वैष्णव हमारे द्रव्य तें डरपत रहेंगो ।  
 और मोहोर तो याके लिये धरि दीनी हती, जो - मोहोर  
 के मिय सां श्रीगोकुल की मुधि बारवार आवेगी । तव आति  
 होइगी । तव आरति भए तें भगवदु धर्म बढ़ेगा । तव रेंडाने  
 विनती कीनी, जो - महाराज ! हम तो अज्ञानी जीव हैं ।  
 आप करत हो सां भलाही करत हो । अब तो आप के सरनि  
 आयो हूं । अब आप हम को कहूं मति पठावो । अपने चरन  
 के निकट राख्यो । तव श्रीगुसाईजी कहे, अब तोको कहूं न  
 पठावेंगे । अब तुम बृद्ध भये, जो - सेवा बने मो करो ।

प्रसादी रसोई में महाप्रसाद लेउ ! तव रेंडा ने कही, जो — महाराज ! प्रथम न्यारी रसोई की आज्ञा करी हती । अब महाप्रसाद लेवे की आज्ञा करत हो, ताकौ कारन कहा ? तव श्रीगुसांईजी कहे, जो — तव तिहारे सरीर में सामर्थ्य हतो । तासों न्यारी रसोई की आज्ञा दिये हते । अब महाप्रसाद की आज्ञा करत हैं ।

भावप्रकाश—यह कहि श्रीगुसांईजी आप यह जताये, जो - सामर्थ्य होंई और हमारो लेइ तो बाधक है । अब तुम असक्त भए तातें अब तुम कों बाधक नहीं । सुखेन महाप्रसाद लेऊ ।

तव रेंडा श्रीगुसांईजी की आज्ञा मानि कै भंडार में बीनाचोंनी करि आवे । श्रीगुसांईजी की सेवा करे । सागघर फूलघर में घरी घरी होंई आवें । या भांति सों निर्वाह करें ।

वार्ता प्रसंग—३

और एक दिन चाचा हरिवंसजी रात्रि कों श्रीगुसांईजी सों यह पालना कौ प्रसंग पूछें —

राग : रामकली

प्रेख पर्यक शयनं ।

चिरविरहतापहरमतिरुचिरमिक्षणं प्रगटय प्रेमायनं । ध्रुव०

तनुतरद्विजपंक्तिमतिललितानि हसितानि तव वीक्ष्य गायकीनाम् ।

यदवधि परमेतदाशया समभवज्जीवितं तावकीनाम् ॥ १ ॥

तोक्ता वपुषि तव राजते दृशि तु मदमानिनीमानहरणम् ।

अग्निमे वयसि किमु भाविकामेऽपि निजगोपिकाभावकरणम् ॥२॥

ब्रजयुवतिद्वयकनकाचलानारोढुमुत्सुकं तव चरणयुगलम् ।

तत्तु मुहुरुन्नमनकाभ्यासमिव नाथ सपदि कुरुते मृदुलमृदुलम् ॥३॥

अधिगोरोचनातिलककमलकोद्ग्रथितविविधमणिमुक्ताफलविरचितम् ।

भूषणं राजते मुग्धतामृतमरस्यंदि वदनैंदुरसितम् ॥ ४ ॥

भ्रूतटे मातृरचितांजनविंदुरतिशयितशोभया दृग्दोषमपनयन् ।

स्मरधनुषि मधु पिवन्नलिराज इव राजते प्रणयिसुखमुपनयन् ॥ ५ ॥

बचनरचनोदारहाससहजस्मितामृतचयैरार्तिभरमदनयन् ।

पालय सदास्मानस्मदीयश्रीविद्वले निजदास्यमुपनयन ॥ ६ ॥

यह पालने कौ भाव श्रीगुसाईजी चाचा हरिवंसजी सों खोलि कै कह्यो । ता समय रेंडा और चाचा हरिवंसजी और श्रीगुसाईजी हते । और कोई नहीं । सो यह पालने कौ भाव रेंडा सुनि कै देहदसा भूलि गए । सो तीन दिन ताई रेंडा कों मूर्छा आइ रही । पाछे श्रीगुसाईजी पधारे तव रेंडा कों चरनामृत दियो । तव रेंडाकों चैतन्यता भई । तव श्रीगुसाईजी ने रेंडा सों पूछी, जो - कहा समाचार है ? तव रेंडा ने कही, जो - महाराज ! अब ऐस में देह छूटे तो भलो हे । फेरि ऐसो समें नहीं पाऊंगो । तव श्रीगुसाईजी कहे, ऐसोई होइगो । तव रेंडा ने श्रीगुसाईजी कों दंडवत् करि कै देह छोरि दीनी । तव श्रीगुसाईजी श्रीमुख तें सराहना करें ।

सो रेंडा श्रीगुसाईजी कौ ऐसौ कृपापात्र भगवदीय हता । तातें इनकी वार्ता कहां ताई कहिए ? वार्ता ॥९६॥



अब श्रीगुसाईजी के सेवक स्त्री-पुरुष, क्षत्री, गुजराति कै, माही ब्रेचि कै सामग्री लयाये, तिनकी वार्ता कौ भाव कहत हैं—

भावप्रकाश—ये सान्त्विक भक्त हैं । लीला में पुरुष तो 'रामवाला' है । और स्त्री कों नाम 'स्यामवाला' । ये दोऊ श्रीचंद्रावलीजी की अंतंग मखी हैं । 'मुभगा' तें प्रगटी हैं, तातें उनके भावरूप हैं ।

ये गुजरात में एक गाम हैं, तहां दोह क्षत्रीन के घर पास हुते । तहां जन्म दोऊ लिये । सो उन क्षत्रीन आपुस में कही, जो - अपने बेटा बेटा कौ विवाह करें तो आछों । पाछे दोऊ बरस आठ-दस के भए तव दोऊन कौ विवाह कियो । ता पाछे केनेक दिन में दोऊन के माता पितान की देह छूटी । पाछे केनेक दिन में श्रीगुसाईजी ढाङ्किली पधारे । सो भाग्य में ये स्त्री-पुरुष के

गाम में डेरा किये । सो तलाव पर डेरा भए । तत्र गाम के सब वैष्णव श्रीगुसां-ईजी के दरसन कों जान लागे । तत्र इन दोऊ स्त्री-पुरुष ने वैष्णवन तें पृच्छयो, जो - आज कहा है ? जो तुम सब इकठे व्हे तलाव की ओर जात हो । तत्र उन वैष्णवन कहे, जो - आज श्रीगुसांईजी पधारे हैं । सो उनके डेरा तलाव पर भए हैं । तातें हम सब उन के दरसन कों जात हैं । तुम्हारे चलनो होंइ तो चलो । ये श्री-गुसांईजी साक्षात् ईश्वर हैं । तत्र तो दोऊ स्त्री-पुरुष कहन लागे, जो - हम हूं चलेंगे । ईश्वर के दरसन करेंगे । तातें तुम हम कों अपने संग ले चलो । पाछें दोऊ स्त्री-पुरुष उन वैष्णवनके संग श्रीगुसांईजीके दरसन कों आए । सो दरसन करत ही थकित व्हे रहे । सो श्रीगुसांईजी आप इन दोऊन कों अलौकिक दरसन दिये । तत्र तो ये दोऊ स्त्री-पुरुष विनती किये, जो - महाराज ! हम आप के सरनि आए हैं । तातें कृपा करि हम कों सरनि लीजिये । आज हमारे बड़े भाग्य हैं, जो - आपके दरसन पाए । तत्र श्रीगुसांईजी दोऊन कों आज्ञा किये, जो - तुम देवी जीव हो । तातें स्नान करि हमारे पास आउ । हम तुम कां सरनि लेइंगे । तत्र दोऊ स्त्री-पुरुष तलाव में स्नान करि अपरस ही में आए । तत्र श्रीगुसांईजी दोऊन कों नाम-निवेदन करवाए । ता पाछें आप कृपा करि दोऊन कों आज्ञा किये, जो - अब तुम सेवा करो । तुम कों हम भगवत्सेवा पधराय देत हैं । तिनकी तुम भाव-प्रीती सहित सेवा करियो । सो श्रीगुसांईजी आप कृपा करि दोऊन कों श्री-मदनमोहनजी कौ स्वरूप स्वामिनीजी सहित पधराय दिये । पाछें आज्ञा किये, जो - इनकी नीकी भांति सों सेवा करियो । और आए गए वैष्णवन की टहल प्रीति सों करियो । और उन कों संग करियो । पाछें श्रीगुसांईजी दोऊन कों सेवा की रीति सिखाए । ता पाछें आप द्वारकाजी पधारे ।

वार्ता प्रसंग—१

सो वे स्त्री-पुरुष श्रीठाकुरजी की सेवा नीकी भांति सों करते । सो वह पुरुष हतो सो तो लकड़ी ल्याय कै नित्य बेचतो । सो वाके पैसा आवते तिनकी सामग्री ल्यावतो । और वामें तें अघेला पैसा नित्य बचाय राखतो । और वाकी स्त्री रसोई की सामग्री सिद्ध करती । और वह पुरुष न्हाय कै श्रीठाकुरजी कों सेवा-सिंकार करतो । और वह स्त्री राजभोग



धरती । पाछे भांग सराय आति करि अनोसर करि जो कोई वैष्णव आवतो ताको प्रथम महाप्रसाद की पातरि धरि के पाछे वे दोऊ स्त्री-पुरुष महाप्रसाद लेते । पाछे नित्य वह पुरुष लकड़ीन में ते अथेला पैसा बचाय राखतो । ताको रुपैया एक भेलो कियो । सो वा रुपैया की एक साड़ी अपनी स्त्री के पहरिवे के लिये ल्यायो हतो । तव दूसरे दिन इनके घर आठ वैष्णव जुरि के आए । तव उन वैष्णवन को श्रीकृष्ण-स्मरण करि बोहोत बोहोत आदर सन्मान करि बैठारे । तव अपनी स्त्री सां कह्यो, जो - अब कहा प्रकार करिये ? जो - वैष्णव आये हैं उन को महाप्रसाद लिवाइए । और घर में तो कुछ नहीं है । जो - वैष्णवन को समाधान करिए । तव स्त्रीने कह्यो, जो - यह साड़ी बेचि के सामग्री ल्याउ । तव वह पुरुष साड़ी बेचि के सामग्री ल्याए । तव वह स्त्री रसोई करि श्रीठाकुरजी को भोग धरि के आप काठी में बैठी । और वा पुरुष सां कह्यो, जो - हां तो काठी में बैठुंगी और तुम भांग सराय के वैष्णवन को महाप्रसाद लिवाइयां । ता पाछे वा पुरुष ने न्हाय के भांग सराय के उन वैष्णवन को श्रीठाकुरजी के दरसन करवाए । पाछे श्रीठाकुरजी को पोदाय उन वैष्णवन सां कही, जो - उठो महाप्रसाद लेउ । तव उन वैष्णवन ने कही, जो - तुम्हारी स्त्री आय के हम को परामेगी तव हम महाप्रसाद लेइंगे । तव वा पुरुष ने कही, जो - स्त्रीजन मंकाच करति है । तासां नहीं आवत है । तव उन वैष्णवन ने कही, जो - वैष्णव होइगी ता स्त्रीजन आय के हम को महाप्रसाद की पातरि धरेंगी । तव हम महाप्रसाद लेइंगे । कहने, वैष्णव ता

आपुस में बहनि-भाई हैं ।

तब वह पुरुष अपनी स्त्रीके पास गयो । और कह्यो, जो-वैष्णव, तो बिना महाप्रसाद नहीं लेत । तू आवेगी तब लेइंगे । तब स्त्रीने कही, जो - भगवान और भगवदीय तो एकही स्वरूप हैं । इन में कछू भेद नहीं है । जो - मैं नग्न हों । सो भगवान तो देखत है तो भगवदीयन की कहा लाज है ? मैं आउंगी । तब वह स्त्री कोठी में साँ निकसन लागी । तब इतने ही में श्रीस्वामिनीजी आप साड़ी लेकै पधारे । तब श्रीठाकुरजी आप कहे, जो - तुम कहाँ जाति हो ? तब श्रीस्वामिनीजी कहे, जो - अपनी सेवा करत हैं तिनकी लाज जाति है । तातें आपुन लाज न राखेंगे तो कौन राखेगो ? तब जुगल स्वरूप नें वा कोठी में ही दरसन दीनो । तब श्रीस्वामिनीजी ने तो साड़ी पहराई । और श्रीठाकुरजी नें अपनो पितांवर उदायो । और वाही कोठी में जुगल स्वरूप के दरसन भए । पाछें वह स्त्री कोठी में तें आइ कै सब वैष्णवन कों श्रीकृष्ण-स्मरन करि कै महाप्रसाद की पातरि परोसन लागी । और सबन कों बैठारे । तब उन वैष्णवन ने महाप्रसाद लियो । पाछें रात्रि कों उहांई रहे । तब सब कार्य तें पहोंचि कै ये स्त्री-पुरुष हू तहां आय बैठे । सो सबन मिलि कै भगवद्वार्ता कीर्तन किये । पाछें सब वैष्णव जब सोये तब उन स्त्री-पुरुष मिलि कै सबन के पांव दावन बैठे । पाछें प्रातःकाल भयो तब वैष्णव उन स्त्री-पुरुष साँ बिदा होइ कै श्रीकृष्ण-स्मरन करि कै चले । सो श्रीगोकुल में आये ।

भावप्रकाश—यामें यह जताये, जो - वैष्णवन में अलौकिक बुद्धि राखे तो

प्रभु वेगि प्रसन्न होंई । और वैष्णव कौ धर्म ऐसो कठिन है, सो हू जनाये । जो - साड़ी बंचि कै सामग्री ल्याए । परि श्रीठाकुरजी अपने सेवकन की लाज क्यों खोवें ? तातें ताही कोठी में आप दरसन दीने । तातें वैष्णवन कों अपने प्रभुन तें साँचौ रहनो । तव श्रीप्रभुजी आप ही कृपा करे । तातें उन ने या भांति अपनो धर्म राख्यो ।

सो वे स्त्री-पुरुष श्रीगुसाईंजी के ऐसैं कृपापात्र भगवदीय हते । तातें इन की वार्ता कौ पार नाहीं, सो कहां ताई कहिए ।  
वार्ता ॥९७॥



अथ श्रीगुसाईंजी की सेवकिनी अजय कुंवरि वाड़े, मेघाड में सिंहाड गाम हे तहां रहती, तिनकी घाता कौ भाष कहत हैं—

भावप्रकाशः—ये राजस भक्त हैं । लीला में इन कौ नाम 'रूप-आधिनी' है । ये श्रीठाकुरजी के रूप में आसक्त हैं । तातें श्रीठाकुरजी कौ वियोग सहि सकति नाहीं । ये 'सुभगा' तें प्रगटी हैं, तातें उनके भावरूप हैं ।

घाता प्रसंग—१

सो वह अजय कुंवरि वाड़ै वाल विधवा हती । सो मीरां-वाड़ै के पास रहती । सो मीरांवाड़ै अजय कुंवरि वाड़ै के गाम सिंहाड में रहती । और मीरांवाड़ै के दूसरी सिंहाड हुती । परि अजय कुंवरि वाड़ै और मीरांवाड़ै एक गाम घर में रहती ।

सो एक समै श्रीगुसाईंजी सिंहाड पधारे । तव वाग मे उतरे । तव मीरांवाड़ै दरसन कों गई । तव अजय कुंवरि ह साथ गई । तव श्रीगुसाईंजी कों अजय कुंवरि ने साक्षात् पूरन पुरुषोत्तम देखे । तव मन में आई, जो - हों इनकी सेवकिनी होऊ तो भली है । पाछें भेंट घरि के दरसन करि के तुरत ही मीरांवाड़ै तो फिरी । तव श्रीगुसाईंजी ने कही. जो - यह भेंट तो हम नाहीं राखे । हमारे काम की नाहों ।

तब और वैष्णव ने मीरांवाई सों कही, जो - ये तो अपने सेवक विना काहू की भेंट राखे नहीं है । ता पाछें भेंट फेरि दीनी । तब अजब कुंवरि वाई ने कही, मीरांवाई सों, जो - तुम कहो तो हों इनकी सेवकिनी होंउं । तब मीरांवाई ने नहीं करी । ता पाछें दोऊ घर कों गई । तब अजब कुंवरि वाई कों महा विरह-ताप भयो और ज्वर आयो । तब मीरांवाई ने पूछयो, जो - तोकों कहा भयो ? अब ही तो आछी हती । तब अजब कुंवरि वाई ने कही, जो - हों तो श्रीगुसाईजी की सेवकिनी होंउंगी । मैं तो उन कों दरसन करत साक्षात् श्री-कृष्ण देखे । तातें ताप भयो । तब मीरांवाई ने कही, जो - तेरी ईच्छा । पाछें अजब कुंवरि वाई सावधान होइ कै श्री-गुसाईजी सों विनती कराई । जो - महाराजाधिराज ! अजब कुंवरि वाई कहत हैं, जो - मोकों नाम दीजिए । तब श्रीगुसाईजी ने कृपा करि कै अजब कुंवरि कों नाम सुनायो । पाछें श्री-गुसाईजी कों विनती करि कै अपने घर पधराए । पाछें श्रीगुसाईजी कों भली भांति रसोई करवाई । ता पाछें श्री-ठाकुरजी कों भोग धरि कै पाछें श्रीगुसाईजी ने भोजन किये । ता पाछें वैष्णव सेवक जो साथ के हते तिन कों महाप्रसाद दियो । पाछें थारि कौ महाप्रसाद अजब कुंवरि वाई कों दीनो । सो लेत मात्र सर्व ज्ञान स्फुर्त भयो । ता पाछें श्रीगुसाईजी उत्थापन के समै गादी तकियान पर विराज कै कथा कही । ता समै आत्मनिवेदन कौ प्रसंग कह्यो । सो अजब कुंवरि वाई ने सुन्यो । तब अजब कुंवरि वाई ने श्रीगुसाईजी सों विनती कीनी, जो - महाराज ! मोकों कृपा करि कै आत्म-

निवेदन करवायो चाहिए । ता पाछें श्रीगुसाईजी ने विधि पूर्वक आत्मनिवेदन करवायो । पाछें सर्व मार्ग की रीति सिखाई । ता पाछें श्रीगुसाईजी कों घनो आग्रह करि कै दिन चारि राखे । भली भांति सों सेवा करी । भली भांति सों सामग्री रसोइ करावती । ता पाछें श्रीगुसाईजी विजय करिवे कों विदाय भए सो चले । तव तुरत ही अजव कुंवरि वाई कों विरह उपज्यो । सो अत्यंत आरति भई । प्राणांत हॉन लाग्यो । तव दासी ने दोरि कै श्रीगुसाईजी सों पुकारि कै विनती कीनी, जो - महाराज ! अजवकुंवरि वाई के तो प्रान जात हैं । यह सुनि कै श्रीगुसाईजी पाछें पांड धारे । तव अजवकुंवरि वाई ने श्रीगुसाईजी के चरनस्पर्स करे, तव सावधान भई । तव श्रीगुसाईजी सों विनती करी, जो - महाराज ! राज के दरसन विनु मोतें रह्यो नहीं जात है । मेरे प्रान रहेंगे नाहीं । तव श्रीगुसाईजी अपनी पादुका पधराय दिये । और श्रीमुख सों कहें. जो - तोकों जव विरह-ताप हॉइ तव इनको दरसन करियो । सो तोकों मेरे दरसन होइंगे । ता पाछें कहे. जो - तू जैसी मेरी सेवा करी याही रीति सों सदा तू इनकी सेवा कीजो । ऐसं सब बात कहि कै सिखाइ कै ता पाछें आप विजय कियो । तव अजवकुंवरि वाई ने बोहोत भेंट करी । ता पाछें श्रीगुसाईजी गुजरात पधारे । ता पाछें अजवकुंवरि वाई पादुकाजी की सेवा करन लागी । सो प्रेम संयुक्त सब काज करे । सेवा भली भांति सों मार्गकी रीति सों करे । सो श्री-पादुकाजी सब सानुभावता जनावे. बातें करें । सो जव श्रीगुसाईजी को दरसन न हॉइ तव अजवकुंवरि वाई कों

तब और वैष्णव ने मीरांवाई सों कही, जो - ये तो अपने सेवक विना काहू की भेंट राखे नाहीं है । ता पाछें भेंट फेरि दीनी । तब अजब कुंवरि वाई ने कही, मीरांवाई सों, जो - तुम कहो तो हों इनकी सेवकिनी होंउं । तब मीरांवाई ने नाहीं करी । ता पाछें दोऊ घर कों गई । तब अजब कुंवरि वाई कों महा विरह-ताप भयो और ज्वर आयो । तब मीरांवाई ने पूछयो, जो - तोकों कहा भयो ? अब ही तो आछी हती । तब अजब कुंवरि वाई ने कहा, जो - हों तो श्रीगुसाईजी की सेवकिनी होंउंगी । मैं तो उन कों दरसन करत साक्षात् श्री-कृष्ण देखे । तातें ताप भयो । तब मीरांवाई ने कही, जो - तेरी ईच्छा । पाछें अजब कुंवरि वाई सावधान होइ कै श्री-गुसाईजी सों विनती कराई । जो - महाराजाधिराज ! अजब कुंवरि वाई कहत हैं, जो - मोकों नाम दीजिए । तब श्रीगुसाईजी ने कृपा करि कै अजब कुंवरि कों नाम सुनायो । पाछें श्री-गुसाईजी कों विनती करि कै अपने घर पधराए । पाछें श्रीगुसाईजी कों भली भांति रसोई करवाई । ता पाछें श्री-ठाकुरजी कों भोग धरि कै पाछें श्रीगुसाईजी ने भोजन किये । ता पाछें वैष्णव सेवक जो साथ के हते तिन कों महाप्रसाद दियो । पाछें थारि कौ महाप्रसाद अजब कुंवरि वाई कों दीनो । सो लेत मात्र सर्व ज्ञान स्फूर्त भयो । ता पाछें श्रीगुसाईजी उत्थापन के समै गादी तकियान पर विराज कै कथा कही । ता समै आत्मनिवेदन कौ प्रसंग कह्यो । सो अजब कुंवरि वाई ने सुन्यो । तब अजब कुंवरि वाई ने श्रीगुसाईजी सों विनती कीनी, जो - महाराज ! मोकों कृपा करि कै आत्म-

निवेदन करवायो चाहिए । ता पाछें श्रीगुसाईजी ने विधि पूर्वक आत्मनिवेदन करवायो । पाछें सर्व मार्ग की रीति सिखाई । ता पाछें श्रीगुसाईजी कों घनो आग्रह करि के दिन चारि राखे । भली भांति सों सेवा करी । भली भांति सों सामग्री रसोइ करावती । ता पाछें श्रीगुसाईजी विजय करिवे कों विदाय भए सो चले । तव तुरत ही अजव कुंवरि वाई कों विरह उपज्यो । सो अत्यंत आरति भई । प्राणांत होन लाग्यो । तव दासी ने दोरि के श्रीगुसाईजी सों पुकारि कै विनती कीनी, जो - महाराज ! अजवकुंवरि वाई के तो प्रान जात हैं । यह मुनि के श्रीगुसाईजी पाछें पांउ धारे । तव अजवकुंवरि वाई ने श्रीगुसाईजी के चरनस्पर्स करे, तव सावधान भई । तव श्रीगुसाईजी सों विनती करी, जो - महाराज ! राज के दरसन विनु मोतें रह्यो नहीं जात है । मेरे प्रान रहेंगे नहीं । तव श्रीगुसाईजी अपनी पादुका पधराय दिये । और श्रीमुख सों कहे, जो - तोकों जव विरह-ताप होंइ तव इनकौ दरसन करियो । सो तोकों मेरे दरसन होइंगे । ता पाछें कहे, जो - तू जैसी मेरी सेवा करी याही रीति सों सदा तू इनकी सेवा कीजो । ऐसं सब बात कहि कै सिखाइ के ता पाछें आप विजय कियो । तव अजवकुंवरि वाई ने बोहोत भेंट करी । ता पाछें श्रीगुसाईजी गुजरात पधारे । ता पाछें अजवकुंवरि वाई पादुकाजी की सेवा करन लागी । सो प्रेम संयुक्त सब काज करे । सेवा भली भांति सों मार्गकी रीति सों करे । सो श्री-पादुकाजी सब सानुभावता जनावे, बातें करे । सो जव श्रीगुसाईजी कों दरसन न होंइ तव अजवकुंवरि वाई कों

बिरह-ताप होंई । तब श्रीपादुकाजी को टेरा खोलि के देखे, तो श्रीगुसांईजी बैठे हैं । सो पोथी देखत हैं । सो श्रीगुसांईजी सब वार्ता करते । पाछे श्रीगुसांईजी की कृपा तें अजबकुंवरि को साक्षात् श्रीगोवर्द्धननाथजी हू दरसन देन लागे । सो श्रीगोवर्द्धननाथजी आप वासों बातें करें, चोपड़ खेलें । हास्यादिक करें । सो ऐसैं नित्य दरसन देहि । जा दिन दरसन न होइ ता दिन जल-पान न करे, परि रहे । ता पाछे श्रीगोवर्द्धननाथजी जब पांव धारे तब दरसन करे । ता पाछे जो-कछू नौतन नौतन सामग्री सिद्ध करि कै राखती सो श्रीनाथजी को भोग समर्पे ।

भावप्रकाश—यामें यह जतायो, जो-गुरु में अलौकिक बुद्धि दृढ़ होइ तो ठाकुर को सानिध्य आपही तें होई । ठाकुर इनके आधीन होंई रहे ।

वार्ता प्रसंग—२

सो एक समै श्रीगोवर्द्धननाथजी काहू वैष्णव के घर अटके । सो इहां आइ न सके । सो दूसरे दिन राजभोग-आर्ति पाछे श्रीगोवर्द्धननाथजी पधारे । तब देखे तो अजबकुंवरि बाई घनी व्याकुल हैं । ता पाछे श्रीगोवर्द्धननाथजी हँसे, खेलें । भोग धरयो सो आरोगे । ता पाछे जान लागे । तब अजबकुंवरि बाई ने कह्यो, जो - हों तो जान न देउंगी । तब श्रीगोवर्द्धननाथजी ने कह्यो, जो-अंब तो गए बिनु काम चले नाहीं । जबलों श्रीगुसांईजी विराजे हैं । तबलों तो जानो और आवनो ही बनेगो । तदुपरांति समय पाय बोहोत वर्ष लगि तेरे ही पास हों सिंहाड में यह तेरी कोठरी में ही बैठोंगो, इहाँ ही रहंगो । यह स्थल छोरि कै कहूं न जाउंगो । तब प्रसिद्ध स्रवन को दरसन इहांई देउंगो । तब अजबकुंवरि बाई ने कह्यो, जो - तम्हारे कैसो भगेंसो ? तम्हारे भक्त अनेक हैं ?



तातें तुम्हारो कछू भरोसो परत नाहीं । तव श्रीगोवर्द्धननाथजी कहे, जो - मैं तोसों सत्य कहत हों । सो सत्य यह मेरो वचन हे । यामें संदेह नाहीं । ऐसं कहिं कै ता पाछें कह्यो, जो - तू अब चिंता करे मति । आज पाछें तोकों नित्य दरसन देउंगो । ता पाछें श्रीगोवर्द्धननाथजी आप पधारे । सो दोई समय इहां जब श्रीगुसाईजी अनोसर करते तव उहां पधारते ।

भावप्रकाश—या वार्ता को अभियाय यह है, जो - ठाकुर अपने जन को ताप सहि सकत नाहीं । तासो जो कोऊ भक्त विरह ताप करि उन को भजत है, तिन के वे आधीन रहे रहत हैं । सदा सर्वदा निकट रहत हैं । सो यह पुष्टिमार्ग विरह आतुरता को है । तातें या मार्ग में श्रीगोवर्द्धननाथजी सदा सानिध्य रहत हैं । सो अजबकुंवरि को ताप जानि श्रीगोवर्द्धननाथजी ब्रज छोरि कै मेवाड़ पधारे । सो जबलों अजबकुंवरि की (आधिदैविक प्रकार सों) स्थिति है । तहां ताई श्रीगोवर्द्धननाथजी मेवाड़ में विराजेंगे ।

सो वह अजबकुंवरि श्रीगुसाईजी की ऐसी परम कृपापात्र भगवदीय हती । तातें इनकी वार्ता कहां ताई कहिए ।

वार्ता ॥९८॥



अथ श्रीगुसाईजी को लेखक एक ब्राह्मण पंडित, गुजरात को, जाने जनेऊ तोरि बुहारी बांधी, तिनको वार्ता को भाव कहत है —

भावप्रकाश—ये तामस भक्त हैं, लीला में इन को नाम 'आतुरी' है । इन को श्रीठाकुरजी की सेवा में बोलोत आरति रहति हैं । रात्रि-दिन सेवा विनु चेन परत नाहीं । और कछु जानत नाहीं । ये 'सुमगा' तें प्रगटी हैं तातें इनके भावरूप हैं ।

ये गुजरात में एक गाम में ब्राह्मण के जन्म्यो । सो बाल्यमें में इनको एक कर्ममार्गीय पंडित को मंग भयो । सो कर्ममार्ग के ग्रन्थ बोलोत पढ्यो । सो कर्मकांड करन लाग्यो । पाछें बरस पच्चीस को भयो तव इन को पिता मग्यो । सो घर में इकलो रहे । व्याह भयो नाहीं । सो एक समै श्रीगुसाईजी द्वाखिजाजी पधारत हे । सो मार्ग में यह ब्राह्मण को गाम आयो । तहां टेग किये । सो यह

ब्राह्मण को श्रीगुसांईजी के दरसन भए। तब यह ब्राह्मण जान्यो, जो - ये कोई पंडित हैं। ताते इन सों सास्त्र-चर्चा करिए तो आछौ। पाछे यह ब्राह्मण श्रीगुसांईजी पास चर्चा करन आयो। तब या ब्राह्मण ने श्रीगुसांईजी पास आर्ड नमस्कार करि यह पूछ्यो, जो - महाराज ! कर्ममार्ग बड़ो के ज्ञानमार्ग बड़ो ? तब श्रीगुसांईजी कहे, जो - जाकों जो रुचे ताके भाये वह मार्ग बड़ो। जा मार्ग पर विश्वास आवें सोई बड़ो। परि वैसे तो बड़ो भक्तिमार्ग है। जामें जीव कृतार्थ होई। और ज्ञान मार्ग कर्ममार्ग तो या काल में बड़ी कठिनता सों होत हैं। ताते कष्ट साध्य हैं। तब या पंडित ब्राह्मण कह्यो, जो - महाराज ! भक्तिमार्ग में कहा कर्म नहीं हैं ? तब श्रीगुसांईजी आज्ञा किये, जो - भक्तिमार्ग में कर्म और ज्ञान दोऊ हैं। परि वे दोउ भगवद् संबंधी हैं। भक्तिमार्ग में जो कर्म किये जात हैं वे सब निष्काम भाव सों भक्ति संयुक्त होत हैं। सो वे भक्ति के अंग रूप हैं। प्रेमलक्षणा भक्ति को बढावनहारे हैं। और कर्ममार्ग में स्वर्गादिक की कामना करि कर्म किये जात हैं। ताते उन में निष्काम भाव रहत नहीं। और बडे कष्ट सों होत हैं। सो या काल में काहू तें आछो भांति बनत नहीं। सोऊ चित्त प्रसन्न रहत नहीं। ताते कलेस को देनहारे हैं। तब यह पंडित ब्राह्मण कह्यो, जो - महाराज ! भक्ति के कर्म कौन प्रकार किये जात हैं ? तब श्रीगुसांईजी आप आज्ञा किये, जो - ब्राह्मण सुनि ! भक्तिमार्ग में एक कृष्ण ही को सरन-आश्रय मुख्य है। सो 'गीताजी' में भगवान श्रीमुख सों सरन की महिमा कहि हैं। ताते भक्तिमार्ग में या सरनि करि जीव प्रवृत्त होत है। तब वह जीव देहसंबंधी लौकिक वैदिक सब कर्म-धर्म एक भगवानही को समर्पन करि निष्काम भाव सों उनकी सेवा करत हैं। या प्रकार निष्काम भाव सों कृष्णार्पण किये कर्म ब्रह्म रूप होई, भक्ति को उत्पन्न करत हैं। ताकरि जीव कृतार्थ होत है। ऐसो यह भक्तिमार्ग हैं। यह सुनि कै पंडित ब्राह्मण ने श्रीगुसांईजी सों विनती कीनी, जो - महाराज ! आज ताई तो हों कर्ममार्ग में पचि मरघो ! परि कछु प्राप्ति भई नहीं। ताते अब कृपा करि मोको भक्तिमार्ग में अंगीकार कीजिए। तब श्रीगुसांईजी वा ब्राह्मण सों कहे, जो - तू स्नान करि आऊ। हम तोको नाम देंगे। पाछे तू काल्हि व्रत करियो। तब तोको निवेदन करावेंगे। सों वह ब्राह्मण स्नान करि आयो। तब श्रीगुसांईजी आप वाको नाम सुनायो। पाछे वह ब्राह्मण अपने घर गयो। दूसरे दिन एक व्रत कियो। ता पाछे स्नान करि अपरसहो में श्रीगुसांईजी के पास आयो। तब श्रीगुसांईजी आप कृपा करि वाको निवेदन कराये। तब यह ब्राह्मण

बिनती कियो, जो - महाराज ! अब श्रीठाकुरजी पधगई दीजीए । और सेवा कौ प्रकार कृपा करि कहिए । तब श्रीगुसाईंजी वा ब्राह्मण के माथे एक लालजो कौ म्वरूप पधराय दिये । पाछे सेवा को सब रीति सिखाई । ता पाछे वह आज्ञा मांगि श्रीठाकुरजी कों पधराय अपने घर आयो । सो घर सब खासा करि सेवा करन लाग्यो ।

पार्श्व प्रसंग—१

सो वह ब्राह्मण चुकटी मांगि के निर्वाह करतो । पाछे स्नान करि कै रसोई करि कै श्रीठाकुरजी कों जगाय मंगला तें सेन पर्यंत की सेवा करतो । सो ऐसे नित्य श्रीठाकुरजी की सेवा करतो । सो एक दिन चुकटी मांगिवे कों गयो । सो अवेर भई । सो घर आय के ताप उपज्यो । सो वेगि वेगि न्हाय के मंदिर में बुहारी करत हतो । सो बुहारी की जेवरी टूटि गई । सो जनेऊ तोरि कै बुहारी उतावलि सां बांधी । सो जनेऊ की कछू सुधि रही नाहीं । पाछे श्रीठाकुरजी कों जगावन गयो । तब श्रीठाकुरजी प्रसन्न भए । तब याने बिनती कीनी, जो - महाराज ! आप प्रसन्न भए ताकौ कारन कहा ? तब श्रीठाकुरजी आपने आज्ञा करी. जो - आज तैंने जनेऊ तोरि कै बुहारी बांधी । सो ऐसी आतुरता में मोकों जगायवे कों आयो । तासों में प्रसन्न भयो हों । तब तैं ऐसे ही नित्य श्रीठाकुरजी सानुभवता जनावन लाग । जो - चहिए सो मांगि लेते । सो यह ब्राह्मण ऐसैई सदा सर्वदा आतुरता पूर्वक सेवा करतो ।

भावप्रकाश—या वार्ता कौ अभिप्राय यह है, जो - पृष्टिमार्ग की सेवा विरह-आतुरता की है । विरह-आतुरता बिना अनुभव न होई । काहें ? विरह आतुरता करि लोक वेद के धर्म चिन्मृत होत है । देहानुसंधान हू छूटत है । तब प्रभु कौ आवेस हृदय में होत है । तानें सर्व रस कौ अनुभव होत है ।

सो वह वैष्णव श्रीगुसांईजी को ऐसो कृपापात्र भगवदीय हतो । तातें इनकी वार्ता को पार नाही, सो कहां तांई कहिए ।  
वार्ता ॥ ९९ ॥



अब श्रीगुसांईजी को सेवक एक कुनवी पटेल, निष्कंचन, गुजरात में रहतो, तिनकी वार्ता को भाव कहत हैं—

भावप्रकाशः—ये सात्विक भक्त हैं । लीला में इन को नाम 'सत्या' है । ये पहिले द्वारिका लीला में 'तन्मध्या' की सखी ही । उन तें प्रगटी है, तातें उन के भावरूप हैं । ये जा प्रकार ब्रजलीला में अंगीकार भई सो बात ऊपर कहि आए हैं ।

ये गुजरात में कुनवी पटेल के घर जन्म्यो । सो एक समै श्रीगुसांईजी आप द्वारिकाजी पवारे । सो वा गाम में डेरा किये । तब ये कुनवी पटेल बरस बीस को हुतो । सो वैष्णव के संग तें सरनि आयो । और यह निष्कंचन हुतो । याके माता-पिता कोऊ नाही । घर में इकलो ई रहे । सो एक समै श्रीगुसांईजी के सात सेवक द्रव्यपात्र को संग वा माम तें श्रीगोकुल को चल्यो । श्रीगुसांईजी के दर्सनार्थ । तब या कुनवी वैष्णव के मन में आई, जो श्रीगुसांईजी के दरसन किये वोहोत दिन भए । तातें श्रीगोकुल जाई श्रीगुसांईजी के दरसन करों तो आछौ । ऐसो विचारि कै यह कुनवी वैष्णव हू वा संग में श्रीगोकुल को चल्यो । सो वाके पास थोरे से चोखा हते । और तो कछु हतो नाही । सो वह चोखा संग लिये । मन में कहें, जो - ये श्रीगुसांईजी को भेंट करोंगो ।

वार्ता प्रसंग—१

सो श्रीगुसांईजी के सेवक आठ सो श्रीगोकुल आए । तामें सात वैष्णव तो द्रव्यपात्र हुते । तिन तो श्रीगुसांईजी को भेंट धरी । और वह एक निष्कंचन वैष्णव हतो । ता पास भेंट को थोरेसे चोखा हते । सो उन चोखान को वह वैष्णव छिपाए राखे हते । सो श्रीगुसांईजी ने आपु वा वैष्णव तें मांगि लीने । पाछें उन चोखान में तें थोरे से श्रीनवनीत-प्रियजी की रसोई में दीने । और थोरेसे चोखा श्रीगोवर्द्धन-नाथजी के इहां तरहटी में पठाय दिये ।

भावप्रकाश—यामें यह जतायो, जो - दीनता तें लाई भेंट प्रभु मांगि के प्रेम सों अंगीकार करत हैं ।

घाता प्रसंग—२

और एक समे श्रीगुसांईजी पोथी खोलि कथा कहत हत और वैष्णव बैठे हते । तव श्रीगुसांईजी श्रीमुख तें कहे, जो- सुनिवेवारो वैष्णव आवे तो वांचों । तव सब वैष्णव आपुस में देखें, जो- कौन रह्यो हे ? तव वह वैष्णव चोखावारो आयो । तव आपु कथा कहे । तव तहां एक वैष्णव ठीट सो हतो । सो वाने श्रीगुसांईजी सों विनती करी, जो- महाराज ! और तो कोऊ वैष्णव आयो नाही । एक यह दुर्बल मजूर सो वैष्णव आयो हे । तव आप कथा कही । सो कहा कारन ? तव श्रीगुसांईजी कहे, जो - जाके मन में अहंकार है द्रव्यादिक कौ सो हमारे हृदय कौ हार्द न समुझेगो । यह निरहंकार है तातें हमारो वैष्णव हे । या प्रकार श्रीगुसांईजी कहे । तव सब वैष्णव लज्जा पाइ के चुप होइ रहे । या प्रकार वा वैष्णव पर श्रीगुसांईजी कृपा करते ।

भावप्रकाश—यामें यह जतायो, जो - अहंकार भगवद्रम में बाधक है ।

घाता प्रसंग—३

और एक समे वेई आठ जने श्रीनाथजीद्वार आए । तहां सात संपन्न वैष्णव सवन सों मिलाप उन कौ बोहोत हुतो । सो तो एक आछी ठौर उतरें जाँय के । और वह गरीब वाकों कौन पूछे ? सो वह वैष्णव भूम्यो प्यासो उहां घाट पे परि रह्यो । सो वेसोई तो वह दुर्बल तेसोई सीत, सो घूजन लाग्यो । सो वाकों ताप श्रीनाथजी सों सह्यो न गयो । सो श्रीनाथजी अर्द्धरात्रि के समय महाप्रसाद और जल और आपके ओदिवं

की सुफेदी लेकर आए। सो श्रीगोवर्द्धननाथजी आप उहां वैष्णव के पास पधारे। सो वाकों महाप्रसाद लिवाइ, जल पिवाइ वह सुफेदी वाकों उढाय कै आप तो अपने मंदिर में पधारे। सो उह वैष्णव तो यह कछू जाने नहीं। ता पाछें श्रीगोवर्द्धननाथजी यह सब समाचार श्रीगुसाईंजी सों कहे, जो - ऐसी भई है। जो - वह दुर्बल वैष्णव, सो मेरो स्नेह वाके हृदय में वाहोत है। सो वापें आयो न गयो। सो ये सातों वैष्णव वाकों उहां घाटे ही पै अकेलो छोरि आए हैं। सो वह भूखो उहांई परि रह्यो है। सो तव रात्रि कों मैं या भांति सों वाकौ महाप्रसाद जल और ओढिवे कौ अपनी सुफेदी दे आयो हूं। सो इनकों तुम समुझाय दीजो। जो वाकों ऐसैं न छोर्यो करें। और अब तुम वाकों बुलाय लेउ। ऐसैं सुनि कै श्रीगुसाईंजी आप पधारे। सो सातों वैष्णवन सों खीझन लागे। जो - साथ में रहि कै गरीब की खबरि नहीं राखत ? तव वे सातों जने वाकों अपने साथ जाँइ के लै आए। ता दिन तें ए सातों वैष्णव ताकी खबरि राखन लागे। वाकों अकेलो न छोरे। सो वा वैष्णव के ऊपर श्रीगोवर्द्धननाथजी ऐसी कृपा करते।

भावप्रकाश—यामें यह जताए, जो - वैष्णव कों जीव मात्र पैं दया राखनी।

सो वह वैष्णव श्रीगुसाईंजी कौ ऐसा कृपापात्र भगवदीय हतो। तातें उनकी वार्ता कौ पार नहीं सो कहां ताँई कहिए ?

वार्ता ॥१००॥



अब श्रीगुसांईजी के सेवक देवाभाई कुणवी, गुजरात के, तिनकी घाता की भाष कहत हैं —

भावप्रकाश—ये राजस भक्त हैं। लीला में इन की नाम 'रतिश्री' हैं। ये पहिले द्वारिका लीला में 'तन्मध्या' की सखी ही। तन्मध्या तें प्रगटी हैं। सो तन्मध्या सत्यभामा की सखी हैं। तिनके ये भावरूप हैं। सो इनकी जा प्रकार ब्रजलीला में प्राप्ति भई, सो उपर कहि आए हैं।

ये गुजरात में एक कुनवी के जन्मे। सो इन की पिता खेती करतो। पाछें ये हू वरस बारह के भये तब तें खेती करन लागे। ता पाछें इन की व्याह भयो। चारि बेटा हू भए।

घाता प्रसंग—१

सो एक समै श्रीगुसांईजी गुजरात पधारे। सो मारग में देवाभाई के गाम में डेरा किये। सो देवाभाई वेण्णव के संग श्रीगुसांईजी के दरसन कों आए। तब श्रीगुसांईजी सां विनती कीनी, जो - महाराज ! कृपा करि कै सरनि लीजिए। तब श्रीगुसांईजी आज्ञा किये, जो - तुम स्नान करि आओ। तब देवाभाई और देवाभाई की स्त्री दोऊ न्हाय आये। तब श्रीगुसांईजी ने कृपा करि कै वे दोऊन कों नाम-निवेदन करवायो। और देवाभाई के घर के और दस वीस हते तिन कों कृपा करि कै नाम सुनायो। तब देवाभाई ने विनती कीनी, जो - महाराज ! कृपा करि कै श्रीठाकुरजी पधराय दीजिए। और सेवा की रीति भांति कृपा करि समझाइए। तब श्रीगुसांईजी कृपा करि कै सेवा पधराइ दिये। और सेवा की रीति भांति सब सिखाई। पाछें श्रीगुसांईजी ब्रह्मसंबंध की तात्पर्य देवाभाई कों समझाइ कहं। तब देवाभाई तें ही सेवा करन लागे।

घाता प्रसंग—२

और उन के बेटा हते सो खेती करते। और देवा भाई तो भगवदु सेवा करते। सो देवाभाई नित्य दोइ वेण्णव कों

महाप्रसाद लिवाय कै पाछें आप महाप्रसाद लेते । और जितनो द्रव्य कमावते वह सब श्रीगुसाईजी कों पधराय भेंट करि देते । और गृहस्थाई में खरच प्रमान सों करते । और आप सदा सुलभ स्वभाव सों ही रहते । और ब्रह्मसंबंध करें पाछें जो द्रव्य कमावते वह सब श्रीगुसाईजी कौ जानते । और ठौर वोहोत खरचते नाहीं । या द्रव्य सों वोहोत डरपते । सो ऐसैं श्रीठाकुरजी की सेवा करते । सो श्रीठाकुरजी सानुभावता जनावते । ब्रजलीला कौ अनुभव करावते । सो वे देवाभाई ऊपर श्रीगुसाईजी सदैव प्रसन्न रहते ।

भावप्रकाश—या वार्ता कौ अभिप्राय यह है, जो - वैष्णव निवेदन कौ सदा सर्वदा स्मरण राखे । अपने द्रव्यादिक कौ और ठौर खर्च करे नाहीं । काहेतें ? जो - ये प्रभुन कौ द्रव्य है । तातें अन्य विनियोग होन न दे । या प्रकार अनन्य व्है सेवा करे तो ठाकुर निश्चय अनुभव जतावे ।

सो वे देवाभाई श्रीगुसाईजी के ऐसैं परम कृपापात्र भगवदीय हते । तातें इनकी वार्ता कहां ताई कहिए ।

वार्ता ॥१०१॥



अब श्रीगुसाईजी के सेवक एक वैष्णव बनिया, गुजरात में रहतो, ताकी बेटी, जाकों रामानदी सों ब्याह भयो, तिनकी वार्ता कौ भाव कहत हैं—

भावप्रकाश—ये बनिया की बेटी तामस भक्त हैं । लीला में इन कौ नाम ' कृष्णानुचरी ' है । सो ये पहिले द्वारिका लीला में ' तन्मध्या ' की सखी ही । उन तें प्रगटी हैं । तातें उनके भावरूप हैं । ये जा प्रकार ब्रज-लीला में प्राप्त भई, सो आगें कहि आए हैं ।

वार्ता प्रसंग—१

एक बनिया वैष्णव हतो । सो गुजरात में रहत हतो । श्रीगुसाईजी कौ परम कृपापात्र भगवदीय हतो । सो वाके घर बेटी जन्मी । सो एक समै श्रीगुसाईजी द्वारिकाजी पधारे हे ।



सो मारग में या वैष्णव के गाम में डेरा किये। तव यह वैष्णव अपनी बेटी कौ नाम सुनायेवे ल्यायो। ता सभे यह बेटी चरस डेढ़ की हती। सो श्रीगुसाईजी आप वाक्यों प्रसन्नता पूर्वक नाम सुनायो। पाछें आज्ञा कीनी, जो - या बेटी कों सर्वात्मभाव सिद्ध होइगो। पाछें यह बेटी बड़ी भई तव श्रीभागवत सुनन लागी। पाछें वा वैष्णव ने एक जाति के लरिका सो याकौ व्याह कियो। सो वह रामानंदी हतो। सो वह श्रीरघुनाथजी के स्वरूप में आसक्त हुतो। और या वह कौ मन श्रीकृष्ण की लीला में आसक्त भयो हुतो। रात्रि दिन श्रीकृष्ण की लीला कौ चिंतन करयो करे।

सो केतेक दिन पाछें वह रामानंदी वैष्णव अपनी बहू कों बुलावन आयो। तव वाके माता - पिता नें अपनी बेटी विदा करि दीनी। तव वे स्त्री पुरुष दोऊ चले। सो मजिल पें जाँइ उतरे। तव वा लरिकिनी नें रात्रि कों विचारयो, जो - याकौ भगवद्भाव कैसो हे सो मैं याकों पूछि देख्यों। तव वा लरिकिनी ने अपने पति सोँ पूछयो, जो - तुम्हारे श्रीरघुनाथजी कहा करत हैं? तव वाके पुरुष ने कही, जो - हमारे श्रीरघुनाथजी तो राजधानी करत हैं। सो उनके पास श्रीजानकीजी विराजन हैं। सो दोउ जनं राज करत हैं, लीला करत हैं। तव पुरुष अपनी स्त्री सोँ पूछयो, जो - तुम्हारे श्रीकृष्णचंद्रजी कहा करत हैं? तव स्त्रीने अपने पुरुष सोँ कही, जो - हमारे श्रीकृष्णचंद्रजी तो वनुनाद करि के सब ब्रजमुंदरीन कों बुलाई के रास रमन उन सोँ करत हैं। उनके संग मिलि के। सो उहां विमान पे चढ़ि चढ़ि के सब देवता देखन कों आए हैं। सो ताकी

उहां मंडप रचना भई है । और गंधर्व गान करत हैं । और ब्रजभक्त अनेक भांति सां गान करत हैं । सो या भांति सां हमारे श्रीठाकुरजी सदैव लीला करत हैं । सो नित्य प्रति अहर्निश यही बात करत उन दोउ जनें स्त्री-पुरुष कों प्रातःकाल होइ जाँइ । तब ये बात करत करत हास्य करत में एक दिन पुरुषनें कह्यो, जो - तुम्हारे श्रीठाकुरजी तो महा व्यभिचारी हैं । सो सदैव स्त्रीन कों साथ ले रमन करत हैं । तब स्त्रीने अपने पुरुष सां कह्यो, जो - तुम्हारे श्रीरघुनाथजी तो घर में निर्वल हैं । सो एक श्रीजानकीजी कों राखि सके नाहीं । या प्रकार दोनो झगरन लागे । सो दोउन कों आरति भई । तब श्रीठाकुरजी ताही समै परम दयाल भक्त की आरति सहि सके नाहीं । तातें आप मध्यमें प्रगट होई झगरो चुकायो । पाछें कही, जो - मैं प्रसन्न भयो हूँ, तातें तुम कछू मांगो । तब इन दोउ जनेंन कही, जो - महाराजाधिराज ! हम तो यही मांगत हैं, जो - तुम हम ऊपर प्रसन्न भए हो तो हमारो निर्वाह सदैव याही बात करत होई । जातें आप के दरसन नित्य होई । तब श्रीठाकुरजी तो इन कौ यह वचन सुनि कै खरेई प्रसन्न भए । तब इन दोउ जनेंन कौ जन्म यही बात करत गयो । परि इनकों कछू संसार की स्फूर्ति न भई । संसार कों जान्यो नाहीं, जो - यह कहा है ?

भावप्रकाश—या वार्ता में यह संदेह है, जो - स्त्री-पुरुष दोऊ ठाकुर की निंदा किये । दोऊ स्वरूपन में भेद-बुद्धि किये । तोऊ ठाकुर आप प्रगट व्है दरसन दिये, ताकौ कारन कहा ? तहां कहत हैं, जो - भक्तिमार्ग में कोऊ कैसे हू प्रकार सां अनन्य व्है रहत हैं तिन पर ठाकुर या भांति कृपा करत हैं । काहेतें, जो - अनन्यता करि भक्त कों तन्मयता होत हैं । सो अनन्यता ऐसो पदार्थ है । और भक्तिमार्ग में लीला-भेद सां स्वरूप-भेद हैं । तातें भक्त हूँ सो जा लीला कौ

अधिकारी होइ ता लीला के स्वरूप में मगन व्है, तव अनन्य होई। तातें जानमार्ग तें भक्तिमार्ग विलक्षण हैं।

वार्ता प्रसंग—२

और उनके घर श्रीठाकुरजी कौ सिंगार जब स्त्री करे तव तो मोर मुकुट, काछनी, धोती, उपरेना, वागा, पाग, फेंटा, कुलही, टिपारो, मल्लकाछ, पिछोरा या प्रकार भांति भांति के सिंगार करे। तव ताई इनकों साक्षात् श्रीठाकुरजी श्री-कन्हैयालालजी के प्रतिविंब के दरसन होई। और जब उन कौ पुरुष श्रीठाकुरजी की सेवा - सिंगार करे तव इन कों श्रीरघुनाथजी कौ साक्षात् दरसन होई। सो याही भांति सों उन दोऊ जनैन कों सदैव अनुभव होई। परि वे जो कार्य करे सो स्नेह संयुक्त करे। याहां प्रकार उन के जन्म संपूरन वीते। उन जान्यो नाहीं, जो - या संसार में और कछू हे। तातें उन दोऊ जनैन कों श्रीठाकुरजी ऐसो अनुग्रह किये। तातें वे दोऊ ऐसैं भगवदीय कृपापात्र हते। दोऊन कों सर्वात्म भाव सिद्ध भयो हतो।

भावप्रकाश—या वार्ता में यह संदेह है, जो - स्त्री तो पुष्टिमार्गीय हती सो उन मर्यादा स्वरूप कौ सिंगार क्यों कियो? तहां कहत हैं, जो - स्त्री में स्नेह प्रकार करि सर्वात्मभाव सिद्ध भयो है। तातें उनके भाव तें वा स्वरूप में पुष्टि कौ आविर्भाव होत है। रसात्मक प्रकार तें ठाकुर अनुभव जनावत हैं। सो ऐसो सर्वात्म भाव सिद्ध होई तव पुष्टि मर्यादा बुद्धि रहत नाहीं। एक स्वरूप भाव प्रगट होत है। तबत्र भावात्मा कौ ही अनुभव होत हैं। सो यह भक्तिमार्ग ऐसो विलक्षण है। सो श्रीआचार्यजी महाप्रभु 'चतुःश्लोकी' में कहत हैं। सो श्लोक—

यदि श्रीगोडुलाधीशो घृतः सर्वात्मना हृदि।

ततः किमपरं ब्रूहि लौकिकैर्वैदिकैरपि।

ताव जा ने अपने हृदय में सर्वात्म भाव करि श्रीगोडुलाधीश कों ध्यान

किये । ताकों लौकिक वैदिक ते कहा ? सो यह भाव सर्वोत्तम जाननो ।

सो वह वैष्णव की लरिकिनी श्रीगुसाईजी की ऐसी कृपापात्र भगवदीय हती । तातें इनकी वार्ता कौ पार नाहीं, सो कहां ताई कहिए । वार्ता ॥१०२॥



अब श्रीगुसाईजी के सेवक दोऊ भाई साँचोरा ब्राह्मन, गुजरात में रहते तिनकी वार्ता कौ भाव कहत हैं —

भावप्रकाश—ये सात्विक भक्त हैं । लीला में बड़े भाई कौ नाम 'वैष्णवी' है । छोटे भाई कौ नाम 'वल्लभा' है । सो दोऊ श्रीयसोदाजीकी अंतरंग सखी हैं । नंदालय की टहल में सदैव तत्पर रहत हैं । ये 'कुंजरी' तें प्रगटी हैं । तातें उनके भावरूप हैं ।

वार्ता प्रसंग—१

सो एक समै श्रीगुसाईजी गुजरात पधारे हे । तब उन दोऊ भाई साँचोरा ब्राह्मन नें नाम-निवेदन पायो हतो । सो साँचोरा ब्राह्मन परम भगवदीय भए । सो उन कों श्रीप्रभुजी सानुभाव हते । और वैष्णव में बोहोत स्नेह ममत्व हतो ।

सो एक समै गुजरात के वैष्णव एकत्र होइ कै श्रीगुसाईजी के दरसन कों श्रीगोकुल कों चले । सो मारग में दोऊ भाई साँचोरा रहत हुते, ता गाम में आए । सो वैष्णव जानि कै रात्रि कों उहां बसे । तब उन दोऊ भाईन कौ वैष्णव पर परम स्नेह हतो, सो मिले, भेटें । श्रीकृष्ण-स्मरण किये । पाछें घर में देखे तो घर में कछू हतो नाहीं । तब अपने मन में विचार करन लागे, जो - अब कहा प्रकार कीजिये ? और वैष्णव तो अपने घर कृपा करि कै पधारे हैं, सो तो अपना बड़ो भाग्य है । परि अपने घर में कछू सामग्री नाहीं है । वैष्णव अपनी गांठि कौ महाप्रसाद लेइंगे तो अपनी माला

को धर्म नहीं है। और सगाई-संबंधता को कल्लू रहेगा नहीं। तब बड़े भाई अपने मन में विचारि करि छोटे भाई सों कह्यो: जो - अपने पाछें अपने बनिया की हाट है। सो बनिया तो काहू गाम (कों) गया है। सो जाँड़ के तारौ तोरि कै जो सामग्री चहिए सो ले आइये। पाछें वह आवेगा तब हम दाम दे देइंगे। तब छोटे भाई ने बड़े भाई सों कह्यो: जो - भली बात है। पाछें जाँड़ के तारौ तोरयो। सो किवाड़ खोलि कै जितनो सीधो सामग्री चहिए तितनो लीनो। पाछे गांठि बांधि कै छोटे भाई ने बड़े भाई कों दीनी और कह्यो: जो - तुम चलो, हों किवाड़ मारि कै आवत हूं। तब बड़े भाई अपने घर आयो।

भावप्रकाश—यहां यह संदेह होई, जो - वैष्णव के समाधान के ताँडे ऐसो लोक विरुद्ध कार्य क्यों किये? तहां कहत हैं, जो भगवदीय वैष्णवन का स्वरूप महा अलौकिक हैं। साक्षात् भगवान का ही स्वरूप हैं। ताँते घर आए भगवदीयन का भूखे कैसे रहन दें? यह वैष्णव का धर्म नहीं। ताँते उन दोउनने भगवद्धर्म आगे लोक वेढकों तुच्छ करि जाने। यह भाव जाननो।

इतने में कोतवाल का मनुष्य आयो। तब छोटे भाई कों कोतवाल के मनुष्य ने पकरयो। तब चोतरा पे ले गए। तब कोतवाल सों सब समाचार कहे। ता सभे गाम का राजा तहां बैठयो हतो। तब उह ब्राह्मण का परोसी चोतरा ऊपर लिखत हतो। सो वह महा कुटिल हतो। सो वाके और इन दोऊ भाईन कों परस्पर द्वेषभाव हतो। सो वाने याकों देग्वि के कह्यो: जो - साहिवजू! ये बड़े चोर हैं। जो - सब गाम में चोरी होत है सो सब येही करत हैं। जो - इन की तन्हाय में होत है। और इनने मनुष्य बहोत मारे हैं। सो गेनीगेनी

बोहोत ही वाते कही । तव राजाने हुकम दियो, जो - याकों खरच करि डारो । तव मनुष्यन ने वाकों ठौर मारयो । ता पाछें वाकौ सीस गाम के द्वार पै वांध्यो । और धड एक वृक्ष सों वांध्यो । ऐसैं छोटे भाई कौ कियो । काहेतें, जो - कोऊ आज पाछें ऐसो काम करे नाहीं । तव ये वात बड़े भाई ने जानी । परि कछु बोल्यो नाहीं । मन में कहे, जो - अपने मन में कलेस करुंगो तो वैष्णव भूखे रहि जाँइगे । और अब तो भयो सो तो भयो । 'निजेच्छा' । ऐसैं मन में विचारि कै आपतो न्यारो वेठि रहि कै पाछें स्त्रीन पास सब सामग्री सिद्ध कराय कै श्रीठाकुरजी कों भोग समर्प्यो । पाछें भोग सराय कै सब वैष्णवन कों महा-प्रसाद लिवायो । पाछें सब वैष्णव कीर्तन किये । और श्री-आचार्यजी महाप्रभुजी के सेवकन की वार्ता तथा श्रीगुसांईजी के सेवकन की वार्ता और ग्रंथन की टीका सब वैष्णव मिलि कै आपुस में चर्चा करन लागे । तव बड़े भाई सों वैष्णवन पूछयो, जो - तुम्हारे छोटे भाई काल्हि तो आए हे ता पाछें फेरि देखे नाहीं । सो कहां है ? तव बड़े भाई ने उन वैष्णवन सों कह्यो, जो - कछु काम गयो होइगो । पाछें दूसरे दिन बड़ी सवारे ही उठि कै सब वैष्णव मिलि कै बिदा हँडि कै चले । तव बड़ो भाई थोरीसी दूरि कों पहुँचावन कों गयो । तव छोटे भाई कौ धड़ बंध्यो हतो ताकी नेक दूरि तें बिदा किये । तब वह धड हू हाथ जोरत है, और कंठ सों लगावत है ।

भावप्रकाश—यहां यह संदेह होई, जो-धड़ हाथ कैसे जोरे ? तहां कहत हैं, जो - जैसे रनमें सूरवीर लरत में मरत हैं । तब वा समै सूरवीरता कौ आवेस रहत हैं । तासों वाकौ धड़ मरे पाछे हू तीन दिन लों, सात दिन लों, लरत हैं ।

तैसैंड भगवद् आवेस सों या धड़ ने वैष्णवन को श्रीकृष्ण - स्मरण किया, ऐसैं जाननो ।

तव दरवाजे की ओर देखे तो सीस बंध्यो है । तव वैष्णव ने कह्यो. जो - यह सिर धड़ कौन कौ है ? पाछें उन वैष्णवन ने पहचान्यो । तव उन वैष्णवन ने बड़े भाई साँचोरा ब्राह्मण सों पूछ्यो, जो - यह कहा कारन है ? तव बड़े भाई कौ हृदय भरि आयो । और वोहोत ही रावन लाग्यो । ता पाछें सब वैष्णवन को दौऊ हाथ जोरि कै विधि पूर्वक सब समाचार कहे । पाछें सब वैष्णव उहां तें धड़ छोरि ल्याए । और सीस दरवाजे तें छोरि ल्याये । सो सीस धड़ के ऊपर धरयो । ता पाछें श्रीआचार्यजी महाप्रभु, श्रीगुसाईजी को स्मरण करि कै नाम लें, चरनोदक-महाप्रसाद कंठ में मेल्यो. और मुख में मेल्यो । ता पाछें महाप्रसादी उपरेना हतो सो कंठ में बांध्यो । तव वह सीस धड़ मिलि गयो ।

भावप्रकाश—यहां यह संदेह होई, जो - एसैं कैसें होई? कटयो भयो मिर कैसें जुरे? तहां कहत हैं, जो - भगवदीय वैष्णवन के हृदय में प्रभु आप साक्षात् विराजत हैं । तातें उन में अलौकिक सामर्थ्य है । ये चाहे जो करि सकत हैं । जैसें वेद व्यासजीने महाभारत के समै मरे भए योद्धान को जिज्ञाए है । सो अपनी अलौकिक सामर्थ्य सों । नांतरु ये कैसें संभवे ? नाही प्रकार यहां हू जाननो ।

पाछें वैष्णव उठि के ठाढ़ भए । तव सब वैष्णवन के उह पाँवन परयो । सो यह बात-समाचार सब गाम के राजा ने सुने । सो दरवान ने दारि जाँइ के राजा सों कह्यो । तव राजा दारि कै देखन आयो । तव वह राजा देखे ता सब साँची बात है । सब ज्यां को त्यां सरीर सिद्ध भयो है । रंचक हू

कसर नहीं परी । ऐसो मिलि गयो हतो । तव वह राजा वैष्णवन के पावन परचो । और वा राजा ने दोऊ हाथ जोरि कै उन वैष्णवन सों कह्यो, जो - तुम बड़े भगवदीय महापुरुष हो । तातें मेरो अपराध क्षमा करो । ऐसी वोहोत विनती राजा ने कीनी । और कह्यो, जो - याकौ अपराध मैं भुगतूंगो । अपना कियो पावेंगे । ता पाछें राजा वा परोसी कों मारन लाग्यो । तव वैष्णवन ने वा परोसी कों मारन न दीनो ।

भावप्रकाश—सो यातें, जो - यह वैष्णव को धर्म नहीं है । वैष्णव कों जीव मात्र पर दया राखनी । काहूकों बुरो होन न दे । यह जतायो ।

ता पाछें वा परोसी कों गाम तें वाहिर काढ़ि दीनो, और वा परोसी कौ घर लूटि लीनो । पाछें राजा ने वैष्णवन कों राखिवे कों वोहोत ही आग्रह कीनो । परि वे रहे नहीं । तव सब वैष्णवन कों राजा ने बिदा किये । सो वे सब श्रीगोकुल कों गए । ता पाछें उन वैष्णवन सब समाचार विस्तारपूर्वक श्रीगुसांईजी सों कहे । तव श्रीगुसांईजी सब वैष्णवन के वचन सुनि कै वोहोत प्रसन भए । सो उन दोऊ भाईन के ऊपर श्रीगुसांईजी सदा प्रसन्न रहते ।

भावप्रकाश—या वार्ता में यह जतायो, जो - घर आए वैष्णवन की सेवा प्रीति पूर्वक करनी । सब कष्टनकों सहन करनो । भगवदधर्म आगें लौकिक वैदिक तुच्छ करि जानने ।

सो वे दोऊ भाई श्रीगुसांईजी के ऐसैं कृपापात्र भगवदीय हते । तातें इनकी वार्ता कौ पार नहीं, सो कहां ताई कहिए ।  
वार्ता ॥१०३॥





अब श्रीगुसाँईजी की सेवक एक राजा गुजरात का, जो दोई भाई साँचोरा ब्राह्मन के संग तें वैष्णव भयो, तिनकी घाता का भाग कहत है—

भावप्रकाश—ये राजस भक्त हैं। लीलामें इनकी नाम 'गौरोचनी' है। सो गौरोचनी वल्लभी की अंतरंग सखी हैं। ये 'कुंजरी' तें प्रगटी हैं, तातें इनके भावरूप हैं।

घाता प्रसंग—१

सो वे वैष्णव तो श्री गोकुल गए। पाछें वा गाम का राजा इन दोऊ भाई साँचोरा ब्राह्मन के पास आयो। और वोहोत ही धिधियाइ के विनती कियो, जो-तुम मेरो अपराध क्षमा करो। हों विनु जाने तुम्हारो अपराध कियो। अब तुम कृपा करि मोकों अपनो सेवक करो। जो तुम महापुरुष हो। सो मोकों सरनि लेहु। या प्रकार राजा की दीनता देखि बड़े भाईने कह्यो, जो-राजा ! हम तो काहू काँ सेवक करत नाहीं। हमारे धनी श्रीगुसाँईजी श्रीविठ्ठलनाथजी श्रीगोकुल में विराजत हैं। उनकी तुम सरनि जाउ। वे तुमकों सेवक करेंगे। वे ईश्वर हैं। सर्व करन समर्थ हैं। ये जो कछू भयो है, सो सब उनकी कृपा जानियो। तातें तुम काँ सेवक होनां होई तो श्रीगोकुल जाई उनकी सरनि होऊ। तब राजा विनती कियो, जो-तुम दोऊ भाई साथ चलो तो हों श्रीगोकुल चलों। काहेतें ? जो श्रीगुसाँईजी तो तुम्हारी कृपातें मोकों सरनि लेई तो लेई। नांतरु मेरे जैसे दुष्ट कर्म करनहार काँ श्रीगुसाँईजी कहा जाने ? या प्रकार राजा का सुद्ध भाव जानि दोऊ भाई राजा के साथ श्रीगोकुल काँ चले। सो राजा अपनी रानी कुटुंब सहित दोऊ भाई साँचोरा ब्राह्मन काँ मंग ले श्रीगोकुल आयो। तहां श्रीगुसाँईजी के दरसन कियो। तब दोऊ भाई साँचोरा ब्राह्मन श्रीगुसाँईजी

सों विनती किये, जो - महाराज ! ये राजा आपकी सरनि आयवे की अभिलाषा करत है । तातें कृपा करि आप इनकों सरनि लीजिए । तव श्रीगुसाईजी दोऊ भाईनकी ओर प्रसन्नता पूर्वक देखि आज्ञा किये, जो - इनकों सरनि लेनो उचित तो नाही, काहेतें, जो - इन वैष्णव कौ अपराध कियो है । परि तुम विनती करत हो तातें इनको सरनि लेइंगे । पाछें श्रीगुसाईजी कृपा करि राजा कों सब कुटुंब सहित नाम दे सरनि लियो । दूसरे दिन व्रत कराय समर्पन करायो । सो राजा श्रीगुसाईजी कौ सेवक भयो । तव श्रीगुसाईजी राजा कों आज्ञा किये, जो - आज पाछें वैष्णव कौ अपराध मति करियो और इन दोऊ भाई साँचोरा ब्राह्मन कों पूछि कै सब काम करियो । पाछें राजाने श्रीगुसाईजी कों बोहोत भेट कीनी । ता पाछें राजा ने श्रीनवनीत-प्रियजी आदि सातों स्वरूपन के दरसन किये । पाछें श्रीगुसाईजी आप श्रीनाथजीद्वार पधारे । तव वह राजा हू श्रीगुसाईजीके संग श्रीनाथजीद्वार श्रीनाथजीके दरसन कों गयो । तहां श्रीगुसाईजी आप स्नान करि कै श्रीगिरिराज पर्वत ऊपर मंदिर में पधारे । तव राजाने हू पर्वत ऊपर चढि कै श्रीगोवर्द्धननाथजीके दरसन किये । सो वा राजाने श्रीगोवर्द्धननाथजी कों बोहोत भेट कीनी । ता पाछें कितनेक दिन ताई वा राजाने श्रीनाथजीके तथा श्रीगुसाईजीके दरसन किये । पाछें श्रीगुसाईजी सों आज्ञा मांगि दोऊ भाई साँचोरा ब्राह्मन कों संग ले अपने देस कों आयो । पाछें वा राजाने दोऊ भाई साँचोरा ब्राह्मन कों बोहोत भांति समाधान कियो । और कह्यो, जो - तुम्हारी कृपा तें हौं वैष्णव भयो हूं । तातें हौं तुम्हारो रिनिया हूं । तव ता दिन तें

राजा उन दोऊ भाईनकी वोहोत कानि राखतो । मिलिके चलतो । सो उन दोउ भाईन के घर राजा एक वार दोय वार नित्य आवतो । उनही सां पूछि के आचरन करतो । सो वे कहते तैसैंडे राजा करतो । सो ऐसैं करत उन दोऊ भाई वैष्णवन के संग तें राजा भलो वैष्णव भयो ।

भावप्रकाश—या वार्ता कौ अभिप्राय यह है, जो - तादृशी वैष्णव की संगति करनी । सो या राजा की बुद्धि सत्संग करि के फिरी । तासो मत्संग ऐसो पदार्थ या संसार में है ।

सो वह राजा श्रीगुसांईजी कौ ऐसो परम कृपापात्र भगवदीय हतो । तातें इनकी वार्ता कहां तांई कहिए । वार्ता ॥१०४॥



अब श्रीगुसांईजी के सेवक स्त्री-पुरुष क्षत्री, प्रयाग के, हीरान की धरती पहचानते, तिनकी वार्ता कौ भाव कहत हैं ।

भावप्रकाश—ये तामस भक्त हैं । लीला में पुत्र्य कौ नाम 'छाया' है, और स्त्री कौ नाम 'माया' । सो 'छाया'—'माया' दोऊ श्रीयसोदाजी की मग्नी हैं । नंदालय में श्रीठाकुरजी के संग रहति हैं । जैसे मनुष्य की छाया रहति है । ता भांति । ये दोऊ 'कुंजरी' तें प्रगटी हैं, तातें उन के भावस्य हैं ।

सो ये दोऊ प्रयाग में क्षत्रीन के जन्मे । पाछे व्रम आठ-दस के भए । तत्र माता-पितान ने दोऊन कौ व्याह कियो । सो एक समै श्रीगुसांईजी आप प्रयाग विराजत हुते । तत्र मकरसंक्रांति कौ पर्व आयो । सो चारों सम्प्रदाय के आचार्य, सत-महंत आदि त्रिवेनी स्नान कौ प्रयाग आए । ता समै श्रीगुसांईजी हू त्रिवेनी स्नान कौ पवारे । तत्र चारों सम्प्रदाय के आचार्यन ने श्रीगुसांईजी कौ नमस्कार किये । ता पाछे सवन ने मिलि क विनती कीनी, जो - महागज ! प्रथम स्नान आप कीजिए । काहेतें ? जो - श्रीआचार्यजी महाप्रभुन ने कृष्णदेव राजाकी सभा में वैष्णव धर्म की रक्षा कीनी है । सायावाद कौ रूटन कियो है । नांतर आज वैष्णव सम्प्रदाय कोऊ जानतो नाहीं । सो आगे हू ऐसो पर्व आयो तत्र श्रीआचार्यजी आप प्रथम स्नान किये हें । तत्र सम्प्रदाय वाग्नि ने आप कौ तिलक कियो है । तातें आप प्रथम स्नान कीजिए । तत्र श्रीगुसांईजी आप चारों

वैष्णव सम्प्रदायवारेन के आग्रह तें प्रथम स्नान किये । ता समै विष्णुस्वामि सम्प्रदाय वारेन ने श्रीगुसांईजी कों आचार्य - तिलक कियो । ता समै संख की ध्वनी चारों दिसान में होन लागी । झालर घंटा वाजन लागे । सो ऐसो उत्कर्ष देखि वोहोत से दैवी जीव सरनि आए । तिन में ये स्त्री-पुरुष हू श्रीगुसांईजी के सरनि आए । तब श्रीगुसांईजी दोऊन कों आज्ञा किये, जो - तुम भगवत्सेवा करो । पाछे श्रीगुसांईजी आप इन स्त्री-पुरुष कों कृपा करि कै एक लालजी कौ स्वरूप पधराय दिये । ता पाछे आज्ञा किये, जो - तुम इनकी नीकी भांति सों सेवा करियो । और श्रीआचार्यजी की सेवकिनी एक धत्रानी प्रयाग में रहति हें । ताकौ संग करियो । सो वह तुमकों सेवा की सब रीति सीखावेंगे । तब पुरुषने श्रीगुसांईजी सों विनती कीनी, जो - महाराज ! हम कों तो आप के स्वरूप में आसक्ति भई है । तातें हम तो आपकी सेवा करेंगे । तब श्रीगुसांईजी वासों कहे, जो - ये मेरो ही स्वरूप है । तातें तुम इनकी प्रीति पूर्वक सेवा करियो । और मैं तुम्हारे निकट ही हूं । सो जब तू चाहेगो तब तोकों मेरे दरसन होईंगे । या प्रकार कहि श्रीगुसांईजी तो आप अडेल पधारे । और वे दोऊ स्त्री-पुरुष धत्रानी के संग तें सेवा की रीति सब सीखे । पाछे भगवत्सेवा भाव पूर्वक करन लागे । सो इन कों श्रीठाकुरजी सानुभावता जनावन लागे । और श्रीगुसांईजी हू दरसन देन लागे ।

वार्ता प्रसंग—१

सो वे खेती करते । सो एक समै वर्षा थोरी भई । सो इनके खेतमें अन्न कछू नाहीं भयो । पाछे हाकिम इन सों खेत कौ पैसा माँगन लाग्यो । तब इन कह्यो, जो - तेरे खेतमें तो अन्न कछू नाहीं भयो है । हम पैसा कहां तें देइ ? तब वा हाकिम ने जो घर में वस्तूभाव हती सो सब लूटि लीनी । पाछे घरमें कछू हू वस्तू नाहीं रही । सो यह स्त्री पतिव्रता हती । तब यह चरखा चलाय रुई ल्याय कै कांतें । सो सूत होइ ताकों बैचि कै जो आवें तामें निर्वाह करें । पहिले श्रीठाकुरजी कों भोग धरि पाछे अपने पति के आगें धरि देहि । सो पुरुष महाप्रसाद लै चुकै तब पति की पातरि में जो कछू रहें सो

लेई । और वह पति पूछे, जो - तेनें अपने लिये कहा राख्यो है ? तव वह कहे, जो - मैं अपने लिये महाप्रसाद राख्यो है । तुम्हारे पीछे लेउंगी । तव वह पति चुप होइ रहे । ऐसें करत दिन दोइ बीते । सो वा स्त्री की देह कृप होइ गई । तव पति ने विचारयो, जो - यह कछु खाँत हे नाहीं । तव तीसरे दिन वा स्त्री ने पति के आगे पातरि धरी । तव इन पूछी, जो - तेरे लिये कहा है ? तव स्त्रीने कह्यो, जो - मैं अपने लिये उहां धरि राख्यो है । तुम लेउगे ता पाछें मैं लेउंगी । तव पुरुष ने जान्यो, जो - यह नाही खाँत हे । तातें वा पुरुष ने आधो महाप्रसाद लियो । पाछें पुरुषने स्त्री सों कही, जो - अब मैं परदेस जाँइ कै कछु कमाय ल्याऊं । तव स्त्रीने कह्यो, जो - तुम काहेकों जाँत हो ? तुम मेरी चिंता मति करो । काम तो चल्योई जात है । तव पुरुषने कही, जो - तू धन्य है । जो - आजके समे मैं ऐसो धर्म राख्यो है । और तू श्रीठाकुरजी की सेवा भली भाँति सों करियो । और तू आछी भाँति रहियो । मैं वेगि ही कछुक दिन में आऊंगो । ऐसें कहि के वह पुरुष चल्यो । सो जहां हीरान की खाँति हती तहां गयो । तहां एक व्यौपारी ने कह्यो, जो तुम कहां ते आए हो ? कौन हो ? कौन काम करत हो ? तव इन कह्यो, जो - मैं हीरान की धरती जानत हूं । तव उन कह्यो, जो - तुम बैठो । पाछें व्यौपारीने कह्यो, जो - तुम धरती जानत हो तो मैं मोल लेऊ । सो तुम कहो । (और) जो - कछु माल निकसेगो तो तुमहू कों देद्विंगे । तव इन कह्यो, जो - मेरे पास तो कछु द्रव्य नाहीं हे । जो - कदाचित्र हीरा न निकसे तो हाकिम कों कहा देउंगो ? तव उन व्यौ-

पारी कह्यो, जो - माल न निकसेगो तो हाकिम कों मैं देउंगो । तब वह वैष्णव वा व्यौपारी के साथ घर रह्यो । पाछें वा व्यौपारीने धरती हाकिम सों लै खुदाई । तामें माल वोहोत निकस्यो । सो वैष्णव बरस दिन ताई वा व्यौपारी के घर रह्यो । सीधो सामान व्यौपारी पास तें लेके रसोई करि भोग धरि कै महाप्रसाद लेतो । पाछें वा वैष्णवने मन में विचारयो, जो - बरस दिन भयो । अब अपने घर चलिये । श्रीगुसाईजी के दरसन करिये । माल हू वोहोत निकस्यो है । तब वा वैष्णव ने व्यौपारी सों कह्यो, जो - अब हम घर जाँइगे, तातें हमारो जो - कछू होई सो देहु । तब व्यौपारीने वैष्णव सों कह्यो, जो - यह माल तो हमारे भाग्य तें निकस्यो है । जो - तू कछू बढतो तो मैं देतो । तुमने चाकरी करी है सो हमने तुम कों सीधो पेटिया खायवे कों दीनो है । अब तुम कहा मांगत हो ? तुम्हारे मन में आवें तब चले जाऊ । मन में आवे रहो । तब यह सुनिकै वैष्णव चुप करि रह्यो । मन में कह्यो, जो - देखो ! बरस दिन चाकरी करी और मोकों कछू न दीनो । और माल वोहोत निकस्यो । परंतु भगवद् इच्छा ऐसी ही है । मैं घर तें श्रीठाकुरजी की सेवा छोरि कै आयो । तातें मोकों कछू न मिल्यो । श्रीठाकुरजी करत हैं सो आछी ही करत हैं । तासों अब घर चलनो उचित है । जो पेट में पाइवे कों तो उहांई मिलत है । ऐसो वह वैष्णव मन में विचार करि वा व्यौपारी सों कछू कह्यो नाहीं । पाछें दूसरे दिन सांझ भई तब सोय रह्यो । पाछें दूसरे व्यौपारी ने ये समाचार सुने । तब वह व्यौपारी दूसरे दिन वा वैष्णव के पास आयो । पाछें वा व्यौपारीने वैष्णव सों

कह्यो, जो - तुम उदास होइ क्यों जात हो ? कछुक दिन मेरे इहां रहो तो आछौ हे । जो माल निकसेगो तामें तें आधो वांटि दउंगो । तव वैष्णव ने कही, जो - एक बेर तो दगा पाइ है । अब कैसे मानों ? तव व्यौपारी ने कह्यो, जो - चारि भले आदमीन सां कहवाय देउं । तव वा वैष्णव के मन में आई, जो - दोइ चारि महिना और देखि लउं । खाली हाथ कहा घर जाऊं ? तव चारि मनुष्यन तें कहि कै वैष्णव वा व्यौपारी पास रह्यो । तव व्यौपारी ने धरती हाकिम पास तें मोल लीनी । सो वैष्णव ने जा ठौर बतार्इ ता ठौर खुदवायो । सो पहिले तें अधिक माल निकस्यो । तव महिना चारि भए । तव वैष्णव ने व्यौपारी सां कह्यो, जो - अब तो हम कां घर छेरे बोहोत दिन भए है तातें अब तो घर जाँइगे । सो तुम आधो माल कह्यो है सो देउ । तव व्यौपारी ने वैष्णव तें कह्यो, जो - यह माल तुम्हारे भाग्य तें निकस्यो है । जो चाहो सो सब लउ । परि तुम कछुक दिन मेरे पास रहो । तव वैष्णव ने कही, जो - अब तो हम घर जाँइगे । हमारे वांटि कौ द्रव्य है सो देउ । अधिकी हमकां नाही चाहियत है । तव वा व्यौपारीने आधो माल वांटि दियो । और प्रसन्नता सां वैष्णव कां विदा कियो ।

और वह पहिले कौ व्यौपारी हतो, तानें दगा कियो हतो । सो ताके घर में आगि लागी । सो सगरो माल घरकी वस्तु सहित सब भस्म होइ गई । तव वा व्यौपारी ने जान्यो, जो - मैंने वा वैष्णव कां कछु न दियो तासां मेरे घर में आगि लागी । सगरो माल गया । तव मन में विचारी, जो - वैष्णव फिरि कै आवे तां विनती करि आउं । और इहां वैष्णव ने विचारि

कै कछूक माल बेचि कै चारि मनुष्य मार्ग में साथ के लिये चाकर राखे । सो अपने घर चलिवे की तैयारी करी । ताही समै वह पहिलो व्यौपारी वा वैष्णव के पास आय पाँवन परयो । और कह्यो, जो - वैष्णव ! मैं तुम सां दगा करयो । तो मेरो सगरो माल योंही गयो । और पहिले घर में वस्तू हती सोऊ आगितें जरि गई । अब मेरे पास खाँयवे कां कछू न रह्यो । मांकां दसवीस रुपैया वजार के देने हैं । सो अब तुम कछूक दिन मेरे पास रहो तो धरती लेउं । पाछें माल निकसेगो तामें तें कछू तुमकां देउंगो । ऐसैं करो तो तुम मांको जिवाय लेउ । तब वैष्णव व्यौपारी सां कह्यो, जो - हम कां तो घर छोरे वोहोत दिन भए हैं । तातें हम कां जरूर घर जानो है । और रुपैया १००) सौ तुम ले जाऊं । यामें तें जाकां देनो होंइ ताकां दीजियो । और तुम कछूक दिन खईयो । तब वह व्यौपारी वा वैष्णव के पास तें रुपैया सौ लैके अपने घर आयो ।

भावप्रकाश—सो वैष्णव काँ ऐसो धम है, जो - कोऊ बुरो करे ताहू काँ भलो करनो ।

पाछें वह वैष्णव चारि मनुष्य लैके अपने घर कां चल्यो । सो मारग में ग्यारह ठग मिले । सो संग चले । तब वैष्णव ने उन सां कह्यो, जो - तुम कौन हो ? तब उन ठगन कह्यो, जो - हम या गाम में राजा के चाकर हते । सो हमारी चाकरी छूटि गई है । सो अब हम कां दूसरे गाम में जहां चाकरी मिलेगी तहां करेंगे । तब वैष्णव ने कहीं, जो - रुपैया दोइ दोइ काँ महिना ग्यारहहू काँ देइंगे । और एक महिना संग राखेंगे । आगें हमारे समवाई है नाहीं । तुम्हारी ईच्छा होंइ तो हमारे संग चलो । तब ठगनने



कही, जो - हम थोरे से दिन लों तुम्हारे संग चलेंगे । आछी जगह हमारी चाकरी लगोगी तहां रहेंगे । तब वैष्णव ने कही, जो - जहां ताई तुम्हारी इच्छा होई तहां ताई चलो । तब वे ग्यारह ठग साथ चले । सो ठगन को दाँव कछू न लगे ।

सो एक दिन गाम साँ कोस एक परे तलाव हतो सो वा तलाव पर आए । तब तलाव वोहोत सुंदर देखि कै उन ठगन कही, जो - रसोई की ठौर वोहोत सुंदर है । यहां रसोई करि कै पाछे गाम में जाई रहेंगे । तब वैष्णव ने चारयो मनुष्यन साँ कही, जो - सीधो सामान लकड़ी, वासन ले आओ तो रसोई करें । तब उन मनुष्यन कही, जो - दोऊ जनें तुम्हारे पास हू चहिए । दोइ जनें सब सामग्री ले आवेंगे । तब वैष्णव ने कही, जो - हमारे संग तो ग्यारह मनुष्य हैं । तुम सब जनें आछी भांति साँ सीधो सामग्री लै आओ । तब वे चारयो जनें तो सीधो सामग्री लेन गए । तब वे ठग आपुन में बातें करन लागे । जो - आज दाव परचो है । अब तो चूको मति । तब यह बात वैष्णव ने सुनी । तब पूछी, जो - तुम कहा कहत हो ? तब उन कह्यो, जो - हम ठग हैं । तुमकों मारेंगे । वोहोत दिन तें तुम्हारे पाछे लगे हैं । तब वैष्णव ने कही, जो - मैं न्हाय लेउ तब तुम मोकों मारियो । तब वैष्णव कपड़ा उतारि कै जल में ठाढ़ो भयो । तब तहां महा दुःख करि कै श्रीगुमां-ईजी को स्मरन करि कै वोहोत आरति साँ विनती करी, जो - महाराज ! मेरो कौन अपराध है सो घर न पहोचन पायो । श्रीठाकुरजी के चरनपरस हू न करन पाया । और आप के हू दरसन न भए । द्रव्य मिले तें प्रान जात है । द्रव्य भगवदु

विनियोग हू न भयो । और ठगन हाथ मृत्यु होत है । यह मेरो अपराध कहा है ? या प्रकार बोहोत आरति करि कै बिनती करी । तव श्रीगुसांईजी आप तो परम दयाल हैं । सो तहांई प्रगट होइ कै दरसन दिये । और आज्ञा किये, जो - वैष्णव ! तू दुःख मति पावे । पहिले जन्म में तैंनें इन ग्यारह जन कों मारयो है । सो ये न्यारे न्यारे दाव लेत तो तोकों ग्यारह जन्म लेने परते । सो अब ये तोकों इकठोरे व्हे कै मारत है । सो एक ही जन्म में तू इन सों छूटेगो । तातें तू डरपे मति । तव यह सुनि कै वैष्णव तलाव में तें निकसि उन ठगन के पास आयो । तव उन वैष्णव नें कही, जो - अब तुम बेगि आओ, मोकों मारो । नाँतरु वे चारों मनुष्य आइ जाँइगे । तव वे ग्यारह ठग मन में डरपे । जो - यह जल में काहू सों वात कियो । श्रीगुसांईजी के दरसन तो उन ठगन कों भए नाहीं । परंतु बचन सुने । तव ठगन कही, जो - तू साँच कहि । जल में किन सों वात कियो ? तव वैष्णवने कही, जो - तुम कों कहा प्रयोजन है ? तुम बेगि मारि कै यह माल की गांठि है सो लेउ । जो - कोई आइ जाइगो तो तुम कों माल न मिलेगो । तातें तुम ढील मति करो । तव ठगननें कही, जो - अब हम तुम कों नही मारेंगे । तुम साँच कहो । जल में किन सों बात कियो । या प्रकार वे ठग बोहोत हठ परे । तव वैष्णव नें कही, जो - हमारे गुरु श्रीविठ्ठलनाथजी हैं । तिन सों हमने बिनती करी, जो - ये ठग मोकों मारत हैं ! तव गुरु मो पै कृपा करि आज्ञा दिये, जो - ये अपनो बैर इकठोरे व्हे कै लेत है । सो अब ये न मारेंगे तो तोकों ग्यारह जन्म

लेने परेंगे । तब यह सुनिके उन ठगन कही. जो - अब हम तुमको सर्वथा नहीं मारेंगे । और तुम्हारे संग चलेंगे । तुम्हारे गुरु की सरनि जाइंगे । तब वैष्णव जान्यो. जो-अब ये हमको न मारेंगे । तब वैष्णव ने फेरि तलाव में जाँइ के विनती करी. जो - महाराज ! अब तो ये माँकों मारत नाही । अब मैं कहा करों ? तब श्रीगुसाईजी कहे. जो - तू ठगन सों प्रसन्नतासों कहवाय लीजो, जो - अपना वैर तुम भरि पाए । तब वे कहे. जो - हम भरि पाए । तब यह कहाय के तू सुखेन अपने घर जा । तब वा वैष्णव ने तलाव के बाहिर आय उन ठगन सों कही, जो - तुम नाही मारत तो प्रसन्न होइ के कहो, जो - हम अगिले जन्म कौ वैर भरि पाए । तब वे ग्यारह हू मिलिके कहे, जो - हम अगिले जन्म कौ वैर भरि पाए । तब वह वैष्णव उनके पास आयो । इतने में चारि मनुष्य सीधो सामान ले आए । तब वैष्णव ने न्हाय के रसोई करी । पाछे श्रीठाकुरजी सों भोग धरयो । पाछे समय भए भोग सरायो । अनोसर कियो । पाछे उन ठगन सों कही. जो - तुम महाप्रसाद लेउ । तब ठगनने कही. जो - हम गाम में जाँई रसोई करि महाप्रसाद लेइंगे । तब वैष्णव ने कही. जो - महाप्रसाद वोहोत है । कछु अनसखड़ी काल्हि की धरी है । सोऊ धरि लेइंगे । तब सवन कों पातरि धरि वैष्णवने महाप्रसाद लियो । पाछे साँझ कों गाम में जाँइ के एक आछौ ठौर देग्वि के सोय रहे । ये ठगन के समाचार वैष्णव ने उन मनुष्यन सों नाही कहे । तब वे ठग आपुस में कहे. जो - यह वैष्णव कोई महापुरुष हैं । जो - हमने इतनो कष्ट दियो परि इनने अपने मनुष्य सों नाही कयो ।

पाछें जब वैष्णव कौ गाम कोस दोइ रह्यो तव उन ठगन नें कही, जो - हम तुम्हारी सरनि आए हैं । तुम हम कों श्री-गुसांईजीकी सरनि लै जाँई वैष्णव करावो । हम वोहोत दिन ताँई दुष्ट कर्म किये हैं । अब हमारो उद्धार होइ सोई करो । तव वैष्णव चुप होइ रह्यो । पाछें वैष्णव अपने घर आयो । तव वाकी स्त्री वोहोत प्रसन्न भई । पाछें वैष्णवने फल फलारी भेवा सामग्री सिद्ध करि न्हाय कै श्रीठाकुरजी के उत्थापन कराए । पाछें वजार तें सिधो सामान आयो । तव स्त्रीने रसोई कीनी । पाछें सेनभोग आयो । समै भए भोग सराय अनोसर कियो । पाछें वे ग्यारह ठग और चारि मनुष्य संग ल्याये हते तिन सबन कों महाप्रसाद लिवायो । ता पाछें उन वैष्णव ने महाप्रसाद लियो । पाछें वा वैष्णव ने उन मनुष्य और ठगन कों न्यारो घर वताय दियो । पाछें प्रातःकाल उन मनुष्य चारचोन कों बुलाय कै चाकरी चुकाय दीनी । कछू और हू दे उन कों प्रसन्न करि अपने घर कों विदा किये । पाछें ठगन सों कह्यो, जो - कछू खरची ले जाओ तो आछौ है । तव ठगनने कही, हमने तो तुम्हारी सरनि लीनी है । हम कों कछू नाहीं चाहिए । श्रीगुसांईजी के सेवक कराय देऊ । तव या वैष्णवने कही, जो-महिना एक में श्रीगोकुल चलंगो । तव ताँई तुम यहां न्यारे घर में रहो । खरची चाहिए सो लीजियो । तव उन ठगन ने कही, जो - खरची तो हमारी पास है । जब तुम श्रीगोकुल चलोगे तब हम हू श्रीगोकुल चलेंगे । तव वैष्णव ने कही, जो - भलो । तव वैष्णव ने एक हार हीरा कौ सुनहरी साज कौ नयो बनवायो । सो हार सिद्ध भयो । तव स्त्री सहित श्रीठाकुरजी

पधराय के वीस मनुष्य मारग के लिये संग ल्याए । और इन ग्यारह जनन को संग ले श्रीगोकुल चले । तव वैष्णव ने श्रीगुसांईजी के दरसन किये । भेट धरी । और श्रीगुसांईजी सों सब समाचार कहे । जो - महाराज ! ग्यारह ठग आपु की सरनि आए हैं । तव ठगन ने श्रीगुसांईजी को दंडवत् करि विनती करी । जो - महाराज ! हमने जनम तें दुष्ट कर्म वोहोत किये हैं । अब या वैष्णव के संग तें तुम्हारे चरनकमल को दरसन भयो है । अब आपु कृपा करि के नाम सुनावो । तव उन ठगन सों श्रीगुसांईजी कही, जो - तुमको दया नाहीं है । मनुष्य मारत हो । माल लूटि लेत हो । तातें तुम को नाम कैसे सुनावें ? तव उन ठगन ने विनती करी, जो - महाराज ! अब तो हमने दुष्ट कर्म छोख्यो । अब न करेंगे । जो - कोई की चाकरी न मिलगी तो खेती करि के निर्वाह करेंगे । परि हम काहू को अब दुःख न देईगे । तव श्रीगुसांईजी ने उनको नाम सुनायो । पाछें वे सब उहां तें उठि गए । तव वैष्णव ने श्रीगुसांईजी को हीरा को हार पहराए । तव श्रीगुसांईजी वैष्णव सों कहे, जो - यह हार तो श्रीनाथजी लायक है । तव वैष्णव ने कही, जो - हमारे तो सर्वस्व धनी आपु हो । सो यह मुनि के श्रीगुसांईजी वोहोत प्रसन्न भए । जो - वैष्णव को ऐसोई चाहिए । पाछें महिना एक लों वैष्णव श्रीगोकुल में रह्यो । सो सब वालक वह-बेटी सबन को वस्त्र आभरन पहराए । पाछें श्रीगुसांईजी सों घर जाइवे की विनती करी । तव श्रीगुसांईजी अपने प्रसादी उपरेना उड़ायो । वोहोत प्रीति सों विदा किये । तव उह स्त्री सहित श्रीठाकुरजी को पधराय श्रीगोकुल तें चल्यो । सो कच्छक दिन में उह वैष्णव

अपने घर आयो । पाछें श्रीठाकुरजीकी सेवा स्त्री-पुरुष भली भांति सां करते । पाछें वैष्णव ने उह ठगन सां कह्यो, जो-अव तुम अपने घर जाऊ । तब ठगनने कही, जो-अवही हम घर न जाँइगे । पाछें घर में जाँइ कै उनकी संगति करि हमारी बुद्धि भ्रष्ट होई जायगी । तातें याही गाममें कछुक दिन जीविका कौ जतन करि कै रहेंगे । तुम्हारे संग तें हमारो उद्धार होइगो । पाछें वे ठग वा गाम में एक सेठ के घर चाकर रहे । सो वा वैष्णव के संग तें वे ठग भले वैष्णव भए ।

सो वे स्त्री-पुरुष श्रीगुसाईंजी के ऐसैं कृपापात्र भगवदीय हे । ताते इनकी वार्ता कहां ताई कहिए । वार्ता ॥ १०५ ॥



अब श्रीगुसाईंजी कौ सेवक एक ब्रजवासी, सनाढ्य ब्राह्मन, आन्यौर में रहतो, जाको श्रीगुसाईंजी ने परे कछो, तिनको वार्ता कौ भाष कहत हैं—

भावप्रकाश— ये तामस भक्त हैं । लीला में इन कौ नाम 'रेली' है । सो रेली गोप श्रीठाकुरजी कौ अंतरंग सखा है । ये 'सुसीला' तें प्रगटयो है, तातें उनके भावरूप हैं ।

ये आन्यौर में एक सनाढ्य ब्राह्मन के जन्मयो । सो वाकौ पिता श्री-गोवर्द्धननाथजी की गाँइन कौ ज्वाल हतो । वह श्रीगुसाईंजी कौ सेवक हुतो । सो वाने अपने बेटा कौ हू श्रीगुसाईंजी कौ सेवक कियो । सो यह लरिका निपट मुग्ध हतो । सो श्रीगुसाईंजी इनको मुग्ध जानि अपने खेल में राखे । सो श्री-गुसाईंजी सां या लरिका सां बोहोत एकताचारी भई । ऐसैं करत ये बरस बीस कौ भयो । तब याकै माता-पिता मरे । ता पाछें यह लरिका श्रीगुसाईंजी के पास रहन लाग्यो । याकौ ब्याह तो भयो नाहीं । घर में कोऊ हतो नाहीं । सो श्री-गुसाईंजी वाको गरीब जानि एक पेटिया करि दीये । सो वह नित्य एक पेटिया लेतो । तामें अपनो निर्वाह करतो ।

वार्ता प्रसंग—१

सो एक दिन एक वैष्णव श्रीगुसाईंजी के दरसन कौ आयो । सो वाने श्रीगुसाईंजी सां विनती कीनी, जो-राज !

कृपा करि श्रीठाकुरजी पधराय दीजिए तो हों सेवा करों। तव श्रीगुसांईजी वा वैष्णव कों कृपा करि श्रीमदनमोहनजी कौ स्वरूप पधराय दिये। सो वह वैष्णव श्रीठाकुरजी कों ले अपने डेरा पै आयो। तव वा वैष्णव के मन में यह आई, जो-श्री-गुसांईजी मोकों श्रीठाकुरजी कों तो पधराय दिये। परि इन कौ नाम तो कछु कह्यो नाहीं। तातें नाम विना हों श्रीठाकुरजी कों कैसे जानोंगो सो वह फेरि श्रीगुसांईजी के पास आइ विनती कियो, जो-महाराज ! मेरे ठाकुर कौ नाम कहा है ? तव श्रीगुसांईजी हास्य-विनोद पूर्वक कहें, जो - श्रीमदन-मोहनजी। सो ता समे यह ब्रजवासी हू उहां ठाढ़ी हुतो। सो याने इह बात सुनी। तव यह जान्यो, जो-श्रीगुसांईजी सवन के ठाकुर के नाम कहत हैं। सो हों हू अपने ठाकुर कौ नाम पूछें। पाछें उनकी सेवा करों। तव ब्रजवासी विनती कियो, जो-महाराज ! मेरे ठाकुर कौ नाम कहा है ? सो ता समे श्रीगुसांईजी वा वैष्णव सों बातें कर रहे हते, सो सुन्यो नाही। तव वह ब्रजवासी गादी पै चढन लाग्यो।

सो श्रीगुसांईजी ने वाकौ हाथ पकरि के कह्यो, जो-परं। तव ब्रजवासी ने मन में विचारयो, जो - सब वैष्णवन कों सेवा पधराय देत हैं। सो तैसे ही मोकों परे ठाकुर दियो। सो उहां तें ब्रजवासी भंडारी पास आयो। सो भंडारी सों कह्यो, जो-आज मोकों दोय पेटिया दीजियो। तव भंडारी ने कह्यो, जो - आज दोय पेटियान कौ कहा करेगो ? तव ब्रजवासी ने भंडारी सों कह्यो, जो - आज मोकों श्रीगुसांईजी ने परं दियो हे। सो एक पेटिया तो मेरो और एक पेटिया उनको। तव

भंडारी ने मन में विचारी, जो - श्रीगुसाईजी इनके उपर प्रसन्न रहत हैं तासों दिवायो होयगो । सो याने दोइ पेटिया दीने । पाछें वह ब्रजवासी सीधा दोई लेकै 'विलछू कुंड' पर गयो । तहां वाने रसोई करी । पाछें दोई पातरि वरावरि की करि धरी । पाछें पुकारन लाग्यो, जो - परे भैया ! परे हो ! बेगि आऊ । सो ऐसैं कहि कहि कै कितनीक बेर पुकारयो । ता पाछें फेरि पुकारयो । जो - अरे भैया ! तू आवे तो आऊ । नहीं तो ये दोऊ पातरि तलाव में डारत हों । सो ऐसैं कहि कै पातरि उठाई । सो तलाव में डारन लाग्यो । तब श्रीगोवर्द्धननाथजी मन में विचारे, जो - ये तो भोरो है । जो - श्रीगुसाईजी कौ वाक्य तो समझ्यो नहीं । सो अब यह भूखन मरेगो । तो श्रीगुसाईजी कों खेलत में चैन न होंडगो । तब यह चित्त में विचारि कै श्रीगोवर्द्धननाथजी बेगि ही पधारे । सो तब वा ब्रजवासी सों कह्यो, जो - अरे भैया ! मैं आयो । तब वह ब्रजवासी बोल्यो, जो - अरे भैया ! तू तो अवेर बोहोत लगावत है । जो दारि-रोटी सीरी होइ गइ है । जो - ऐसो करेगो तो और दिन में तेरो सीधो न लाउंगो । जो - तू और काहू सों कराय लीजियो । तब श्रीगोवर्द्धननाथजी ने कह्यो, जो - अरे भैया ! आज तो पहिलो दिन है । सो तासों अवेर लागी है । जो - काल्हि सों मैं बेगि ही आउंगो । ऐसैं कहि कै श्रीगोवर्द्धननाथजी और वह ब्रजवासी अपनी अपनी पातरि पै बैठें । तब श्रीगोवर्द्धननाथजी ने वा ब्रजवासी सों कह्यो, जो - अरे भैया ! थोरी सी दारि मोकों और दै । तब वा ब्रजवासी ने कही, जो - अरे भैया ! जितनी तेरे आगे हैं तितनी मेरे आगे हैं । जो - मैंने कछू अधिक तो लीनी नहीं ।



तेरो मन चाहे वा पातरि पे बेठि। तव श्रीगोवर्द्धननाथजी कहें, जो - तू थोरीसी लीटी मेरी पातरि में सों ले। तव वा ब्रजवासी ने कही, मैं तो कछू लेहू न देहू। ऐसैं वचन सुनि श्रीगोवर्द्धननाथजी हँसत हँसत वा पातरि की सामग्री अंगीकार कीनी।

भावप्रकाश—या वार्ता में यह संदेह होई, जो - या ब्रजवासी कों श्रीगुसांईजी ने ठाकुर तो पधराये नहीं। परे क्यो। सो तो दूरि जाइवे कों क्यो। तोऊ श्रीनाथजी आप, परे 'कहे तें कैसे पधारे' ? तहां कहत हैं, जो - श्रीगुसांईजी की वानी स्वरूपात्मक हैं। सो जो - कोऊ जा भाव सों वाकौ अनुसरत है, ताकों तें फलित होत है। सो या ब्रजवासी ने वा वानी कों भगवत्स्वरूप करि कें जानी। और वा पै दृढ विश्वास हू कियो। तातें श्रीनाथजी कों वा नाम वें आमनो परयो। तातें विश्वास ऐसो पदार्थ है।

ऐसैं करत केतेक दिन वीते। सो श्रीगोवर्द्धननाथजी वा ब्रजवासी के साथ विलछू पे खेलत रहे। सो श्रीगुसांईजी की पास तो जायवो वने नहीं। तव एक दिन अधिकारी ने मन में विचारयो, जो - यह ब्रजवासी सीधा दोड़ ले जात है। परि ये कछू काम तो करत नहीं। तातें अब याकौ पेटिया बंध करो। तव फेरि मन में विचारी, जो - श्रीगुसांईजी सुनेंगे तो खीझेंगे। तातें कछू मिष करि कें याकौ पेटिया बंध करोंगे। तव अधिकारी ने भंडारी सों क्यो, जो - अमुकौ ब्रजवासी सीधौ लेन आवें तव मो पास पठाइयो। फेरि ब्रजवासी सीधा लेन कों आयो। तव भंडारीने अधिकारी पास पठायो। तव वाने जाँइ के अधिकारी सों क्यो, जो - क्यों रे भैया अधिकारी ! तू कहा कहत है ? तव अधिकारीने क्यो, जो - क्यों रे भैया ! तू नित्य सीधा खाँत है, मो अब तोकों श्रीगुसांईजी ने आज्ञा करी है, जो - तू मृत जाँइ के भेट

वैष्णवन सों ले आउ । तव वा ब्रजवासी ने कही, जो-मैं तो तेरी सूरत देखी नहीं । जो-तेरी सूरत कहां है ? और भेटी भेटा तू कहा कहत है ? जो-मैं तो कछू समझत नहीं । सो ता समै तहां कोइ एक और हू ब्रजवासी ठाढ़ो हतो । सो वाने कह्यो, जो-अरे भैया ! सूरत तो सहर है । सो नाम है । और दोइ महिना की गेल है । सो तहां तू वैष्णवन सों जाँइ कै मिलेगो तव वैष्णव तोकों भेंट उघाय देंगे । तव तू ले आइयो । तव वह ब्रजवासी मन में डरप्यो । जो-इतने दिना तें सीधा लेत हों और आज मैं इन कौ कह्यो न करुंगो तो आज पाछें सीधा देइगो नहीं । तव मैं कहा खाउंगो । पाछें वह ब्रजवासी भंडारी पास सीधा लेन गयो । सो सीधा लेकै बिलछू तलाव पर रसोई करन गयो । तव इतने में श्री-गोवर्द्धननाथजी तहां पधारे । तव वा ब्रजवासी सों श्रीगोवर्द्धननाथजी बोले । बोहोत हांसी करी । परि वह ब्रजवासी कछू बोल्यो नहीं । तव श्रीगोवर्द्धननाथजी कहे, जो-अरे भैया ! आज तू बोलत क्यों नहीं । तव वह ब्रजवासी ने श्रीगोवर्द्धननाथजी सों कह्यो, जो-भैया ! तेरो अधिकारी कहत है, जो-सूरत की भेट लै आउ । सो मैं तो जानत हू नहीं । जो-सूरत कित में है ? तव श्रीगोवर्द्धननाथजीने कही, जो-अरे भैया ! तू या बात की चिंता मति करे । जो-हों तोकों सूरत दिखाउंगो । जो-मैं हूं तेरे साथ चलूंगो । तव वह ब्रजवासी बोल्यो, जो-अरे भैया ! मैं तोकों नहीं ले जाउंगो । तव श्री-गोवर्द्धननाथजी कहे, जो-तू मोकों क्यों नहीं ले जायगो ? तव वा ब्रजवासी ने कही, जो-अरे भैया ! तेरे पांव छोटेसे हैं ।

सो गेल में तू हारि जाइगो। फेरि तू कहेगो. जो - मोकों उठाय ले। तव में तोकों कैसे उठाउंगो ? तव श्रीगोवर्द्धननाथजी आज्ञा किये, जो - भैया ! में तोकों उठायवे की नाही कहंगो। जो - हों तो अपने पावन सों चलयो चलंगो। तव वा ब्रजावसीने कस्यो. जो - आछौ। पाछें जव वह रसोई सों पहोंचि चुक्यो तव याकों श्रीगोवर्द्धननाथजी आज्ञा किये, जो - अरे भैया ! तू अधिकारी के पास जा। सो पत्र और महाप्रसाद की थेली ले आईयो। जो - आज आपुन सूरतकों चलंगे। तव वह ब्रजवासी अधिकारी के पास गयो। तहां जाँय कै कस्यो, जो - लरें भैया ! पत्र लिख देउ। तव अधिकारी ने पत्र और महाप्रसाद की थेली वा ब्रजवासी कों दीनी। सो लेके ब्रजवासी विलछू पे आयो। तव श्रीगोवर्द्धननाथजी सों कस्यो. जो - भैया ! मैं पत्र ले आयो हूं। तव श्रीगोवर्द्धननाथजी वा ब्रजवासी कों संग लेके पधारें। सो गेल में आय कै श्रीगोवर्द्धननाथजी ठढ़े रहे। पाछें कस्यो, जो - हों तो हारि गयो हूं। तव वा ब्रजवासी ने कस्यो, जो - मैं तो तोसों पहिले ही कस्यो हतो, जो - तू चले मति। हारि जायगो। अब तू कहत हे जो - हों हारयो हूं। तव श्रीगोवर्द्धननाथजी कहे, जो - अरे भैया ! हों तो योंही कहत हों। तू चलि। यों कहि कै श्रीगोवर्द्धननाथजी उठि चले। सो पूंछरी की ओर 'अपछरा कुंड' हे तहां पधारें। तव तहां दिन मूंद्यो। तव श्रीगोवर्द्धननाथजी कस्यो. जो - भैया ! आज तो यहांई दिन मूंद्यो। सो यहांई रात्रि परि गई हे। सो इहांई सोवेंगे। सो काल्हि मूरत पहोचंगे। तव वा ब्रजवासीने कस्यो. जो - भलो। तव वह ब्रजवासी उहांई सोय रह्यो। और श्रीनाथजी तो आप मंदिर में पधारें। पाछें

जब सवारो भयो, तब श्रीनाथजीने जाँय कै वा ब्रजवासी को जगायो । जो - अरे भैया उठि ! तब वह ब्रजवासी जाग्यो । सो अपनी कमरि बांधि कै तैयार भयो । तब श्रीगोवर्द्धननाथजी कहे, जो - चलो । पाछे श्रीगोवर्द्धननाथजी ने कही, जो - सूरत तो आई । तब वा ब्रजवासी ने श्रीनाथजी सो कह्यो, जो - भैया ! मैं तो सुन्यो है, जो - सूरत द्वै महिना कौ पैडो है । सो आज तो आपुन एकही दिन में आय पहोँचे हैं । तब श्रीगोवर्द्धननाथजी ने वा ब्रजवासी सो कह्यो, जो - भैया ! आपुन तो सगरी राति चले हैं । मेरे पाँव हारि गए हैं । सो तोकों खरि नहीं है । तब वा ब्रजवासी ने कह्यो, जो - भैया ! मेरे हू पाँव तो हारि गए हैं । तब श्रीगोवर्द्धननाथजी हँसि कै कह्यो, जो - अरे भैया ! तू गाम में जा । सो गाम में अधिकारी टहलुवा हैं । सो तिनकों पत्र तथा महाप्रसाद की थेली दीजियो । और विन सो यों कहियो, जो - हम तो यहां रहेंगे नहीं । जो - आजकी आज हमको भेट देउ । तब वे तोसों कहेंगे, जो - तुम यहांई सोय रहो । महाप्रसाद लेउ । परंतु तू काहू कौ कह्यो मानियो मति । सीधो मेरो तथा तेरो लेकै यहां मेरे पास आईयो । सो आपुन दोऊ जनं यहां जेमंगे । तब यह ब्रजवासी श्रीगोवर्द्धननाथजी के बचन सुनि कै गाम में आय कै अधिकारी टहलुवान सो मिल्यो । सो उन को पत्र तथा महाप्रसाद दिये । और कह्यो, जो - भैया ! मेरी भेट ल्याउ । तब वैष्णवन टहलुवान कह्या, जो - अरे भैया ! यहां तो भेटिया आवत हैं सो महिना दोइ चारि रहत हैं । सो तुमको डेरा देई । तुम हू रहो । और महाप्रसाद नित्य लियो करो । तब वह ब्रजवासी बोल्यो, जो - भैया !

मैं तो तिहारे प्रसाद में समुझत नाहीं हों। जो - मोकों तो सीधा ल्याउ। सो अपने हाथ सों रसोई करोंगे। और सीधा न देउ तो भेट ल्याउ। जो - हम तो आज रसोई न करोंगे। काल्हि भंडारी सों सीधा लैके उहांई जाँय कै रसोई करोंगे। तव उन वैष्णवन कह्यो, जो - भंडार सों लेउगे, सो कहा एक दिन कौ पैंडो हे ? तव वह ब्रजवासी ने कह्यो. जो - काल्हि हम उहां रसोई करी हती। सो आज तो यहां रसोई करोंगे। सो सुनि कै सब वैष्णव चुप करि रहे। और मन में विचार कियो, जो - यह ब्रजवासी तो भोरो है। जो - प्रभुन की लीला कछु जानी न परे। पाछें पत्र खोलि कै देख्यो, जो पत्र में काल्हि की मिति हे। फेर कह्यो, पत्र लिखवे में भूल गए होईंगे। तव महा-प्रसाद खोलि कै देखे तो वामें ताजा श्रीनाथजी कौ वीडा हतो। सो खोलि कै देखे तो पान ताजा हे। तव वा ब्रजवासी के कहे कौ विस्वास आयो। तव वासों पूछ्यो. जा - भैया ! तू कहे तो तोकों सीधा देई। तू कहे तो प्रसाद देई। तव वा ब्रजवासी ने कह्यो. जो - हमकों तो सीधा देउ। और जहां ताँई हम रसोई करे तहां ताँई तुम भेट और पत्र तैयार करि राखियो। जो - हम रात्रि कों यहां न रहेंगे। पाछें उन कों वैष्णव सीधो देन लागे। तव उन कह्यो. जो - हम कों सीधा दे देउ। तव उन वैष्णवन कह्यो. जो - तुम तो एक हो दूसरो सीधा कौन कौ लेउगे ? तव ब्रजवासी ने कह्यो. जो - मरे साथ श्रीगुसांईजी ने एक परे दियो हे। तव वैष्णवन ने दो सीधा दिये। तामें घृत और खांड बोहोत दीनी। तव ब्रजवासी सीधा लैके जहां श्रीनाथजी विराजन हते तहां आयो। और

जब सवारो भयो, तब श्रीनाथजीने जाँय कै वा ब्रजवासी कों जगायो । जो - अरे भैया उठि ! तब वह ब्रजवासी जाग्यो । सो अपनी कमरि बांधि कै तैयार भयो । तब श्रीगोवर्द्धननाथजी कहे, जो - चलो । पाठें श्रीगोवर्द्धननाथजी ने कही, जो - सूरत तो आई । तब वा ब्रजवासी ने श्रीनाथजी सों कह्यो, जो - भैया ! मैं तो सुन्यो है, जो - सूरत द्वै महिना कौ पैडो है । सो आज तो आपुन एकही दिन में आय पहुँचे हैं । तब श्रीगोवर्द्धननाथजी ने वा ब्रजवासी सों कह्यो, जो - भैया ! आपुन तो सगरी राति चले हैं । मेरे पाँव हारि गए हैं । सो तोकों खवरि नहीं है । तब वा ब्रजवासी ने कह्यो, जो - भैया ! मेरे हू पाँव तो हारि गए हैं । तब श्रीगोवर्द्धननाथजी हँसि कै कह्यो, जो - अरे भैया ! तू गाम में जा । सो गाम में अधिकारी टहलुवा हैं । सो तिनकों पत्र तथा महाप्रसाद की थेली दीजियो । और विन सों यों कहियो, जो - हम तो यहां रहेंगे नहीं । जो - आजकी आज हमकों भेट देउ । तब वे तोसों कहेंगे, जो - तुम यहांई सोय रहो । महाप्रसाद लेउ । परंतु तू काहू कौ कह्यो मानियो मति । सीधो मेरो तथा तेरो लेकै यहां मेरे पास आईयो । सो आपुन दौऊ जनं यहां जेमंगे । तब यह ब्रजवासी श्रीगोवर्द्धननाथजी के बचन सुनि कै गाम में आय कै अधिकारी टहलुवान सों मिल्यो । सो उन कों पत्र तथा महाप्रसाद दिये । और कह्यो, जो - भैया ! मेरी भेट ल्याउ । तब वैष्णवन टहलुवान कह्या, जो - अरे भैया ! यहां तो भेटिया आवत हैं सो महिना दोइ चारि रहत हैं । सो तुमकों डेरा देई । तुम हू रहो । और महाप्रसाद नित्य लियो करो । तब वह ब्रजवासी बोल्यो, जो - भैया !

मैं तो तिहारे प्रसाद में समुझत नहीं हों। जो - मोकों तो सीधा ल्याउ। सो अपने हाथ सों रसोई करोंगे। और सीधा न देउ तो भेट ल्याउ। जो - हम तो आज रसोई न करेंगे। काल्हि भंडारी सों सीधा लेके उहांई जाँय कै रसोई करेंगे। तव उन वैष्णवन क्यो, जो - भंडार सों लेउगे, सो कहा एक दिन कौ पैडो है ? तव वह ब्रजवासी ने क्यो. जो - काल्हि हम उहां रसोई करी हती। सो आज तो यहां रसोई करेंगे। सो सुनि कै सब वैष्णव चुप करि रहे। और मन में विचार कियो, जो - यह ब्रजवासी तो भोरो है। जो - प्रभुन की लीला कछू जानी न परे। पाछें पत्र खोलि कै देख्यो, जो पत्र में काल्हि की मिति है। फेर क्यो, पत्र लिखवे में भूल गए होईगे। तव महा-प्रसाद खोलि कै देखे तो वामें ताजा श्रीनाथजी कौ वीडा हतो। सो खोलि कै देखे तो पान ताजा है। तव वा ब्रजवासी के कहे कौ विस्वास आयो। तव वासों पूछ्यो, जा - भैया ! तू कहे तो तोकों सीधा देई। तू कहे तो प्रसाद देई। तव वा ब्रजवासी ने क्यो. जो - हमकों तो सीधा देउ। और जहां ताँई हम रसोई करे तहां ताँई तुम भेट और पत्र तैयार करि राखियो। जो - हम रात्रि कों यहां न रहेंगे। पाछें उन कों वैष्णव सीधो देन लागे। तव उन क्यो. जा - हम कों सीधा दे देउ। तव उन वैष्णवन क्यो. जो - तुम तो एक हो दूसरो सीधा कौन कौ लेउगे ? तव ब्रजवासी ने क्यो. जो - मेरे माथ श्रीगुसांईजी ने एक परे दियो है। तव वैष्णवन ने दो सीधा दिये। तामें घृत और खांड बोहोत दीनी। तव ब्रजवासी सीधा लेके जहां श्रीनाथजी विराजत हते तहां आयो। और

श्रीनाथजी सों कह्यो, जो-अरे भैया ! सीधा ले आयो हूं । तब श्रीनाथजी वासों कहे, जो-अरे भैया ! मेरो सीधा ले आयो है ? तब वाने कह्यो, जो - हां हां ले आयो हूं । वैष्णवन ने घृत और खांड बोहोत दीनो है । सो आपुन याकौ कहा करेंगे ? तब श्रीगोवर्द्धननाथजी आप आज्ञा किये, जो-अरे भैया ! लडुवा करि डारो । तब वा ब्रजवासी ने लडुवा कीने । तब श्रीनाथजी आप आरोगे । पाछें वा ब्रजवासी सों कह्यो, जो-तू गाम में जाँइ कै पत्र ले आउ । तो आपुन श्रीगुसांईजी के पास चले । तब वह ब्रजवासी गाम में आय कै टहलवान सों कह्यो, जो-पत्र ल्याउ । तब वा टहलवान नें गाम के वैष्णव हते तिन सवन कों बुलाये । सो सब जनें आए । तिन कों महाप्रसाद दियो । और पत्र पहुंचाए । और उन सों कह्यो, जो-भैया हो ! जो-भेटिया की तो मुग्ध दसा दीसत है । और देखो महाप्रसाद और बीड़ा के पान ताजे हैं । और पत्र में हू काल्हि की मिति है । और ब्रजवासी हू कहत है, जो - मैं उहां सो काल्हि कौ चल्यो हूं । तातें प्रभुन की लीला तो जानी नहीं जाय । जो-कहा है ? तातें आज याकों बेगि विदा करो तो यह जाँय । तब सब वैष्णवन मिलि कै आपुस में भेट की हुंडी करि कै हाथ में दीनी । और रुपैया १०) सेवकी के देन लागे । तब वाने कह्यो, जो - मैं इन कों कहा करुंगो ? तब उन वैष्णवन ने कह्यो, जो-यह तेरी सेवकी है । सो तेरे गेल के खरच के काम आवेगी । तब वा ब्रजवासीने कह्यो, जो-मेरे गेल में खरच कौ कहा काम है ? काल्हि तो मैं जाँय कै भंडारी सों सीधा लेउंगो । तब वैष्णवन ने रुपैया



१०) सेवकी के दिये हते सो तिनकी हुंडी करि के भेट की हुंडी में वीडि दिये । और श्रीगुसांईजी साँ विनती पत्र लिख्यो. तामें सब समाचार लिखे । जो - ब्रजवासी कों सेवकी के रुपैया दस देत हते, सो यह तो भोरो हे । सो याने लीने नाहीं । सो पत्र में हुंडी करि दीनी, सो वीडि हे । सो आप अपनी इच्छा में आवे तैस करोगे । तव वा ब्रजवासी पत्र तथा हुंडी लेके श्रीनाथजी के पास आयो । तव श्रीगोवर्द्धननाथजी ने वा ब्रजवासी साँ कह्यो, जो - अरे भैया ! आज आपुन वोहांत जैएँ हैं तातें चलयो न जायगो । तातें अब यहांई सोय रह्यो । सवारे श्रीगुसांईजी के पास चलेंगे । तव ब्रजवासी उहांई सांय रह्यो । और श्रीनाथजी तो आप मंदिर में पधारे । सो जब सवारे भयो तव श्रीनाथजी 'अप्सरा कुंड' पर पधारे । और वा ब्रजवासी कों जगायो । तव वह ब्रजवासी जाग्यो । तव श्रीनाथजी ने कह्यो, जो - अरे भैया ! तू वेगि अधिकारी कों पत्र देके भंडारी पै तें सीधा लेके वेगही विलछू पे रसाई करि । तव वह ब्रजवासी मंदिर में गयो । तव कोऊ मनुष्य ने जाय के अधिकारी साँ कह्यो, जो - अमृको ब्रजवासी सूरत गयो नाहीं हे । तव अधिकारी ने वा ब्रजवासी कों बुलाय के कह्यो, जो - अरे ! सूरत गयो नाहीं ? तव वह ब्रजवासी सूरत साँ पत्र ल्यायो हतो सो वाके हाथ में दीनो । तव अधिकारी पत्र कों देखि के चकत व्हे रह्यो । तव मन में विचारयो. जो - यह एक दिन में सूरत कैसे गयो होयगो ? मति कहुं अठो कागद लिखि ल्यायो होंइ । यह जानि के पत्र ग्वालि के देखे तो हुंडी ह भीतर हे । तव अधिकारी ने श्रीगुसांईजी साँ विनती कीनी, जो - महाराज ! अमृको ब्रजवासी

सूरत पठायो हतो, सो पत्र तथा हुंडी तीसरे दिन ले आयो है । तब श्रीगुसांईजी पत्र वांचि कै देखे तो तामें वैष्णवन ने समाचार लिखे हते सो सब जाने । तब वा ब्रजवासी कों श्रीगुसांईजी ने बुलाइ कै सब बात पूछी । तब वा ब्रजवासी ने कही, जो - अरे भैया विठ्ठलनाथ ! तू मेरो कह्यो न मानेगो । तुम्हारे परे सों पूछो । वह मेरे साथ गयो हतो । तब श्रीगुसांईजी वा ब्रजवासी सों पूछे, जो - अरे भैया ! परे कौन है ? तब वा ब्रजवासी ने कही, जो - ता दिन तुम्हारे संग खेलत हँसत हतो । ता दिन तुम मेरे साथ परे कों दियो है । सो वे परे सदा विलछू पै मेरे साथ खेलत है और मेरे हाथ की सदा रोटी खात हैं । तब श्रीगुसांईजी मंदिर में पधारे । सो श्रीनाथजी के कपोलन पर अपनो श्रीहस्त फेरि कै कही, जो - बाबा ! अमूके ब्रजवासी के साथ आप सूरत गए हते ? तब श्रीनाथजी ने कही जो - मैं कहा करों ? वाकों तो तुम्हारे वचन पर विश्वास आय गयो है । ता दिन सों मैं वाके पास रहत हूँ । तब श्रीगुसांईजी ने श्रीनाथजी सों विनती कीनी, जो - आज्ञा होइ तो वा ब्रजवासी कों पातरि करि देई । तब श्रीनाथजी ने कही, जो - उनसों पूछो । जैसे उनकी प्रसन्नता होई तैसें करो । तब श्रीगुसांईजी ने वा ब्रजवासी सों पूछी, जो - अरे भैया ! तोकों पातरि करि देइ ? तब वा ब्रजवासी ने कही, जो - मैं तो तुम्हारी पातरि-वातरि समझत नाही हों । जो - मोकों तो तुम सीधा दोइ देउगे तो तुम्हारे परे कों रसोई करि देउंगे । और एक सीधा देउगे तो मैं मेरी रसोई करूंगो । तब श्रीगुसांईजी ने श्रीनाथजी के खासा भंडारी सों बुलाय कै आज्ञा करी, जो - इनकों सीधा दोइ

खासा में ते दियो करो। सो ता दिन तें वह दोड़ सीधा खासा भंडार में तें ले जातो। और विलछू पै जाँय के रसोई करतो। सो तहां श्रीनाथजी आरोगिवे कों पधारतें। सो श्रीगुसाईंजी श्रीनाथजी वा पै एसी कृपा नित्य करते। हांसी खेल करते प्रसन्न रहते।

सो वह ब्रजवासी श्रीगुसाईंजी को ऐसो परम कृपापात्र भगवदीय हतो। तातें इनकी वार्ता कहां ताई कहिए।

वार्ता ॥१०६॥



अब श्रीगुसाईंजी के सेवक जन-भगवानदास दोऊ भाई, गौरवा क्षत्री, ब्रजवासी हते, तिनकी वार्ता को भाव कहन हें —

भावप्रकाश—ये राजस भक्त हें। लीला में 'जलतरंगिनी', 'एकतारी' इनके नाम हें। ये दोऊ श्रीचंद्रावलीजी की अंतरंग सखी हें। 'घुशीला' तें प्रगटी हें तातें उनके भावरूप हें। सो 'जन' तो जलतरंगिनी को प्रागट्य हें और एकतारी को प्रागट्य 'भगवानदास' भए।

वार्ता प्रसंग—१

सो वे जन और भगवानदास वे दोऊ भाई ब्रजवासी गौरवा के जन्मे। सो ये गोकुल में रहते। सो बाल्य में श्रीगुसाईंजी की सरनि आए हें। सो बड़े भाई तो जन और छोटे भाई भगवानदास। सो बड़े कृपापात्र भगवदीय हते। सो वे दोई भाई गृहस्थ हते। सो उन दोऊ भाईनको विवाह उनके माता पिता ने करयो हतो। सो उन दोऊन के स्त्री हती। परि वे अपने मनमें संसार-व्यवहार में उदासीन रहते। और अपने मनमें वैराग्य राखते। संसार के विषय कों तुच्छ पदार्थ जानते। सो उन दोऊ भाईन को मन एक ही हतो। और परस्पर बोहोत

ही स्नेह हतो। सो श्रीगुसाईजी के पास श्रीसुवोधिनी की कथा नित्य सुनते। ता पाछें घर आय के दोऊ भाई अहर्निश विचार करते। और अपनी अपनी छाप कीर्तन करते। श्रीनाथजी के पास हू बैठि कीर्तन करते, सुनते। सो ऐसैं उन दोऊ भाईन के सदैव चली जाँय। परि लौकिक में काहू सों संभापन हू नहीं करते। और काहू सों बोलते नहीं। उदर अर्थ भिक्षा मांगते। आसपास के गामन में तें। सो कोऊ जानतो नहीं। जा गाममें भिक्षा करन आज जाँय ता गाममें फेरि कै नहीं जाँय। ऐसैं निर्वाह करते। सो घर कों आवे। सो घर में स्त्री-जन खरच कों दुःख पावे। गाम के पटेल-चोधरी सबन मिलिकै इन कों खेत बोवाय दियो। सो धान आयो। वा धान कों गाम के लोग इन के घर ठलाय गए। तब स्त्रीजन तो वाहिर गई हती। तब इनने वह सब अन्न गायन कों खवाय दियो। कछू मंगतान कों बाँट दियो। घर में कछू नहीं राख्यो। ता पाछें पटेल-चोधरी सबन मिलि कै इन सों कह्यो, जो - तुम्हारो और खेत बोयो है, आछो पक्यो है, परि तुम रखवारी करो। तब वे दोऊ भाई खेत पै गए। सो पक्षी-खग आवे तिन कों बरजे नहीं। तोहू ऐसैं करत खेत में सों अन्न बोहोत आयो। सो वे दोऊ भाई तो खेत पै बैठे भगवद्वार्ता करते। सो लोग सब कहे, जो - अब तुम्हारे खेत कों तुम क्यों नहीं काटत हो? अन्न-खरिहान में तुम डारत क्यों नहीं? परि वे कछू सुने नहीं। और कछू उत्तर नहीं देय। पाछें और लोगन सों कहि कै स्त्रीन नें अन्न सिद्ध करवाइ लीनों। परि इन नें घर में राख्यो नहीं। तब लोग सब कहते, जो - और लोग तो अपनी स्त्रीन सों खीझत

हैं। परि ये तो कळ्ठ वोलत नाहीं। और ये दोऊ भाई तो काहू की कोड़ी राखत नाहीं। जो सवहीन तें उदास रहत हैं।

वार्ता प्रमग—२

और एक समे ये दोऊ भाई श्रीगुसाईजी के दरसन करिबे कों प्रातःकाल के समय आए। ता समे सव सेवक जन श्री-गुसाईजी के द्वार दरसन कों ठाढ़े हे। तव इन दोऊ भाईन ने यह पद गायो। सो पद —

राग : धिभास

प्रात समय श्रीमुख देखन कों सेवक जन सव ठाढ़ें द्वार।  
 जै जै जै श्रीवल्लभनदन दरसन दीजे परम उदार ॥  
 सुंदर स्याम सुभगता सीवा मेघ गंभीर गिरा मृदुधार।  
 नैनन निरखे होत परम सुख श्रवन सुनाए वचन सुठार ॥  
 श्रवन मंगल जग भवन मंगल रस पुरुषोत्तम लीला अवतार।  
 'जन-भगवान' जाय बलिहारी अगनित गुन महिमा नहीं पार ॥

यह पद जन-भगवानदास ने गायो। सो सुनि के श्री-गुसाईजी स्नान करि के श्रीनवनीतप्रियजी के मंदिर में पधारे। तव जन-भगवानदास दोऊ भाई साथ आए। सो मंगला के दरसन किये। ताही समे जन-भगवानदासने यह पद गायो। सो पद —

राग : धिभास

मंगल आरति कीजे भोर।  
 मंगल जनम करम गुन मंगल मंगल जसोदा माम्वन चोर ॥  
 मंगल मुकुट वेनु वनमाला मंगल रूप वरन वन-मोर।  
 'जन-भगवान' जगतमय मंगल मंगल राधा जुगल किसोर ॥

यह पद जन-भगवानदास ने गायो । सो सुनि कै श्री-गुसाईजी बोहोत प्रसन्न भए । तव श्रीगुसाईजी श्रीनवनीत-प्रियजी की आरति करि कै श्रीनाथजीद्वार पधारे । तव जन भगवानदास दोऊ भाई साथ गए । सो श्रीगुसाईजी 'रुद्र कुंड' में स्नान करि कै श्रीगोवर्द्धन पर्वत पर पधारे । सो श्रीगोवर्द्धन-नाथजी को राजभोग समर्प्यो । पाछें भोग सरायो । ताही समे जन-भगवानदास ने यह पद गायो । सो पद —

राग : सांग

आगें आउरी छकिहारी ।

जब तू बोली तब हों टेरयो सुनी न टेर हमारी ॥

मैया छक सवारी पठई तू कित रही अवारी ।

अहो गुपाल गेल हों भूली मधुरे बोलन पर वारी ॥

श्रीगोवर्द्धन धरन धीर सों प्रीत वढी अति भारी ।

'जन-भगवान' जाय बलिहारी तनकी दसा विसारी ॥

यह पद जन-भगवानदास ने गायो । सो सुनि कै श्री-गुसाईजी श्रीनाथजी बोहोत प्रसन्न भए । पाछें श्रीनाथजी की राजभोग-आर्ति करि कै श्रीगुसाईजी नीचे पधारे । सो अपनी बैठक में गादी-तकियान के ऊपर बिराजे ।

सो जन-भगवानदास श्रीगुसाईजी के दरसन करि बोहोत आनंद पाए । जो - श्रीठाकुरजी ब्रज में प्रगटे कहे हैं । सो यही हैं, सो धन्य हमारो भाग्य है । जो - हम को ऐसे दरसन भए । सो ऐसे आपुस में दोऊ भाई बातें करते । सो भगवद्रस में छुके रहते । काहू बात की स्मृति राखते नहीं । श्रीगोवर्द्धननाथजी इन के पद सुनते । सो बोहोत ही प्रसन्न रहते ।

ता पाछें श्रीगुसांईजी आप भोजन कों पधारे । सो भोजन करि आचमन करि वीरा आरोगि कै ता पाछें जन-भगवानदास कों महाप्रसाद की पातरि धरे । और श्रीमुख तें कहे जो - तुम श्रीनाथजी कौ महाप्रसाद यहां लेऊ । तव जन-भगवानदास दोऊ भाईन नें महाप्रसाद लियो । ता पाछें श्रीगुसांईजी आप छिनक विश्राम करि कै जागे । सो स्नान करि कै श्रीगिरिराज पर्वत के ऊपर पधारे । सो उत्थापन तें सेन पर्यंत सब सेवा तें पहोंचि कै श्रीनाथजी के मंदिर तें नीचे पधारे । ता पाछें श्रीगुसांईजी आप कथा कहन लागे । सो इन दोऊ भाईन नें श्रीमुख तें कथा सुनी । सो ऐसे कित्तेक दिन तांई श्रीगोवर्द्धननाथजी के दरसन किये । ता पाछें श्रीगुसांईजी आप गोकुल पधारे । तव जन-भगवानदास दोऊ भाई साथ आए । सो श्रीनवनीतप्रियजी आदि सातों स्वरूपन के दरसन किये । तव ऐसें करत जन्माष्टमी कौ उत्सव आयो । ताही समै जन-भगवानदास ने यह पद गायो । सो पद —

राग : तारंग

ग्वाल बघाई मांगन आए ।

गोपी-ग्वाल गोरस सकल लिये सबहिन के सिर नाँए ॥

अब ये गर्व गिनत न कहू करि पाए मन भाए ।

जहां नंद बैठे नंदी-मुख तहां गहन कों थाए ॥

चरन-चरन पट पाए उछाह सों आनंद मंगल गाए ।

‘जन-भगवान’ जसोदा नंदन बलि बलि मंगल गाए ॥

सो यह बघाई जन-भगवानदास ने गाई । सो मुनि कै श्रीगुसांईजी बोहोत प्रसन्न भए । ता पाछें श्रीगुसांईजी कौ जन्म-

दिन आयो । तव ताही समै एक बधाई गाई । सो पद —

राग . धनाषी

श्रीवल्लभ गृह होत बधाई अनुदिन मंगल चार ।  
 घर-घर आनंद महा महोच्छ्व होत वेद झंकार ॥  
 देत आसीस सकल पुरवासी बरखत कुसुम अपार ।  
 मागध सूत बंदित बंदीजन जै जै सब्द उच्चार ॥  
 देति असीस सकल ब्रज सुंदरि गावत गीत उच्चार ।  
 श्रीविठ्ठल तुम चिरजियो भक्तन प्रान आधार ॥  
 नृत्यत आवत हरिजस गावत पुलकित प्रेम आधार ।  
 'जन-भगवान' जाय बलिहारी जै जै दीन दयाल ॥

यह बधाई कौ पद जन-भगवानदास ने गायो । सो सुनि कै श्रीगुसांईजी बोहोत प्रसन्न भए । ता पाछें संध्या समै एक पद और गायो । सो पद —

राग : कान्हरो

जय श्रीवल्लभजू के नंदन श्रीवल्लभचरन रज पावन ।  
 जुग पद कमल विराजमान अति महिमा सदा बोहोत सुख पाइन ।  
 सेवा करों उभै कर दोऊ त्रिविध ताप नसावन ।  
 'जन-भगवान' जाय बलिहारी कृपा सबै जन पावन ।

यह पद जन-भगवानदास ने गायो । सो सुनि कै श्रीगुसांईजी बोहोत प्रसन्न भए । और श्रीमुख तें कहे, जो - इन दोऊ भाईन कौ कैसो सरल स्वभाव है ? सो काहू सों अन्यतर भाव नाहीं ।

सो वे जन-भगवानदास श्रीगुसांईजी के ऐसैं कृपापात्र भगवदीय हे । तातें इनकी वार्ता कौ पार नाहीं, सो कहां ताई कहिए ?

वार्ता ॥१०७॥





अब श्रीगुसांईजी के सेवक कल्याण भट्ट, खंभालिया के वासी, तिनकी वार्ता कों भाव कहत हैं —

भावप्रकाश—ये सात्विक भक्त हैं। लीला में इनकी नाम 'मधुरिमा' हैं। ये 'सुसीला' तें प्रगटी हैं, तातें उनके भावरूप हैं। और 'सुसीला' की एक सखी है। वाकी नाम 'देवका' है। सो यहां बेटी भई।

ये खंभालिया में एक गिरिनारा ब्राह्मण के प्रगटे। सो पढ़े वोहोत। पाछे इन कों ब्याह भयो। सो एक बेटी भई। वाकी नाम देवका राख्यो।

वार्ता प्रसंग—१

सो एक समै श्रीगुसांईजी द्वारिकाजी पधारे हते। सो श्रीरत्नछोरजी के दरसन किये। सो तहां वोहोत दिन लों रहे। ता पाछे श्रीगुसांईजी आप उहां तें विदा होइ कै चले। सो खंभालिया कों पधारे। सो तहां डेरा किये। पाछे श्रीगुसांईजी आप गादी तकियान के ऊपर विराजे। तव सब वैष्णव श्रीगुसांईजी के दरसन कों आए। तिनके संग कल्याणभट्ट हू तहां आए। तव उन हाथ जोरि कै विनती कीनी, जो-महाराजा-धिराज ! मोकों नाम सुनाइये। तव श्रीगुसांईजी आप कल्याणभट्ट सों श्रीमुख सों आज्ञा किये, जो-तुम स्नान करि आऊ। हम तुम कों नाम-निवेदन दोऊ संग करवावेंगे। तव वे स्नान करि आए। पाछे हाथ जोरि कै श्रीगुसांईजी के आगे ठाढ़े होइ रहे। तव श्रीगुसांईजी आप कृपा करि कै कल्याण भट्ट कों नाम सुनायो। ता पाछे निवेदन करवाए। तव कल्याण भट्ट ने यथा-सक्ति भेट करी। ता पाछे श्रीगुसांईजी आप रसोई करि कै श्रीठाकुरजी कों भोग समर्प्यो। समयानुसार भोग सराय कै श्रीगुसांईजी आप भोजन किये। तव सब सेवक टहलुवा रसोई करन लागे। सो रसोई करि श्रीठाकुरजी कों भोग समर्प्यो।

ता पाछें सवन ने महाप्रसाद लियो । और श्रीगुसांईजी आप भोजन करि मुख सुद्धार्थ आचमन करि पाछें कल्यान भट कों महाप्रसाद की पातरि धरवाई । सो उननें महाप्रसाद लियो । पाछें श्रीगुसांईजी आप गादी तकियान के ऊपर विराजे । तव कल्यान भट हू तहां आए । सो साष्टांग दंडवत् करि बैठे । तव श्रीगुसांईजी कल्यान भट सों पूछे, जो - तुम कहा पढ़े हो ? तव कल्यान भट ने श्रीगुसांईजी सों विनती कीनी, जो - महाराजा-धिराज ! कछू व्याकरण देख्यो है । तव श्रीगुसांईजी आपने कहा, जो - बोहोत ही आछी है । ता पाछें श्रीगुसांईजी आप कल्यान भट कों मारग के ग्रंथ पढ़ाए । सो सब ग्रंथ पढ़े । तव उन कल्यान भट कों बोहोत ही विद्या स्फूर्त भई । सो सब बात कौ ज्ञान भयो । पाछें कल्यान भट श्रीगुसांईजी सों जो गोप्य वार्ता होंइ सो पूछते । तव श्रीगुसांईजी आप कल्यान भट सों कृपा करि सब समझाय कै कहते । और अनेक भांति सों कथा भगवद्-वार्ता सुनावते । सो श्रीगुसांईजी आप उहां बोहोत दिनलों विराजे । सो कल्यानभट ने अपने घरकेन कों नाम-निवेदन करवाये । ता पाछें श्रीगुसांईजी आप उहां तें विजय किये । सो श्रीगोकुल कों पधारे । तव कल्यान भट हू श्रीगुसांईजी के साथ चले । सो अपनो सब कुटुंब लैकै श्रीगोकुलमें आय रहे । सो श्रीनवनीतप्रियजी आदि सातों स्वरूपन के दरसन किये । सो कल्यानभट कछूक दिन श्रीगोकुल में रहे । पाछें श्रीगोपालपुर आये । तहां श्रीगोवर्द्धननाथजी के दरसन किये । ता पाछें आन्योरमें रहे । सो वे कल्यानभट श्रीगुसांईजी के ऐसैं कृपापात्र भगवदीय हते ।

घाता प्रसंग—२

और एक समै श्रीगोवर्द्धननाथजी आप के नेग में कसेंड़ी दोइ दूध ओछो हतो। तव दूधघरीया ने अपुने मन में विचार कियो, जो - आज तो दूध थोरो है। तो काल्हि कसेंड़ी दोइ दूध अधिक करुंगो। ता पाछें श्रीगोवर्द्धननाथजी आप ता रात्रि कों सुवर्ण कौ कटोरा लैकै बरस दस के लरिका कौ रूप धारन करि आन्योर में आए। सो कल्याण भट्ट के घर आय कै कल्याण भट्ट की बेटी देवका सों श्रीगोवर्द्धननाथजी आप पूछे, जो - देवका ! तेरे यहां दूध है ? तव देवका ने वा लरिका सों कह्यो, जो - हां हां, बोहोत दूध है। जितनो चहिए तितनो है। तव वा लरिका ने देवका सों कह्यो, जो - तू दूध कौ मोल कहे। तो मैं लेऊं। तव देवका ने तो मोल की नाहीं करी। तव श्रीगोवर्द्धननाथजी आपने साढ़ें तीन पैसा सेर दूध मांग्यो। तव देवका ने तो नाहीं करी। पाछें श्रीगोवर्द्धननाथजी आपने चारि पैसा कौ सेर दूध मांग्यो। सो ऐसैं करत साढ़े चार पैसा सेर ठहरायो। फिरि कै श्रीगोवर्द्धननाथजी आपने कटोरा गहने धरयो। तव देवका ने कटोरा में दूध राख्यो। ता पाछें अंतः-करन मांही खेद उपज्यो। तव देवका ने अपने घर में तें मिठाई ल्याय कै कटोरा में दूध धरि कै दियो। तव श्रीगोवर्द्धननाथजी आप सब दूध आरोगे। कटोरा उहांई धरि आए। और श्री-गोवर्द्धननाथजी आप श्रीमुख सों देवका सों कहे, जो - प्रातःकाल पैसा दै कै कटोरा ले जाउंगो। ता पाछें वा वाई देवका ने वा कटोरा कों घोय कै गवाखे में धरि दियो। ता पाछें दूसरे दिन सवारे प्रातःकाल श्रीगुसाईजी स्नान करि कै श्रीगिरिराज पर्वत

ऊपर मंदिर में पधारे। सो श्रीगोवर्द्धननाथजी को सेवा सिंगार किये। ता पाछें भोग धरि कै कटोरा श्रीगुसाईजी देखे ता मंदिर में नाहीं है। तव श्रीगुसाईजी आप भीतरीयान सों पूछन लागे, जो - कटोरा कहां गया? तव श्रीगोवर्द्धननाथजी आपने श्रीगुसाईजी सों कह्यो, जो - दूध के नेग में काल्हि कसैडी दोइ दूध ओछो हतो। सो ताही तें आन्योर में देवका के घर दूध पी कै कटोरा धरि आयो हूँ। तव श्रीगुसाईजी ने कल्यान भट सों जो वार्ता भई हती सो सब कही। जो - देवका के घर श्रीगोवर्द्धननाथजी आप कटोरा धरि आए हैं। सो तहां तें तुम ले आउ। तव कल्यान भट श्रीगुसाईजी की आज्ञा मांगि कै घर आय कै देवका सों पूछे, जो - देवका! कोई कछू गहने धरि गयो है? तव देवका ने कल्यान भट सों कही, जो - धरि तो गयो है। तव कल्यान भट ने कही, जो - वे तो श्रीगोवर्द्धननाथजी आप हते। सो कटोरा गहने धरि गए हैं। ता पाछें देवका ने कल्यान भट सों कह्यो, जो - तुम कटोरा दे आऊ। तव कल्यान भट देवका तें कटोरा लै कै आए। सो श्रीगुसाईजी आप के आगे राख्यो। तव श्रीगुसाईजी आपने कल्यानभट सों कही, जो - वाके भाग्य की कहा कहिये? जो - जाकौ ऐसो सरल भाव है सो ताके घर श्रीठाकुरजी दूध के लिये कटोरा धरि आए। पाछें राजभोग आर्ति करि अनोसर करि श्रीगुसाईजी आप नीचे पधारे। सो अपनी बैठक में गादी तकियान के ऊपर धिराजे। तब सब वैष्णव श्रीगुसाईजी के दरसन कों आए। सो दरसन करि कै अपने अपने घर कों गए। ता पाछें श्रीगुसाईजी आप दूधघरिया कों बुलाय कै वासों बोहोत स्वीजे।

जो - ऐसो काम कबहू नाहीं करिये । जो - श्रीगोवर्द्धननाथजी आप के नेम में सों घटाइये नाहीं । तव दूधघरीया ने श्रीगुसांईजी सों विनती कीनी, जो - महाराजाधिराज ! आप की आज्ञा होइगी सोई हम करेंगे । सो ऐसी कृपा देवका के ऊपर आप करते । सो वे कल्याण भट्ट श्रीगुसांईजी के ऐसैं कृपापात्र भगवदीय हते ।

घाता प्रसंग—३

और एक समै कल्याण भट्ट ने श्रीगुसांईजी आप सों विनती कीनी, जो - महाराजाधिराज ! श्रीगोवर्द्धननाथजी आपके निकटवर्ती जे वैष्णव रहत हैं, सो एक डबुवा जल कौ भरि कै जो समर्पत हैं, और एक डबुवा जल कौ ल्याय कै जो आप कों स्नान करावत हैं । और कोई वैष्णव आप कों जल-बीड़ा ल्याय कै अरोगावत है । और एक सोंधो लगावत है । और एक वैष्णव पंखा करत है । और एक तेल लगावत है । सो आप के सेवक अनेक प्रकार सों श्रीठाकुरजी (और) आपकी सेवा करत हैं । सो वैष्णव मोकों कहत हैं, जो - यह घर हमारो । अब हमारो अंगीकार करेंगे । ता पाछें उन सों मैं कह्यो, जो - अब ताई तुम्हारो कछू करना वाकी रह्यो है । जो - साक्षात् ईस्वर कों तेल लगावत हो । और आरोगावत हो । और कहा वाकी रह्यो है ? जो - यथासक्ति सामग्री करि कै श्रीठाकुरजी आप कों समर्पत हो सो अंगीकार करत हैं । तातें महाराजाधिराज ! मैं उन वैष्णवन सों ऐसैं कह्यो । तव श्रीगुसांईजी आप कल्याण भट्ट सों कहे, जो - अब तो इतनो वाकी रह्यो है, जो - तुम तो जानत नाहीं हो । तव कल्याण भट्ट ने श्री-

गुसाईजी सों विनती कीनी, जो - महाराजाधिराज ! आप कृपा करि जनावोगे तव मैं जानाँगो । ऐसैं वचन कल्यान भट के सुनि कै श्रीगुसाईजी आप बोहोत प्रसन्न भए ।

सो वे कल्यान भट श्रीगुसाईजी के ऐसैं कृपापात्र भगवदीय हते ।

वार्ता प्रसंग—४

और एक समै श्रीगुसाईजी जलधरा में स्नान करत हते । इतने में राघौदास ने माला मांगी । तव श्रीगुसाईजी आय कै हांडी धरि कै पाछें अपने कंठ सों माला उतारिवे लागे । तैसैं माला परस्पर उरझि गई । तव कल्यान भटने श्रीगुसाईजी सों विनती कीनी, जो - महाराजाधिराज ! माला विनती करत है जो - आप मोकों श्रीकंठ तें काहे कों उतारत हो ? तव श्रीगुसाईजी आप बोहोत ही मुसिकाए ।

वार्ता प्रसंग—५

और एक समै कल्यान भट ने श्रीगुसाईजी आप सों विनती कीनी, जो - महाराजाधिराज ! श्रीप्रभुजी के उत्तम भगवदीय कृपापात्र होंइ सो तिन के लक्षण कैसे हैं ? आप कृपा करि कहिये । तव श्रीगुसाईजी आप कल्यान भट सों कहे, जो - उत्तम भगवदीय वैष्णव के लक्षण तो यह हैं, जो - सदा सब के ऊपर कृपा राखे । कोई भगवदीय वैष्णव के उपर क्रोध नहीं करे । जो - भगवदीय वैष्णव के ऊपर द्रोह नहीं करनो । जो - कदाचित कोई भगवदीय वैष्णव कौ अपराध परचो होइ तिन सों क्रोध नहीं करे । और तिन कौ अपराध सहनो । भगवदीय वैष्णव जो क्रोध में दुर्वचन बोले तो अपनो अपराध माने । परंतु तिन के वचन सुनि कै मन में बिगारे नहीं । जो - करे

सो क्षमा ही करे । तिन कों दोऊ हाथ जोरि कै मधुरे वचन  
सों बोले, क्षमा राखे । जो-भगवदीय वैष्णव सों सांचो बोले ।  
और श्रीप्रभुजी सों चित विषे निर्मल बुद्धि राखे । और सदा  
सर्वदा उपकार ही करे । और श्रीप्रभुजी के ऊपर तें तथा भग-  
वदीय वैष्णव के ऊपर तें मन डिगावे नाहीं । जो - इंद्रियजीत  
रहे । और अपने मन कौ मतो श्रीप्रभुजी के अर्थ नाहीं आवे ।  
और आप महाप्रसाद मात्र कों अंगीकार करे । और अपने  
अर्थ उद्यम नाहीं करनो । और महाप्रसाद कों न्यून ले । और  
बोहोत महाप्रसाद लेइ तो निद्रा आवे; तो भगवद भजन न होई  
आवें । तातें उनमान कौ महाप्रसाद लेनो । और रोगादिक  
होइ तव श्रीठाकुरजी आपकी सेवा में अंतराय होई । तातें  
अपने मन कों जीति कै रहे । मन बस होई तव श्रीप्रभुजी के  
भजन में स्थिर होइ रहे । मन बस होइ तो सदा सर्वदा कार्य  
में रहे । सब इंद्रिय कों जीते । विषय में लगावे नाहीं । और  
कहे, जो - हमतो श्रीप्रभुजी आपके दास हैं । सरन हैं । सो  
ऐसें मन कों समुझावतो रहे । और जहां वहिर्मुख लोग चर्चा  
करें तहां मौन होइ कै रहे । और श्रीप्रभुजी की सेवा में सदा  
सावधान रहे । और असावधान नाहीं होनो । और श्रीप्रभुजी  
की, भगवदीय वैष्णव कों रहस्य-वार्ता प्रगट नाहीं करनी । और  
धीरज क्व हू नाहीं छोरे । भूख तें प्यास तें निद्रा तें सीत तें  
उष्ण तें क्रोध लोभ तें । इतने दोष रूप हैं । सो इनके बस नाहीं  
होइ । तिन कों जीति कै रहनो । और अभिमान नाहीं करे ।  
सो सब भगवदीय वैष्णवन को आदर करत रहे । जो - श्रीप्रभुजी  
के स्वरूप पर और श्रीप्रभुजी की लीला हे ता रूप में अनेक

भगवदीय वैष्णव को आदर करत रहे । भगवदीय वैष्णव को धर्म, अपने स्वरूप को, ऐसे विचार करत रहे । सो ऐसे लक्षण होइ तिनको उत्तम भगवदीय जाननो । तब यह श्रीगुसांईजी के श्रीमुख के वचन सुनि के कल्याण भट वोहोत प्रसन्न भए । तब कहे, जो-वैष्णव को स्वरूप तो ऐसो ही है ।

सो वे कल्याण भट श्रीगुसांईजी के ऐसे परम कृपापात्र भगवदीय हते । ताते इनकी वार्ता को पार नाहीं । ताते इनकी वार्ता कहां ताई कहिए । वार्ता ॥१०८॥



अब श्रीगुसांईजी के सेवक दांई भाई पटेल, राजनगर में रहते, तिनकी वार्ता को भाव कहत हैं—

भावप्रकाश—ये दोऊ सात्विक भक्त हैं । लीला में इनके नाम 'कांची' 'कामना' हैं । ये दोऊ श्रीचंद्रावलीजी की सखी मैना हैं, उन तें प्रगटी हैं । ताते उनके भावरूप हैं । सो बड़ो भाई, कांची को प्रागट्य और छोटे भाई कामना को प्रागट्य जाननो ।

वार्ता प्रसंग—१

सो एक समै श्रीगुसांईजी राजनगर पधारे हे । सो भाईला कोठारी के घर विराजत हते । सो राजनगर में दोई भाई पटेल गृहस्थ हते । दोऊन की स्त्री तथा बेटा-बेटी हू हते । सो उन कुनबीन तें भाईला कोठारी को मिलाप हतो । सो भाईला कोठारी के घर वे नित्य आवते । सो इन दोऊ भाईन को श्रीगुसांईजी के दरसन भए । सो महा अलौकिक दरसन भए । तब उननें भाईला कोठारी सों बिनती करी, जो-हम को तुम श्रीगुसांईजी के पास नाम दिवावो । तब भाईला कोठारी श्रीगुसांईजी तें बिनती किये, जो-महाराज ! ये दोऊ भाई नाम पायवे की बिनती करत हैं । तब श्रीगुसांईजी कृपा करि के उन दोऊ भाईन को नाम



सुनाये । पाछें वे दोऊ भाई भाइला कोठारी के घर नित्य भग-  
वद् वार्ता सुनिवे कों आवते । सो वे दोऊ भाई जो सुनते सो  
सब कंठाग्र करि लेते । ऐसैं करत केतेक दिन भए ।

वार्ता प्रसंग—२

पाछें एक दिना उन दोऊ भाई पटेलने भाईला कोठारी  
तें कही, जो - नाम तो तिहारे सत्संग तें पायो, परि अव तो  
ब्रह्मसंबंध होंइ तों आछो । तव भाइला कोठारी ने कही, जो -  
तुम श्रीगोकुल श्रीगुसाईजी के पास जाँइ कै ब्रह्मसंबंध करि  
आवां । पाछें इन दोऊ भाईन कों ब्रह्मसंबंध की बड़ी आतुरता  
भई । पाछें अपने बेटान कों घर कौ कामकाज सोंपि कै वे  
दोऊ भाई पटेल ब्रज में आए । सो ता समै श्रीगुसाईजी श्री-  
ठकुरानी घाट पै संध्यावंदन करत हते । ता समै वे दोऊ भाई  
आरति के भरे श्रीगुसाईजी कों जाँइ कै दंडवत् किये । तव  
श्रीगुसाईजी श्रीमुख तें कहे, जो - इन वैष्णवन कों तो राजनगर  
में देखे हते । तव दोऊ पटेलने हाथ जोरि कै विनती कीनी,  
जो - राज ! आपने कृपा करि भाईला कोठारी के घर दरसन  
दिये और नाम सुनाए । अव तो कृपा करि कै ब्रह्मसंबंध कर-  
वाइये । तव ताही समै श्रीगुसाईजी कृपा करि श्रीमुख तें आज्ञा  
किये, जो - न्हाउ । तव दोऊ भाई न्हाय कै कोरे वस्त्र पहरि कै  
हाथ जोरि कै ठाढ़े भए । तव श्रीगुसाईजी कृपा करि कै समर्पन  
करवाए । पाछें आप मंदिर में पधारे । सो राजभाग सराय के  
दरसन करवाए । पाछें राजभोग - आर्ति किये । सो ये दोऊ  
भाई दरसन करि कै परम आनंद पाए । श्रीनवनीतप्रियजी के  
दरसन अति आनंद सों किये । पाछें श्रीगुसाईजी श्रीनवनीत-

प्रियजी कों अनौसर करवाय कै आप अपनी बैठक में पधारे । तब ये दोऊ भाई पटेल दंडवत् करि कै श्रीगुसाईजी कों भेंट धरी । तब आप आज्ञा करी, जो - दोऊ जनें महाप्रसाद यहाँई लीजो । पाछें आप भोजन कों पधारे । सो भोजन करि महाप्रसाद की पातरि दोऊ भाईन कों धरी । आप बैठक में विराजे । पाछें वे दोऊ भाई महाप्रसाद ले कै श्रीगोकुल में कोटरी ले कै रहे । सो नित्य भगवद् वार्ता मंडली में जाते ।

पाछें एक दिन श्रीगुसाईजी श्रीनाथजीद्वार पधारे । तब वे दोऊ भाई पटेल श्रीगुसाईजी के संग गए । सो श्रीगोवर्द्धननाथजी के दरसन करि कै मनोरथ किये । पाछें दोऊ भाई विचार किये, जो - ब्रजयात्रा करिए तो आछो । ता पाछें श्रीगुसाईजी की आज्ञा ले वे दोऊ भाई ब्रजयात्रा कों गए । सो ब्रजयात्रा करि कै पाछें श्रीगोकुल आइ कै श्रीगुसाईजी के दरसन किये । तब श्रीगुसाईजी ने पूछी, जो - ब्रजयात्रा करि आए ? तब इन कही, जो - राज की कृपा तें करि आए । पाछें सातों स्वपरून कौ तथा श्रीगुसाईजी कौ मनोरथ कियो । पाछें केतेक दिन श्रीगोकुल में रहे । तब एक दिन श्रीगुसाईजी ने पूछी, जो - अब तुम्हारे कहा मनोरथ है ? तब उन दोऊ भाई पटेलन ने हाथ जोरि कै श्रीगुसाईजी सां बिनती कीनी, जो - राजकी आज्ञा होय तो तरहटी में रहें । और श्रीगोवर्द्धननाथजी की जो बने सो सेवा करें । तब श्रीगुसाईजी प्रसन्न होइ कै आज्ञा दिये, जो - आछौ है । पाछें वे दोऊ भाई तरहटी में आय रहे । सो नित्यप्रति उठि स्नान करि कै श्रीगोवर्द्धननाथजी के मंदिर में जाते । सो राजभोग ताई जो सेवा होई सो करते । राजभोग

के दरसन करि कै पाछें अपनी कोटरी में आइ कै रसोई करते । पाछें ध्वजा सन्मुख भोग धरि कै महाप्रसाद लेते । पाछें घरी दोई सोय रहते । ता पाछें संध्या सेन के दरसन करि कै पाछें अपने घर आय किवाड़ लगाई कै वे दोऊ जनें भगवद् वार्ता करते । सो सगरी रात्रि भगवद् वार्ता करते । सोवते नाहीं । दुपहरि कों प्रसाद ले कै सोय रहते । रात्रि कों न सोवते ऐसैं नित्य करते । सो श्रीगोवर्द्धननाथजी इनकी वार्ता सुनिवे कों पधारते ।

भावप्रकाश—काहेतें, जो - श्रीगोवर्द्धननाथजी तो जहां दोई वैष्णव भगवद् वार्ता करते होई, तहां पधारत हैं । सो बात चाचा हरिवंसजी और कृष्ण भट के प्रसंग में आगे कहि आए हैं । तातें श्रीगोवर्द्धननाथजी भगवद् वार्ता के विसनी हैं । सो जहां कहूं एकांत में वैष्णव भगवद् वार्ता करे तहां अवस्य श्रीगोवर्द्धननाथजी पधारत हैं ।

सो एक दिन ये दोऊ भाई पटेल अपनी कोटरी में भगवद् वार्ता करत रसावेस भए । ताही समै श्रीगोवर्द्धननाथजी दोऊन के बीच में प्रगट होई कै दरसन दिये । ता दिन तें सदैव दरसन देते । पाछें इन पटेल वैष्णवन के बेटा बुलावन आए । परि ये दोऊ गये नहीं । सदैव श्रीगोवर्द्धननाथजी की सेवा, ब्रजवास, भगवद् वार्ता करते ।

भावप्रकाश—या वार्ता में इह जतायो, जो - वैष्णव कों भगवद् वार्ता किये विनु सर्वथा न रहनो । काहेतें ? जो - भगवद् वार्ता किये तें श्रीठाकुरजी आप सुखी होत हैं । सो भगवद् वार्ता ऐसो पदारथ है ।

सो ये दोऊ भाई पटेल वैष्णव श्रीगुसांईजी के ऐसैं कृपापात्र भगवदीय हते । तातें इन की वार्ता कौ पार नाहीं, सो कहां ताई कहिए ?

वार्ता ॥१०९॥



अब श्रीगुसाईजी की सेवकिनी एक ब्राह्मणी, उपराचारी, अडेल में रहती, तिनकी वार्ता का भाव कहत हैं —

भावप्रकाश—ये तामस भक्त हैं । लीला में इनका नाम 'अनन्या' है । ये 'मैना' तें प्रगटी हैं, तातें उनके भावरूप हैं ।

ये अडेल में एक ब्राह्मण के प्रगटी । सो बरस पांच की भई तब याकौ विवाह जाति के लरिका सों भयो । पाछें केतेक दिन में सीतला कौ उपद्रव भयो । तामें वाकौ धनी मरघो । तब यह ब्राह्मणी बरस पचीस की ही । सो पिता के घर आइ रही । ता पाछें केतेक दिन में वाके माता पिता हू मरे । तब वह घर में अकेली रहे । सो वाकौ दिन कटे नाहीं । तब परोसिनी ने कह्यो, जो-तू वैष्णवन की मंडली में जायो करि । तहां भगवद्वार्ता बोहोत आछी होत है । तब वह वैष्णवन की मंडली में जान लागी । पाछें वैष्णवन के संग तें वह श्रीगुसाईजी की सेवकिनी भई ।

वार्ता प्रसंग—६

सो वा ब्राह्मणी कों श्रीगुसाईजी ने अडेल में नाम सुनायो । ता पाछें श्रीगुसाईजी ने वा ब्राह्मणी कों कृपा करि कै ब्रह्म-संबंध करवायो । पाछें ब्राह्मणीने विनती कीनी, जो-महाराज ! घर में मेरे दिन कटत नाहीं । तातें कृपा करि कै कछू टहल दीजिये । तब श्रीगुसाईजी वाकों कृपा करि कै श्रीनवनीत-प्रियजी की रसोई में परचारगी करन की कहे । तब वह ब्राह्मणी श्रीनवनीतप्रियजी के खासा वासन मांजती । रसोई में परचारगी करती । सो एक दिन दारि के वासन में भीतर कारो दाग रहि गयो । सो खबरि न परी । तब दूसरे दिन रसोई भई । सो श्रीगुसाईजी, राजभोग धरन लागे । तब श्रीनवनीतप्रियजी ने श्रीगुसाईजी सों कह्यो, जो-काल्हि दारि के वासन में दाग रहि गयो हतो । तातें रसोई सब छूड़ गई । परचारगनी वासन आछे मांजे नाहीं है । तब श्रीगुसाईजी ने सगरी सामग्री लेकै गाँइन कों डारि दीनी । पाछें तत्काल और

सामग्री सिद्ध करि कै मंगला तें राजभोग ताई पहोंचे । पाछें श्रीगुसाईंजी श्रीनवनीतप्रियजी कों अनोसर कराय कै अपनी वैठक में पधारे । तव परचारगनी कों बुलाय कै ब्रजवासी कों आज्ञा किये, जो - या ब्राह्मनी कों पार उतारि आवो । तव वा ब्राह्मनीने कही, जो - राज ! मेरो अपराध कहा है ? तव श्रीगुसाईंजी कहे, जो - काल्हि दारि के वासन में कारो दाग रहि गयो हतो । सो वासन आछी भांति क्यों नहीं मांजे ? तव उन कह्यो, जो - अनजाने कारो दाग रहि गयो होइगो । ता वात कों मैं कहा करों ? तव ऐसे वचन सुनि कै श्रीगुसाईंजी वा परचारगनी के ऊपर वोहोत रिस कीनी । तव वा ब्रजवासी कों आज्ञा किये, जो - या ब्राह्मनी कों अडेल के घाट पर अब ही नाव में वैठारि कै पार उतारि आवो ।

भावप्रकाश—यामें यह जताए, जो - वैष्णवन कों गुरुन के सन्मुख दीनता सों बोलनो, अपराध भय मानि कै ।

तव वह ब्रजवासी वा ब्राह्मनी कों अडेल के घाट पर नाव में वैठारि कै पार उतारि आयो । तऊ वा ब्राह्मनी कों श्रीगुसाईंजी की ऊपर नेक हू दोष बुद्धि न आई । मन में कह्यो, जो - प्रभू हैं, फेरि कृपा करि कै बुलावेंगे ।

भावप्रकाश—काहेतें, जो - प्रभु अपने जीव को सर्वथा छोरेत नहीं ।

फेरि मन में विचारी, जो - अब मैं निर्वाह कैसें करों ? तव वा ब्राह्मनी ने घाट के ऊपर एक छानि छ्वाय लीनी । और घाट ऊपर बेल गाँइ आवें सो गोबर वोहोत होई । ताके ऊपर थोपें । और घाट पै आए गए काहू भले मनुष्य सों चून मांगि लेई । तामें निर्वाह करे । और वा झोंपरी में परी रहे । अहर्निश श्रीगुसाईंजी के चरन कमल कौ स्मरण करे । सो कलक

दिन में ऊपरान कौ बड़ो ढेर भयो ।

सो एक दिन एक ब्रजवासी सों श्रीगुसाईजी आज्ञा किये, जो - ऊपरा नाहीं है । सो नाव ले जाँइ के प्रयाग जाँइ के ऊपरा ले आउ । जो - दाम लगे सो दे आवो । तव ब्रजवासी एक बड़ी नाव ले जाँइ के पार गयो । तव वा ब्रजवासी कों देखि के वा ब्राह्मनी ने जान्यो, जो - यह श्रीगुसाईजी कौ सेवक है । तव वा ब्रजवासी सों श्रीकृष्ण-स्मरण करयो । तव पूछयो, जो- नाव लिवाय के कहां जात हो ? तव या ब्रजवासीने कह्यो, ऊपरा चाहियत है, सो श्रीगुसाईजीने मोकों प्रयाग पठायो है । सो प्रयाग जाँइ के ऊपरा लाउंगो । तव वा ब्राह्मनीने कही, जो- मैं उपरा थापे हैं सो सब श्रीगुसाईजी के हैं । सो तुम ले जाऊ । मैं श्रीगुसाईजी की सेवकनी हूं । तव यह सुनि के वह ब्रजवासी बोहोत प्रसन भयो । तव वह ब्राह्मनी और वह ब्रजवासी दोऊ मिलि के नाव ऊपरान सों भरे । सो नाव ऊपरान सों भरि गई । और उपरा बोहोत बचे । तव वा ब्राह्मनीने वा ब्रजवासी सों कह्यो, जो - नाव पार ले जाऊ । ऊपरा धराय के फेरि एक बेर ल्यावो । तव सगरे उपरा जाँइगे । तव वा ब्रजवासी ने कही, जो भली बात है । पाछें वह नाव पार ले जाँइ पांच सात मनुष्य संग लगाय के वह ब्रजवासी उपरा ढोवन लाग्यो । तव वा ब्रजवासी सों श्रीगुसाईजी आप पूछे, जो - अबकी बेर उपरा बोहोत आछे हैं । और तू बोहोत बेगि नाव ल्यायो । सो ऊपरा कहां मिले ? तव ब्रजवासीने वा ब्राह्मनी की दंडवत् करी । और कह्यो, जो - महाराज ! वह परचारगनी आप पार उतारी ही । सो वह पार झोंपरी छाय के बैठी है । घाट ऊपर बोहोत मनुष्य

आवत जात हैं तिन सों चून मांगि निर्वाह करत हैं । और घाट पै गाय भैंसि बेल वोहोत आवत हैं । सो गोवर वोहोत होत है । ताके उपरा थापत हैं । सो सोसों कह्यो, जो-ये ऊपरा सब श्रीगुसांईजी के हैं । मैं श्रीगुसांईजी की दासी हूँ । सो ले जाउ । सो नाव भरि कै ऊपरा ल्यायो हूँ । और एक नाव भरि कै ऊपरा और होंइगे । सो वा ब्राह्मनीने कह्यो, जो-यह नाव ले जावो दूसरी नाव और ल्याइओ । तव यह सुनि कै श्रीगुसांईजी वा ब्राह्मनी के ऊपर वोहोत प्रसन्न भए ।

भावप्रकाश—काहेतें, जो - याकों दोष बुद्धि नाहीं है । एकरस भाव है । ताते प्रसन्न भए ।

तव श्रीगुसांईजी वा ब्राह्मनी कों बुलाइवे कौ विचार कियो । तव वा ब्रजवासी सों कहे, जो-अव फेरि नाव ले जाँइ कै नाव में ऊपरा भरि कै वा ब्राह्मनी कों नाव में बैठारि कै यहां लिवाइ ल्याइयो । पाछें वह ब्रजवासी घर में उपरा धरि कै पाछें नाव ले कै पार आयो । तव वा ब्रजवासी ने वा ब्राह्मनी सों कह्यो, जो - श्रीगुसांईजी तेरे उपर प्रसन्न होंइ कै तोकों बुलाई हे । तव यह सुनि कै वह ब्राह्मनी वोहोत प्रसन्न भई । पाछें सगरे ऊपरा नाव में भरि कै पाछें वह ब्राह्मनी अपने श्रीठाकुरजी कों नाव में चढाय कै पाछें बैठी । सो वह नाव पार आई । सो उत्थापन के समै श्रीगुसांईजी न्हायवे कों पधारे हते । ता समै वह ब्राह्मनी अत्यंत आतुर होंइ कै जलधारा में आइ दंडवत् करी । नेत्रन में तें आंसू जात हैं । मुख तें कछू बोल आवत नाहीं । तव ऐसी दसा देखि कै श्रीगुसांईजी कों वाकी वोहोत दया आई । ता पाछें श्रीगुसांईजी अपने श्रीहस्त कमल

साँ वा ब्राह्मनी कौ हाथ पकरि के ठाढ़ी किये । और कह्यो, जो-तेरो अपराध तो थोरो हतो और दंड तोकों वोहोत भयो । परितू धन्य है । सो तेनें ऐसो धीरज धरयो । तव वा ब्राह्मनीने श्रीगुसाईजी साँ विनती करी, जो - महाराज । मोसाँ अपराध तो वोहोत ही परयो हतो, जो - सगरी सामग्री छूई गई । प्रभुन कों ढील भई । या अपराध तें मोकों तीन्यो लोक में कहूं ठौर न हती । सो आप तो परम दयाल हो सो थोरे ही में मेरो अपराध निवृत्त कियो । तव ये वचन वा ब्राह्मनी के सुनि कै आप वोहोत प्रसन्न भए ।

भावप्रकाश—या वार्ता में यह जताए, जो - जीव कों अपने रंचक दोष कों हू वोहोत बड़ो करि जाननो । तो दीनता होई । और शिक्षा कौ अनुग्रह करि जाननो । यह कहे ।

पाछें श्रीगुसाईजी अपनो चरनामृत दियो । तव वा ब्राह्मनी कों आज्ञा करी, जो - बेगि न्हाय अपनी सेवा में जाय लगो । सेवा सावधानी साँ दोऊ वार करनो । यह श्रीमुख के वचन सुनि कै वह ब्राह्मनी वोहोत ही प्रसन्न भई । ता दिन तें वह ब्राह्मनी भय संयुक्त अत्यंत प्रीति साँ सेवा करती । सो कच्छक दिन में श्रीनवनीतप्रियजी सानुभावता जतावन लागे ।

सो एक दिन सेन भोग के दूध में बूरा थोरो परयो हतो । तव वा ब्राह्मनी साँ श्रीनवनीतप्रियजी कहें, जो - आज सेन भोग के दूध में बूरा थोरो हतो । सो यह आज्ञा श्रीनवनीतप्रियजी की सुनि कै ताही समै अर्द्धरात्रि कों श्रीगुसाईजी के पास जाँइ कै विनती करी, जो - महाराज ! आज सेन-भोग के दूध में बूरा थोरो हतो । श्रीनवनीतप्रियजी की आज्ञा भई है । सो भंडारी कौ दोष है । तव श्रीगुसाईजी ताही समै भंडारी



कों आज्ञा करी, जो - आज सेनभोग के दूध में बूरा थोरो क्यों करयो ? तब भंडारी ने विनती करी, जो - महाराज ! ऊजरो बूरा थोरो ही रह्यो । सो पैसा चारि भरि घटती हतो । सो अब प्रातःकाल मँगाय लेउंगो । तब श्रीगुसांईजी भंडारी सों खीझि कै कहे, जो - आज पाछें पैसा भरि हू घटती मति करियो । तब भंडारी ने विनती करि कै कह्यो, जो - महाराज ! आज पाछें नेग में घटती कब हू न करुंगो । सो या प्रकार वा ब्राह्मनी के ऊपर श्रीनवनीतप्रियजी वोहोत प्रसन्न रहते ।

भावप्रकाश—या वार्ता कौ अभिप्राय यह है, जो - सेवा भय-प्रीति संयुक्त करनी । और गुरून पै दोष बुद्धि सर्वथा न करनी ।

सो वह ब्राह्मनी श्रीगुसांईजी की ऐसी परम कृपापात्र भगवदीय ही । ताते इनकी वार्ता कौ पार नाही । सो कहां तांई कहिए ।

वार्ता ॥११०॥



अब श्रीगुसांईजी के सेवक मा-वेटा, ब्राह्मन, गुजरात के, जिनने श्रीगुसांईजी की सेवा करी, तिनकी वार्ता कौ भाव कहत हैं —

भावप्रकाश—ये सात्विक भक्त हैं । लीला में इन के नाम 'प्यारी', और 'दुलारी' हैं । सो प्यारी तो इहां मा भई और दुलारी वेटा भयो । ये दोऊ मैना ते प्रगटी हैं । ताते उनके भावरूप हैं ।

सो ये दोऊ मा-वेटा ब्राह्मन हे । सो गुजरात में एक गाम में रहत हुते । सो एक समै श्रीगुसांईजी द्वारिकाजी पधारत हुते । सो मारग में इन मा-वेटा के गाममें डेरा किये । तब गाम के वैष्णव सब दरसन कों आये । उनमें ये मा-वेटा हू श्रीगुसांईजी के दरसन कों आए । सो दरसन करि थकित व्है रहे । साक्षात् कोटि कंदर्प लावन्य पुरुषोत्तम के दरसन भए । तब इन श्रीगुसांईजी सों विनती कीनी, जो - महाराज ! कृपा करि हम कों सरनि लीजिये । तब श्रीगुसांईजी आप दोऊन कों नाम सुनाये । पाछें वैष्णवन कही, जो - तुम निवेदन की विनती और हू करो । तब दोऊन श्रीगुसांईजी सों निवेदन की विनती किये ।

साँ वा ब्राह्मनी कौ हाथ पकरि कै ठाढ़ी किये । और कह्यो, जो-तेरो अपराध तो थोरो हतो और दंड तोकों वोहोत भयो । परितू धन्य है । सो तेनें ऐसो धीरज धरयो । तव वा ब्राह्मनीने श्रीगुसाईजी साँ बिनती करी, जो - महाराज । मोसाँ अपराध तो वोहोत ही परयो हतो, जो - सगरी सामग्री छूई गई । प्रभुन कों ढील भई । या अपराध तें मोकों तीन्यो लोक में कहूं ठौर न हती । सो आप तो परम दयाल हो सो थोरे ही में मेरो अपराध निवृत्त कियो । तव ये वचन वा ब्राह्मनी के सुनि कै आप वोहोत प्रसन्न भए ।

भावप्रकाश—या वार्ता में यह जताए, जो - जीव कों अपने रंचक दोष कों हू वोहोत बड़ो करि जाननो । तो दीनता होंई । और शिक्षा कौ अनुग्रह करि जाननो । यह कहे ।

पाछें श्रीगुसाईजी अपनो चरनामृत दियो । तव वा ब्राह्मनी कों आज्ञा करी, जो - बेगि न्हाय अपनी सेवा में जाय लगो । सेवा सावधानी साँ दोऊ बार करनो । यह श्रीमुख के वचन सुनि कै वह ब्राह्मनी वोहोत ही प्रसन्न भई । ता दिन तें वह ब्राह्मनी भय संयुक्त अत्यंत प्रीति साँ सेवा करती । सो कछूक दिन में श्रीनवनीतप्रियजी सानुभावता जतावन लागे ।

सो एक दिन सेन भोग के दूध में बूरा थोरो परयो हतो । तव वा ब्राह्मनी साँ श्रीनवनीतप्रियजी कहें, जो - आज सेन भोग के दूध में बूरा थोरो हतो । सो यह आज्ञा श्रीनवनीतप्रियजी की सुनि कै ताही समै अर्द्धरात्रि कों श्रीगुसाईजी के पास जाँइ कै बिनती करी, जो - महाराज ! आज सेन-भोग के दूध में बूरा थोरो हतो । श्रीनवनीतप्रियजी की आज्ञा भई है । सो भंडारी कौ दोष है । तव श्रीगुसाईजी ताही समै भंडारी

गुसांईजी सों विनती कीनी, जो - महाराज ! आज्ञा होइ तो श्रीगोवर्द्धननाथजी के दरसन करि कै ब्रजयात्रा करि आवैं । तव श्रीगुसांईजी ने आज्ञा दीनी, जो - आछो, करि आऊ ! तव वे मा-बेटा दोऊ श्रीगुसांईजी कों दंडवत् करि कै चले । सो श्रीगोवर्द्धननाथजी के दरसन किये । पाछें संपूरन ब्रजयात्रा करि कै श्रीगोकुल आए । श्रीगुसांईजी के दरसन किये । तव श्रीगुसांईजी ने पूछी, जो - ब्रजयात्रा करि आए ? तव उन विनती करी, जो - राज की कृपा तें श्रीमुख निरखि कै ब्रजयात्रा करि आए । पाछें उन ब्राह्मन वैष्णवन ने और हू विनती करी, जो - कृपानाथ ! अब कहा आज्ञा है ? तव श्रीगुसांईजी ने कही, जो - श्रीठाकुरजी की सेवा करो । तव इन ब्राह्मन वैष्णव ने श्रीगुसांईजी सों विनती करी, जो - कृपानाथ ! हमारो ऐसो मनोरथ है, जो - आप की सेवा करें । तव श्रीगुसांईजी ने कही, जो - हमारी सेवा कौन भांति करोगे ? तव इन ब्राह्मन वैष्णव ने कही, जो - राज ! जा भांति श्रीठाकुरजी की सेवा करें ता भांति हम करेंगे । सिंघासन, खंडपाट सब श्रीठाकुरजी के से राखेंगे । और पट्टा विछाय कै झारी भरि धरें, भोग समर्पें, आप आरोगो । हम तो बाहिर बैठेंगे । समय होय तव भोग सराय आचमन मुखवस्त्र कराऊं । या भांति कृपा करो । तो हम सेवा करें । तव श्रीगुसांईजी आप तो परम दयाल है । सो आप कौ नाम 'भक्तेच्छा पूरकाय नमः' हे । सो आपने कही, जो - काहू के आगें यह (सेवा-प्रकार) प्रगट न होय तो हम तेरे घर पधारेंगे, प्रगट होइ कै आरोगेंगे । और जो - कहुँ कोई जानेगो तो हम एक छिन हू न विराजेंगे ।

तब श्रीगुसाईजी कहे, जो - अब ही नहीं । श्रीगोकुल अइयो, तहां तुम कों निवेदन करावेंगे ।

वार्ता प्रसंग—१

सो वे दोऊ मा बेटा द्रव्यपात्र हते । सो वे दोऊ मा बेटा विचारि करि कै ब्रज कों चले । सो श्रीगोकुल आए । सो श्रीनवनीतप्रियजी के राजभोग के दरसन किये । पाछें बैठक में आय कै श्रीगुसाईजी के दरसन किये । तब श्रीगुसाईजी कों भेट करी । तब श्रीगुसाईजीने पूछी, जो - तुम कव आए ? तब इन वैष्णवन ने कही, जो - राजकी कृपा तें श्रीनवनीतप्रियजी के राजभोग के दरसन आय किये । तब श्रीगुसाईजी ने आज्ञा करी, जो - महाप्रसाद इहांई लीजो । पाछें इन वैष्णव कों आप श्रीहस्त सों जूठिनि धरी । पाछें आप बैठक में विराजे, वीरा आरोगे । पाछें वे वैष्णव महाप्रसाद ले आए । तब श्रीगुसाईजी आप प्रसादी वीरा उन कों दे कै आप पोढ़े । पाछें वे वैष्णव तो अपने डेरा आये । पाछें सेन समै दरसन कों आए । सो दरसन किये । ता पाछें श्रीगुसाईजी अपनी बैठक में कथा कहन लागे । तब इन वैष्णवन ने हू सुनी । पाछें जब कथा कहि चुके तब उन ब्राह्मन वैष्णव बिनती करी, जो - राज ! कृपा करि कै ब्रह्मसंबंध कराइये । तब श्रीगुसाईजी ने आज्ञा करी, जो - काल्हि ब्रत करियो । परसों तुम कों ब्रह्मसंबंध करावेंगे । तब उन ब्राह्मन (मा-बेटा) वैष्णवन ब्रत कियो । ता पाछें दूसरे दिन सबेरे श्रीयमुनाजी में स्नान करि कै अपरस में श्रीगुसाईजी के आगे हाथ जोरि कै ठाढ़े भए । तब श्रीगुसाईजी ने श्रीनवनीतप्रियजी के सन्निधान उन दोऊन मा बेटान कों ब्रह्मसंबंध करवायो । पाछें थोरेसे दिन रहि कै श्री-

गुसांईजी सां विनती कीनी, जो - महाराज ! आज्ञा होइ तो श्रीगोवर्द्धननाथजी के दरसन करि कै ब्रजयात्रा करि आवैं । तव श्रीगुसांईजी ने आज्ञा दीनी, जो - आछो, करि आऊ ! तव वे मा-बेटा दोऊ श्रीगुसांईजी कों दंडवत् करि कै चले । सो श्रीगोवर्द्धननाथजी के दरसन किये । पाछें संपूरन ब्रजयात्रा करि कै श्रीगोकुल आए । श्रीगुसांईजी के दरसन किये । तव श्रीगुसांईजी ने पूछी, जो - ब्रजयात्रा करि आए ? तव उन विनती करी, जो - राज की कृपा तें श्रीमुख निरखि कै ब्रजयात्रा करि आए । पाछें उन ब्राह्मन वैष्णवन ने और हू विनती करी, जो - कृपानाथ ! अब कहा आज्ञा है ? तव श्रीगुसांईजी ने कही, जो - श्रीठाकुरजी की सेवा करो । तव इन ब्राह्मन वैष्णव ने श्रीगुसांईजी सां विनती करी, जो - कृपानाथ ! हमारो ऐसो मनोरथ है, जो - आप की सेवा करें । तव श्रीगुसांईजी ने कही, जो - हमारी सेवा कौन भांति करोगे ? तव इन ब्राह्मन वैष्णव ने कही, जो - राज ! जा भांति श्रीठाकुरजी की सेवा करें ता भांति हम करेंगे । सिंघासन, खंडपाट सब श्रीठाकुरजी के से राखेंगे । और पट्टा विछाय कै झारी भरि धरें, भोग समर्पें, आप आरोगो । हम तो बाहिर बैठेंगे । समय होय तव भोग सराय आचमन मुखवस्त्र कराऊं । या भांति कृपा करो । तो हम सेवा करें । तव श्रीगुसांईजी आप तो परम दयालु है । सो आप कौ नाम 'भक्तेच्छा पूरकाय नमः' है । सो आपने कही, जो - काहू के आगें यह (सेवा-प्रकार) प्रगट न होय तो हम तेरे घर पधारेंगे, प्रगट होइ कै आरोगेंगे । और जो - कहुँ कोई जानेगो तो हम एक छिन हू न विराजेंगे ।

भावप्रकाश—काहे तें, जो - यह एकांतिक सेवा कौ प्रकार है । सो केवल भावरूप है । तातें प्रगट कियो नहीं जाई ।

तब उन वैष्णवन कही, जो - आज्ञा । पाछे सेवा तो कछु पधराई नहीं । श्रीगुसाईजी कौ स्वरूप हृदय में राखे ।

ता पाछे वे दोऊ मा-बेटा श्रीगुसाईजी सों विदा होइ के अपने घर राजनगर आए । तब मा ने बेटा सों पूछ्यो, जो-तेरी सगाई ब्याह करे । वह आवे तो तोकों सेवा में सहायक होइगी । तब बेटा कौ मन तो सेवा में हतो । सो बेटा ने कही, जो - द्रव्य अलौकिक सेवा में लगे तो आछो । जो - मेरे तो विवाह करनी नहीं । पाछे वा डोकरी नें अनेक भांति सों बेटा कौ मन देख्यो । परंतु बेटा कौ मन तो सेवा में है । तातें ब्याह कियो नहीं । पाछे इन वैष्णवन नें दूसरो नयो घर करवायो । ताके भीतर एकांत में मंदिर करवायो । सो सब ब्योंत निज मंदिर, तिवारी, सिज्या मंदिर, भोजन घर, चोक, डोल-तिवारी जलघरा, खासा, सेवकी, सब ब्योंत ज्यों कौ त्यों करवायो । और अपने रहिवे कौ न्यारो करवायो । ऐसो करवायो जो-कोऊ न जानें, जो-मंदिर है । पाछे सिंघासन चंदौवा पिछवाई सिज्या सब साज बड़ो करवायो । और भीतर कुआँ । सब ब्योंत भीतर । बाहिर प्रगट लेस नहीं ।

और मंदिर कौ जल तथा घोटना सब सेवा अपरस में करते । पाछे सब सामग्री सिद्ध करि के भोजन घर में पट्टा बिछाय के भोग सब विधि पूर्वक साजि के झारी भरि के हाथ जोरि के जैसे दरसन किये हते तैसे स्वरूप कौ ध्यान करि बिनती करी, जो-कृपानाथ ! श्रीठाकुरजी तो श्रीमहाप्रभुजी की कानि

तैं आरोगत हैं और आप श्रीमहाप्रभुजी की कानि तैं तथा आपकी कानि आप राखि कै आरोगोगे । ता पाछें भोग समर्पि कै बाहिर आए । कीर्तन करन लागे । सो श्रीगुसांईजी आप कृपा करि कै आरोगिवे कों पधारे । सो भली भांति सों आरोगे । पाछें समय भयो भोग सरायो । आचमन मुखबस्त्र बीड़ा . सब विधिपूर्वक किये । आर्ति, घंटा, झालर, कछू नहीं । पाछें अनोसर करि कै वह महाप्रसाद और पात्रन में ठंलाय कै पात्र मांजि कै ठिकाने धरि कै मंदिर की सब सेवा पहोंचि कै गाँइ की पातरि दीनी । पाछें महाप्रसाद लेवे बैठे । सो महाप्रसाद अत्यंत अलौकिक स्वाद भयो । जो - साक्षात् श्रीगुसांईजी आरोगे, सो क्यों न होंइ ? सो या भांति नित्य सेवा करें । और समय पर कोई अचानक वैष्णव आवे तो उन कों महाप्रसाद लिवाय कै विदा करि देते । कोइ कों रहिवे न देई । या भांति करते । ऐसैं करत द्रव्य तो थोरो सो रह्यो । तव बेटा ने अपनी मा तैं कह्यो, जो - द्रव्य तो थोरो रह्यो । द्रव्य विना सेवा न वने । तातैं तुम कहो तो एक बरस दिना परदेस करि कै द्रव्य ले आउं । तव मा ने कही, जो - सेवा छूटि जाइंगी । तव बेटा ने कही, जो - तुम सेवा जैसे होत हैं तैसैं नित्य करियो । एक बरस में चाहे तैसैं करि कै आइ जाउंगो । तव मा ने कही, जो - आछो । पाछें बेटा तो परदेस गयो । और मा वैसे ही सेवा करें । सो एक दिना साग सम्हारत मन में ऐसी आई, जो - बेटा आवें तो सेवा में सहायक होंई । पाछें सामग्री सिद्ध करि कै भोग समर्पें । तव श्रीगुसांईजी ने साग कौ कटोरा सरकाय दीनो । सो वा वाई ने कीर्तन करि, समय भयो तव भोग

भावप्रकाश—काहे तें, जो - यह एकांतिक सेवा कौ प्रकार है । सो केवल भावरूप है । तातें प्रगट कियो नही जाई ।

तब उन वैष्णवन कही, जो - आज्ञा । पाछे सेवा तो कछू पधराई नही । श्रीगुसाईजी कौ स्वरूप हृदय में राखे ।

ता पाछे वे दोऊ मा-बेटा श्रीगुसाईजी सों विदा होइ के अपने घर राजनगर आए । तब मा ने बेटा सों पूछ्यो, जो-तेरी सगाई ब्याह करे । वहु आवे तो तोकों सेवा में सहायक होइगी । तब बेटा कौ मन तो सेवा में हतो । सो बेटा ने कही, जो - द्रव्य अलौकिक सेवा में लगे तो आछो । जो - मेरे तो विवाह करनी नही । पाछे वा डोकरी नें अनेक भांति सों बेटा कौ मन देख्यो । परंतु बेटा कौ मन तो सेवा में है । तातें ब्याह कियो नही । पाछे इन वैष्णवन नें दूसरो नयो घर करवायो । ताके भीतर एकांत में मंदिर करवायो । सो सब ब्योंत निज मंदिर, तिवारी, सिज्या मंदिर, भोजन घर, चोक, डोल-तिवारी जलघरा, खासा, सेवकी, सब ब्योंत ज्यों कौ त्यों करवायो । और अपने रहिवे कौ न्यारो करवायो । ऐसो करवायो जो-कोऊ न जानें, जो-मंदिर है । पाछे सिंघासन चंदौवा पिल्लवाई सिज्या सब साज बड़ो करवायो । और भीतर कुआँ । सब ब्योंत भीतर । बाहिर प्रगट लेस नही ।

और मंदिर कौ जल तथा पोतना सब सेवा अपरस में करते । पाछे सब सामग्री सिद्ध करि के भोजन घर में पट्टा बिछाय के भोग सब विधि पूर्वक साजि के झारी भरि के हाथ जोरि के जैसे दरसन किये हते तैसे स्वरूप कौ ध्यान करि बिनती करी, जो-कृपानाथ ! श्रीठाकुरजी तो श्रीमहाप्रभुजी की कानि



तैं आरोगत हैं और आप श्रीमहाप्रभुजी की कानि तैं तथा आपकी कानि आप राखि कै आरोगोगे । ता पाछें भोग समर्पि कै बाहिर आए । कीर्तन करन लागे । सो श्रीगुसांईजी आप कृपा करि कै आरोगिवे कों पधारे । सो भली भांति सों आरोगे । पाछें समय भयो भोग सरायो । आचमन मुखवस्त्र चीड़ा सब विधिपूर्वक किये । आर्ति, घंटा, झालर, कछू नहीं । पाछें अनोसर करि कै वह महाप्रसाद और पात्रन में ठलाय कै पात्र मांजि कै ठिकाने धरि कै मंदिर की सब सेवा पहोंचि कै गाँइ की पातरि दीनी । पाछें महाप्रसाद लेवे बैठे । सो महाप्रसाद अत्यंत अलौकिक स्वाद भयो । जो - साक्षात् श्रीगुसांईजी आरोगे, सो क्यों न होंइ ? सो या भांति नित्य सेवा करें । और समय पर कोई अचानक वैष्णव आवे तो उन कों महाप्रसाद लिवाय कै विदा करि देते । कोइ कों रहिवे न देई । या भांति करते । ऐसैं करत द्रव्य तो थोरो सो रह्यो । तव बेटा ने अपनी मा तैं कह्यो, जो - द्रव्य तो थोरो रह्यो । द्रव्य विना सेवा न बने । तातैं तुम कहो तो एक बरस दिना परदेस करि कै द्रव्य ले आउं । तव मा ने कही, जो - सेवा छूटि जाइंगी । तव बेटा ने कही, जो - तुम सेवा जैसें होत हैं तैसें नित्य करियो । एक बरस में चाहे तैसें करि कै आइ जाउंगो । तव मा ने कही, जो - आछो । पाछें बेटा तो परदेस गयो । और मा वैसें ही सेवा करें । सो एक दिना साग सम्हारत मन में ऐसी आई, जो - बेटा आवें तो सेवा में सहायक होंई । पाछें सामग्री सिद्ध करि कै भोग समर्पे । तव श्रीगुसांईजी ने साग को कटोरा सरकाय दीनो । सो वा वाई ने कीर्तन करि, समय भयो तव भोग

सरायो । तब वाने देख्यो तो साग कौ कटोरा दूरि धरयो है । तब वा वाई ने आचमन मुख वस्त्र करावत विनती करी, जो-राज ! साग क्यों नहीं आरोगे ? तब श्रीगुसाईजी ने कह्यो, जो-साग सम्हारत में तेरो चित्त कहां हतो ? तब इन कही, जो-बेटा में हतो । तब आपने कही, जो-लौकिक में मन क्यों चलायो ? तातें साग नहीं आरोगे । ऐसैं बानी होई । जैसे आकास-बानी । ऐसैं ऐसैं कोई दस बेर जताए ।

और सामग्री में कछू चूक परे, खारो खाटो होइ, तब दूसरे दिन विनती करती । तब आप आज्ञा करते, जो-तुमने महा-प्रसाद लीनो के नहीं लीनो ? तब वह कहती, जो-राज ! लीनो । तब आप आज्ञा करते, जो-खवरि न परी । ऐसैं साक्षात् बानी होई । पाछें केतेक दिन में बेटा आयो । सो द्रव्य ले आयो । पाछें वे या प्रकार मिलि कै सेवा भलीभांति सों दोऊ मा बेटा ब्राह्मन वैष्णव सेवा करन लागे । श्रीगुसाईजी आप सानुभावता जनावन लागे ।

भावप्रकाश—यह कहि यह जताये, जो-सेवा 'यथा देहे तथा देवे' या प्रकार मन लगाय कै सावधानी सों करनी ।

तातें वे दोऊ मा-बेटा श्रीगुसाईजी के ऐसैं कृपापात्र भगवदीय है । जिनने श्रीगुसाईजी को बानी कों स्वरूपात्मक करि जानी । और भावात्मक सेवा कीनी । तातें इनकी-वार्ता कौ पार नहीं, सो कहां ताई कहिए । वार्ता ॥१११॥



अब श्रीगुसाईजी को सेवक एक चोर, दिल्ली में रहतो, तिनकी वार्ता कौ भाष कहत हैं—

भावप्रकाश—ये तामस भक्त हैं । लीला में इनको नाम 'तुरंगा' गोप है । सो 'मनसुखा' तें प्रगटयो है, तातें उनके भावस्वप हैं ।

घात प्रसंग—१

सो श्रीगुसाईजी एक समै श्रीगोकुलजी तें दिल्ली पधारे । तहां वैष्णवन की भेट बोहोत आई । और एक वैष्णव अपनी वह के गहना वस्त्र ल्याय कै श्रीगुसाईजी सों कह्यो, जो - महाराजाधिराज ! मैं आप के संग श्रीगोकुलजी चलि कै तहां वास करुंगो । आप यह गांठि धरो और लिवाय ले चलो । तव श्रीगुसाईजी यह वैष्णव सों कहे, जो - धरि जाउ । तव वह वैष्णव धरि गयो । पाछें रात्रि कों एक चोर आयो । सो सगरी भेट कौ द्रव्य, कपरा, वासन, सब वांधि दूसरे के हाथ पठायो । ता पाछें धरोहर की गांठि उठाई । तव वह गांठि कों पकरि कै श्रीगुसाईजी कहे, जो - यह पराई धरोहर है । तातें वह धरोहर वारो हम पर दोष बुद्धि करेगो । तातें हमारे गहना यह न्यारे धरे हैं सो ले जा । तव वह चोर छोरि कै गयो । पाछें दूसरे दिन वह सगरी वस्तु ले गयो सो सब वह चोर अपने घर तें ले और कछू अपनी ओर तें भेंट ले आय कै श्रीगुसाईजी पास विनती करि कह्यो, जो - यह सब आप कौ माल है सो आप रखवाइए ।

पाछें विनती कीनी, जो - महाराज ! मैं चोर हूं । आप की सरनि आयो हूं । तव श्रीगुसाईजी ने कही, जो - चोर कों तो हम सेवक न करेगो । तव चोर ने विनती कीनी, जो - महाराज ! आप जैसे आज्ञा करो तैसेई करुंगो । परि मोकों कृपा करि कै सरनि लीजिए । आप तो ईस्वर हो । आप की दयालता कौ पार नाही है । तव श्रीगुसाईजी ने वासों आज्ञा करी, जो - तू चोरी तो छोरि सकत नाही । परि तू दया

राखियो, और साँच बोलियो । तो तेरो कारज हाइगो । तब चोर ने कही, जो - महाराज ! आप सांची कही । जो - मेरो सुभाव चोरी करन कौ है । तातें चोरी किये विनु रह्यो जात नाहीं । परि आज पाछें बडी ठौर चोरी करुंगो । काहू गरीब कों न सताऊंगो । और साँच बोलुंगो । तब श्रीगुसाईजी आप वा चोर कों कृपा करि कै दूसरे दिन नाम दे सेवक कियो । पाछें वह चोर श्रीगुसाईजी कों दंडवत् करि कै गयो । तब एक सहर में गयो । सो जब और ठिकाने चोरी करन कों गयो तब दया आई । सो पाछो आयो । फेरि एक राजा के यहां अर्द्ध रात्रि के समै गयो । तब जामा, मोती के कड़ा पहरि कै ड्योढी पै गयो । तब ड्योढीवान ने पूछ्यो, जो - तुम कौन हो ? कहां जाऊगे ? तब वाने क्यो, जो - मैं चोर हूं कहा तोकों सूझत नाहीं ? राजा के पास जाय रह्यो हूं । सो ड्योढीवान ने अपने मन में जाने, जो - ये चोर नाहीं । यह कोई खुसमसकरा है । काहेतें, जो - चोर ऐसे कहे नाहीं जो - हम चोर हैं । तातें इनकों रोको मति । याही भांति वह सात ड्योढी लांघि कै वह चोर जहां राजा रानी सोए हते तहां गयो । सो भीतर जाँइ जवाहरखाने के घर कौ ताला तोरि कै वहां तें रानी कौ बंटा, गहना कों, लै कै ड्योढी पै आयो । तब ड्योढीवानने टोके, जो - तुम कैसे गए ? और कैसे आए ? कौन हो ? तब वाने कही, जो - मैं चोर हूं । राजा के पास गयो हतो । सो चोरी करि कै लें चल्यो । तोकों सूझत नाहीं ? सो ड्योढीवान ने जान्यो, जो - ये हमारी हाँसी करत है । कहूँ चोर ऐसे कहत होंगे ? या प्रकार सब ड्योढीवान कों उनने ऐसे क्यो ।

सो सवन नें जान्यो, जो - कछू राजा के काम कों आयो होयगो । सो सवन ने जान दियो । पाछें वह चोर अपने ठिकाने जाँइ कै वंटा धरि कै सोयो । पाछें सबेरो भयो तव राजा के यहां चोरी को हल्ला भयो । सो चोर कों दूँढन कों मनुष्य गए । सो दीवान हू साथ गयो । पाछें दिन घरी चारि चढ्यो तव उठि कै वह चोर दांतिन करत हतो । तव उहां ही दीवान चोर की तलास करत हतो । सो वाही कों देख्यो । तव पूछी, जो - तू या समै दांतिन क्यों करत है ? तव वाने कह्यो, जो - मैं राजा के घर चोरी करिवे गयो हतो । सो वंटा ल्यायो । सो घर में धरि कै सोयो । सो अब उठ्यो हूं । तव दीवान ने जाँय कै राजा सों कही, जो - एक चोर तलास भयो है । तव राजाने कही जो - मेरे पास ल्याओ । तव दीवान वा चोर कों राजा के पास ल्याए । तव राजाने पूछी, जो - तुमने चोरी कैसे करी ? तव वा चोर ने कह्यो, जो - मैं ड्योढ़ी पै पूछत पूछत तुम्हारे पास आयो । सो गहना, वंटा कों लै कै ड्योढ़ी पै कहत कहत मेरे ठिकाने गयो । तव राजाने कही, जो - गहना कौ वंटा ल्याऊ । तव वंटा ल्याइ कै राजा कों दिखायो । तव राजा ने कही, जो - ऐसो आदमी साँचो बोले सो कहां मिले ? पाछें दीवान सों कही, जो - यह कुलकुलां दीवान है । याके पास काम कर्ता तू है । तव सों वह चोर दीवानगीरी करन लाग्यो । पाछें केतेक दिन में श्रीगुसाईंजी उहां पधारे । सो यह दीवान सन्मुख गयो । तव मनुष्य ने कही, जो - कोई राजा आवत है । तव श्रीगुसाईंजी कहे, जो - दीवान आवत है । पाछें वाने जाय कै श्रीगुसाईंजी कों साष्टांग दंडवत् करी और कही, जो - मैं

आपको चोर हूँ । और यह दीवानगीरी आप की दर्ई भई है ।  
पाछें श्रीगुसाईजी उहां तें द्वारिका पधारे ।

भावप्रकाश—या वार्ता में यह जतायो, जो - जीव कैसे हू दोष सों  
भरयो क्यों न होई, परि जो - सरनि आवत है ताकों प्रभु आप निश्चय अंगीकार  
करत हैं । तातें पुष्टिमार्ग में सरनि मुख्य है ।

सो वह चोर वैष्णव श्रीगुसाईजी को ऐसे कृपापात्र भयो ।  
तातें इनकी वार्ता कहां ताई कहिए ? वार्ता ॥ ११२ ॥



अब श्रीगुसाईजी के सेवक तानसेन ब्राह्मन, पात्साह के गवैया, ग्वालियर के,  
तिनकी वार्ता को भाव कहत हैं—

भावप्रकाश—ये राजस भक्त हैं । लीला में इनको नाम 'दीपा' है । सो  
'दीपा' श्रीठाकुरजी को अंतरंग सखा है । ये 'मनसुखा' गोप तें प्रगटयो है, तातें  
उन के भावरूप हैं ।

ये तानसेन ग्वालियर में एक ब्राह्मन के जन्मे । सो बरस पांच के भए ।  
तब इन को एक म्लेच्छ को संग भयो । सो वह म्लेच्छ संगीत-कला में बोहोत  
निपुण हतो । सो वाने तानसेन को संगीत सिखायो । सो तानसेन बोहोत सुंदर  
गावन लागे । ता पाछें तानसेन सरस्वती की आराधना किये । तब सरस्वती  
वाकों दरसन दे कह्यो, जो - कछू मांगि । तब तानसेन ने कह्यो, जो - मोकों  
राग सिद्ध होई । तब सरस्वती कहे, जो - 'तथास्तु' । या प्रकार सरस्वती तानसेन  
को वर दे अंतर्धान भई । पाछें तानसेन गावें तब हिरन उनके निकट दोरि आवें ।  
ऐसो सुंदर गावन लागे । सो एक समय ये दिह्यी गए । सो पात्साहके पास गए ।  
सो पात्साह को गानो सुनाए । सो पात्साह उन को गानो सुनि बोहोत प्रसन्न भयो ।  
सो बोहोत द्रव्य दियो । पाछें पात्साह तानसेन को कहे, जो - तू हमारे पास रहे ।  
पाछें इन को महिना करि दियो । सो ता दिन तें तानसेन पृथ्वीपति के पास रहे ।  
सो दरबार में जान लागे । पात्साह को गानो सुनावे । या भांति रहे ।

पाछें जो - कोउ गायवे में समुझे ताके पास तानसेन जातें । सो राज-  
महाराजा, सत-महंत सब कोऊ इन को आदर करते । पात्साह को गवैया जानि  
बोहोत द्रव्य देते । ऐसै करत तानसेन जगत में प्रसिद्ध भए ।

वार्ता प्रसंग—१

सो एक समै उष्णकाल के दिन हते । सो श्रीगुसांईजी गोविंदघाट पै विराजे हते । तव गोविंदस्वामी आदि और हू भगवदीय पास बैठे हते । ता समै तानसेन श्रीगुसांईजी पास गायवे कों आए । तव तानसेन कों देखि कै श्रीगुसांईजी आज्ञा किये, जो - तानसेन ! कछू कीर्तन गाउ । तव तानसेन ने एक पद गायो । सो पद—

राग : लाछसाख

तेरे मन में किलो एक गुनरे जो तो पै आवे तो प्रकास कररे ।  
सप्त सुर तीन ग्राम इकइस मूर्छना जोइ सुर आवे तोपे सोइ सुर भररे ।  
हिरन बुलाये, पगन पराये, मेहा वरसाये तोकों सरस्वती वररे ।  
कहे मियां 'तानसेन' सुनेरे गुनीजन, सब गुनियन के पांयन पररे ।

सो यह पद सुनि कै श्रीगुसांईजी तानसेन कों पात्साह कौ गवैया जानि रुपैया ५००) पांचसौ दिये । ता पर एक कोड़ी और दिये । तव तानसेन पूछ्यो, जो - महाराज ! यह कोड़ी काहेकों दीनी ? तव श्रीगुसांईजी आज्ञा किये, जो - तानसेनजी ! तुम पात्साह के गवैया हो । तातें तुम कों रुपैया पांचसौ हम दिये हैं । और यह कोड़ी तो तुम्हारी वानी सुनि कै दीनी है । तव तानसेन ने श्रीगुसांईजी सों विनती कीनी, जो - महाराज ! हम कों आप कछू अधकी सुनाइए तव हम जानें, जो - आपने हमारी कीमत करी सो उचित हे । नांतरु हम कैसें जाने ? तव श्रीगुसांईजी आप मुसिक्याइ के गोविंदस्वामी की ओर देखें । पाछें गोविंदस्वामी सों आज्ञा कीनी, जो - गोविंददास ! कछू कीर्तन गाउ । तव गोविंदस्वामी ने

‘सारंग’ राग में एक पद गायो । सो पद—

राग : सारंग

श्रीवल्लभनंदन रूप अनूप स्वरूप कह्यो नहीं जाई ।  
प्रगट परमानंद गोकुल वसत हैं सब जगत के सुखदाई ।  
भक्ति मुक्ति देत सबन को कृपा प्रेम बरखत अधिकाई ।  
सुखमय सुखरूप सुखद एक रसना कहाँलों वरनौं ‘गोविंद’ बलि२ जाई ।

ता पाछें दूसरो पद गायो—

राग : सारंग

सुनिरी सखी दुपहरी की विरियां वैठि झरोखन पोवति हार ।  
ओंचका आय गये नंदनंदन मोतन कांकरी चितये डार ।  
हों सकुच मुख मोरि ठाढ़ी भई गुरुजन लाज विचार ।  
‘गोविंद’ प्रभु पिय रसिक सिरोमनि सेन बतार्ई भुजा पसार ।

सो ये पद सुनत ही तानसेन चकित होइ रहे । पाछें दोऊ हाथ जोरि श्रीगुसाईजी सों विनती किये, जो - महाराज ! इनके आगें मेरो गानो ऐसो है, जैसें मखमल के आगें टाट होत हैं ।

ता पाछें तानसेन गोविंदस्वामी के निकट जाँइ विनती किये, जो - तुम मोकों कृपा करि कछू गान सिखाओ । तब गोविंदस्वामी कह्यो, जो - हम श्रीगुसाईजी के सेवक बिना काहू सों संभाषन हू-करत नाहीं । तब तानसेन श्रीगुसाईजी सों विनती किये, जो - महाराज ! कृपा करि मोकों सेवक कीजिए । तब श्रीगुसाईजी तानसेन को नाम सुनाए । पाछें तानसेन ने श्रीगुसाईजी को एक सहस्र मुद्रा भेंट करी । और विनती कीनी, जो - महाराज ! आप गोविंदस्वामी सों आज्ञा करें, जो-मोकों ये गान विद्या सिखावे । तब श्रीगुसाईजी



गोविंदस्वामी सों आज्ञा किये, जो - गोविंददास ! इन कों कीर्तन सिखइयो । तव तानसेन कछूक दिन गोविंदस्वामी के पास रहे । मार्ग की प्रणाली अनुसार कीर्तन सीखे । ता पाछें श्रीगुसांईजी की आज्ञा पाइ श्रीनाथजी के सन्मुख कीर्तन करन लागे ।

घाता प्रसंग—२

सो तानसेन श्रीनाथजी के सन्निधान कीर्तन करते । सो श्रीनाथजी तानसेन के कीर्तन सुनि वोहोत प्रसन्न होते । सो तानसेन अमल-पानी करत हुते । सो उनके मुख में सों दुर्गंध आवती । सो एक समै तानसेन श्रीनाथजी के सन्निधान कीर्तन करत हते । तव एक वैष्णव ने उनकों टोके । और कह्यो, जो - तुम अमल-पानी मति करो । तुम्हारे मुख सों दुर्गंध आवत हैं । सो श्रीनाथजी कों कैसें सुहात होइगो ? तव तानसेन ने दूसरे दिन अमल-पानी छोरि दियो । पाछें तानसेन राजभोग समै कीर्तन करन लागें । तव कीर्तन आछें होइ नहीं । तव श्रीगुसांईजी तहां श्रीगोवर्द्धननाथजी कों दर्पन दिखावत हते । तव श्रीनाथजी श्रीगुसांईजी सों आज्ञा किये, जो - आज कीर्तन फीके लगत हैं । सो तानसेन आछी भांति गावत नहीं है । तातें उन सों कहो, जो - आछी भांति कीर्तन गावे । तव श्रीगुसांईजी तानसेन कों कहे, जो - आज ऐसें फीके क्यों गावत हो ? तव तानसेन ने कही, जो - महाराज ! अमल-पानी कियो नहीं । एक वैष्णव मोसों कहे, जो - श्रीनाथजी कों दुर्गंध आवत है, तातें तुम अमल-पानी मति करो । तातें महाराज ऐसें होत है । तव श्रीगुसांईजी आज्ञा किये, जो - तुम पहिले जैसें करत हुते तैसें करो । तामें श्रीगोवर्द्धननाथजी प्रसन्न हैं । तव तें

फेरि तानसेन अमल-पानी लेन लागे । तव सुंदर गावन लागे ।  
सो श्रीगोवर्द्धननाथजी मुसकाये । सो श्रीगोवर्द्धननाथजी के  
मुसकान के दरसन तानसेन कों भए ।

भावप्रकाश—सो या वार्ता में वह जताए, जो - पुष्टिमार्ग में जा भांति  
श्रीगोवर्द्धननाथजी प्रसन्न रहे सोई कर्तव्य है । पुष्टिमार्गीय कों सोई धर्म है ।

सो तानसेन श्रीगुसाईजी के ऐसैं कृपापात्र भगवदीय हते ।  
तातैं इनकी वार्ता कहां ताई कहिए । वार्ता ॥११३॥



अब श्रीगुसाईजी कों सेवक एक दलाल बनिया, राजनगर कों, तिनकी  
वार्ता कों भाष कहत हैं—

भावप्रकाश—ये सात्विक भक्त हैं । लीला में इनकौ नाम 'स्नेहलता'  
है । ये मनसुखा गोप की भतीजी है । तातैं उनके भावरूप हैं ।

सो यह राजनगर में एक द्रव्यपात्र बनिया के जन्म्यो । सो वह बनिया  
दलाली करत हतो । पाछें यह लरिका बरस बीस कों भयो तव याकौ व्याह  
भयो । फेर केतेक दिन पाछें याके माता-पिता मरे । तव यह दलाली करन  
लाग्यो । सो याके गांठि मे निन्यानवे हजार रुपैया हते । परि यह बनिया लोभी  
हतो । सो कहतो, जो - लाख रुपैया होंइ तो आछो । तातैं द्रव्य कों संग्रह करे ।  
खानपान में हू संकोच करे । सो बारह आना नित्य कमावे । सो आठ आना सो  
जमा करे । और बाकी चार आना में निर्वाह करे । ऐसैं करत केतेक दिन पाछें  
श्रीगुसाईजी राजनगर असारुवा में भाईला कोठारी के इहां पधारे । सो ता समै यह  
बनिया भाईला कोठारी के पास कछु काम कों आयो हतो । सो इन श्रीगुसाईजी  
कों दरसन पायो । तव भाईला कोठारी कों या बनियाने पूछ्यो, जो - यह कौन हैं ?  
कहां रहत है ? और इन कों नाम कहा है ? तव भाईला कोठारीने कयो, जो -  
ये श्रीगुसाईजी साक्षात् ईश्वर हैं । श्रीगोकुलाधिपति हैं । इनकौ नाम श्रीविठलनाथजी  
है । और हम सब इनके सेवक हैं । तव यह बनिया कयो, जो - हम हू कों इनके  
सेवक करावो तो आछो । हम हू इनके सेवक होइंगे । तव भाईला कोठारी ने  
श्रीगुसाईजी सों बिनती कीनी, जो - महाराज ! यह बनिया सेवक होन की  
कहत हैं । तव श्रीगुसाईजी आप या बनिया की ओर मुसियाइ कै देखे । तव  
या बनियाने बिनती कीनी, जो - महाराज ! कृपा करि अपनो सेवक कीजिए तो

आछौ । तव श्रीगुसाईंजी बाकों नाम सुनाए । पाछें वह बनिया अपने घर गयो । सो दूसरे दिन अपनी स्त्री कों ल्याय नाम दिवायो । ता पाछें श्रीगुसाईंजी आप द्वारिकाजी कों पधारे ।

घाता प्रसंग—१

सो वोहोरि एक समै श्रीगुसाईंजी आप गुजरात द्वारिका-जी श्रीरनछोरजी के दर्सनार्थ पधारे । सो मार्ग में राजनगर असारुवा में भाईला कोठारी के यहां डेरा किये । सो मार्ग जात या बनिया कों दरसन भए । सो श्रीगुसाईंजी के संग ही यह बनिया भाईला कोठारी के घर आयो । तव दुपहर ताई तो श्रीगुसाईंजी की टहल में रह्यो । इतने में प्यास लगी । सो घर आयो । फेरि विचार भयो, जो-मैं खाली हाथन दंडवत् कैसें करूं ? तव स्त्रीने कही, जो-आज तो कछू कमाए हो नाहीं । कछू ल्याए नाहीं । तव कही, जो-कछू दे । तव इत में उत में देखे तो एक खोटो नारियल परयो है । तव कही, जो-यह लै जाऊ । तव वह खोटो नारियल लै कै चलयो ! सो जाँय कै श्रीगुसाईंजी के आगे भेंट धरि दंडवत् करी । तव सब वैष्णवने कही, जो-महाराज ! हमकों तो ठगे हे । परि आप सों हू ठगविद्या लगाई है । तव श्रीगुसाईंजी ने कही, जो-वैष्णव ! ये कहा कहत हैं ? तव वा दलाल ने कही, जो-वे साँच कहत हैं । जो-राज ! मेरी गांठि में निन्यानवे हजार रुपैया हैं । सो लाख होंइ तो मैं लखेश्वरी होऊं । सो चारि आना में तो निर्वाह करत हूं और आठ आना जमा करूं हूं । तव श्रीगुसाईंजी आप वां पर प्रसन्न भए । वासों कहे, जो-यह साँच बोल्यो । अपना भाव प्रगट कहि दियो । पाछें आप आज्ञा किये, अव तू श्रीठाकुरजी पधराय कै सेवा करि तो तेरो कारज सिद्ध

होइगो । तेरो कल्याण होइगो । तव वाने कही, जो - राज ! यामें तें कोड़ी खरच होइ नाहीं । ऐसी सेवा कृपा करि वताईए । तव श्रीगुसाईजी आप कहे, जो - तू मानसी सेवा करि । तामें तेरो कछू खरच न होयगो । तव वाने श्रीगुसाईजी सों कही, जो - राज ! मोकों मानसी सेवा कौ प्रकार समझाइए । ता भांति हों सेवा करों । तव श्रीगुसाईजी वाकों नित्य की तथा उत्सव की रीति सब बताय दीनी । सो ताही रीति सों वह सेवा करन लाग्यो । सो एकाग्र चित्त सों श्रीठाकुरजी कों हृदय में पधराय के भक्तिभाव सों सेवा करे । सो ऐसैं करत कोई उत्सव आयो । सो वह खीरि करन लाग्यो । तव खीरि सिद्ध भई । तव वामें बूरा पधराये । सो बूरा वोहोत परचो । सो पाछें काढ़िवे लग्यो । तव ताही समै श्रीठाकुरजी ने आय कै हाथ पकरि कै कह्यो, जो - यामें तेरी गांठि कौ कहा खरच होत है ? जो - तू पाछों काढ़त है । तव तो यह दलाल मन में विचारचो, जो - अब तो यह सब द्रव्य श्रीठाकुरजी के विनियोग में लगावनो । पाछें वाने जाय कै श्रीगुसाईजी सों विनती करि कै श्रीठाकुरजी पधराये । तव वह सब द्रव्य श्रीठाकुरजी के विनियोग में आयो ।

भावप्रकाश—यामें यह सिद्धांत जतायो, जो - पुष्टिमार्ग में ठाकुर जीव कौ जैसो स्वभाव होत हैं ता भांति वाकों अंगीकार करत हैं । सो ऐसैं प्रभु कारुणिक भक्तवत्सल हैं । तातें जा प्रकार बनि आवें ता प्रकार वैष्णव कों भगवद्-सेवा करनी । सेवा तें विमुख रहनो नाहीं ।

सो वह दलाल श्रीगुसाईजी कौ ऐसो कृपापात्र भगवदीय हतो । तातें इनकी वार्ता कहां ताई कहिए । वार्ता ॥११४॥



अब श्रीगुसाईजी के सेवक वेनीदास, दामोदरदास, दोऊ भाई, वनिया, सूरत में रहते, तिनकी घातों की भाष कहत हैं।

भावप्रकाश—ये सात्विक भक्त हैं। लीलामें 'वीरा' 'धीरा' इन के नाम हैं। सो वीरा-धीरा, विसाखाजी की सखी सोरसेनी है, तिनकी दोऊ सखी हैं। उन तें प्रगटी हैं, तातें उन के भावरूप हैं। सो वेनीदास 'वीरा' की प्रागटय और 'धीरा' दामोदरदास भए।

ये दोऊ सूरत में एक द्रव्यपात्र वनिया के जन्मे। सो वह वनिया कपड़ा की दुकान करतो। सो ये दोऊ भाई बरस दस-बारह के भए तब माता-पिताने दोऊन को व्याह कियो। ता पाछें केतेक दिन में इनके माता-पिता मरे। तब दोऊ दुकान करन लागे।

घातों प्रसंग—१

सो एक समै श्रीगुसाईजी राजनगर में भाईला कोठारी के घर विराजत हते। और वेनीदास दामोदरदास दोऊ भाई सूरत में वजाज की दुकान करते। सो कपड़ा खरीदन कों राजनगर आए। सो भाईला कोठारी सों इन को व्यौहार हतो। सो ये भाईला कोठारी कों मिलिवे कों असारुवा आए। तब दोऊ भाईन कों श्रीगुसाईजी के दरसन भये। सो महा अलौकिक दरसन भए। तब दोऊ भाई भाईला कोठारी सों कहे, जो - तुम हम कों इनके सेवक करावो तो आछौ। तब भाईला कोठारी प्रसन्न व्हे श्रीगुसाईजी सों विनती किये, जो - राज ! कृपा करि कै इनकों सरनि लीजिए। ये सेवक होन की विनती करत हैं। तब श्रीगुसाईजी ने उन दोऊ भाईन कों नाम सुनायो। ता पाछें दोऊ जनें केतेक दिन राजनगर में रहि कै पाछें सूरत गए। सो नित्य रात्रि कों भगवद्वार्ता मंडली में जाते।

घातों प्रसंग—२

सो एक दिना उन दोऊ भाईनने हाट पै विचार कियो, जो - ब्रज में जाई कै श्रीगुसाईजी के दरसन करे तो आछौ।

ता पाछें घर आए । सो उन दोऊन के स्त्री हती । और बेनी-  
 दास बड़े हते । सो उनके दोई पुत्र हते । और दामोदरदास  
 के एक पुत्र हतो । और तीन्हीं बेटान के बहू घर में हती ।  
 सो इन दोऊ भाईनने दुकान तथा घर बेटान कों सोंपि दीनो ।  
 और कही, जो - हम तो ब्रजयात्रा कों जात हैं । सो प्रभुनकी  
 ईच्छा तें पांच सात वरस में आवेंगे । तुम हमारी वाट मति  
 देखियो । तुम अपने घर सावधान रहियो । सो ऐसैं सब  
 निवृत होइ कै वे दोऊ भाई ब्रज कों चले । सो सूधे श्रीगोकुल  
 आए । सो उत्थापन के पहिलें प्रभु पोढि कै उठे हते । ता  
 समै आए । सो श्रीगुसांईजी के दरसन किये । तब श्रीगुसां-  
 ईजी ने पूछी, जो - बेनीदास, दामोदरदास ! तुम कव आए ?  
 तब इन विनती करी, जो - राज ! अब ही आए । तब श्री-  
 गुसांईजी ने पूछी, जो - बेनीदास ! महाप्रसाद तो नहीं लिये  
 होईंगे ? तब बेनीदास ने कही, जो - राज के दरसन किये  
 बिना कैसें लेई ? तब श्रीगुसांईजी आज्ञा किये, जो - रात्रि  
 कों महाप्रसाद यहांई लीजियो । पाछें बेनीदास, दामोदरदास  
 एक घर लिये । तामें चीज बस्तु सब धरि कै उत्थापन के दर-  
 सन किये । पाछें सातों मंदिरन में दरसन किये ।

ता पाछें श्रीनवनीतप्रियजी के सेन के दरसन किये । पाछें  
 श्रीगुसांईजी अपनी बैठक में पधारे । तब आज्ञा किये, जो -  
 बेनीदास ! तुम दोऊ महाप्रसाद लेऊ । तब इन विनती कीनी,  
 जो - राज ! प्रथम तो आप आरोगे । पाछें हम लेइंगे । तब  
 श्रीगुसांईजी आप आरोगे । पाछें इन दोऊ भाईन कों जूठनि  
 की पातरि धरी । सो बेनीदास दामोदरदास ने महाप्रसाद लीनो ।

भावप्रकाश—या वार्ता में यह जतायो, जो - गुरुन के आरोगे पहिले सेवक कों महाप्रसाद लेनो सर्वथा उचित नाहीं ।

ता पाछें श्रीगुसांईजी आप कथा कहन लागे । तव इन दोऊ भाईन ने आप के श्रीमुख तें कथा सुनी । पाछें बेनीदास दामोदरदास ने श्रीगुसांईजी सों विनती करी, जो - राज ! अब तो कृपा करि कै ब्रह्मसंवंध करावो तो भलो है । तव श्रीगुसांईजी ने एक व्रत कराय कै दोऊन कों श्रीनवनीत-प्रियजी के सन्मुख ब्रह्मसंवंध करवायो । पाछें श्रीनवनीतप्रियजी के राजभोग की आरति किये । पाछें अनोसर करि श्रीगुसां-ईजी अपनी बैठक में आइ विराजे । तव इन भेंट करी । पाछें दोऊन विनती किये, जो - राज ! अब कहा आज्ञा है ? तव श्रीगुसांईजी आज्ञा किये, जो - श्रीठाकुरजी की सेवा करो । तव इन दोऊ भाईन विनती करी, जो - महाराज ! एक वार श्रीगोवर्द्धननाथजी के दरसन करि कै ब्रजयात्रा करिए, ऐसो मनोरथ है । पाछें राज जो - आज्ञा करें सो करें । तव श्रीगुसांई-जी ने कही, जो - आछौ है । ब्रजयात्रा करि आऊ । पाछें सेवा करियो । तव दोऊ भाई तीनि दिना श्रीगोकुल में रहि कै पाछें श्रीनाथजीद्वार गए । सो दोइ चारि दिना श्रीगोवर्द्धननाथजी के दरसन करि कै पाछें ब्रजयात्रा किये । सो संपूरन ब्रजयात्रा करि कै श्रीगोकुल आए । तव श्रीगुसांईजी के दरसन किये । पाछें दंडवत् करी । तव श्रीगुसांईजी ने पूछी, जो - ब्रजयात्रा करि आए ? तव इन विनती करी, जो - राज की कृपा तें कार आए । पाछें श्रीगुसांईजी ने कही, जो - अब सेवा करो । तव बेनीदास ने विनती करी, जो - महाराज ! सेवा तो तव करें

जब श्रीठाकुरजी बोलें । मांगि मांगि कै लेई तो सेवा करें । तब श्रीगुसाईजी ने कही, जो - भाव सों सेवा करो । श्रीठाकुरजी तुम्हारो सब मनोरथ पूरन करेंगे । पाछें श्रीगुसाईजी ने सेवा पधराय दीनी । ता पाछें वैष्णवन सों मिलि कै सेवा पधराय कै सेवा की रीति भांति सब सीखे । पाछें एक भाई सामग्री करे, एक भाई सिंगार करे । सो नित्य मंगला के सातों स्वरूपन के दरसन करे । तब दोई वैष्णवन कों न्योतो दे आवते । ता पाछें दोऊ सेवा में न्हाते । सो राजभोग धरि कै समय होइ तब भोग सराय महाप्रसाद वैष्णवन कों लिवावते । ता पाछें आप लेते । या प्रकार नित्य नेम तें भाव सहित सेवा करे । सो श्रीठाकुरजी सानुभावता जनावन लागे ।

वार्ता प्रसंग—३

सो एक दिना श्रीठाकुरजी ने कही, जा - मैं तुम पै प्रसन्न भयो हूं । सो कछू मांगो । तब इन कही, जो - श्रीगुसाईजी की कृपा तें और तो सब है । परंतु एक, श्रीगुसाईजी की सेवा करिवे कौ मनोरथ है ।

भावप्रकाश—यामें ठाकुरतें गुरुकी सेवा दुर्लभ दिखाए ।

तब श्रीठाकुरजी ने कही, जो - करो । पाछें एक दिना श्रीगुसाईजी ने पूछी, जो - कहो बेनीदास ! श्रीठाकुरजी कछू सानुभावता जनावत हैं ? तब इन कही, जो - राज की कृपा तें बोलत हैं । तब श्रीगुसाईजी ने कही, जो - कछू कही है ? तब इन कही, जो - श्रीठाकुरजी ने कही, जो - कछू मांगो । तब मैंने कही, जो - श्रीगुसाईजीकी सेवा करें । तब श्रीठाकुरजी ने कही, जो - करो । पाछें श्रीगुसाईजी आज्ञा किये, जो - तुम



फूलघर, पानघर भंडार की सेवा करो । तब इन कही, जो - महाराज ! सेवा तो आपकी करें और फूलघर, पानघर, भंडार की सेवा तो न करेंगे । तब श्रीगुसाईंजी ने कही, जो - हमारी खवासी करो । तब ये दोऊ भाई प्रसन्न होइ कै एक तो घर सोवते और एक यहां मंदिर में सोवें । सबेरे बेगि उठि कै वे हू आवते ।

भावप्रकाश—यामें यह जताए, जो - रात्रि कों घर में श्रीठाकुरजी कों अकेले न छेरने । काहेतें ? बालक हैं, तातें डरपे ।

सो दोऊ मिलि कै कीर्तन करते । जब श्रीगुसाईंजी जागें तब एक जनो तो श्रीगुसाईंजी कों दंतधावन करावें । और एक सैया उठावें । बुहारी करें । पाछें दोऊ जनें श्रीगुसाईंजी कों तेल लगाय न्हावते । पाछें श्रीगुसाईंजी आप तिलक मुद्रा करि कै मंदिर में पधारते । ता पाछें दोऊ भाइ जाँइ कै अपने घर न्हातें । सो एक सामग्री करे, एक सिंगार करे । पाछें राजभोग धरि कै भोग सराय कै एक तो उहां रहे । सो वैष्णवन कों महाप्रसाद लिवावे । एक श्रीगुसाईंजी के पास आवते । सो श्रीगुसाईंजी भोजन करि कै पोढते । तब घर आय कै महाप्रसाद लेते । या प्रकार श्रीठाकुरजी कों सब सामग्री नित्य करते । जो - महाप्रसाद लेवे जानो होइ, तो हू सामग्री तो उतनी ही समर्पते नित्य, घटतीन करें । या प्रकार भाव सों भगवद् सेवा, गुरुसेवा, करते । रात्रि कों श्रीमुख तें कथा सुनते । वैष्णव मंडली में वार्ता सुनते ।

सो एक दिन श्रीगुसाईंजी इनकी सेवा देखि कै प्रसन्न भए । तब आपने कही, जो - तुम्हारे कहा मनोरथ है ? तुम कछू

मांगो तब इन श्रीगुसांईजी सों विनती करी, जो - कृपानाथ !  
हमारो तो अब वैष्णवन की सेवा करिवे कौ मनोरथ है ।

भावप्रकाश—याकौ अभिप्राय यह है, जो - वैष्णवन की सेवा अत्यंत दुर्लभ है । ठाकुर कौ, गुरु कौ दास होई सेवा करे । परन्तु वैष्णवन कौ दास वैष्णवन की सेवा होनी बोहोत कठिन हैं । सो तो जब प्रभुनकी, गुरुन की कृपा होई तबही सिद्ध होई । तातेँ इन दोऊ भाई श्रीगुसांईजी पास यह माँगे ।

तब श्रीगुसांईजी ने कही, जो - सुखेन करो । पाछें श्री-ठाकुरजी की सेवा करते, और नित्य दोइ वैष्णवन कों महा-प्रसाद लिवावते । सो अब पांच वैष्णवन कों महाप्रसाद लिवा-यवे लगे । सो नित्य एक नयो वैष्णव न्योते । और नित्य नौतन सामग्री करते । सो थोरी थोरी रितु अनुसार सामग्री करते । अब या प्रकार श्रीठाकुरजी की सेवा, गुरु की सेवा, वैष्णवन की सेवा करते । सो बरस चारि पांच करी । तब वैष्णवन प्रसन्न भए । सो कहन लागे, जो - भाई ! इन दोऊ भाईन कों धन्य है । सो तीनयो सेवा नित्य नेम पूर्वक करत हैं । तब ये दोऊ भाई बोहोत प्रसन्न भए । ता पाछें एक दिना श्रीगुसांईजी सों विनती कीना, जो - राज की आज्ञा होइ तो सब कुटुंब कों यहां बुलाय लें । तब श्रीगुसांईजी ने कही, जो - भले । तब बेनीदास दामोदरदास ने अपनो सब कुटुंब सूरत तें बुलाय लियो । सबन श्रीगुसांईजी के दरसन किये । पाछें श्रीगुसांईजी सों विनती करि कै सबन कों व्रत करवायो । पाछें ब्रह्मसंबंध करवायो । ता पाछें श्रीगुसांईजी सों आज्ञा माँगि कै श्रीठाकुरजी पधराय कै सबन मिलि कै ब्रजयात्रा करी । श्रीगोवर्द्धननाथजी के दरसन किये । मनोरथ किये । पाछें श्रीगोकुल में आय कै सातों स्वरूपन के सातों बालकन के श्रीगुसांईजी के मनोरथ

किये । पाछें थोरे से दिन रहि कै श्रीगुसांईजी सों विनती कीनी, जो - राज की आज्ञा होंइ तो सूरत जाँय । तव श्रीगुसांईजी ने प्रसन्नता पूर्वक इनकों विदा किये । ता पाछें श्रीगुसांईजी सों विदा होंइ कै वे अपने घर सूरत कों गए । पाछें भलि भांति सों सेवा करन लागे । दोऊ भाई सिंगार करते । दोऊन की स्त्री सामग्री करती । दोऊन के बेटान की बहू उपर की परचारगी करती । तीन्य बेटा व्यौहार-सेवा करते । सो राजभोग पर्यंत की सेवा करि कै वैष्णव चारि पांचन कों महाप्रसाद लिवावते । पाछें भगवद्वाता मंडली में जाते । या प्रकार भली भांति सों सेवा करते । और सुंदर वस्त्र और भेंट श्रीगुसांईजी कों प्रतिवर्ष पठावते । सो या प्रकार सदा भगवद-सेवा, गुरु सेवा, वैष्णव सेवा करते । श्रीठाकुरजी सानुभावता जनावते ।

भावप्रकाश—या वार्ता कौ अभिप्राय यह है, जो - सेवा समान और कोई फल नहीं । तातें वैष्णव कों सेवा ही में मन लगावतों । और सेवा भय प्रीति पूर्वक करनी । तो प्रभु तत्काल प्रसन्न होंई ।

सो वे वेनीदास दामोदरदास श्रीगुसांईजी के ऐसैं परम कृपापात्र भगवदीय हते । तातें इनकी वार्ता कौ पार नहीं, सो कहां ताई कहिये ? वार्ता ॥११५॥



अब श्रीगुसांईजी के सेवक जनार्दनदास क्षत्री, आगरे के, तिनकी वार्ता कौ भाष कहत हैं —

भावप्रकाश—ये राजस भक्त हैं । लीला में इन कौ नाम 'चपला' है । ये विसाखाजी की सखी सौरसेनी हैं, उन तें प्रगटी हैं । तातें उनके भावरूप हैं ।

सो जनार्दनदास आगरे में एक चोपडा क्षत्री के जन्मे । सो वह क्षत्री बोहोत भलो मनुष्य हुतो । वाकै पास द्रव्य हू बोहोत हुतो । सो वा क्षत्री के घर

के पास वैष्णवन के घर हते । सो जनार्दनदास वरस पांच के भए तव तें वैष्णवन के घर जाइवे लगे । सो वैष्णव उन कों दैवी जीव जानि महाप्रसाद देतें । कहतें, जो - तू दैवी जीव है । तेरे पर वेगि कृपा होइगी । ऐसैं करत जनार्दनदास वरस अठारह के भए । तव इन कौ विवाह भयो । सो स्त्री दैवी आई । ता पाछें केतेक दिन कों जनार्दनदास के माता-पिता मरे । तव जनार्दनदास वैष्णवन की मंडली में जाइवे लगे । भगवद् वार्ता-चर्चा सुनते ।

वार्ता प्रसंग—१

सो एक समै चार-पांच वैष्णव आगरे तें श्रीगोकुल कों श्रीगुसांईजी के दरसन कों चले । सो उन के संग जनार्दनदास चोपडा क्षत्री आगरे तें श्रीगोकुल कों श्रीगुसांईजी आपु के दरसन कों आए । तव जनार्दनदास कों श्रीगुसांईजी आपु के दरसन भए । सो साक्षात कोटि कंदर्पलावन्य श्रीपूरन पुरुषो-त्तम के दरसन भए । तव जनार्दनदास ने श्रीगुसांईजी आपु सों विनती कीनी, जो - महाराजाधिराज ! मोकों सरनि लीजिए । तव श्रीगुसांईजी आपु आज्ञा किये, हां हां, तोकों नाम सुनाइ सरनि लेइगें । जाऊ, श्रीयमुनाजी में स्नान करि आऊ । तव जनार्दनदास ने साष्टांग दंडवत् किये । ता पाछें श्रीयमुनाजी स्नान करिवे कों गए । पाछें स्नान करि कै श्रीगुसांईजी पास आइ आपु सों विनती किये, जो - महाराजाधिराज ! मोकों नाम सुनाइए । तव श्रीगुसांईजी आपु जनार्दनदास कों नाम सुनाए । और श्रीनवनीतप्रियजी के दरसन करवाये । ता पाछें श्रीगुसांईजी आपु श्रीनवनीतप्रियजी कों अनोसर करि कै अपनी बैठक में पधारे । गादी तकियान के ऊपर विराजें । तव सब वैष्णवन के संग जनार्दनदासने साष्टांग दंडवत् किये । और कहे, जो - मोकों तो श्रीमहाराज की चरनार-

विंद की सेवा में रखिये । तव श्रीगुसांईजी आपु अपनी खवासी में राखे । सो जनार्दनदास श्रीगुसांईजी की सेवा करि कै वोहोत प्रसन्न भए । तव श्रीगुसांईजी आप श्रीमुख तें कहते, जो-जनार्दनदास चोपडा वड़े कृपापात्र भगवदीय हैं । पाछें जनार्दनदासने श्रीगुसांईजी सों विनती कीनी, जो-महाराजाधिराज मोकों सेवा पधराइए । तव श्रीगुसांईजी आपु जनार्दनदास के ऊपर दया करि कै प्रसन्न होइ कै तिनके माथें पर श्रीवालमुकुंदजी की सेवा पधराई । आपु पंचामृत सों स्नान करवाए । और सब प्रनालिका सिखाए । पाछें वह आगरे आइ कै अपने घर में जनार्दनदास सेवा करन लागे । ता पाछें श्रीगुसांईजी आगरे पधारे तव स्त्री कों नाम-निवेदन करवाए । सो अह-निंस चित्त सेवा के विषे रहे । उत्तम तें उत्तम सामग्री होइ सोई आरोगावें । भांति भांति के वस्त्र आभूषन श्रीठाकुरजी आपु कों अंगीकार करावते । ऐसैं करत वोहोत दिन भए । तव श्रीठाकुरजी आपु वा जनार्दनदास विनु एक क्षन रहते नाहीं । जो चहिए सोई मांगि लेते । वातें करते । सो जनार्दनदास चोपडा कछू कामकाज कों कहूं जाते तव श्रीवालमुकुंदजी कहते, जो-मैं तेरे संग आऊंगो । तू कहां जात है ? तव जनार्दनदास श्री-वालमुकुंदजी सों कहते, जो-महाराजाधिराज ! मैं अव ही आवत हों । परि श्रीठाकुरजी आप मानते नाहीं । सो जनार्दनदास विना वालमुकुंदजी सों रह्यो जाँइ नाहीं । और कहते, जो-जनार्दनदास ! मैं तेरे संग आऊंगो । ऐसो श्रीवालमुकुंदजी आप सों स्नेह हतो । सो जनार्दनदास श्रीवालमुकुंदजी आप सों कहते, जो-महाराजाधिराज ! मैं अवही वड़ी बेगि आवत

हों। ता पाछें जनार्दनदास चोपड़ा कोई कामकाज होइ सो करि आवते। तव श्रीबालमुकुंदजी आपु कहते, जो - जनार्दनदास ! आयो ? जो - ऐसैं श्रीबालमुकुंदजी आपु जनार्दनदास की देह चली तहां पर्यंत ऐसैं ही किये। सो ऐसैं करत वोहोत दिन भए। ता पाछें जनार्दनदासकी स्त्री मूर्ई। ता पाछें वे श्रीगुसांईजी आप के घर आय कै रहे।

वार्ता प्रसंग—२

और जनार्दनदास के और माधवदास कपूर सों मित्राई हती। सो माधवदास ने जनार्दनदास सों कह्यो, जो - जनार्दनदास ! तुम कों श्रीगुसांईजी की आज्ञा है, सो जनार्दनदास ! तुम और विवाह करो। तव जनार्दनदास ने यह कही, जो - माधवदास ! सुनि भाई। तू भी सेवक और मैं भी सेवक श्रीगुसांईजी आप के हैं। सो श्रीगुसांईजी तोकों हू जानत हैं। और हम कों हू जानत हैं। सो जो तोकों आज्ञा दिए हैं तो मोकों हू आज्ञा श्रीगुसांईजी आपु क्यों नहीं दीनी। तातें मैं कैसे विवाह करों ? जो - उन की इच्छा नहीं है। और उन की इच्छा होइ तो तोकों कह्यो तो मोकों ही कहते। कहते कहा बेर लागत हैं ? यह बात सुनि कै माधवदास चुप करि रहे। सो ऐसैं ही रहे, परि विवाह नहीं कियो। पाछें जहां पर्यंत जनार्दनदास की देह चली तहां पर्यंत सेवा करी।

सो वह जनार्दनदास श्रीगुसांईजी आप के ऐसैं टेक के कृपापात्र भगवदीय हते। जो - जिन के ऊपर श्रीगुसांईजी आप सदा प्रसन्न रहते। वे जनार्दनदास आपु की सदा आज्ञा में रहे।

भावप्रकाश—या वार्ता कौ अभिप्राय यह है, जो - वैष्णव कों लौकिक में आसक्ति सर्वथा न राखनी। एक प्रभुन में स्नेह राखनों। उनकी सेवा करनी।

सो वे जनार्दनदास श्रीगुसांईजी के ऐसे कृपापात्र भगवदीय हते । ताते इनकी वार्ता कहां ताई कहिये । वार्ता ॥११६॥



अब श्रीगुसांईजी के सेवक ताराचंदभाई, गुजरात में रहते, तिनकी वार्ता की भाव कहत हैं—

भावप्रकाश—ये तामस भक्त हैं । लीला में इन की नाम 'वचन-चातुरी' है । सो इन के वचन में चतुराई बोहोत है । ये 'सोरसेनी' तें प्रगटी हैं, ताते उनके भावरूप हैं ।

ये गुजरात में एक बनिया के जनमे । सो ता समै गाम में महामारी आई । सो यह लरिका दिन दस को भयो तब इन के माता-पिता दोऊ मरे । ता पाछे इन के एक काका हतो । सो बाने या लरिका को अपनी पास राख्यो । पाल्यो पोष्यो बढो कियो । सो वह काका वैष्णव हतो । वाके घर में नित्य भगवद् मंडली होई । तामें यह लरिका नित्य भगवद् वार्ता सुने । तब याके मन में आई, जो-में हू श्रीगोकुल जाई श्रीगुसांईजी को सेवक होउ तो आछौ । सो ऐसे करत कछुक दिन में गाम में तें एक संग वैष्णव को श्रीगोकुल को चलयो । सो वा संग में ताराचंद हू चले ।

वार्ता प्रसंग—१

सो ताराचंद भाई श्रीगुसांईजी के दरसन को श्रीगोकुल आए । सो श्रीगुसांईजी आप के दरसन करि कै विनती करी, जो-महाराजाधिराज ! मोको नाम दीजिए । तब श्रीगुसांईजी आप आज्ञा किये, जो-जाऊ, श्रीयमुनाजी में स्नान करि कै आउ । तब ताराचंद भाई श्रीयमुनाजी में स्नान करिवे को गए । सो स्नान करि कै आए । तब श्रीगुसांईजी आप से विनती करी, जो-महाराजाधिराज ! मोको अब सरनि लीजिए । तब श्रीगुसांईजी आपु वा ताराचंद भाई को नाम सुनाए । ता पाछे श्रीगुसांईजी आपु श्रीनवनीतप्रियजी को राजभोग को समय हतो । सो श्रीनवनीतप्रियजी को राजभोग सरायो । पाछे श्री-

गुसाईजी आप कृपा करि ताराचंदभाई को श्रीनवनीतप्रियजी के सन्मुख ब्रह्मसंबंध करवायो । पाछें राजभोग के दरसन के किवाड़ खुले । सो ताराचंदभाई श्रीनवनीतप्रियजी के दरसन करि कै बोहोत ही प्रसन्न भए । ता पाछें श्रीगुसाईजी आपु श्रीनवनीतप्रियजी को राजभोग आर्ति करि अनोसर कराय आपु अपनी बैठक में पधारे । तब सब वैष्णव मिलि कै आए । सो श्रीगुसाईजी आप सो दंडवत् करि कै बैठे । पाछें श्रीगुसाईजी आप सब वैष्णवन को समाधान कियो । ता पाछें ताराचंदभाई हू आए । सो श्रीगुसाईजी आप को साष्टांग दंडवत् करि कै बैठे । तब श्रीगुसाईजी आप सब वैष्णवन को विदा करि कै आप भीतर भोजन करिवे को पधारे । सो भोजन करि कै बीरा आरोगि कै अपनी बैठक में गादी तकियान पर विराजे । तब श्रीगुसाईजी ताराचंद भाई को आज्ञा किये, जो-उठो ! महाप्रसाद लेहु । तब ताराचंद भाईने महाप्रसाद लियो । पाछें ताराचंद भाई ने श्रीगुसाईजी सो विनती करी, जो-महाराज ! कछूक दिन राज की टहल करिवे को मनोरथ है । तब श्रीगुसाईजी ताराचंद भाई को अपनी खवासी में राखे ।

वार्ता प्रसंग—२

सो एक दिन ताराचंद भाई को मन कछूक बात पै चलयो । तब ताराचंद भाई को श्रीगुसाईजी आप ने शिक्षा कीनी, जो-या बात में मन चलाइए नहीं । ता पाछें श्रीगुसाईजी आपु सो ताराचंद भाईने विनती कीनी, जो-महाराजाधिराज ! कौन ने राज के आगे आय कै मिथ्या कह्यो है ! सो हम सो कहो । जो-मैं सुनों । ता पाछें श्रीगुसाईजी आप ने कह्यो,



जो-कहा रे ! कहा में जानत नाही ? जो-मैं काहू कौ कह्यो सुनों ? मैं तिहारी रक्षा के लिए कहत हों । तव ताराचंदभाई श्रीगुसाईजी आपके श्रीमुख के वचन सुनि कै सिखा हू मानत भए । पाछें ताराचंद भाई ने श्रीगुसाईजी सों विनती कीनी, जो-महाराज ! मेरो मन स्थिर होई सो उपाय कृपा करि आप जनाइए । तव श्रीगुसाईजी ताराचंद भाई सों आज्ञा किये, जो-तुम 'सर्वोत्तम स्तोत्र' कौ पाठ नित्य करियो । तातें तुम्हारे सब कार्य सिद्ध होइगो । सो यह सुनि कै ताराचंद भाई वोहोत प्रसन्न भए । पाछें वा दिन तें नित्य 'सर्वोत्तम स्तोत्र' कौ पाठ करन लागे । तातें वैष्णव कों बड़ेन कौ वचन मान्यो चाहिए ।

भावप्रकाश—या वार्ता में यह जतायो, जो - वैष्णव कों गुरुन के आगे झूठ बोलनो नाही । काहू बात कौ दुराव करनो नाही । नांतरु अपराध होई । बड़ेन की सिखा कों गुन करि कै माननो । और सर्वोत्तम स्तोत्र कौ स्वरूप जताए, जो - मन कैसो हू चंचल होई परि श्रद्धापूर्वक-सुद्ध बुद्धि सों सर्वोत्तम स्तोत्र को पाठ करें तो वाकौ मन स्थिर होई । और उत्तम फल की प्राप्ति होई ।

सो वह ताराचंद भाई श्रीगुसाईजी आप के सेवक ऐसैं कृपापात्र भगवदीय हे । जिन के ऊपर श्रीगुसाईजी आपु सदाही प्रसन्न रहते । तातें उनकी वार्ता कौ पार नाही । सो कहां ताई कहिए ।

वार्ता ॥११७॥



अब श्रीगुसाईजी कौ सेवक एक मलेच्छ हतो, महावन में रहतो, तिनकी वार्ता कौ भाष कहत हैं—

भावप्रकाश—ये तामस भक्त हैं । लीला में इन कौ नाम 'गोहनी' है । ये श्रीठाकुरजी के पाछें पाछें फिरति हैं । ऐसी स्वरूपामक्त हैं । ये भामा की मखी माधुरी हैं, उन तें प्रगटी हैं, तातें उन के भावरूप है ।

सो एक दिन 'गोहनी' ठाकुर के पाछें पाछें वन में गई, तहां ठाकुर ने इन देखी । सो ठाकुर गोहनी सों कहे, जो - गोहनी ! त श्रीदामा कों वेगि

बुलाइ ल्याउ । तब गोहनी ने श्रीठाकुरजी सों क्यो, जो - महाराज ! मोतें आप कौ वियोग सह्यो जात नहीं । तातें आप और काहू कों पठावो तो आछौ । हों तो टेंटी विनन के मिप सास-ननद तें दुराय कै आप के दरसन कों वन में आवति हों । तातें या भेद कों कोऊ जानें तो मेरो वन में आवनो बंद होई । तो आप के दरसन विना मेरे प्रान रहे नहीं । तातें महाराज में पराधीन हों । तब ठाकुर ने सुवल सखा कों बुलाई कै क्यो, जो - तू 'श्रीदामा' कों वेगि बुलाय ल्याऊ । आज एक नयो खेल खेलेंगे । सो सुवल सखाने जाइ कै श्रीदामा सों क्यो, जो - तू वेगि चलि । आज एक नयो खेल होइगो । सो श्रीदामा वेगि वेगि आय श्रीठाकुरजी कों दंडवत् कियो । पाछें खेल भयो । सो ठाकुर तो श्रमित भए । तब गोहनी वन में ते मधुर फल ल्याई सिद्ध किये । पाछें पतीवान के दोना करि तामें ले आई । और क्यो, जो - महाराज ! अरोगिए । सो विनती करत मुख तें छींटा उडयो । सो सामग्री में परयो । सो वा वात कों गोहनीने जानी नहीं । सो छींटा उरत श्रीदामाने देख्यां । तब श्रीदामाने गोहनी तें क्यो, जो - दारी ! तु अपनो झूठो ठाकुर कों अरोगावति हैं ? जा म्लेच्छ योनि कों प्राप्त होऊ । तब गोहनी डरपि कै ठाकुरकों विनती करन लागी, जो-महाराज ! हों तो जानी नहीं । सो मेरो अपराध क्षमा करो । तब ठाकुरने क्यो, जो - अनजान तें अपराध भयो । परि ये श्रीदामा की वानी मिथ्या कैसें होई ? तातें म्लेच्छ योनि तो प्राप्त होइगी । पाछें तेरो उद्धार होइगो ।

सो वह महावन तें उरे कोस बीस पर एक गाम है, तहां एक म्लेच्छ के जन्म्यो । सो ये बरस अठारह कौ भयो तब याके माता-पिता मरे । ता पाछें वह म्लेच्छ के एक काका हतो । सो महावन में रहतो । सो ताके घर आइ रख्यो ।

वार्ता प्रसंग—१

सो एक समै श्रीगुसाईंजी आप 'रमनरेती' पधारे है । तहां आप एक वैष्णव के लरिका कों अष्टाक्षर सुनावत हते । सो नाम सुनाइ सेवक किये । तहां यह म्लेच्छ सूकी लकरी तोरन कों आयो हतो । सो वाकों श्रीगुसाईंजी कौ दरसन भयो । सो महा अलौकिक दरसन भयो । तब वह म्लेच्छ अपने मन में विचारयो, जो - मैं हूँ इनकौ सेवक होउं तो आछौ । सो वह

मलेच्छ नित्य सांझ को श्रीगोकुल आवतो । सो श्रीगुसांईजी के दरसन करतो । पाछें रात्रि को श्रीठकुरानी घाट उपर नित्य कारो कम्मर लेकै सोवतो । सो एक दिन श्रीगुसांईजी कौ जलधरा छुवाइ गयो हतो । तव श्रीगुसांईजी श्रीयमुनाजी न्हान को अंधेरे में पधारे हते ।

भावप्रकाश—काहेतें, जो - साख में सीतल जल सों घर में न्हानो दोष कह्यो है ।

सो श्रीगुसांईजी श्रीयमुनाजी न्हाइवे को पधारे । तव अंधेरे में वा मलेच्छ के माथे में श्रीगुसांईजी कौ चरन लाग्यो । तव श्रीगुसांईजी तीन बेर अष्टाक्षर मंत्र कहे । पाछें श्रीगुसांईजी आप न्हाय श्रीयमुनाजी में, ता पाछें घर पधारे । पाछें वह मलेच्छ वैष्णवन पास आइ बैठे, और वैष्णवन सों कहे, जो-मैं हूं सेवक हों । पाछें सब वैष्णव यह बात श्रीगुसांईजी सों पूछें । तव श्रीगुसांईजी उन वैष्णवन सों प्रसन्न होइ कै सब बात कहे । पाछें कह्यो, जो-नेक दूरि बैठन दीजो । सो वह मलेच्छ नित्य द्वार पर आइ कै दरसन करि जाँइ । और श्रीगुसांईजी श्रीनाथजीद्वार तथा परदेस जहां पधारे तहां वह मलेच्छ हू श्रीगुसांईजी के संगही जाँई । परंतु श्रीगुसांईजी के दरसन किये विना वह मलेच्छ जलपान न करे । ऐसी कृपा वा ऊपर भई । पाछें श्रीगुसांईजी आप अंतर्धान लीला दिखाए । तव वह मलेच्छ हू श्रीगुसांईजी कौ विरह करि कै आप हू देह छोरि दियो ।

भावप्रकाश—या वार्ता कौ अभिप्राय यह है, जो - प्रभुन के (श्रीगुसांईजी के) वचन पर दृढ विस्वास राखें ताकौ कार्य तत्काल सिद्ध होई ।

सो वह मलेच्छ श्रीगुसांईजी कौ ऐसो कृपापात्र भगवदीय हतो । तातें इनकी वार्ता कहां तांड कहिए । वार्ता ॥११८॥

अब श्रीगुसांईजी की सेवकिनी एक क्षत्रानी हती, सो आगरे में रहती, तिनकी वार्ता कौ भाव कहत हैं—

भावप्रकाश—ये राजस भक्त हैं । लीला में ये 'ब्रजांगना' हैं । सो राति दिन गृह के कार्य में आसक्त रहति हैं । सो जब प्रभु वन तें ब्रज कों आवत हैं तब इन कों प्रभुन के दरसन होत हैं । तब यह विह्वल व्है जाति हैं । ता पाछे फेरि गृह-कारज में आसक्त रहति हैं । ये 'माधुरी' तें प्रगटी हैं, तातें उनके भावरूप हैं ।

ये आगरे में एक क्षत्री के घर जन्मी । सो ये बरस आठ की भई तब याकौ व्याह भयो । सो धनी रोगी मिल्यो । सो जनम सगरो इन की सेवा करिवे में वीत्यो । पाछे ये बरस पैंतीस की भई तब याकौ धनी मरयो । तब सब जाति के लोग लुगाई भेलें भए । तब यह क्षत्रानी बोहोत रुदन करन लागी-सो जाति के सब वैष्णव हते । तिन कही, जो - वाई ! जो - कछ होनहार हतो सो भयो । अब रोइवे तें कहा होइगो ? तातें तू वैष्णव होई भगवद् सेवा करि । तो तोकों क्लेस न होईगो । तब यह क्षत्रानी कहे, जो - वैष्णव कैसे होउं ? सो तुम मोकों बतावो । तब उन कयो, जो - यहां बृहक दिन में श्रीगुसांईजी पधारेंगे । तब हम तोसों कहेंगे । तब तू उन के सरनि जैयो । और सेवक व्है स्वरूप सेवा पधराइयो । तब वाने कही, जो - तुम मोकों श्रीगुसांईजी पधारे तब कहियो, मैं उन की सेवक होउंगी । ता पाछे केतेक दिन में श्रीगुसांईजी श्रीनाथ-जीद्वार तें आगरा पधारे । तब जाति की लुगाइन कयो, जो - वाई ! श्रीगुसांईजी पधारे हैं । तातें तेरी इच्छा होई तो उनकी सरनि होऊ । तब वह क्षत्रानी श्री-गुसांईजी के पास आइ विनती कीनी, जो - महाराज ! मोकों सेवक करिए । तब श्रीगुसांईजी वाकों कृपा करि नाम सुनाए । पाछे दूसरे दिन समर्पन कराए ।

वार्ता प्रसंग—१

सो वा क्षत्रानीने श्रीगुसांईजी पास नाम-समर्पन करि कै विनती श्रीगुसांईजी सां करी, जो - महाराज ! मेरो सेवा कौ मनोरथ है । सो स्वरूप-सेवा कृपा करि कै आप मोकों पधराइ दीजे । तब श्रीगुसांईजी वा क्षत्रानी के माथे एक श्रीलालजी कौ स्वरूप पधराय सब सेवा कौ प्रकार नित्य कौ तथा उत्सव कौ बताइ दिये । सो वह क्षत्रानी श्रीलालजी की सेवा करती । परंतु वह क्षत्रानी कौ मन लौकिक में बोहोत ही रहतो । सबेरो

होंइ तव कहे, जो-चारि पौनी कांति लेऊ । फलानी तें मिलि  
आऊं । ऐसैं नित्य वह क्षत्रानी श्रीलालजी की सेवाकों अवेर करे ।

सो वहोरि श्रीगुसाईजी आगरे पधारे । तव श्रीठाकुरजी  
श्रीगुसाईजी सों कहे, जो-यह क्षत्रानी कौ मन लौकिक में  
वोहोत है । पाछें वह क्षत्रानी रात्रि कों श्रीठाकुरजी कों पोंढाय  
कै श्रीगुसाईजी के दरसन कों आई । तव श्रीगुसाईजी वह  
क्षत्रानी सों कहे, जो-तोसों श्रीठाकुरजीकी सेवा न वनि आवत  
होंइ तो हमकों श्रीठाकुरजी पधराइ दे । तू अवेर वोहोत काहे  
कों करत है, लौकिक कार्यमें ? तव वह क्षत्रानी श्रीगुसाईजी  
सों विनती करि कै कही, जो - महाराजाधिराज ! अव तें मैं  
बेगि ही कियो करोंगी । पाछें फेरि वह क्षत्रानी अवेर करन  
लागी । तव श्रीगुसाईजी ने आगरे के वैष्णवन सों कही, जो-  
फलानी वाई के घर श्रीठाकुरजी हैं । सो तिनकी तुम सेवा  
करियो । तव उन वैष्णवन श्रीगुसाईजी सों कही, जो - महाराज !  
वह वाई हम कों अपने श्रीठाकुरजी की सेवा कैसें करन देइगी ?  
तव उन सब वैष्णवन सों श्रीगुसाईजी कहें, जो - प्रभु कछू दिन  
में वह वाई पास सेवा न करावेंगे । उद्वेग तें प्रतिबंध होइगो ।

भावप्रकाश—याकौ अभिप्राय यह है, जो - सेवा में तीन वस्तु बाधक हैं ।  
उद्वेग, प्रतिबंध अरु भोग । सो उद्वेग तें प्रतिबंध होत हैं । और प्रतिबंध तें  
लौकिक भोग प्राप्त होत हैं । तातें दैवी जीवन कों यह तीनों बुद्धिपूर्वक त्याग  
करने । सो बात श्रीआचार्यजी महाप्रभु आप 'सेवाफल' के 'विवरण' में विस्तार  
सों कहे हैं ।

ता पाछें कछूक दिन वीते । पाछें एक दिन सवेरो भयो ।  
घरी दोइ दिन चढ़यो । तव वह क्षत्रानी चरखा कांतत हुती ।  
सो ऊपर तें वाके उपर भीति गिरी । तासों दोऊ हाथ वाके दृष्टि

गए । यह सुनिकै वा क्षत्रानी के घर वैष्णव आए । तब वा क्षत्रानी ने वैष्णव सों कही, जो - तुम श्रीठाकुरजी कों पधराइ ले जाउ । तब वे वैष्णव श्रीठाकुरजी कों वा क्षत्रानी के घर तें अपने घर पधराइ ले गए ।

भावप्रकाश—याकौ अभिप्राय यह है, जो - जदपि वा क्षत्रानी कौ जीव दैवी हतो, परि वाकी देह आसुरी हुती । और मन हू आसुरी हुतो । तातें प्रभु इन पास सेवा नहीं कराए ।

सो वैष्णव श्रीगुसाईजी के वचन स्मरण करि कै प्रीति सों श्रीठाकुरजी की सेवा करते । पाछें वह क्षत्रानी वोहोत खेद करन लागी । सो वह क्षत्रानी श्रीगुसाईजी की ऐसी कृपापात्र हती । तातें इनकी वार्ता कहां ताई कहिए । वार्ता ॥११९॥



अब श्रीगुसाईजी के सेवक भील दोइ, द्वारिकाजी के मारग मे रहते, तिनकी वार्ता कौ भाव कहत हैं—

भावप्रकाश—ये सात्विक भक्त हैं, लीला में ये 'पुलिदिनी' के यूथ के हैं । 'माधुरी' तें प्रगटे हैं, तातें उन के भावरूप हैं ।

वार्ता प्रसंग—१

सो एक समै श्रीगुसाईजी श्रीगोकुल तें द्वारिकाजी श्री-रनछोरजी के दरसन कों पधारे । तहां ये भील दोइ आछे कपरा पहरि मुसाफिर वनि मारग में श्रीगुसाईजी के डेरान के पास उतरे । सो भील चोरी करन के लिये उतरे । पाछें सब कोऊ अधिकारी भंडारी सेवक टहलुवान ने बरजे । तब श्री-गुसाईजी आप कहे, जो रहन देहु । पाछें रात्रि कों उन भीलन कों श्रीगुसाईजी जूठनि दीनी । तब जूठनि लेत ही उन दोऊ भीलन की बुद्धि फिरी । सो सगरी रात्रि श्रीगुसाईजी के डेरान की चौकी दिये । पाछें भोर ही उन भीलन नें श्रीगुसां-

ईजी सों विनती कीनी, जो-महाराजाधिराज ! अब आप हम ऊपर कृपा करि कै हम कों अपने सेवक करो । तव श्रीगुसां-ईजां कहे, जो-तुम स्नान करि आवो तो तुम कों सेवक करें । तव वे दोऊ भील जाँइ स्नान करि आइ, हाथ जोरि, श्रीगुसां-ईजी के सन्मुख ठाढ़े भए । तव श्रीगुसांईजी आप उन ऊपर कृपा करि कै उन दोऊ भीलन कों नाम सुनाय सेवक किये । पाछें श्रीगुसांईजी द्वारिकाजी होई श्रीरनछोरजी के दरसन करि कै श्रीगोकुल पधारे । तव वे दोऊ भील श्रीगुसांईजी के साथ चौकी पहरा देत आए । तहां श्रीगोकुल में वे दोऊ भील सातों स्वरूपन के और श्रीवल्लभकुल के दरसन करि श्रीयमुनाजी स्नान करि कै अत्यंत प्रसन्न भए । पाछें वे कछूक दिन श्रीगोकुल में रहि कै श्रीगुसांईजी सों विनती किये, जो-महाराजाधिराज ! हमारे मन में ब्रजयात्रा और श्रीगोवर्द्धननाथजी के दरसन की ईच्छा है । सो आप आज्ञा देहु तो हम जाँई । तव श्रीगुसांईजी आप उन सों दोऊ भीलन सों यह आज्ञा किये, जो-वोहोत आछो, करि आवो । पाछें वे दोऊ भील श्रीगुसांईजी की आज्ञा पाय कै चले । सो वनयात्रा परिक्रमा करत वे दोऊ भील श्रीगिरिराज आए । तहां परवत उपर जाँई श्रीगोवर्द्धननाथजी के दरसन किये । तव तो वे दोऊ अपने मनमें अत्यंत प्रसन्न होई कै कहे, जो-धन्य हमारे भाग्य हैं, जो-श्रीगुसांईजी आप की कृपा तें हमकों ऐसे सुख के दरसन भए । नाहीं तो हम तो महादुष्ट दुर्बुद्धि हते । हम कों या सुख कौ दरसन कहाँ हुतो ? पाछें वे दोऊ भील वनयात्रा करि श्रीगोवर्द्धननाथजी के दरसन करि श्रीगोकुल आय श्रीगुसांईजी कों

साष्टांग दंडवत् करि विनती किये, जो - महाराजाधिराज ! आज्ञा होइ तो अब हम अपने देस घर कों जाइ । तब श्रीगुसाईजी उन सों यह आज्ञा किये, जो - कछु दिन श्रीगोकुल कौ सुख और हू लेहु । तब वे और हू कछु दिन श्रीगोकुल में रहे । सो सातो स्वरूपन की झांकी और श्रीवल्लभकुल की झांकी करे । श्रीगुसाईजी के श्रीमुखकी कथा श्रवन करे । पाछें एक कहे, जो - महाराज ! आप की कृपा तें वड़े ई सुख देखे । वोहोत ही सुख की प्राप्ति भई । नाहीं तो हम सारिखे महापतित दुष्टन कों यह सुख की प्रारब्ध कहां हुती ? सो अब आप आज्ञा देहु तो हम अपने देस कों जाइ । तब श्रीगुसाईजी उन भीलन सों कहे, जो - वोहोत आछो । पाछें वे दोऊ भील श्रीगुसाईजी कों वोहोत भेंट किये । तब श्रीगुसाईजी आप उनकों प्रसाद दे उपरेना दोइ प्रसादी उढाय कै विदा किये । उन ऊपर श्रीगुसाईजी बड़ी ही कृपा किये । सो वे दोऊ भील श्रीगोकुल तें श्रीगुसाईजी पास तें विदा होइ कै अपने देस घरकों चले ।

सो मारग में एक ब्राह्मन वैष्णव के घर उत्सव हतो । तहां ये दोऊ भील तलाव पर उतरे हते । सो वह ब्राह्मन वैष्णव इन के तिलक कंठी देखि दोऊन कों तलाव पर तें महाप्रसाद लेन कों बुलावन आयो । तब इन दोऊन वा ब्राह्मन वैष्णव सों कह्यो, जो - हम तो काहू के हाथ कौ लेत नाहीं । तब वा ब्राह्मन वैष्णवने इन की जाति पूछी । सो इननें वा ब्राह्मन वैष्णव कों अपनी जाति बताई । तब वह ब्राह्मन वैष्णव पिछोरी फेरि कै नाच्यो । तब रसोई छोरि कै सब वैष्णव ब्राह्मन आय उन दोऊ भीलन कों ले गए । पाछें उन भीलन कों कह्यो सबननें, जो - हम हू श्रीगुसाईजी के



सेवक हैं। तब वे दोऊ भील महाप्रसाद वा ब्राह्मन वैष्णव के घर लिये। ता पाछे अपने देस घर कों गए। पाछे वे भील सगरे घर के मनुष्यन कों श्रीगुसांईजी के सेवक कराए। सो भील बड़े भगवदीय भए। अष्टप्रहर भगवनाम लेते। अपनो दुष्ट कर्म सब छोरि दिये। पाछे खेती करि निर्वाह करन लागे।

सो वे भील श्रीगुसांईजी के ऐसे कृपापात्र भगवदीय भए। ताते इनकी वार्ता कहां ताई कहिए ? वार्ता ॥१२०॥



अब श्रीगुसांईजी कौ सेवक एक ब्रजवासी कौ छोहरा, गुजर, सो बरस दस कौ हुतो, बह सकरवा में रहतो, ताकी वार्ता कौ भाव कहत हैं—

भावप्रकाश—ये तामस भक्त हैं। लीला में इन कौ नाम 'मनोरूपा' है। ये नंदरायजी के घर की रखवाली करत हैं। ये 'नागरी' तें प्रगटी हैं, ताते उनके भावरूप हैं।

ये सकरवा में एक गुजर के जन्म्यो। सो बरस बारह कौ भयो तब तें ये खेत पै जान लाग्यो। सो खेत बोवे, हल जोते। या प्रकार सब काम करे। सो एक विरक्त वैष्णव वाके घर चुकटी लेन आयो। सो याने वा विरक्त वैष्णव कों दो धोवा नाज दियो। सो वा विरक्त नें वामें तें एक धोवा नाज, एक महात्मा कों दियो। सो वह देख्यो। तब या लरिकाने वा विरक्त वैष्णव सों पूछ्यो - जो तुमने अपनो नाज दूसरे कों क्यों दियो ? वाकों हम और देते। तब वा विरक्त वैष्णव ने कही, जो - खेत में नाज होत हैं तामें जीव-हत्या हू बोहोत हैं। ताते वा नाज में तें दूसरे कों देनो चाहिए। यात वह दोष निवृत्त होई। तब या लरिका ने विचार करयो, जो - आज पाछे जीव-हत्या होई ऐसो कार्य नहीं करनो। पाछे वह लरिका ने वा विरक्त वैष्णव सों पूछ्यो, जो - हमारो उद्धार होई ऐसो मारग बतावो। हम तो आज तें जीव-हत्या होई सो कार्य कब हू न करेंगे। तब वा विरक्त वैष्णवने कही, जो - तू गोपालपुर जाई श्रीगुसांईजी कौ सेवक होऊ। पाछे श्रीगोवर्द्धननाथजी की टहल करि। तब तेरो उद्धार होइगो। तब वह छोहरा सकरवा तें गोपालपुर आयो। पाछे श्रीगुसांईजी कौ सेवक भयो, नाम पायो।

मनुष्यन कह्यो, जो - यह श्रीगुसांईजी हैं । तब वा सन्यासी ने कह्यो, जो - ये कैसे गुसांई हैं ? इन के तो संग्रह बोहोत है । सब दान करि देऊ । सो यह बात श्रीगुसांईजी आप सुने । तब श्रीगुसांईजी वा सन्यासी के देखत ही जो कछू वैभव हतो सो सब ब्राह्मन कों बुलाई कै दे दियो । कछू गंगाजी में डार दियो । पाछें वा सन्यासी सों श्रीगुसांईजी आप कहे, जो - तू सन्यासी है, तातें ये कोपीन तूवा अपने दे घालि । तब वह सन्यासी ने श्रीगुसांईजी सों कह्यो, जो - मैं अपने वस्त्र तूवा दे घालूं तो मोकों फेरि कहां तें मिलें ? तब श्रीगुसांईजी आप कहे, जो - हमने तो इतनो सामान ब्राह्मनन कों दान कियो और तू सन्यासी होई कोपिन हू नहीं दे सकत ? सो कोपिन में इतनी ममता है ! तोकों ईश्वर कौ भरोसा हू नहीं ? तातें तू सन्यासी कैसे ? तब वह सन्यासी लज्जित व्हे रह्यो । इतने ही गौड़ देस तें नारायनदास कौ पठायो सगरो वैभव पालकी, घोरा, डेरा आदि ले कै मनुष्य सब मनिकर्निका घाट पर आए । तब उन मनुष्यन नारायनदास की ओर तें बिनती कीनी, जो - महाराज ! बेगि गौड़ देस पधारिए । तब श्रीगुसांईजी कौ वैभव फेरि पहिले जेसो व्हे रह्यो । सो देखि कै वह सन्यासी श्रीगुसांईजी सों कह्यो, जो - महाराज ! तुम ईश्वर हो ! तुम्हारे चरनन सों लछिमी लागी है । पाछें श्रीगुसांईजी सों वह सन्यासी बोहोत ही बिनती करि कै कह्यो, जो - महाराज ! तुम साँचे गुसांईजी हो । तातें अब आप मो ऊपर कृपा करि कै मोकों अपनो सेवक करि कै कृतार्थ करो । तब श्रीगुसांईजी वह सन्यासी ऊपर परम अनुग्रह करि कै आज्ञा किये, जो - तुम स्नान करो, जटान कों मुंडाय कै आओ । तब

हम तुम को सेवक करें । तब वह सन्यासी जटा मुंडाई, स्नान करि कै श्रीगुसांईजी पास आइ हाथ जोरि कै ठाढ़ो भयो । तब श्रीगुसांईजी कृपा करि वाको नाम सुनाइ कै वैष्णव करि वा सन्यासी को कृतार्थ किये । तब वह सन्यासी नाम पाय वोहोत प्रसन्न भयो । पाछें श्रीगुसांईजी आप भोजन किये । तब वह सन्यासी वैष्णव भयो हुतो ताको बुलवाई कै श्रीगुसांईजी अपने श्रीहस्त सों वाको महाप्रसाद की पातरि कृपा करि कै धरी । सो महाप्रसाद वह लेन लाग्यो । पाछें श्रीगुसांईजी बीरी आरोगि कै विश्राम किये । पाछें विश्राम करि उठि कै वा सन्यासी वैष्णव सों कहे, जो-अब तुम ब्रजयात्रा जाय कै करो । सो वह वैष्णव कासी तें श्रीब्रजयात्रा को चल्यो । सो कछ्क दिन में श्रीमथुराजी आय पहोंच्यो । पाछें वह वैष्णव बनयात्रा परिक्रमा को विश्राम घाट स्नान करि कै निकरयो । सो ब्रज की सोभा देखि अपने मन में वोहोत ही प्रसन्न भयो । पाछें परिक्रमा - यात्रा करत श्रीगिरिराज में आय परवत ऊपर श्रीगोवर्द्धननाथजी के राजभोग की आरति के दरसन करि वह वैष्णव अत्यंत प्रसन्न भयो । पाछें श्रीगिरिराज तें परिक्रमा - यात्रा करत श्रीगोकुल आय श्रीगोकुल की सोभा देखि दरसन करि कै वोहोत ही प्रसन्न अपने मन में भयो । ता पाछें वह वैष्णव श्रीगोकुल तें फेरि कासी को चल्यो । सो कछ्क दिन में कासी में आइ कै श्रीगुसांईजी को दंडवत् कियो । तब श्रीगुसांईजी ने वा वैष्णव सों पूछ्यो, जो-वैष्णव ! तुम ब्रज होंइ आए ? तब इन श्रीगुसांईजी को साष्टांग दंडवत् करि विनती करी, जो - महाराज ! आपके प्रताप सों मैं ब्रज होंइ आयो हों । सो ब्रज की बात

कहा कहूँ ? महा अलौकिक ही है । श्रीठाकुरजी कौ निजधाम है । पाछें वह वैष्णव ब्रज की मानसी करतो । सो श्रीठाकुरजी वाकों अनुभव जतावन लागे ।

भावप्रकाश—या वार्ता कौ अभिप्राय यह है, जो - वैष्णव कों प्रभुन पर विश्वास राखनो । काहू वस्तु पर ममता राखनी नाहीं । सब वस्तु-पदार्थ प्रभुन की ईच्छा सों आय मिलत हैं । तातें प्रभुन पर भरोसो राखनो ।

सो वह श्रीगुसांईजी कौ ऐसो कृपापात्र भगवदीय भयो । तातें इनकी वार्ता कहां तांई कहिए । वार्ता ॥ १२२ ॥



अब श्रीगुसांईजी के सेवक आसकरन, नरवर (गढ) के राजा, तिनकी वार्ता कौ भाव कहत हैं —

भावप्रकाश—ये राजस भक्त हैं । लीला में इनको नाम 'विकला' है । सो विकला श्रीदामा सखा की सङ्गिनी हैं । ये 'नागरी' तें प्रगटी हैं, तातें उनके भावरूप हैं ।

वार्ता प्रसंग—१

सो आसकरन कों प्रथम राग पर बौहोत आसक्ति हुती । सो देस देस के कलामत गवैया आसकरन के पास आवते । सो आसकरन सब कौ समाधान करते । जहां लों रहते तहां तांई सीधो सामान प्होंचावते । पाछें जब चलते तब विदा हू आछी करते । सो दोइसैं—चारसैं गवैया सदा आसकरन के पास गाइवे कों रहते ।

सो एक दिन तानसेन ने आसकरन की बड़ाई सुनी । सो मनमें विचारयो, जो - एकवार आसकरन के पास जांइ देखों, आसकरन कछू समुझत हैं ? यह विचार कै तानसेन आसकरन के उहां गए । सो मध्याहन समय राजा अपनी कचहरी में बैठो है । दसवीस भले भले गवैया गावत हैं, सारंग के पद । ज्येष्ठ

के दिन हैं। सो आसकरन तानसेन को देखि कै वोहोत प्रसन्न भयो। अपने निकट बैठायो। कही, तानसेन ! तुम भले समय आये। कछु सारंग के पद गावो। तब तानसेन ने गोविंदस्वामी को पद गायौ —

राग : सारंग

कुंवर बैठे प्यारी क संग अंग - अंग भरे रंग-

बलि बलि बलि बलि त्रिभंगी जुवतिन-सुखदाई।

ललित गति विलास हास दंपति मन अति हुलास-

विगलित कच सुमन वास स्फुटित कुसुम निकर तेसीये सरदरेनि जुन्हाई ॥

नव-निकुंज मधुप गुंज कोकिल - कल कूजत पुंज-

सीतल सुगंध मंद पवन अति सुहाई।

‘गोविंद’ प्रभु सरस जोरी नव किसोर नव किसोरी निरखि मदन-फौज मारी

छेल छवीले नवल कुंवर ब्रजकुल मनिराई।

यह पद सुनत ही आसकरन को मूर्छा आई। सो चार घरी पाछे चैतन्यता भई। तब आसकरन ने तानसेन से कही, जो - आज ताई मैंने ऐसो पद नहीं सुन्यो। हजार-हजार कलामत सर्वदा मेरे पास रहे। परंतु ऐसो विष्णुपद नहीं गायो। पाछे आसकरन ने तानसेन से कही, जो - यह विष्णु-पद सुनि कै त्रयलोक को राज मोकों तुच्छ दीसत है। मैं अपने राज की कहा कहूं ? ताते तानसेन तुम्हारो मन होइ तो यह मेरो राज, भूमि, रानी, द्रव्य सब लेहु। तुम्हारो मनोरथ होइ सो लेहु। यह सुनि कै तानसेन ने कही, मैं कछू तुम्हारो राजभूमि नहीं चाहत। मैं तुम को देखन आयो हो। जो-राजा कछू गाइवे में समुझत है के नहीं। बड़ाई वोहोत सुनी। सो तुम्हारी बड़ाई साँची। अब मोकों कछू चहिए नहीं।

अब मैं जात हों । यह सुनि कै आसकरन ने तानसेन को बिनती करि कै बैठाये । कहे, जो - यह पद तुम अपनो करि कै गाए के कोई और कौ है ? तब तानसेन ने आसकरन सों कही, हे राजा ! ऐसो पद मोसों कोटि जन्म में हू न आवे । यह तो श्रीगोकुल में श्रीविठ्ठलनाथ गुसाईजी हैं, सो साक्षात् श्रीकृष्ण प्रगट भए हैं । तिन के अंतरंग सेवक गोविंदस्वामी हैं, उनने गायो है । मैं उन सों सिखे हों । उनसों साक्षात् कृष्ण वार्ता करत हैं, संग खेलत हैं । वे बड़े भगवदीय हैं । उनकी कृपा तें मोकों इतनो आयो है । यह सुनि कै आसकरन ने कही, जो - ऐसो कछू उपाय बतावो, जो - मैं गोविंदस्वामी के दरसन करों । तब तानसेन ने कही, जो - वे गोविंदस्वामी श्रीगुसाईजी के सेवक भए बिना अपने पास काहू को बैठन नहीं देत । मैं हू जब श्रीगुसाईजी कौ सेवक भयो, श्रीगुसाईजी आज्ञा दिये, तब मोकों बताए हैं । तब आसकरन ने कही, मैं श्रीगुसाईजी कौ सेवक निश्चै होउंगो । तब तानसेन ने कही, आछौ । तब आसकरन ने कही, तुम मेरे संग चलो । श्रीगुसाईजी सों बिनती करि कै मोकों सेवक करावो । तब तानसेन आसकरन पास रहे । पाछें आसकरन ने सगरे गवैयान को बिदा किये । कह्यो, अब तुम्हारे पदन सों मोकों काम नहीं है । सो सगरे उठि गए । पाछें वृंदावनी महंत हते, तिनहू को बिदा किये । जाउ तुम्हारे हू पद सों मेरो काम न होई । सो सगरे उठि गए । पाछें आसकरन राजा ने श्रीगोकुल आईवे की तैयारी करी । सो 'नरवर' सों कूच कियो । तब अपनो मनुष्य दोरायो, जो - खबरि ल्याउ । श्रीगुसाईजी श्रीगोकुल होइ तो श्रीगोकुल

चलों। श्रीगोवर्द्धन होइ तो श्रीगोवर्द्धन चलों। सो श्रीगुसाईजी श्रीगोकुल हते। सो मनुष्यने आसकरन को खरि करी, जो - श्रीगुसाईजी श्रीगोकुल में विराजत हैं। तव आसकरन तानसेन को लेके श्रीगोकुल आए। सो राजभोग-आरति श्रीनवनीतप्रियजी की श्रीगुसाईजी ने करी। सो आसकरन दरसन करि के मन में वोहोत प्रसन्न भए। सो वा समय गोविंदस्वामी यह पद गावत हते।

राग : सारंग

श्रीवल्लभनंदन रूप अनूप स्वरूप कह्यो नहीं जाई।

यह कीर्तन सुनि के आसकरन वोहोत प्रसन्न भए। तव तानसेन ने कान में कह्यो, जो - गोविंदस्वामी येही हैं। परंतु अब ही वोलियो मति। पाछें अनोसर भयो। तव आसकरन और तानसेन श्रीगुसाईजी की बैठक में आय बैठे। पाछें श्रीगुसाईजी श्रीनवनीतप्रियजी को अनोसर कराय के पाछें बैठक में पधारे। गादी तकिया पर विराजे तव आसकरन और तानसेन ने दंडवत् करी। पाछें तानसेन ने विनती श्रीगुसाईजी सो करी, जो - महाराजाधिराज ! आसकरन आये हैं। नाम पाइवे की विनती करत हैं। पाछें आसकरन ने साष्टांग दंडवत् करि के विनती करी, जो - महाराज ! जब तें जन्म्यो हूं तव तें सदा पापाचरन किये हों। क्वह भलो करम नाही कियो। राज पाछें नर्क सास्त्र में कहे हैं। सो मुनि के वोहोत भय पाय आप की सरन आए हों। मोकों दीन जानि के अपनी सरनि राखो। मैं राजमद में क्वहू कछू साधन नाही किये हैं। सो अब मेरी रक्षा करो। यह सुनि के श्रीगुसाईजी

कों करूना आई । तव श्रीगुसाईजी श्रीमुख सों आज्ञा किये,  
जो - आसकरन ! कछू चिंता मति करो । प्रभु बड़े हैं सब  
आछी करेंगे । धीरज राखि । जाई कै श्रीयमुनाजी में न्हाय  
आवो । तव आसकरन प्रसन्न होइ कै श्रीयमुनाजी में न्हाइवे  
गए । न्हाय कै अपरस में आए । तव श्रीगुसाईजी ने नाम  
सुनायो । तव आसकरन की निर्मल बुद्धि होइ गई । तव  
आसकरन ने श्रीगुसाईजी सों विनती करी, जो - महाराजा-  
धिराज ! ब्रह्मसंबंध कराइए । तव श्रीगुसाईजी ने कही, जो -  
तुम आजु व्रत करो । राजकाज बोहोत किये हो । सो काल्हि  
तुम कों ब्रह्मसंबंध करावेंगे । तव आसकरन दंडवत् करि कै  
व्रत कियो । पाछें दूसरे दिन राजभोग सरे पाछें श्रीगुसाईजी  
आसकरन कों श्रीनवनीतप्रियजी के आगें समर्पन कराये ।  
तुलसी श्रीनवनीतप्रियजी के चरनाविंद पर समर्पी । ता समय  
आसकरन कों लीला सहित दरसन भए । सो आसकरन ने  
यह पद राग सारंग में गायो —

राग सारंग

जे श्रीविठ्ठलनाथ कृपाल ।

कलिके महापतित अधरासी अपने करि कै किये निहाल ॥

पुरुषोत्तम निज कर ले दीने ऐसैं दानी महा दयाल ।

‘आसकरन’ कों अपनो करि कै पुष्टि प्रमेय बचन प्रतिपाल ॥

यह कीर्तन सुनि कै श्रीगुसाईजी बोहोत प्रसन्न भए ।  
पाछें राजभोग-आर्ति श्रीनवनीतप्रियजी की श्रीगुसाईजी करि  
कै पाछु अनोसर कराय कै श्रीगुसाईजी अपनी बैठक में  
पधारे । तव तानसेन ने श्रीगुसाईजी सों विनति करी, जो -



महाराजाधिराज ! आसकरन गोविंदस्वामी के कीर्तन सुनि के एक कीर्तन के प्रभाव तें सरन आए हैं। तव श्रीगुसाईंजी कहे, जो - गोविंदस्वामी ऐसे ही भगवदीय हैं। इन के कीर्तन एक हू जो - कोई धारन करे ताकौ निश्चय कल्याण होइ। यह सुनि के आसकरन ने चिनती करी, महाराज ! गोविंदस्वामी मोकों राजा जानि के मोसों बोलत नाहीं। सो आपु कृपा करि के इन कों आज्ञा देउ तो कछु गावनों में हू सीखुं। तव श्रीगुसाईंजी गोविंदस्वामी कों बुलाई कहे, जो - गोविंददास ! आसकरन कों हू कछु सिखावो। याकों राजमद नाहीं है। आसकरन वैष्णव हैं। और तुम्हारे कीर्तन के प्रभाव सों सरनि आए हैं। और तुम्हारे कीर्तन में रुचि वोहोत है। तातें तुम इन कों जो - ये पूछे सो बतार्इयो। तव गोविंदस्वामी ने कही, जो - महाराजाधिराज ! आप जव जीव कों सरनि लियो चाहत हो तव अनेक उपाय करि लेत हो। सो मेरो नाम क्यों लेत हो ?

भावप्रकाश—यह कहि यह जतायो, जो - मैं तो आप कों दास हूँ। तातें यह प्रभाव अब आपही कौ है।

और मेरे कीर्तन में यह आसकरन कहा समुझेगो ? परि भली, अब आप आज्ञा किये हो सो कछुक बतार्इयो। तव श्रीगुसाईंजी कहे, तुम्हारे कछुक हू बतार्इवे में याकौ काम होइ जाइगो। पाछें आसकरन और गोविंदस्वामी और तानसेन ये तीनों जनै 'रमनरेती' जाते। तहां गोविंदस्वामी ने आसकरन कों लीला कौ क्रम और प्रातःकाल तें सेन पर्यंत, और वरस दिन के उत्सव कौ प्रकार बतार्इयो। सो एक महिना लों गोविंदस्वामी ने बतार्इयो। पाछें गोविंदस्वामी ने आसकरन सों कही, जो -

अब तुम भगवद् सेवा करो । तब आसकरन ने गोविंदस्वामी को नमस्कार करि कहे, जो - यह सब जो - कछु मोकों प्राप्त भयो सो तुम्हारी कृपा तें । तातें अब तुम जो कछु आज्ञा करो सो मोकों कर्तव्य है । ऐसैं वोहोत प्रसंसा करि आसकरन और तानसेन श्रीगुसांईजी के पास चले । तब तानसेन ने आसकरन सों कही, जो - गोविंदस्वामी ने सगरे कीर्तन कौ प्रकार बताए सो मोकों खबरिन परी । तब आसकरन ने कही, जो - गोविंदस्वामी बड़े भगवदीय हैं । सो ये जाकों विचारि कै जितनो दान करें तिन को तितनो होइ । यामें हमारी तुम्हारी चले नहीं । पाछें आसकरन और तानसेन श्रीगुसांईजी की बैठक में आय दंडवत् श्रीगुसांईजी को किये । तब आसकरन ने श्रीगुसांईजी सों विनती करी, जो - महाराजाधिराज ! गोविंदस्वामी ने भगवद् सेवा करन की आज्ञा करी हैं । सो अब आप आज्ञा करो सो मैं करों । तब श्रीगुसांईजी ने कही, जो - गोविंदस्वामी ने कही सोई तुम को कर्तव्य है । अब तुम घर जाई कै भगवद् सेवा करो । तब आसकरन ने विनती करी, जो - महाराजाधिराज ! आप स्वरूप पधराय देऊ तो मैं सेवा करों । तब श्रीगुसांईजी एक ठाढ़ो स्वरूप हतो सो खेल के ठाकुरन में बिराजतो सो श्रीगुसांईजी ने आसकरन के माथे पधराए । और 'श्रीमोहनजी' नाम श्रीगुसांईजी धरि दिए । तब आसकरन ने विनती करी, जो - महाराज ! दोइ भितरिया जो - सेवा में आछी रीति भांति जानत होई सो मेरे संग करि देहु । तो मैं अपने देस में जाई घर में सेवा करों । तब श्रीगुसांईजी दोइ भितरिया संग आसकरन के करि दिये । तब

आसकरन श्रीगुसाईजी को दंडवत् करि कै विनती कीनी ।  
जो - महाराजाधिराज ! मैं कछु जानत नाही । मो पर कृपा  
सदा राखोगे । यह दीन वचन सुनि कै श्रीगुसाईजी को हृदय  
भरि आयो । तव श्रीगुसाईजी आसकरन सों कहे, तुम सुखेन  
घर जाँइ कै सेवा करो । तुम को राजकाज लौकिक बाधा न  
होइगी । तव आसकरन दंडवत् करि कै अत्यंत भाव-प्रीति  
सहित विदा होई तानसेन को संग ले कै अपने घर आए ।  
तव आसकरन ने तानसेन की बोहोत बड़ाई करी । जो -  
तुम्हारी कृपा तें मैं पुरुषोत्तम पाए । अब तुम आज्ञा करो सोई  
मैं करों । गाम धरती लेहु, मेरे पास रहो । तव तानसेन ने  
कही, जो - तुम्हारे ऊपर कृपा भई । और मेरे ऊपर इतनी  
नाहीं भई । सो मेरो अधिकार नाही, मेरो भाग्य नाही । तो  
मैं कहा करो ? अब तो मैं घर जाऊंगो । तव आसकरन ने एक  
आछो घोड़ा सुनहरी साज को अपने चढ़िबे को और हजार  
दोइ रुपैया तानसेन को बोहोत विनती करि कै दिये । सो  
तानसेन ले कै अपने घर आए । पाछें आसकरन आछो  
सुंदर मंदिर सिद्ध कराय, राज-सेवा परम प्रीति सोंक रन लागे ।  
सो तनुजा वित्तजा दोउ प्रकार सों भली भांति सों सेवा करन  
लागे । राजकाज दीवान के हवाले करि दियो । सो वे  
आसकरन ऐसैं भगवदीय भए ।

चार्ता प्रसंग—२

सो आसकरन भगवद् सेवा बोहोत प्रीति सों करते । सो  
श्रीठाकुरजी कछु दिन में सानुभावता जनावन लागे । तव  
आसकरन सेवा समय तो स्वरूपानंद को अनुभव करते । तव

आनंद पावते । पाछें अनोसर में विप्रयोग क्लेश कौ अनुभव करते । और मानसी सेवा हू नित्य करते । ऐसैं करत करत कछू दिन वीते । तब दक्षिन कौ राजा आसकरन के ऊपर चढ़ि आयो, राज के लिये । सो आसकरन ने सुनी तब कही, भली भई, मैं आपुही तें राज छोरत हतो । सो यह राजा आयो है ताकों राज दे कै मैं श्रीगोकुल जाय वैठोंगो । यह मन में विचारि कै दीवान सो आसकरन ने कही, जो - तुम कछू लखि की तैयारी मति करियो । या राजा कों राज देनो । अपने भाज चलेंगे । तब दीवान ने कही, यह बात आछी नाही है । पाछें तुम बड़े हो, राजा हो, कहोगे सो करुंगो । पाछें रात्रि कों आसकरन कों नींद आई । तब श्रीठाकुरजी ने कही, जो - आसकरन ! तू भाजिवे की विचारी है सो मोकों आछी नाही लागी । मैं कैसें भाजूंगो ? तातें तू लखि जा ।

भावप्रकाश—यामें यह जतायो, जो - भक्त की लाज जाई सो मोकों सुहाय नाही । तातें, सूरदासजी गाए हैं —

‘भक्तन के जीते हों जीतों भक्तन हारे हारों ।’

तब आसकरन ने कही, जो - महाराज ! तुम्हारी सेवा बिना कैसें रहूंगो ? यह सुनि कै श्रीठाकुरजीनें कही, जो - तू मानसी सेवा करेगो सो मैं मानि लेहोंगो । और भीतरिया मेरी सेवा करेंगे । तू लखि कों जइयो । यह सुनि कै आसकरन उठे । सो अर्द्धरात्रि समय दीवान कों बुलाय कै कह्यो, जो - लखि की तैयारी करो । काल्हि दुपहर पाछें मैं हू चलूंगो । यह सुनि कै दीवान बोहोत प्रसन्न भयो । सो सगरी फौज की तैयारी प्रातःकाल करी । पाछें प्रातःकाल उठि कै देहकृत्य करि

न्हाय कै सेवा करन कों गए । सो राजभोग आरति ताई सगरी सेवा करि पाछें आसकरन विदा होइ श्रीठाकुरजी सों, भीतरिया दोऊन कों समुझाय कह्यो, जो-सेवा में सावधान रहियो । मोकों लरिवे जानो हे । सो यह प्रतिबंध मोकों सेवा में आयो है । सो मेरे अभाग्य हैं । परंतु गए विना न चले । तातें हम जात हैं । तुम्हारे परम भाग्य हैं, जो-प्रभुन की सेवा में रहोगे । तव भीतरियान ने कही, जो - तुम जाऊ, हम सों जितनी वनेगी तितनी सेवा मन लगाय कै करेंगे । तुम काहू वात की चिंता मति करियो । तव आसकरन मंदिर कों दंडवत् करि वाहिर अपनी कचहरी में आए । तव दीवान ने विनंती करी, जो - सगरी फौज तैयार है । तुम्हारी ढील है । और दक्षिन के राजा की फौज अपने अमल में आय चुकी है । यह सुनि कै आसकरन ने अपने घोड़ा पै असवार होइ के उह राजा के सन्मुख चले । सो कोस दोइ कौ बीच रह्यो । तव उह राजा ने कही, काल्हि लराई लेऊंगो । सो आसकरन ने हू डेरा उहां किये । पाछें रात्रि रहे । ता पाछें प्रातःकाल आसकरन ने दीवान सों कही, जो - मैं दुपहर पाछें लरूंगो, जो - बीच में उह राजा लरे तो तुम लरियो । तव दीवान ने कही, जो - आछो । पाछें राजा तो न्हाय कै मानसी सेवा करन बैठ्यो । ताही समै में उह राजा की फौज चढ़ी । सो लराइ होन लागी । तव दीवान ने आसकरन सों कह्यो, जो - अब लराइ होत है । तुम्हारे चढ़े विना सगरी तुम्हारी फौज भाजेगी । पाछें दुपहर के तुम चढिवे के कहा करोगे ? यह सुनि कै आसकरन उठि कै वागो पहिरयो । पाग बांधी, पाछें घोड़ा पर

चढ्यो । परंतु मन मानसी सेवा में लग्यो है । मंगला तें ले सगरो सिंगार, ग्वाल ताई भावना करि राजभोग धरन लागे । सो सगरो राजभोग धरि चुके । पाछें कढ़ी कौ डवरा हाथ में ले धरन लागे । ताही समय एक खाड में घोड़ा कूद गयो । सो आसकरन के हाथ सों कढ़ी को डवरा छूट्यो । सो सगरो वागा, घोड़ा ऊपर कढ़ी कढ़ी होइ गई । तब दीवान ने कही, यह कहा ? तब आसकरन ने कही, कछू नाहीं । मेरे पास कढ़ी हती । घर तें ल्यायो हतो, सो गिरी ।

भावप्रकाश—यामें यह जतायो, जो - भगवद्धर्म गोप्य राखनो । काहू के आगें प्रगट न करनो ।

पाछें संभार कै मन कों, फेर आसकरन ने दूसरो डवरा सिद्ध करि राजभोग धर्यो । समय भये भोग सराय आरति करि अनोसर करि पाछें नेत्र खोलि कै दीवान की ओर देखि कै सगरी फौज लै कै उह राजा के ऊपर चढ्यो । सो उह राजा कों महाकाल स्वरूप सेना आसकरन की दीसी । सो डरप्यो । कह्यो यहां मैं न जीतोंगो । पाछें बादर होइ आये । सो उह दक्षिन के राजा की फौज में बड़े बड़े पत्थर की सिला जैसें ओरें बरसे । और आसकरन की फौज में नेन्ही नेन्ही बुंद आई । सो उह राजा की फौज कछू मारी गई, कछू ओरान तें मरी । सो उह राजा भाजि कै अपने देस कों गयो । अपने मन में कह्यो, जो- आसकरन के ऊपर आज पाछें कबहू उह गाम पर न जानो । पाछें आसकरन रात्रि कों घर आए । सो एक दिन श्रीठाकुरजी की-सेवा अपनी देह सों आसकरन ने नाहीं करी । ताकौ महा दुःख भयो । पाछें फेरि सेवा भली भांति सों करन लागे ।

वार्ता प्रसंग—३

और एक दिन आसकरन के घर में चोर पेंठे । सो चोरन ने विचारी, जो - आसकरन के ठाकुर है तहां सोने रूपे के वासन आभूषन वोहोत हैं तहां पेंठिये । सो एक दिन एक चोर दरसन में आयो । सो रसोइ घर में पेंठि रह्यो । सो सीतकाल कौ दिन हतो । सो राजा घरी चारि रात्रि पाछिल्ली रही तव न्हाई कै मंदिर में गए । सो उहां जाय के मंगला करी । तव चोर ने विचारी, जो - इह राजा कों मारिए तो गहनो वासन हाथ आवे । तव चोर ने तीर मारी । सो आसकरन की पीठ में लगि के पेट की राह पार निकरि गई । परंतु आसकरन कों कछू देह की सुधि नाही । ऐसो मन सेवा में तत्पर भयो । सो व्यसन अवस्था सिद्ध भई । तातें देह-धर्म बाधा नहीं किये । देहानुसंधान छूट्यो । ताही समय दोऊ भीतरिया आए । सो चोर ने विचारी, जो - राजा कों तीर लागी । परंतु गिर्यो नाही । और अब मैं पकरौं जाउंगो, तो मेरे प्राण जायंगे । सो रात्रि के निकरि गयो । पाछें भीतरिया ने आसकरन के पीठ में और पेट में लोहू देख्यो । तव राजा सों तीन बेर पूछी । परंतु राजा सेवा के आवेस में कछू सुन्यो नाही । तव भीतरिया ने दोऊ ओर राखि भरि कै बड़े कपड़ा सों फेंट कसि दीनी । और जहां जहां लोहू के टपका परे हते तहां खुरच कै खासा किये । पाछें राजभोग आर्ति राजा करि अनोसर कराय के वाहिर आयो । तव राजा कों देह की सुधि आई । तव राजा ने भीतरिया सों कही, जो - यह मेरो फेंट क्यों बांधे ? तव भीतरिया ने कही, तुम खोलि कै देखो । तुम कों चोट लागी है । सो

तीर कौ सो घाव भयो है । सो जानी नहीं जाय । तव राजा पटुका उतारि कै देखें तो तीर कौ घाव जान्यो । तव राजाने कही, यह चोर कोई आयो तिन ने मारयो । सो अब यह गाम छोरि कै श्रीगोकुल जाँइ तो आछे । परंतु श्रीठाकुरजी की आज्ञा होई तो जायो जाँय । तो श्रीगोकुल जाँय सगरे द्रव्य कौ त्याग करि एक झाँपी में प्रभु कों पधराय कै विरक्त होइ कै रहूं । मानसी सेवा करूं । जामें कोई चोर न आवे, काहू सों बोलनो न परें । यह राजकाज में वोहोत प्रतिबंध है । यह विचारि करि कै रात्रि कों राजा सोयो । तव श्रीठाकुरजी रात्रि कों जताए, जो - राजा ! अब तू मोकों पधराय कै श्रीगोकुल ले चलि । अब तेरी तनुजा वित्तजा सेवा सब होइ चुकी है । व्यसन पर्यंत सिद्ध भयो है । सो अब तू एकांत में रहि कै मानसी सेवा करियो । यह सुनि कै आसकरन वोहोत प्रसन्न होइ कै प्रभु कों दंडवत् करी । पाछें प्रातःकाल उठि कै भगवद-सेवा करी । राजभोग आर्ति करी । पाछें संपुट में श्रीठाकुरजी कों पधराय गुंजा चंद्रिका कौ सिंगार वेनु-वेत्र, झारी, इतनो लिये, और सब दीवान सों कहे, जो - संगरो द्रव्य है मंदिर कौ सो श्रीगुसाईजी के इहां पठाईयो । पाछें दोऊ भीतरियान कों बुलाय कै आसकरन ने कही, अब तुम श्रीगोकुल जाऊ तुमने वोहोत सेवा करी । पाछें एक एक हजार रुपैया दोऊ जनेन कों आसकरन ने दे कै बिदा किये । पाछें आसकरन के एक भतीजा बरस बीस कौ हतो ताकों आसकरन ने राज दीनो । दीवान भलो मनुष्य हतो । सो दीवान कों राज कौ कामकाज सोंपि कै अकेले आसकरन एक तुंबा, एक ठाकुरजी की झाँपी,



धोवती-उपरेना एक, पहरि कै घर तें निकरे । पाछें मनमें आसकरन ने विचार कियो, जो - श्रीगुसाईजी या भांति देखि कै कहूं मेरे उपर खीझे तो मैं कहा करूंगो ? यह सोच मन में भयो । तव श्रीठाकुरजी श्रीगुसाईजी सों कहें, जो - आसकरन सगरो त्याग करि कै श्रीगोकुल आवत हैं । ताके ऊपर कछू खीझियो मति । तव श्रीगुसाईजी कहे, जो - तुम्हारी आज्ञा है सोई हम कों कर्तव्य है । पाछें दिन दोई चारि में आसकरन आय कै दंडवत् किये । तव श्रीगुसाईजी देखि कै आसकरन सों कहे, आसकरन भली कीनी । मेरे मन में यही हुती, जो - आसकरन आवे तो आछौ है । सो अव तुम ऐसी भांति आए, जो - अव देस में जानो नहीं परेगो । और श्रीठाकुरजी कों पधरावो । तव आसकरन मन में प्रसन्न होइ कै कह्यो, जैसी आपकी आज्ञा होइ । ता प्रकार हमें करनो । पाछें खेल के ठाकुर हते तहां आसकरन के ठाकुर कों श्रीगुसाईजी ने पधराए । पाछें आसकरन के ठाकुर के मंदिर कौ द्रव्य हतो । सो दीवान ने हुंडी करि कै लाख रुपैया की हुंडी, तामें पचास हजार मंदिर कौ, पचास हजार राजा के खजाना कौ हतो सो पठायो । तव श्रीगुसाईजी मंदिर कौ द्रव्य हतो सो तो पचास हजार श्रीनाथजी के इहां सोने के थार, कटोरा, डवरा करि पठाए ।

भावप्रकाश—यामें यह जताए, जो - प्रभुन कौ द्रव्य अपने कार्य में नहीं लावनो । लावें तो बहिर्मुखता प्राप्त होई ।

और पचास हजार आसकरन की सत्ता कौ हतो, सो आपु अंगीकार किये । पाछें आसकरन एक दरसन श्रीनवनीतप्रियजी कौ और अपने ठाकुर कौ करि जाते । पाछें रमनरंती के पास

तीर कौ सो घाव भयो है । सो जानी नहीं जाय । तव राजा पटुका उतारि कै देखें तो तीर कौ घाव जान्यो । तव राजाने कही, यह चोर कोई आयो तिन ने मारयो । सो अब यह गाम छोरि कै श्रीगोकुल जाँइ तो आछे । परंतु श्रीठाकुरजी की आज्ञा होंई तो जायो जाँय । तो श्रीगोकुल जाँय सगरे द्रव्य कौ त्याग करि एक झाँपी में प्रभु कों पधराय कै विरक्त होइ कै रहूं । मानसी सेवा करूं । जामें कोई चोर न आवे, काहू सों बोलनो न परें । यह राजकाज में बोहोत प्रतिबंध है । यह विचारि करि कै रात्रि कों राजा सोयो । तव श्रीठाकुरजी रात्रि कों जताए, जो - राजा ! अब तू मोकों पधराय कै श्रीगोकुल ले चलि । अब तेरी तनुजा वित्तजा सेवा सब होइ चुकी है । व्यसन पर्यंत सिद्ध भयो है । सो अब तू एकांत में रहि कै मानसी सेवा करियो । यह सुनि कै आसकरन बोहोत प्रसन्न होइ कै प्रभु कों दंडवत् करी । पाछें प्रातःकाल उठि कै भगवद-सेवा करी । राजभोग आर्ति करी । पाछें संपुट में श्रीठाकुरजी कों पधराय गुंजा चंद्रिका कौ सिंगार वेनु-वेत्र, झारी, इतनो लिये, और सब दीवान सों कहे, जो - संगरो द्रव्य है मंदिर कौ सो श्रीगुसाईजी के इहां पठाईयो । पाछें दोऊ भीतरियान कों बुलाय कै आसकरन ने कही, अब तुम श्रीगोकुल जाऊ तुमने बोहोत सेवा करी । पाछें एक एक हजार रुपैया दोऊ जनेन कों आसकरन ने दे कै बिदा किये । पाछें आसकरन के एक भतीजा बरस बीस कौ हतो ताकों आसकरन ने राज दीनो । दीवान भलो मनुष्य हतो । सो दीवान कों राज कौ कामकाज सोंपि कै अकेले आसकरन एक तुंबा, एक ठाकुरजी की झाँपी,

धोवती-उपरेना एक, पहरि कै घर तें निकरे । पाछें मनमें आसकरन ने विचार कियो, जो - श्रीगुसाईजी या भांति देखि कै कहूं मेरे उपर खीझे तो मैं कहा करूंगो ? यह सोच मन में भयो । तव श्रीठाकुरजी श्रीगुसाईजी सों कहें, जो - आसकरन सगरो त्याग करि कै श्रीगोकुल आवत हैं । ताके ऊपर कछू खीझियो मति । तव श्रीगुसाईजी कहे, जो - तुम्हारी आज्ञा है सोई हम कों कर्तव्य है । पाछें दिन दोई चारि में आसकरन आय कै दंडवत् किये । तव श्रीगुसाईजी देखि कै आसकरन सों कहें, आसकरन भली कीनी । मेरे मन में यही हुती, जो - आसकरन आवे तो आछौ है । सो अब तुम ऐसी भांति आए, जो - अब देस में जानो नहीं परेगो । और श्रीठाकुरजी कों पधरावो । तव आसकरन मन में प्रसन्न होइ कै कह्यो, जैसी आपकी आज्ञा होइ । ता प्रकार हमें करनो । पाछें खेल के ठाकुर हते तहां आसकरन के ठाकुर कों श्रीगुसाईजी ने पधराए । पाछें आसकरन के ठाकुर के मंदिर कौ द्रव्य हतो । सो दीवान ने हुंडी करि कै लाख रुपैया की हुंडी, तामें पचास हजार मंदिर कौ, पचास हजार राजा के खजाना कौ हतो सो पठायो । तव श्रीगुसाईजी मंदिर कौ द्रव्य हतो सो तो पचास हजार श्रीनाथजी के इहां सोने के थार, कंटोरा, डवरा करि पठाए ।

भावप्रकाश—यामें यह जताए, जो - प्रभुन कौ द्रव्य अपने कार्य में नहीं लावनो । लावें तो बहिर्मुखता प्राप्त होई ।

और पचास हजार आसकरन को सत्ता कौ हतो, सो आपु अंगीकार किये । पाछें आसकरन एक दरसन श्रीनवनीतप्रियजी कौ और अपने ठाकुर कौ करि जाते । पाछें रमनरेती के पास

टीला पर रात्रि-दिन बैठि रहते । विप्रयोग कौ अनुभव करते । मानसी सेवा करते । सो आसकरन ऐसैं भगवदीय हे । सो जो कोई कीर्तन गावते तामें अपने प्रभु की छाप धरते । 'आसकरन प्रभु मोहन नागर' । मोहनजी घर के सेव्य हैं । या प्रकार आसकरन श्रीगोकुल में रहते । 'जसोदा घाट' एक वार नित्य न्हाय जाते ।

वार्ता प्रसंग—४

और एक वार होरी के दिन हते । सो आसकरन 'गोप-कुँआँ' तें 'जसोदा घाट' न्हाइवे कों आवत हते । इतने में रमनरेती में मुरली श्रीठाकुरजी ने बजाई । सो मुरली कौ सब्द आसकरन ने सुन्यो । सो सुनतही न्हाइवोतो भूलि गये । पाछें फेरि 'रमनरेती' गए । तहां जाँय के देखे तो अलौकिक गोकुल नंदालय की लीला कौ दरसन भयो । सो ब्रजभक्त श्रीठाकुरजी के संग होरी खेलन कों आई हैं । सो श्रीबलदेवजी सखा गोप सहित एक ओर हैं । और एक ओर ब्रजभक्त मिलि कै होरी खेलन लागे । तहां तें एक गेल 'रावल' की श्रीस्वामिनीजी के घर की है । ता दिसा श्रीस्वामिनीजी ठाढ़ी हैं । एक गेल बलदेवजी की है । सो अपने संग के सस्रधारी बड़े गोप लिये ठाढ़े हैं । एक गेल महावन की है । ता दिसा नंदरायजी जसोदाजी ठाढ़े हैं । एक गेल घोख जहां गाँई कौ खरिक् है तहां की है । ता दिसा श्रीठाकुरजी अपनी बराबर के सखा लिये ठाढ़े हैं । परस्पर होरी खेलत हैं । सो या प्रकार आसकरन कों लीला सहित दरसन भयो । सो आसकरन कों ऐसो आनंद भयो, जो-देहदसा रही-नाहीं । उन्मत्त भए दरसन करन लागे । सो

हृदय सों आनंद उमग्यो । तव यह धमार आसकरन ने गाई—

राग : धनाधी

या गोकुल के चौहटे रंगराची ग्वालि ।

मोहन खेलें फाग, नैन सलोनरी रंगराची ग्वालि० ॥

नरनारीन आनंद भयो । रंग० । सांवल के अनुराग नैन० ॥१॥

दुंदुभी बाजे गहगहे । रंग० । नगर कोलाहल होंई । नैन०

उमडयो मानस घोखकौ । रंग० । भवन रह्यो नहीं कोई ॥ नैन० ॥२॥

डफ वांसुरी सुहावनी । रंग० । ताल मृदंग उपंग । नैन०

झांझ झालरी किन्नरी । रंग० । आवज कर मुख चंग ॥ नैन० ॥३॥

उतहि समाज गोपाल कौ । रंग० । बलजुत नंदकुमार । नैन०

इत गोपी नवजोवना । रंग० । अंबुज लोचन चारु ॥ नैन० ॥४॥

गारी देति सुहावनी । रंग० । प्रसुदित गोप कदंब । नैन०

जुवती जूथ एकत्र भए । रंग० । गावति मदन विडंब ॥ नैन० ॥५॥

रतन खचित पिचकाईयां । रंग० । कर लिये गोकुलनाथ । नैन०

तकि छिरके ता वृंद कों । रंग० । जे राधा के साथ ॥ नैन० ॥६॥

केसु कुसुम निचोय कै । रंग० । भरत परस्पर आनि । नैन०

मृगमद चोवा कुमकुमा । रंग० । चारु चतुर सम सानि ॥ नैन ॥७॥

सुरंग गुलाल उडावही । रंग० । वूका बंदन धूरि । नैन०

चढि विमान सुर देखही । रंग० । देहदसा गई भूलि ॥ नैन० ॥८॥

खेल मच्यो अति गहगहयो । रंग० । चितवत ब्रजवधू धाय । नैन०

राधा रसिक सिरोमनि । रंग० । 'आसकरन' बलि जाय ॥ नैन० ॥९॥

या प्रकार धमार आसकरन ने गाई । पाछें खेल होइ चुक्यो । श्रीठाकुरजी ब्रजभक्तन सहित श्रीनंदरायजी के घर पधारे । तव आसकरन उहां देखे तो रमनरेती हे । और कछू नाही । तव आसकरन व्याकुल होई के महावन दोरे गए । जो-मैं फेरि लीला देखूं । सो उहां गाम के लोग सब आ मिले । तव सब लौकिक रीति देखि के विचारयो, जो - यह लीला मेरे मनोरथ सों कैसें देखोंगो ? जब प्रभु अनुग्रह करेंगे तव दरसन होइगो ।

पाछें आसकरन 'जसोदा घाट' तीसरे प्रहर न्हायवे कों आए । न्हाय के श्रीगुसाईजी के दरसन करिवे कों आसकरन आए । सो उत्थापन कौ समय भयो हतो । श्रीगुसाईजी गादी तकिया पै विराजे हते । न्हाइवे की तैयारी हती । ताही समय आसकरन आय के दंडवत् क्रिये । तव श्रीगुसाईजी आसकरन कों देखि के पूछे, जा - आसकरन ! आज तुम प्रातःकाल दरसन कों नहीं आये, सो या समय आये, सो क्यों ? तव आसकरन ने श्रीगुसाईजी सों विनती करी, जो - महाराजाधिराज ! मैं प्रातःकाल गोपकुआँ की ओर गयो हतो । पाछें तहां तें जसोदा घाट न्हाइवे कों चलयो । सो मारग में श्रीठाकुरजी की मुरली कौ सव्द सुन्यो । सो मैं रमन रेती में गयो, तहां अलौकिक लीला देखी । आप की कृपा तें होरी के खेल कौ मैं दर्सन पायो । तहां यह धमार गायो । सो जब खेल होइ चुक्यो तव मैं कछु देख्यो नहीं । पाछें महावन गयो । सगरे दूँढ्यो । सो फेरि दरसन न भये । यह सुनि के श्रीगुसाईजी कहे, जो - प्रभु तुम्हारे ऊपर प्रसन्न होइ कृपा करि के दरसन दिए हैं । सो इहां नित्य विहार करत हैं । अपने चाहे तें मिले नहीं । जब आप के मन में होइ तवही दरसन देहि । सो तुम कों फेरि हू दरसन होइंगे । तुम्हारो हृदय सुद्ध है । यह सुनि के आसकरन ने दंडवत् करि विनती करी, जो - महाराज ! यह सब आप के चरनकमल कौ प्रताप है ।

वार्ता प्रसंग—५

और एक समय आसकरन श्रीगुसाईजी के दरसन करन संध्या-आर्ति समै आए । सो ता दिन श्रीगुसाईजी आसकरन

कों आज्ञा कीनी, जो - आसकरन ! सेन समे पौढायवे के कीर्तन तुम करियो । चले मति जैयो । सो संध्याति कौ दरसन आसकरन करि कै जगमोहन में बैठे रहे । सो पाछें सेनभोग आयो । तव आसकरन कों ब्रजभक्तन की सहचरिन कौ दरसन भयो । सो सहचरी सब श्रीठाकुरजी सां प्रार्थना करति हैं, जो-हमारी स्वामिनी सगरी सामग्री सिद्ध निकुंज में करि राखे हैं, सो तुम पधारि कै मनोरथ पूरन करो । यह सगरो अनुभव आसकरन कों भयो । तव सेन समय केदार राग में आसकरन ने यह कीर्तन गायो—

राग : केदारो

तुम पौढो हों सेज वनाऊं ।

चाँपों चरन रहों पाटीतर मधुरे सुर केदारो गाऊं ।

सहचरी चतुर सवे जुरि आई दंपति सुख नैनन दरसाऊं ।

‘आसकरन’ प्रभु मोहन नागर यह सुख स्याम सदा हों पाऊं ।

यह कीर्तन आसकरन ने गायो । सो सुनि कै श्रीगुसाईंजी वोहोत ही प्रसन्न भए । पाछें श्रीगुसाईंजी श्रीनवनीतप्रियजी कों पौढाय अनोसर कराय कै अपनी बैठक में पधारे । तव आसकरन ने दंडवत् कीनी । तव श्रीगुसाईंजी आसकरन तें कह्यो, जो - भल्लो कीर्तन गायो । तव आसकरन ने श्रीगुसाईंजी सां विनती कीनी, जो - महाराजाधिराज ! आपु कृपा करि कै मोकों सेन समय कौ अनुभव करायो । तव मैं कीर्तन गायो । तव श्रीगुसाईंजी श्रीमुख सां आज्ञा किये, जो - पौढवे के समय दोय कीर्तन तुम नित्य करियो । ता दिन तें आसकरन सेन समय के कीर्तन करते । एक मान कौ, एक पौढवे कौ ।

सो या भांति आसकरन के ऊपर श्रीगुसांईजी अनुग्रह करते ।  
श्रीठाकुरजी अनुभव करावते ।

वार्ता प्रसंग—६

और एक समय आसकरन श्रीगुसांईजी के संग श्रीजीद्वार  
गए । तहां चतुर्भुजदास मान कौ कीर्तन भोग समय गावत हते ।

राग : नट

राधे तू मान मदनगढ कियो ।

वाकौ कोट ओट घूँघट कौ नाहिन जात लियो ।

पठई वसीठ इते इतनी तें कोऊ न उत्तर दियो ।

‘चतुर्भुजदास’ लाल गिरिधर कौ अधर-सुधारस पियो ।

यह सुनत ही आसकरन कों मूर्छा आई । सो चारि घरी  
पाछें चैतन्यता भई । पाछें सेन आर्ति समय आसकरन की मूर्छा  
बीती । सो सेन आर्ति के दरसन आसकरन ने श्रीनाथजी के  
किये । मनमें बोहोत ही आनंद पायो । पाछें अनोसर कराय  
कै श्रीगुसांईजी अपनी बैठक में पधारे । तब सगरे भगवदीय  
बैठकमें आए । आसकरन हू तहां बैठे । पाछें श्रीगुसांईजी श्री-  
सुबोधीनीजी कहे । सो कथा सुनि कै सगरे वैष्णव, आसकरन  
बोहोत ही प्रसन्न भए । पाछें आसकरन ने श्रीगुसांईजी सों  
बिनती करी, जो - महाराजा धिराज ! चतुर्भुजदास भोग के समय  
मान कौ कीर्तन गावत हते । सो इनकों उह लीला कौ अनुभव  
होत है ? तब यह सुनि कै श्रीगुसांईजी कहे, आसकरन ! तुम  
जानत नाहीं । चतुर्भुजदास कों तो कुंभनदासजी सारिखे भग-  
वदीय श्रीआचार्यजी के अंतरंग सेवक, तिनके संग तें चतु-  
र्भुजदास कों रहस्य लीला कौ अनुभव होंइ सो उचित ही है ।



यह सुनि कै आसकरन ने कही, जो - कुंभनदास सों मिलनो ।  
 पाछें दूसरे दिन प्रातःकाल कुंभनदास मंगला के दरसन कों आए ।  
 तव आसकरन ने जैश्रीकृष्ण किये । सो श्रीकृष्ण - स्मरन  
 सुनत ही कुंभनदास के रोम रोम में आनंद भयो । नेत्रन में  
 तें अश्रुन की धारा चली । सो आसकरन देखि कै चकित  
 होइ रहे । कहे, भगवन्नाम सुनत जिन कों इतनो प्रेम प्रगट भयो  
 तिन कों अनुभव में कहा कहनो ? पाछें आसकरन चतुर्भुजदास  
 मिलि कै कुंभनदास कौ संग दिन पांच करे । सो कुंभनदास  
 के संग तें आसकरन कौ भगवद्भाव वोहोत बढ़यो । सो आस-  
 करन हू वोहोत पद रहस्य लीला के किये । पाछें श्रीगुसांईजी  
 श्रीगोकुल पधारे तव आसकरन श्रीगोकुल आए ।

सो आसकरन श्रीगुसांईजी के ऐसैं कृपापात्र भगवदीय  
 हे । तातें इनकी वार्ता कहां तांई कहिए । वार्ता ॥ १२३ ॥



अब श्रीगुसांईजी की सेवक एक मोची द्वारिका के मार्ग में एक गाम में  
 रहती, ताकी वार्ता कौ भाव कहत हैं—

भावप्रकाश—ये सात्विक भक्त हैं । लीला में इनका नाम 'ब्रह्मानंदिनी'  
 हैं । ये 'शशीकला' तें प्रगटी हैं, तातें इनके भावरूप हैं ।

वार्ता प्रसंग—१

एक समै श्रीगुसांईजी श्रीगोकुल तें श्रीरनछोरजी के  
 दरसन कों श्रीद्वारिकाजी पधारे । तव मार्ग में यह मोची रहत  
 हतो । ता गाम के बाहिर श्रीगुसांईजी आप के डेरा भए हते ।  
 सो श्रीगुसांईजी रसोई करि श्रीठाकुरजी कों भोग समर्पि सम-  
 यानुसार भोग सराइ आप भोजन करि आचमन करि वीरी  
 आरोगि कै गादी तकीया ऊपर विराजे हते । सब सेवक टहलुवा

महाप्रसाद ले चुके हते । ता समै यह मोची उहां आइ निकस्यो । तहां याकों श्रीगुसांईजी कौ दरसन भयो । सो साक्षात् पूरन पुरुषोत्तम कौ दरसन भयो । तव यह अति आनंद पाइ श्रीगुसांईजी कों साष्टांग दंडवत् करि दोऊ हाथ जोरि विनती करि कै कह्यो, जो - महाराज ! आपु कृपा करि कै मोकों अपनो सेवक करिये । तव श्रीगुसांईजी आप कृपा करि वा मोची कों नाम सुनाइ कै सेवक किये । श्रीगुसांईजी वा मोची कों आज्ञा किये, जो - तू कहूं तें भगवत्स्वरूप ले आऊ । ताकी तू सेवा करि ! तव वह मोची श्रीगुसांईजी सों कह्यो, जो - महाराज ! मेरे एक श्रीसालिग्रामजी कौ स्वरूप है । तव वह सालिग्रामजी के स्वरूप कों मँगाय, ताकों श्रीगुसांईजी पंचामृत सों स्नान कराइ, षाट बैठारि कै उनकी सेवा करिवे की आज्ञा किये । पाछें आप श्रीरनछोरजी के दरसन कों श्रीद्वारिकाजी पधारे । सो वा मोची की आसक्ति तो श्रीगुसांईजी में भई है । सो वह मोची सालीग्रामजी में श्रीगुसांईजी की भावना करि भगवत्सेवा करिवे लग्यो । सो तिलक छापा करे । सुंदर उज्वल वस्त्र पहिरे, धोती उपरेना । और कछू पहिरे नाहीं । ब्राह्मन की नाई रहन लाग्यो । तव वाकों गाम के ब्राह्मन सब मिलि कै दुःख देन लागे । कहे, जो - तू सूद्र होंई कै ब्राह्मन की चालि क्यों चलत है ? तव यानें कह्यो, जो - मैं हूं ब्राह्मन हों । तव ब्राह्मनन कही, जो - कहूं छाल कौ दूध होत है ? तव यानें कही, जो - प्रभुन की कृपा होंई तो छाल कौ हू दूध होंई । प्रभु सर्व करन समर्थ हैं । तव ब्राह्मनन कही, जो - हम देखें तो माने । तव यानें छाल मँगाई । पाछें प्रभुन सों विनती कीनी, जो - महाराज ! श्रीगुसांईजी के संबंध करि,

जो - हों ब्राह्मन भयो हों तो या छछ कौ दूध करि दीजो ।  
ता पाछें घरी एक पाछें देखें तो छछ कौ दूध भयो है । तव तो  
सब ब्राह्मन आश्चर्य करन लागे । पाछें वा दूध की खीरि करि  
सब ब्राह्मन कों खवाय विदा किये । तव सब वा मोची कों  
दंडवत् करि अपने अपने घर गए । ता दिन पाछें वा मोची  
कों कोऊ दुःख न देतो । सब कोऊ उन कौ वोहोत आदर करते ।

भावप्रकाश—या वार्ता कौ अभिप्राय यह है, जो - वैष्णव कौ स्वरूप महा  
अलौकिक है । काहे तें, जो - वैष्णवन के हृदय में परब्रह्म श्रीकृष्ण साक्षात् सदा-  
सर्वदा विराजत हैं । तातें उन में अलौकिक ब्राह्मनत्व सिद्ध है ।

सो यह मोची श्रीगुसांईजी कौ ऐसो कृपापात्र भगवदीय  
हतो । तातें उन की वार्ता कहां तांई कहिए । ॥१२४॥



अब श्रीगुसांईजी कौ सेवक एक सेठ, आगरे में रहतो, तिनकी वार्ता कौ  
भाव कहत हैं—

भावप्रकाश—ये राजस भक्त हैं । लीला में इनकौ नाम 'उल्लासिनी' है ।  
ये 'शशीकला' तें प्रगटी हैं, तातें उनके भावरूप हैं ।

ये आगरे में एक द्रव्यपात्र बनिया के जन्मे । सो वा बनिया कौ व्योहार  
में रूपचंदनदा सों वोहोत मिलाप रहतो । सो रूपचंदनदा की आचार क्रिया देखि  
वह बनिया रूपचंदनदा सों बार-बार कहे, जो - मोकों तुम्हारे मार्ग आछौं लागत  
है । तातें मोकों वैष्णव करो । परि रूपचंदनदा या बात कौ कछु उत्तर दे नहीं ।  
काहेतें, जो - रूपचंदनदा जाने, जो दैवी होइगो तो आपु ही तें सरनि होइगो ।  
पाछें कछुक दिन में श्रीगुसांईजी रूपचंदनदा के घर पधारे । तब वह बनिया  
श्रीगुसांईजी के दरसन पायो । तब वा बनिया ने रूपचंदनदा सों कस्यो, जो -  
अब मोकों श्रीगुसांईजी कौ सेवक कराइए । तब रूपचंदनदा ने श्रीगुसांईजी सों  
बिनती कीनी, जो - महाराज ! यह बनिया सेवक होन की कहत है । तब श्री-  
गुसांईजी वाकों कृपा करि नाम निवेदन कराए । पाछें वह बनिया घर आइ अपनी  
स्त्री-बेटा दोऊन कों रूपचंदनदा के घर ल्यायो । पाछें उन कों श्रीगुसांईजी के  
सेवक कराए । नाम-निवेदन कराए । तब वे दोऊ वैष्णव भए । पाछें ये तीनों

रूपचंदनंदा के घर नित्य जाँइ भगवद्वार्ता सुने । ता पाछे कछुक दिन में वह वनिया और वाकी स्त्री दोऊ मरे । तब वाकौ वेटा घर में अकेलो रह्यो । सो वाकौ व्याह तो भयो नाहीं हतो । सो वानें अपने मन में विचार कियो, जो-अब संसार में परनो उचित नाहीं । प्रभुन ये सुंदर देह दीनी है । सो तो उन की सेवा के ताँई दीनी है । तातें भगवत्सेवा करनी । सो वहोरि श्रीगुसाँईजी आगरा पधारे तब या सेठ ने श्रीगुसाँईजी सों विनती कीनी, जो-महाराज ! कृपा करि मीकों भगवत्सेवा पधराइ दीजिए । तो हों सेवा करों । मेरो यह मनोरथ है ।

वार्ता प्रसंग—१

सो उह सेठ के माथें श्रीमदनमोहनजी की सेवा श्रीगुसाँईजी ने पधराई । सो उह सेठ के द्रव्य वोहोत हुतो । सो उह सेठ राजसेवा करतो । सो उह सेठ कौ चाकर हतो । सो साग फलफलाहरी आछी नाहीं ल्यावतो । सो सस्ती लेतो । जामें पैसा थोरे लगें, बस्तु वोहोत आवे । सो उह सामग्री आछी नाहीं आवती । सो उह सेठ नित्य अपने मनुष्य सों कहतो, जो - तू आछी सामग्री उत्तम तें उत्तम क्यों नाहीं ल्यावे ? पैसा अधिकी लागें तो मेरे लगेंगे । तू उत्तम तें उत्तम ल्याइओ । या प्रकार सेठ नित्य कहे । परंतु उह मनुष्य के मन में आवे नाहीं । सो सेठ ने मन में विचारो, जो - या मनुष्य कौ सेवा में काम नाहीं । सेवा में कोई वैष्णव होइ तो सामग्री उत्तम आवे । सो उह गाम में एक वैष्णव चुकटी मांगतो । सो मध्यान्ह के समै सेठ के घर चुकटी लेन आयो । तब सेठ ने वैष्णव सों विनती करी, जो - वैष्णव एक दुःख मेरे है । सो मैं तुम सों कहत हों । तुम्हारो मन प्रसन्न होइ तो मानियो । तब उह वैष्णव ने कही, तुम कहो । मोसों बनेगो सो मैं करूंगो । तब सेठने कही, मेरो चाकर है, सो सागफल मेवा आछी बजार तें

नाहीं ल्यावत । मैं वोहोत कहि पचिहारयो । सो तुम अपने श्रीठाकुरजी कों मेरे श्रीठाकुरजी के पास पधरावो । और तुम सागघर की सेवा करो । तो आछो है । तव उह वैष्णव ने कही, आछौ । तुम प्रसन्न होउगे तो ऐसो करुंगो । पाछें उह विरक्त ने अपने श्रीठाकुरजी कों सेठ के घर पधराए । पाछें सागघर की सेवा करन लागे । सो आगरे में आछें तें आछौ साग फलादि मेवा जो आवतो सो महेंगे तें महेगो ले आवतो । सो सेठ वोहोत उह विरक्त के ऊपर प्रसन्न रहतो । पाछें सेठ ने अपना द्रव्य कौ कोठा उह विरक्त कों सोंपि दियो । और कह्यो, जो - सामग्री ल्याऊ सो दाम तुम ही दीजो । दुपंहर पाछें हम कों लिखाय दीजो । सो उह विरक्त अपने मन-मानतो साग (और) आछी आछी सामग्री मेवा, फल ल्याई दाम आपु चुकाय देतो । पाछें राजभोग-आर्ति पाछें, महाप्रसाद लिये पाछें, सब सेठ कों लिखाय देतो । सो सेठ प्रसन्न होइ कै लिख लेतो । ऐसं ही करत वोहोत दिन बीते । पाछें एक दिन कार्तिक कौ महिना हतो । ता दिन एक खरबूजा वोहोत सुंदर एक मेवा-फरोस ल्यायो । सो उह वैष्णव देखि कै वोहोत प्रसन्न भयो । कह्यो, आजु काल्हि की रितु में खरबूजा कहां मिले ? सो यह फल प्रभु अंगीकार करें तो आछौ है । पाछें उह विरक्त ने उह खरबूजा कौ मोल पूछ्यो । सो उह मेवा-फरोस नें एक रुपैया कह्यो । तव वैष्णव नें कही आछौ, एक रुपैया देऊंगो । यह फल मोकों दे । ता ठौर एक मुगल ठाढ़ो हतो । सो उन कह्यो, मैं दोइ रुपैया देऊंगो । खरबूजा मैं लेऊंगो । तव वैष्णव ने कही मैं पांच रुपैया देऊंगो । तव मुगल ने दस रुपैया कहं । तव

वैष्णव ने एक सौ रुपैया कहे । तव मुगल पांच-सौ रुपैया तांडि आयो । तव वैष्णव ने रिस करि कै हजार रुपैया कही । तव मुगल हारि कै चल्यो गयो । तव वैष्णव उह मेवा-फरोस कों सेठ के घर ल्याय कै हजार रुपैया की थेली मेवा-फरोस कों निकारि दियो । सो मेवा-फरोस रुपैया लै चल्यो गयो । पाछें उह वैष्णव खरबूजा लै कै सागघर में धरच्यो । और हू सगरो साग फलादि मेवा धरच्यो । पाछें राजभोग आर्तिकौ समे भयो । सो दोऊ जनें सेवा सों पहोंचि श्रीठाकुरजी कों अनोसर कराए । पाछें सेठ और विरक्त महाप्रसाद लेइ बैठे । तव विरक्त ने कही, साग-फलादि लिखि लेहु । तव सेठ कह्यो, भले । पाछें उह विरक्त लिखान लाग्यो । सो सेठ लिखन लागे । सो सगरे साग लिखाय कै मेवा लिखायो । मेवा लिखाय कै पाछें फलादि लिखायो । तामें हजार रुपैया कौ खरबूजा एक विरक्तने लिखायो । सो जैसे सगरी सामग्री सेठ ने लिखी ताही भांति उह हजार रुपैया कौ खरबूजा हू सेठ ने लिख लीनो । यह नाहीं पूछ्यो, जो - हजार रुपैया एक खरबूजा कौ कौन भांति दीनो । सेठ के मन में यह निश्चय विश्वास है, जो वैष्णव करें सो सांची करेंगे । आछी करेंगे । ऐसो सरल सुभाव सेठ कौ हतो । पाछें सगरे साग लिख चूके तव दोऊ जनें एक घरी सोए । सो सिज्या मंदिर तें श्रीठाकुरजी उठि कै सागघर में पधारे । सो उह खरबूजा हतो ताकों ले कै अपने निजमंदिर में पधारे । खरबूजा सों खेलन लागे । पाछें उत्थापन सों दोइ घरी पहिले दोऊ जनें भगवद्वार्ता करि कै उठे । यह नेम दोऊ जन कौ हतो । सेवा के समय सेवा करे । पाछें महाप्रसाद ले कै दुपहर के दोइ घरी एक घरी

सोवें । पाछें उठि कै भगवद् वार्ता, श्रीआचार्यजी, श्रीगुसांईजी के ग्रंथ देखे ।

सो जब उत्थापन में दोड़ घरी की ढील रही तब दोऊ जनें उठि कै न्हाये । सो सेठ तो न्हाय कै मंदिर में आयो । और उह विरक्त न्हाय कै उत्थापन की सामग्री सिद्ध करन के लिये सागधर में आयो । सो सागधर में खरबूजा कों नाहीं देख्यो । तब उह विरक्त कें मन में महा दुःख भयो । मन में कह्यो, जो - देखो ! मैं सेठ कों हजार रुपैया कौ खरबूजा लिखायो । सो सेठ ने कछू पूछ्यो नाहीं । सो उह खरबूजा सेठ जब न देखेगो तब यह जानेगो, जो - खरबूजा कौ नाम ले के विरक्त ने हजार रुपैया लियो । और देखो, मैं हजार रुपैया खरन्न के खरबूजा ल्यायो । सो प्रभु अंगीकार न कियो । तातें यह मैं जानत हों, जो - मैं महादुष्ट हों । दोष तें भरयो हों । सो मेरी ल्याई वस्तू प्रभुन कौन प्रकार अंगीकार करत होंइंगे ? ऐसी भांति उह विरक्त मन में वोहोत खेद पायो । पाछें और मेवा फलादिक नित्य करत हते सो ताही भांति सँवारि कै उह विरक्त आयो, मंदिर में । पाछें सेठ ने उत्थापन समै किवाड़ मंदिर के खाले । तो श्रीठाकुरजी सिंघासन ऊपर हाथ में खरबूजा लिये विराजे हैं । सो देखि कै सेठ वोहोत ही मन में प्रसन्न भयो । तब सेठ ने वैष्णव सों कह्यो, जो - वैष्णवजी ! तुम आजु खरबूजा ऐसं स्नेह सों ल्याये, जो - श्रीठाकुरजी अपने श्रीहस्त कमल में लिए विराजे हैं । तुम दरसन करो । सो उह विरक्त दरसन करि कै मन में वोहोत प्रसन्न भयो । सगरो दुःख हृदय में भयो हतो सो गयो । आनंद पायो । तब

श्रीठाकुरजी उह सेठ सों कहे, जो - तू धन्य है । जो - वैष्णव सों पूछे नाहीं, जो - हजार रुपैया कौ एक खरबूजा कौन प्रकार ल्यायो ? सो तेरे मन में ऐसा वैष्णव पर विश्वास है । सो मैं दोऊन के ऊपर प्रसन्न हों । तुम चाहो सो मांगि लेहु । तब सेठने कही, जो हम कों तो यही चाहिए, जो - वैष्णव पर सदा याहू तें अधिक भाव रहे । कवहू वैष्णव पर अभाव न होई । यह सुनि कै श्रीठाकुरजी सेठ के ऊपर वोहोत प्रसन्न भए । पाछें उह विरक्त सों श्रीठाकुरजी ने कही, जा - मैं तिहारे ऊपर हू वोहोत प्रसन्न हूं । जो - तू मेरे लिये हजार रुपैया एक खरबूजा कौ दिये । सो मांगि । तब उह वैष्णव ने कही, महाराज ! मैं यह मांगत हों, जो - इह सेठ कौ संग मोकों न छूटे । यह वैष्णव के संग तें मेरी बुद्धि निर्मल भई है । सो सदाई हम इन याही प्रकार सों निर्वाह होई । यह सुनि कै श्रीठाकुरजी कहे, ऐसैं ही होइगो । पाछें सेठ ने श्रीठाकुरजी सों विनती करी, जो - महाराजाधिराज ! खरबूजा देहु तो सँवारि ल्याउं । तब श्रीठाकुरजी ने कही, जो - यह खरबूजा मोकों वोहोत प्यारो है । तातें आज मेरे पास रहन देहु । मैं वासों खेलत हों । काल्हि उत्थापन समै सँवारियो । यह सुनि कै सेठ ने श्रीठाकुरजी सों विनती करी, जो - महाराजाधिराज ! काल्हि तांई खरबूजा विगारि जायगो । यह सुनि कै श्रीठाकुरजी ने कही, जो - अब मेरो श्रीहस्त लाग्यो । अब यह नाहीं विगरेगो । तू चिंता मति करे । तब सेठ ने दंडवत् करि पाछें हाथ धोइ उह नित्य की सामग्री उत्थापन की हती सो भोग धरे । पाछें नित्य की नांई सेन पर्यत पहुँचे । पाछें श्रीठाकुरजी कों सेन कराय अनोसर



करि पाछें सेठ वाहिर आयो । तव सेठ ने वा वैष्णव सों कही, जो - तुम्हारो धन्यभाग्य है । सो तुम्हारी ल्याई वस्तू श्रीठाकुरजी या प्रकार अंगीकार करत हैं । तव वा विरक्त वैष्णव ने सेठ सों कही, जो - तुम धन्य हो । सो वैष्णव के ऊपर ऐसो दृढ विस्वास राखत हो । तव सेठ ने कही, जो - मेरो कहा है ? यह सब द्रव्य तुम्हारो ही है । पाछें दोऊ वैष्णव महाप्रसाद ले भगवद् वार्ता करन बैठे । सो अर्द्धरात्रि गई ता पाछें सोए । सो घरी दोइ रात्रि पाछिली रही, तव दोऊ जनं उठि कै देह कृत्य करि न्हाय कै सगरी सेवा राजभोग लों पहोंचे । पाछें उत्थापन के समै सेठ और उह विरक्त न्हाये । सो सेठ मँदिर में न्हाय कै गये । विरक्त ने नित्य के उत्थापन की तैयारी करी । सो वह खरबूजा समारि कै श्रीठाकुरजी कों भोग धरयो । सो ताही समय सेठ ने भोग समय बड़ो उत्सव कियो । श्रीनाथजी श्रीगुसाईंजी की भेट काढ़ी । सो श्रीगोकुल कों पठाई । और श्रीठाकुरजी कों वोहोत सामग्री आरोगाई । पाछें सब गाम के वैष्णव बुलाय कै महाप्रसाद लिवायो । तव रंच रंच खरबूजासैं तें सब कों धरयो । सो वोहोत अद्भुत स्वाद आयो । परम आनंद भयो ।

भावप्रकाश—या वार्ता कौ अभिप्राय यह है, जो - वैष्णव पर विस्वास राखनो । वैष्णव कौ संग करनो । तारें प्रभु तत्काल प्रसन्न न्हें ।

सो उह सेठ तथा विरक्त वैष्णव दोऊ श्रीगुसाईंजी के ऐसैं कृपापात्र भगवदीय हे । सो इनकी वार्ता कौ पार नाहीं, सो कहां ताई कहिए ।

वार्ता ॥ १२२ ॥



अब श्रीगुसांईजी को सेवक एक वैष्णव हुतो, सो गुजरात में रहतो, तिनकी वार्ता को भाव कहत हैं—

भावप्रकाश—ये तामस भक्त हैं। लीला मे इनको नाम 'दोहिनी' है। ये 'शशिकला' तें प्रगटी हैं। तातें इनके भावरूप हैं।

वार्ता प्रसंग—१

सो एक समै श्रीगुसांईजी गुजरात को पधारे हुते। तव याको श्रीगुसांईजी के दरसन भए। सो साक्षात् पूरन पुरुषोत्तम के दरसन भए। तव वाने श्रीगुसांईजी सो विनती कीनी, जो - महाराज ! मोको नाम सुनाइये। तव श्रीगुसांईजी ने कह्यो, जो - तुम स्नान करि कै आवो। तव वह स्नान करि कै आयो। तव श्रीगुसांईजी ने कृपा करि कै नाम सुनायो। ता पाछे निवेदन करायो। तव वा वैष्णव ने विनती कीनी, जो - महाराज ! अब कहा कर्तव्य है ? तव श्रीगुसांईजी कहे, जो - हम तोको भगवत्सेवा पधराय देत हैं। ताकी तू सेवा करियो। और प्रभुन पर भरोसो राखियो। प्रभु सर्व करन समर्थ हैं। तातें उनकी कृति में अविश्वास सर्वथा मति करियो। तव वा वैष्णव ने श्रीगुसांईजी सो विनती कीनी, जो - महाराज ! मेरे मन में एक संदेह है। सो आप सो निवृत्त होइगो। तव श्रीगुसांईजी कहे, जो - पूछि, कहा संदेह है ? तव वा वैष्णव ने कह्यो, जो - महाराज ! प्रभु अपने निकट रहिवे वारे की तो सुधि लेत है। परि ये जो दूर दूर देसांतर में रहत हैं तिनकी सुधि कौन लेत होइगो ?

तव श्रीगुसांईजी वा वैष्णव सो कहे, जो - सुनि ! श्रीठाकुरजी को नाम ईश्वर है। विस्वंबर है। जो मनकी बात नहिं जाने तो ईश्वर नाम काहे को कहनो परे ? तातें श्रीठा-

रजी वड़े दयाल है सब की रक्षा करत हैं । ये वचन श्रीगुसां-  
ईजी के मुनि के वह वैष्णव वोहोत प्रसन्न भयो । ता पाछें  
श्रीगुसांईजी ने वा वैष्णव काँ एक लालजी काँ स्वरूप सेवा  
करिवे काँ पधराय दियो । पाछें सेवा की सब रीति भांति  
समुझाइ कह्यो, जो - इन की सेवा तू नीकी भांति करियो ।  
ता पाछें श्रीगुसांईजी आप तो श्रीगोकुल पधारे । और वह  
वैष्णव तो श्रीगुसांईजी की आज्ञा प्रमान श्रीठाकुरजी की सेवा  
करन लाग्यो । सो तन्मय होइ के श्रीठाकुरजी की सेवा करतो ।  
ऐसें करत वोहोत दिन भए तव श्रीठाकुरजी सानुभावता जता-  
नव लागे । जो - चाहिए सो मांगि लेते ।

भावप्रकाश—या वार्ता में यह जतायो, जो-वैष्णव काँ प्रभुन पर  
दृढ भरोसो राखनो । प्रभु सर्व करन समर्थ हैं । तातेँ लौकिक वैदिक की चिंता  
सवथा न करनी । और भगवत्सेवा तन्मय होई के करनी ।

सो यह वैष्णव श्रीगुसांईजी काँ ऐसो कृपापात्र भगवदीय  
हो । तातेँ इन की वार्ता कहां तांई कहिए । वार्ता ॥१२६॥



अब श्रीगुसांईजी काँ सेवक दामोदर झा बडनगरा नागर ब्राह्मन, बडनगर में  
रहतो, तिनकी वार्ता काँ भाव कहत हैं—

भावप्रकाश—ये सात्विक भक्त हैं । लीला में इन काँ नाम 'इंद्रप्रभा' है ।  
ये 'नीला' तें प्रगटी हैं । तातेँ उनके भावरूप हैं ।

सो ये गुजरात में बडनगर गाम है, तहां एक नागर ब्राह्मन के प्रगटे । सो  
वह ब्राह्मन सेवी हतो । सो दामोदरदास झा बरस आठ के भए । तव तें ये विद्या  
पढन लागे । सो विद्या वोहोत पढे । बड़े पडित भए । पाछे बरस ब्राह्म के भए  
तव इनके माता-पिता मरे । सो वह अकेले ही रहे । सो वा गाममें सेवी वोहोत  
हुते । और वैष्णव थोरे हुते ।

वार्ता प्रसंग—१

सो दामोदर झा वैष्णवन काँ टीलुआ कहतो । और कहतो.

जो - यह मार्ग वेदमूलक नहीं है । सो जब वडनगर के वैष्णव श्रीगोकुल आए, श्रीगुसांईजी के दरसन कों तब सब वैष्णवन ने श्रीगुसांईजी सों विनती कीनी, जो - महाराजाधिराज ! वडनगर में एक दामोदर झा नागर वडनगरा है । सो आपको वडो पंडित माने हैं । सो वैष्णवन कों टीलूआ कहत हैं । और यह कहत हैं, जो - यह मार्ग वेदमूलक नहीं है । तातें महाराजाधिराज ! याकों कछू कह्यो चाहिए । ता पाछें वैष्णव तो श्रीगुसांईजी आपके दरसन करि कै वडनगर अपने घर कों आए । ता पाछें केतेक दिन में श्रीगुसांईजी आप द्वारिकाजी कों पधारे, श्रीरनछोरराइजी के दरसन कों । सो रनछोरराइजी के दरसन करि कै जब श्रीद्वारिकाजी तें पाछें फिरे तब श्रीगुसांईजी आप वडनगर पधारे । सो वडनगर में एक वैष्णव के घर उतरे । सो श्रीगुसांईजी आप भोजन करि कै गादी तकियान पर विराजे तब वैष्णव सब श्रीगुसांईजी आगें बैठे हते । तब श्रीगुसांईजी आप ने कह्यो, जो - इहां कौन कहत हैं, जो - ये मार्ग वेद मूलक नहीं है ? जो - यह मार्ग श्रीआचार्यजी महाप्रभु ने प्रगट कियो है, सो सर्वोपरि है ।

भावप्रकाश—याकों अभिप्राय यह, जो - और मार्ग में तो तीन प्रमान कहे हैं । वेद, गीता, ब्रह्मसूत्र । परि या मार्ग में तो श्रीआचार्यजी ने चारि प्रमान माने हैं । वेद, गीता, ब्रह्मसूत्र, श्रीभागवत । तातें यह मार्ग सर्वोपरि है ।

जो जाकों कछू संदेह होंइ सो आओ, मोकों पूछो । तब दामोदर झा आदि दे कै सब पंडित आए । सो चर्चा भई । सो वाद-विवाद में सब पंडित निरुत्तर भए । तब सब पंडित श्रीगुसांईजी कों दंडवत् करि कै अपने घर गए । पाछें दामोदर

झा तो दूसरे दिन आइ कै श्रीगुसांईजी आप सों विनती कीनी, जो - महाराजाधिराज ! मेरो अंगीकार करिये । तव श्रीगुसांईजी आप तो परम दयाल कृपा करि कै दामोदर झा कों नाम सुनाए । तव और सब हुते सो कहन लागे, जो - तुम यह कहा कियो ? जो - हम सबन कों तो तुम्हारो भरोसो हतो । सो तुमने तो नाम पायो ! तव दामोदर झा ने उनसों कह्यो, जो - “भाई ! आटला दहाडा तो कोई जाण्युं नहीं, जो - केवल छिलका कूट्या । जे कंड छे ते आज मारग छे । ” यह सुनि कै और पंडित तो गए । पाछे दामोदर झा श्रीगुसांईजी आपके पास ही रहते । जो - वड़े ही पंडित हते ।

सो वे श्रीगुसांईजी आप की कृपा तें वड़ेई कृपापात्र भगवदीय भए । तातें इनकी वार्ता कहां तांइ कहिए । वार्ता ॥१२७॥



अब श्रीगुसांईजी के सेवक मधुसूदनदास, क्षत्री हुते, सो पश्चिम में रहते, तिनकी वार्ता की भाव कहत हैं—

भावप्रकाश—ये तामास भक्त हैं । लीला में इन को नाम ‘वीरवाला’ है । ये ‘नीला’ तें प्रगटी हैं । तातें इनके भावरूप हैं ।

ये पश्चिम में एक क्षत्री के जन्मे । सो वह क्षत्री राज में चाकर हतो । सो घोड़ा खरीदवे को काम करे । सो जब मधुसूदनदास बरस तेईस के भये । तब तें वह क्षत्री इन कों अपने संग राखे । सो घोड़ा की पहचानि करावे । सो कछुक दिन में ये घोड़ा कों पहचानिबे लागे । पाछे वह क्षत्री मरयो । तब मधुसूदनदास राज में चाकर रहे । सो एक समै यह घोड़ा खरीदवे कों आगरा में आए । ता समै श्रीगुसांईजी आगरा में विराजत हुते । सो इन श्रीगुसांईजी के दरसन पाए । तब श्रीगुसांईजी आप पूछे, जो - तुम कौन हो ? कहा करत हो ? तब मधुसूदनदास कहें, जो - महाराज ! मैं क्षत्री हूं । अमूके राज में चाकर हों । घोड़ा की पहचानि करत हूं । राज के लिये आछे आछे घोड़ा खरीदत हों । तब श्रीगुसांईजी कहे, जो - एक सुंदर घोड़ा हम कों चाहिए है, सो तुम हम कों खरीद देऊ । तब

मधुसूदनदास कहे, जो - महाराज ! आप के लायक एक सुंदर घोड़ा राज में है। सो आप उहां पधारो। और वह घोड़ा पसंद करो तो वह घोड़ा हों आप कों भेंट करों। तब श्रीगुसांईजी कहे, जो - अब ही तो हमारो उहां आवनो बने नाहीं। तब मधुसूदनदासने विनती कीनी, जो - महाराज ! आप आज्ञा करो तो घोड़ा मैं यहां लाउं। आप कों भेंट करों। और महाराज ! मोकों अपनो सेवक कीजिए। तब श्रीगुसांईजी आज्ञा किये, जो - अबही तो समय नाहीं। पाछें काहू समै फेरि उहां पधारेंगे तब तुम कों सेवक करेंगे। तब घोड़ा हू देखेंगे। तब मधुसूदनदास कहे, जो - महाराज ! आप कदाचित न पधारे तो मैं कहा करों ? मेरो जन्म व्यर्थ जाई। तब श्रीगुसांईजी आप कहे, जो - हमारो वचन है। हम तोकों निश्चै सरनि लेंगे। पाछें मधुसूदनदास श्रीगुसांईजी कों दंडवत् करि घोड़ा खरीदिवे कों गए।

वार्ता प्रसंग—१

पाछें एक समै श्रीगुसांईजी श्रीगोकुल तें लाहोर पधारवे कौ विचार किये। तब एक वैष्णव ने श्रीगुसांईजी सों विनती कीनी, जो - महाराज ! एक बेर तो पश्चिम देस कों पधारिये। तब श्रीगुसांईजी ने वा वैष्णव सों कह्यो, जो - हमारी तो पश्चिम देस की इच्छा नहीं है। परि एक बार पश्चिम देस में पधारेंगे ऐसो जान परे हैं। जो - मधुसूदनदास के अंगीकारार्थ पधारनो परेगो तो सही। तब वा वैष्णव ने श्रीगुसांईजी कों विनती कीनी, जो - महाराज ! मधुसूदनदास ने तो घोड़ा बोहोत सुंदर सिद्ध करि कै राख्यो है। तब वा वैष्णव सों श्रीगुसांईजी ने कही, जो - तातें अवस्य पधारनो परेगो।

ता पाछें श्रीगुसांईजी पश्चिम देस में पधारे। तब मधुसूदनदास ने श्रीगुसांईजी सों विनती कीनी, जो - महाराज ! मोकों नाम सुनाइए। मेरो अंगीकार करिए। तब श्रीगुसांईजी ने श्रीमुख तें आज्ञा दीनी, जो तुम स्नान करि कै आवो। तब मधुसूदनदास स्नान करि कै आए। तब श्रीगुसांईजी ने

कृपा करि कै नाम सुनायो । ता पाछें निवेदन करायो । तव मधुसूदनदास ने एक सुंदर घोड़ा भेंट कियो । ता पाछें श्रीगुसांईजी आप गादी तकियान के ऊपर विराजे । तव मधुसूदनदास पंखा करन लागे । ता समै मधुसूदनदास ने श्रीगुसांईजी सों विनती कीनी, जो - महाराज ! अब हम कों कहा आज्ञा है ? तव श्रीगुसांईजी ने कृपा करि कै मधुसूदनदास के माथें सेवा पधराई । और सेवा की रीति सिखाई । ता पाछें श्रीगुसांईजी कितनेक दिन लों उहां विराजे । सो वा मधुसूदनदास कों सिंगार सिखाये । और रात्रि कों नित्य प्रसंग-भगवद्वाता सुनावते । सो एक दिन श्रीआचार्यजी महाप्रभुन की सेवा कौ माहात्म्य कह्यो । जो - जीव कैसेउ अघ की खान होंई परि श्रीआचार्यजी महाप्रभुन की सरन आवे तो तत्काल सब दोष दूरि होंई जाई । और श्रीआचार्यजी, पुष्टिमार्गकौ फल है ताकौ दान करे । ऐसे श्रीआचार्यजी महाप्रभु परम दयाल हैं । तातें उन के चरनकमल कौ विस्वास राखनो । तातें पुष्टिमार्ग के फल की प्राप्ति होंई । सो श्रीगुसांईजी ने मधुसूदनदास कों कह्यो । सो सुनि कै मधुसूदनदास वोहोत प्रसन्न भए । ता पाछें श्रीगुसांईजी ने उहां सों विजय कियो । सो श्रीगोकुल पधारे । तव मधुसूदनदास श्रीगुसांईजी के साथ आए । सो श्रीनवनीतप्रियजी के दरसन किये । ता पाछें श्रीगुसांईजी श्रीनवनीतप्रियजी के राजभोग-आरति करि कै ता पाछें अनोसर करि कै अपनी बैठक में पधारे । तव श्रीगुसांईजी ने मधुसूदनदास सों पूछी, जो - मधुसूदनदास ! दरसन किये ? तव मधुसूदनदास ने आय कै श्रीगुसांईजी सों विनती कीनी, जो - महाराज ! आप की कृपा तें दरसन किये । ता

मधुसूदनदास कहे, जो - महाराज ! आप के लायक एक सुंदर घोड़ा राज में है । सो आप उहां पधारो । और वह घोड़ा पसंद करो तो वह घोड़ा हों आप कों भेंट करों । तब श्रीगुसांईजी कहे, जो - अब ही तो हमारो उहां आवनो वने नाहीं । तब मधुसूदनदासने विनती कीनी, जो - महाराज ! आप आज्ञा करो तो घोड़ा में यहां लाउं । आप कों भेंट करों । और महाराज ! मोकों अपनो सेवक कीजिए । तब श्रीगुसांईजी आज्ञा किये, जो - अबही तो समय नाहीं । पाछें काहू समै फेरि उहां पधारेंगे तब तुम कों सेवक करेंगे । तब घोड़ा हू देखेंगे । तब मधुसूदनदास कहे, जो - महाराज ! आप कदाचित न पधारे तो मैं कहा करों ? मेरो जन्म व्यर्थ जाई । तब श्रीगुसांईजी आप कहे, जो - हमारो वचन है । हम तोकों निश्चै सरनि लेंगे । पाछें मधुसूदनदास श्रीगुसांईजी कों दंडवत् करि घोड़ा खरीदिवे कों गए ।

वार्ता प्रसंग—१

पाछें एक समै श्रीगुसांईजी श्रीगोकुल तें लाहोर पधारवे कौ विचार किये । तब एक वैष्णव ने श्रीगुसांईजी सों विनती कीनी, जो - महाराज ! एक बेर तो पश्चिम देस कों पधारिये । तब श्रीगुसांईजी ने वा वैष्णव सों कह्यो, जो - हमारी तो पश्चिम देस की इच्छा नहीं है । परि एक बार पश्चिम देस में पधारेंगे ऐसो जान परे हैं । जो - मधुसूदनदास के अंगीकारार्थ पधारनो परेगो तो सही । तब वा वैष्णव ने श्रीगुसांईजी कों विनती कीनी, जो - महाराज ! मधुसूदनदास ने तो घोड़ा बोहोत सुंदर सिद्ध करि कै राख्यो है । तब वा वैष्णव सों श्रीगुसांईजी ने कही, जो - तातें अवस्य पधारनो परेगो ।

ता पाछें श्रीगुसांईजी पश्चिम देस में पधारे । तब मधुसूदनदास ने श्रीगुसांईजी सों विनती कीनी, जो - महाराज ! मोकों नाम सुनाइए । मेरो अंगीकार करिए । तब श्रीगुसांईजी ने श्रीमुख तें आज्ञा दीनी, जो तुम स्नान करि कै आवो । तब मधुसूदनदास स्नान करि कै आए । तब श्रीगुसांईजी ने



कृपा करि के नाम सुनायो । ता पाछें निवेदन करायो । तव मधुसूदनदास ने एक सुंदर घोड़ा भेंट कियो । ता पाछें श्रीगुसांईजी आप गादी तकियान के ऊपर विराजे । तव मधुसूदनदास पंखा करन लागे । ता समै मधुसूदनदास ने श्रीगुसांईजी सों विनती कीनी, जो - महाराज ! अब हम कों कहा आज्ञा है ? तव श्रीगुसांईजी ने कृपा करि के मधुसूदनदास के माथें सेवा पधराई । और सेवा की रीति सिखाई । ता पाछें श्रीगुसांईजी कितनेक दिन लों उहां विराजे । सो वा मधुसूदनदास कों सिंगार सिखाये । और रात्रि कों नित्य प्रसंग-भगवद्वार्ता सुनावते । सो एक दिन श्रीआचार्यजी महाप्रभुन की सेवा कौ माहात्म्य कह्यो । जो - जीव कैसेउ अघ की खान होंई परि श्रीआचार्यजी महाप्रभुन की सरन आवे तो तत्काल सब दोष दूरि होंई जाई । और श्रीआचार्यजी, पुष्टिमार्गकौ फल है ताकौ दान करे । ऐसैं श्रीआचार्यजी महाप्रभु परम दयाल हैं । तातें उन के चरनकमल कौ विस्वास राखनो । तातें पुष्टिमार्ग के फल की प्राप्ति होंई । सो श्रीगुसांईजी ने मधुसूदनदास कों कह्यो । सो सुनि के मधुसूदनदास वोहोत प्रसन्न भए । ता पाछें श्रीगुसांईजी ने उहां सों विजय कियो । सो श्रीगोकुल पधारे । तव मधुसूदनदास श्रीगुसांईजी के साथ आए । सो श्रीनवनीतप्रियजी के दरसन किये । ता पाछें श्रीगुसांईजी श्रीनवनीतप्रियजी के राजभोग-आरति करि के ता पाछें अनोसर करि के अपनी बैठक में पधारे । तव श्रीगुसांईजी ने मधुसूदनदास सों पूछी, जो - मधुसूदनदास ! दरसन किये ? तव मधुसूदनदास ने आय के श्रीगुसांईजी सों विनती कीनी, जो - महाराज ! आप की कृपा तें दरसन किये । ता

पाछें दंडवत् करि के बैठे । पाछें श्रीगुसांईजी भोजन कों पधारे । सो भोजन करि कै फेरि अपनी बैठक में पधारे । तब श्रीगुसांईजी आप भीतरिया कों श्रीमुख तें आज्ञा दीनी, जो - मधुसूदनदास कों महा-प्रसाद की पातरि पठवाइयो । तब भीतरिया ने मधुसूदनदास कों पातरि पठाई । सो मधुसूदनदास ने महाप्रसाद लियो । ता पाछें श्री-गुसांईजी विश्राम करि के जागे । इतने में उत्थापन कौ समय भयो । सो स्नान करि कै श्रीनवनीतप्रियजी के मंदिर में पधारे । सो संखनाद करवाये । पाछें नवनीतप्रियजी के दरसन सब वैष्णव कों कराए । ता पाछें श्रीगुसांईजी सेन पर्यंत सेवा सों पोहोंचि कै अनोसर करि कै अपनी बैठक में पधारे । सो श्रीसुबोधिनीजी की कथा कहे । सो मधुसूदनदास सुने । सो बोहोत प्रसन्न भए । पाछें श्रीगुसांईजी आप पोढ़वे कों पधारे । ता पाछें प्रातःकाल श्रीगुसांईजी आप श्रीगोवर्द्धननाथजी के दरसन करिवे कों पधारे । सो मधुसूदनदास हू साथ हुते । सो श्रीगोवर्द्धननाथजी कौ राजभोग कौ समै हुतो । तब श्रीगुसां-ईजी तत्काल स्नान करि कै मंदिर में पधारे । सो राजभोग समप्यो । ता पाछें राजभोग आरति करी । तब मधुसूदनदास ने श्रीगोवर्द्धननाथजी के दरसन किये । सो साक्षात् कोटि कंदर्प लावन्य के दरसन भए । पाछें श्रीगुसांईजी अपनी बैठक में पधारे । तब मधुसूदनदास हू श्रीगुसांईजी पास आए । ता पाछें श्रीगुसांईजी ने पूछी, जो - मधुसूदनदास ! तुमने दरसन किये ? तब मधुसूदनदास ने कह्यो, जो - महाराज ! आपकी कृपा तें । ता पाछें श्रीगुसांईजी ने कह्यो, जो - श्रीगोवर्द्धननाथजी कौ महा-प्रसाद पठावत हूं सो तुम लीजियो । पाछें श्रीगुसांईजी ने भोजन

करि कै मधुसूदनदास कों जूठनि की पातरि पंठाई । तव मधु-  
सूदनदास ने महाप्रसाद लियो । ता पाछें श्रीगुसांईजी पोंदें ।  
तव मधुसूदनदास पंखा करन लागे । ऐसैं करत वोहोत दिन  
भए । तव मधुसूदनदास ने विनती कीनी, जो - महाराज !  
आप की आज्ञा होइ तो हम आपुने देस जाई । तव श्रीगुसां-  
ईजी ने मधुसूदनदास कों विदा किये । सो केतेक दिन में अपने  
घर आए । सो श्रीठाकुरजी की सेवा प्रीतिपूर्वक करन लागे ।  
तव थोरेसे दिन में श्रीठाकुरजी सानुभावता जनावन लागे ।

सो वह मधुसूदनदास श्रीगुसांईजी के ऐसैं कृपापात्र भग-  
वदीय हे । तातें इनकी वार्ता कौ पार नाही । सो कहां ताई  
कहिए । वार्ता ॥१२८॥



अब श्रीगुसांईजी कौ सेवक एक राजा, पूरव कौ, तिनकी वार्ता कौ भाव  
कहत हैं—

भावप्रकाश—ये राजस भक्त हैं । लीला में इन कौ नाम 'मनमोदिनी' है ।  
ये 'नीला' तें प्रगटी हैं, तातें उन के भावरूप हैं ।

ये पूरव में एक राजा के जन्म्यो । पाछें वरम अठारह कौ भयो तव याकौ  
पिता मरयो । तव ये राजा भयो । पाछें एक समै वह जगन्नाथराइजी की यात्रा कों  
चल्यो । सो ता समै श्रीगुसांईजी आप जगन्नाथपुरी में विराजत हुते । तहां  
पंडितन सों साख्खार्थ करत हुते । सो गाम कौ राजा तथा और हू लोग या  
सभा में आए हुते । सो वह राजा हू वा समै वहां आयो । ताहीं समै श्रीगुसांईजी  
आप मायावादीन कों निरुत्तर किये । तव यह राजा श्रीगुसांईजी कौ नेज प्रताप  
देखि आप की सरनि आयो । तव श्रीगुसांईजी आप वा राजा कों नाम मुनाए ।  
पाछें निवेदन कगए । तव राजा ने विनती कीनी, जो - महाराज ! सोकों यह  
मारग स्फुरे सी कृपा करिये । तव श्रीगुसांईजी आप चाचाजी कों बुलाई आज्ञा  
किये, जो-चाचाजी ! तुम कइक दिन या राजा के पास गहि इन कों मारग कौ  
ज्ञान कराउ । पाछें श्रीगुसांईजी तो आप अइल पधारे । ओं चाचाजी वा राजा

में बड़े प्रवीन हते । पाछें इन कों व्याह भयो । सो स्त्री सुपात्र मिलि, पतिव्रता । इन के दोःवेदा भये ।

वार्ता प्रसंग—१

सो एक समय श्रीगुसाईजी गुजरात पधारे हते । तब चाचा हरिवंसजी प्रभुन के साथ हते । सो श्रीगुसाईजी कों पधरावन कों खंभाइच के वैष्णव राजनगर साम्हे आए । तब वैष्णवन कौ वोहोत हठ आग्रह जानि के श्रीगुसाईजी खंभाइच पधारे । तहां श्रीगुसाईजी सहजपाल दोसी के घर उतरे । सो वा ठौर एक ब्राह्मन मुरारी आचार्य छहों सास्त्र कौ ज्ञानी-वक्ता हतो । वाकी कर्ममार्ग विषे नेष्टा वोहोत हती । सो वह ब्राह्मन श्रीगुसाईजी के दरसन कों तहां सहजपाल दोसी के घर आयो । पाछें वह ब्राह्मन कछू सास्त्र की वार्ता श्रीगुसाईजी सों करि उठि गयो । तब चाचाजी ने श्रीगुसाईजी सों कही, जो - ऐसो ब्राह्मन वैष्णव होय तो भलो । यह बात चाचाजी ने प्रभुन के आगे तीन वार कही । परि श्रीगुसाईजी या बात कौ प्रति-उत्तर न दिए ।

भावप्रकाश—सो यातें, जो - वह दैवी है । सो आपही तैं सरन आवेगो ।

ता पाछें श्रीगुसाईजी श्रीद्वारिकाजी होइ के श्रीमथुराजी में पधारे । तहां तैं अड़ेल आए । पाछें केतेक दिन कों वह ब्राह्मन खंभाइच तैं कासी जाइवे कों भयो । सो मथुरा व्हे अड़ेल आयो, संग में । सो वाकों चाचाजी ने देख्यो । सो उत्थापन समय श्रीगुसाईजी गादी तकिया पर विराजत हते । इतने ही गुजरात खंभाइच कौ साथ अड़ेल श्रीगुसाईजी के दरसन कों आयो । तब चाचाजी ने विनती करी, जो - महाराज ! खंभाइच कौ ब्राह्मन आयो है । सो चाचाजी के बचन सुनि के

श्रीगुसाईजी चुप करि रहे । पाछें श्रीगुसाईजी के दरसन करि के ब्राह्मन तो डेरा में बैठ्यो । इतने फेरि चाचाजी ने श्रीगुसाईजी सों विनती करी, जो - राज ! मोकों आप या बात को प्रतिउत्तर दियो नाहीं, सो कहा ? तव हू श्रीगुसाईजी चाचाजी के वचन सुनि के चुप करि रहे ।

पाछें श्रीगुसाईजी एक श्लोक करि, पत्र लिखि के एक ब्रजवासी हाथ वा ब्राह्मन पास पठायो । सो ब्रजवासी वा संग में जाइ के मुरारी आचार्य कों वह पत्र दियो । ता पत्र कों वांघि के वा ब्राह्मन कों श्रीगुसाईजी के स्वरूप कौ ज्ञान भयो । तव वह मुरारी आचार्य अपनी स्त्री सों कह्यो, जो - गाड़ी में तें उतरो । और एक बड़ो बेटा साथ हतो, ताकों संग ले के मुरारी आचार्य फेरि वा ब्रजवासी के साथ वाही समय श्रीगुसाईजी के दरसन कों कागद माथें वांघि के आयो । सो मुरारी आचार्य आवत ही श्रीगुसाईजी कों साष्टांग दंडवत करी । पाछें वह पत्र श्रीगुसाईजी के श्रीहस्त में दे के मुरारी आचार्य ने श्रीगुसाईजी सों विनती करी, जो - राज ! अब मोकों आप सेवक करो । अब विलंब मति करो । तव श्रीगुसाईजी मुरारी आचार्य सों कहे, जो - विधि तौ ऐसी है, जो - प्रथम उपवास करि के ताके दूसरे दिन समर्पन करिए । तव मुरारी आचार्य ने श्रीगुसाईजी के वचन सुनि के यह विनती करी, जो - राज ! प्रथम नाम तो सुनाओ । तव श्रीगुसाईजी वाकी आर्ति आतुरता देखि के तीनों जनैनों कों नाम सुनाए । पाछें फेरि मुरारी आचार्य ने विनती करी, जो - राज ! देह कौ तौ न्यामक है काल । परि काल कौ तो न्यामक

नाहीं । तातें या देह कौ कहा भरोसो है । तासों आप विलंब न करिए । तव श्रीगुसांईजी उन मुरारी आचार्य की वोहोत ही आतिं जानि कै आपु कृपा करि कै उन तीनों कों नाम निवेदन करवायो । पाछें उन कौ नाम श्रीगुसांईजी ने मुरारीदास धरयो । और सेवा के ताई श्रीनवनीतप्रियजी के प्रसादी वस्त्र पधराय दिये । पाछें घर आइ मुरारी आचार्य संग के मुखिया सों कहे, जो - हम तो श्रीवल्लभी सम्प्रदाय सिर धरि आए ।

पाछें संग के मुखिया कौ मुख यह मुरारीदास की बात सुनि कै स्याम होइ गयो । और वाने अपने परिकर सों कह्यो, जो - अब वह मेरे पास न आवन पावे । पाछें वाके परिकर के एक मनुष्य ने मुरारीदास कों कही, जो - तुमने यह आली बात न करी । जो इनकों अप्रसन्न करे । और अब इन कही है, जो - मुरारीदास अब मेरे पास तिलक-मुद्रा माला छोरि कै आवे तो आवन पावे । नांतरु यह मेरे पास न आवन पावे । यह इन सों कहि कै वह मनुष्य तो चल्यो गयो । पाछें मुरारीदास वा दिन प्रसाद ले वोहोत मुद्रा धरि कै वा मनुष्य के पास गए । जिन कों वा मुखिया ने बरजे हुते, जो - मुरारीदास मेरे पास न आवन पावे तिन पास गए । सो सगरे मुरारीदास कौ तेज देखि कै विस्मित होइ गए । तातें वे मुरारीदास कों कछु बरजि न सकें । सो ये जाँइ कै वा मुखिया सों आपुस में दोऊ संभाषन करयो । जो - अब मुरारीदास सों न जीतेंगे । पाछें मुखिया के मन में आई, जो - यह मार्ग तो उत्तम है तासों इन कौ सेवक हूजिये । सो बहुरि श्री-यमुनाजी में स्नान करि वह श्रीगुसांईजी कौ सेवक भयो । ता

पाछें मुरारीदास और वह मिलि श्रीनवनीतप्रियजी के और सब वालकन के दरसन करि अति प्रसन्न भए । पाछें कछूक दिन मुरारीदास और वह मुखिया श्रीगुसांईजी पास रहि के 'नवरत्न' आदि सब ग्रंथ पढ़े । तव वाकी बुद्धि अति उज्वल भई । तव वाने एक दिन श्रीगुसांईजी सों विनती करी, जो - राज ! आपकी कृपा सों अलौकिक वस्तू तो सर्व प्राप्त भई । अब हमारे तीर्थयात्रा सों कहा काम है ? आपके चरनारविंद विषे सब तीर्थ होय चुकै । तव श्रीगुसांईजी उनसों कहे, जो - तुम तीर्थ-पर्यटन करिवे जाहू । नांतरु सगरे लोग निंदा करेंगे । तातैं सर्वथा जायो चाहिए । तीर्थ-पर्यटन के आग्रह पूर्वक तो जानो नाहीं । परि लोक रीति राखिवे कों एक्वार सर्वथा जानो ।

भावप्रकाश—सो यातें, जो - श्रीआचार्यजी 'पुष्टिप्रवाहमर्यादा' ग्रन्थ में लिखे हैं । सो श्लोक —

‘ लौकिकत्वं वैदिकत्वं कापट्यात्तेषु नान्यथा ।

वैष्णवत्वं हि सहजं ततोऽन्यत्र विपर्ययः । ’

यासों पुष्टि जीव कों लोक वेद रीति राखिवे कों तीर्थादि सब करने । परि उन के फल की इच्छा राखनी नाहीं ।

पाछें श्रीगुसांईजी की आज्ञा तें वे तीर्थयात्रा होइ आए । पाछें फेरि श्रीगुसांईजी पास मथुरा आइ प्रभुन के दरसन करि कछूक दिन प्रभुन पास रहि के श्रीभागवत, श्रीसुबोधिनीजी और सर्व ग्रंथ सुनि सर्व मार्ग कौ रहस्य प्रणालिका पूछि के प्रभुन सों विदा होइ के खंभाइच आए । उन पर श्रीगुसांईजी ने ऐसी कृपा करी । जो उन पूछ्यो सो सर्व उन कों समझायो ।

वार्ता प्रसंग—२

सो खंभाइच में और एक सैव ब्राह्मन की दीनी ब्रह्मपुरी

हती । सो तामें एक घर उनहूँ कौ हतो, सो तहां जाइ रहें । तहां एक लाड़ बनिया हतो । सो एक और मुखिया कौ चाकर हतो । सो वह बनिया नित्य मुरारीदास के घर आवतो । ताके साथ वह मुखिया कहवाय पठावतो । जो एक वार मुरारीदास माला उतारि मेरे पास आवे तो मुरारीदास कहें सो मैं करूं । यह वा मुखिया के समाचार वा बनिया ने आइ के मुरारीदास सों कहें । तव मुरारीदास एक दिन मुनि के श्रीठाकुरजी सों पहोंचि के अपने मार्ग कौ सर्व चिन्ह प्रकासि के वाके घर गए । सो मुरारीदास कों देखि के वह जरि गयो । परि वह कर्मिष्ठ हतो । तासों पूजा कौ साज मंगायो । सो वह पूजा करिवं कों तत्पर भयो । तव मुरारीदास कों तामस चढयो । सो मुरारीदास कों मुखिया छूवे लग्यो तव मुरारीदास ने वासों कही, जो - तू मेरे सरीर कों हाथ लगावेगो तो मोकों सचैल स्नान करना पडेगो । तव वा ब्राह्मन अति क्रोधवंत भयो । सो श्राप देवे लग्यो । सो वानें कह्यो, जो - मुरारीदास ! तेरे जल कौ देववारो मति रहियो । तेरो सत्यानास जैयो । और ये तेरो घर ही उजार हूजो । तव मुरारीदास कह्यो, जो - श्रीगु-साईजी साक्षात् पूरन पुरुषोत्तम हैं, और मेरो धर्म सांचो है, तो तेरो श्राप मोकों कहा करेगो ? और यह तेरो डेरा है । सो दूजो कोई घर के द्वार ठाड़ो होइगो ताही कों घर जात ही देउंगो । और मैं तेरी ब्रह्मपुरी छोरि जाउंगो । यह कहि के मुरारीदास अपने घर आए । सो घर आय द्वारे ही ठाढ़े रहि अपनी स्त्री कों बुलाइ के मुरारीदास कहे, जो - तू श्रीठाकुरजी कों संपुट में पधराय के संपुट लै के सगरे कुटुंब सहित घर में



तें वाहिर निकसि आउ । सो घर में तें सगरे निकसे । तव मुरारीदास ने घर भरयो जैसो को तैसो द्वारें एक शुक्ल ठाड़ो हतो ताकों दियो । पाछें स्त्री लरिका साथ लै के मुरारीदास गाम तें निकसन लागे । सो एक वैष्णव वा गाम में रहत हतो । तिन अपनो घर मुरारीदास को भेट कियो । सो वे मुरारीदास ऐसे टेक के कृपापात्र भगवदीय हते । सो सर्व वस्तू को त्याग करत मन में मोह न आयो । पाछें यह बात श्रीगुसांईजी ने सुनी । तव मुरारीदास उपर वोहोत प्रसन्न होइ के आपु कहे जो - वैष्णव को योंही चाहिये ।

भावप्रकाश—यामें यह जतायो, जो - वैष्णव को टेक ही बड़ो पदार्थ है । तातें भगवद्धर्म दृढ़ होई ।

वार्ता प्रसंग—३

और एक समय मुरारीदास ने श्रीगुसांईजी को विनती पत्र लिख पठायो । जो - महाराज ! कोइ एक ग्रंथ आपु कृपा करि के ऐसो लिख पठाओ, जासों वादीन को मुख भंजन करिए । सो पत्र मुरारीदास को श्रीगुसांईजी पास आयो । तव श्रीगुसांईजी मुरारीदास पास के पत्र उत्तर के साथ 'भक्तिहंस' ग्रंथ लिखि पठायो ।

तव मुरारीदासने माथे चढाइ पत्र-ग्रंथ को वांच्यो । पाछें फेरि मुरारीदास ने श्रीगुसांईजी को विनती लिखी, जो - महाराज ! यह ग्रंथ वोहोत ही उत्तम है, सुंदर है । परि अगम है । सो पत्र को उत्तर मुरारीदास को श्रीगुसांईजी पास आयो । तव प्रभुन वांचि क वाक्यो प्रतिउत्तर " भक्ति हेतु निर्णय " ग्रंथ लिखि पठायो । सो पत्र मुरारीदास पास आयो । तव माथें चढाइ के मुरारीदास ने वा पत्र के साथ वा ग्रंथ को वांच्यो । सो

मुरारीदास अपने मनमें बोहोत प्रसन्न भये । तब प्रसन्न होइ कै पत्र एक और मुरारीदास ने श्रीगुसाईजी कों लिखि पठायो । जो - महाराज ! सास्त्र के वचन अति दुर्घट है । याकों पार नहीं । तब श्रीगुसाईजी के पास मुरारीदास कौ पत्र आय पहों-च्यो । सो आपु वांच्यो । तब प्रभुन अपने मन में जान्यो, जो - याकों यह विद्या स्फूर्त तो भई ।

वार्ता प्रसंग—४

बहोरि मुरारीदास कौ बड़ो बेटा हो । सो अपने पिता पास विद्या पढ़ि के 'विज्ञापुर' गयो । तहां जाय के यह सर्व मायावादीन कों जीत्यो । भक्तिमार्ग दृढ़ कर्यो । तब दक्षिन के ब्राह्मन आपुस में कह्यो, जो - हमारे आगे यह गुजराती जीत्यो ! यह बड़ो आश्चर्य लागत है । पाछें उन ब्राह्मनन मुरारीदास के बेटा सों पूछ्यो, जो - तुम्हारो कौन संप्रदाय है ? तब मुरारीदास के बेटा ने उन ब्राह्मनन सों कही, जो - हमारी बल्लभी संप्रदाय है । हम श्रीगुसाईजी के सेवक हैं । तब वा महाराष्ट्र ने कही, जो - यह सांची बात है । श्रीगुसाईजी ने प्रथम हू मायावाद कौ खंडन कियो है । पाछें वह मुरारीदास कौ बेटा कछूक दिन विज्ञापुर में रहि कै अपने देस आयो । अपनी माता सों मिल्यो । तब मुरारीदास कहीं गाम गए हुते । सो जब मुरारीदास गाम सों आए तब मुरारीदास कौ बेटा मुरारीदास सों मिलि कै दक्षिन के ये सर्व समाचार कह्यो । तब बेटा के वचन सुनि कै मुरारीदास बोहोत प्रसन्न भये ।

सो ये मुरारीदास और यह इन कौ बेटा, ये दोऊ श्रीगुसाईजी की कृपा तें ऐसैं पंडित भए । तातें इनकी वार्ता कौ पार नहीं, सो इनकी वार्ता कहां ताई कहिए । वार्ता ॥ १३० ॥

अब श्रीगुसाईंजी की सेवक एक वनिया वैष्णव, राजनगर को, जाने भोग में चेली धरी, तिनको वार्ता को भाव कहत हैं —

भावप्रकाश—ये तामस भक्त हैं । लीला में इन का नाम 'अनम्या' है । ये 'नंदा' तें प्रगटी हैं, तातें उनके भावरूप हैं ।

ये राजनगर में एक द्रव्यपात्र वनिया के जन्म्यो । सो उह वनिया श्रीगुसाईंजी की सेवक हुतो । सो वाने अपने वेटा को श्रीगुसाईंजी की सेवक करायो । सो यह वरस बीस को भयो तव याको पिता मरयो । पाछें यह भाईला कोठारी के उहां नित्य भगवद्वार्ता सुनिवे जाई । तव याके मन में आई, जो-हों श्रीठाकुरजी पधराई सेवा करों तो आछौ ।

वार्ता प्रसंग—१

सो एक समै गुजरात को संग व्रज में आयो । सो श्रीगोकुल में श्रीगुसाईंजी के दरसन करि कै कछू दिन रहि के श्रीनाथजीद्वार गयो । सो वा संग में वह वैष्णव हू आयो । सो वह नित्य श्रीनाथजी के मंदिर में सेवा करिवे को जातो । सो सब सेवा नजरि में राखे । सो एक दिना राजभोग आयवे को समय हतो । ता समै मुखिया भीतरिया ने जलघरियान तें कही, जो - चेली खासा करि कै लावो । तव जलघरियान ने चेलीन को दोना भरयो हतो सो भीतरियान को दीनो । सो इन वैष्णव देख्यो । सो अपने मन में विचारी, जो - यहू श्रीठाकुरजी के राजभोग में आवत हैं । सो कितने दिन पाछें वह संग श्रीगुसाईंजी सों श्रीनाथजी सों विदा होइ के गुजरात चलन लाग्यो तव वह वैष्णव श्रीगुसाईंजी सों विनती कियो, जो - महाराज ! मोको सेवा पधराइ दीजिए । तव श्रीगुसाईंजी वाको एक लालजी को स्वरूप पधराइ दिए । सो वह वैष्णव अपने ठाकुर को ले वा संग में चलयो । सो कछूक दिन में अपने घर आयो । तव वैष्णव ने चेली गढ़वाई । सो श्रीठाकुरजी को राजभोग धरे तामें एक

पधराय देऊ। सो वा वैष्णव ने वामें की सामग्री—द्रव्य सब श्री-मथुराजी जाँई श्रीयमुनाजी में पधराय दीना। सो वामें की कछु श्रीठाकुरजी के काम आई नहीं।

सो वह क्षत्री कों श्रीगुसाँईजी के वचन कों ऐसो दृढ़ विश्वास हतो।

भावप्रकाश—यामें यह जतायो, जो-आसुरी द्रव्य लिये तें भगवत्सेवा में प्रतिबंध होई। बहिर्मुखता प्राप्त होई। तातें आसुरी द्रव्य सर्वथा ग्रहण करना नहीं। और यह जताए, जो - गुरु के वचन में वैष्णव कों सर्वथा विश्वास करना।

सो वह क्षत्री श्रीगुसाँईजी कों ऐसो कृपापात्र भगवदीय हतो। तातें इनकी वार्ता कहां ताँई कहिए। वार्ता ॥१३२॥



अब श्रीगुसाँईजी के सेवक दोई भाई पटेल, गुजरात में रहते, तिनकी वार्ता कों भाष कहत है—

भावप्रकाश—ये तामस भक्त हैं। लीला में इन के नाम 'भक्तिनि' और 'आवेसिनी' हैं। ये 'ब्रजमंगला' तें प्रगटी हैं, तातें उनके भावरूप हैं। सो बड़ो भाई भक्तिनि कों प्रागट्य है, और छोटे भाई आवेसिनी कों प्रागट्य जाननो।

ये दोऊ गुजरात में एक गाम में एक पटेल कुन्वी के जन्मे। सो बरस तीस-पैंतीस के भए तब इन के मा-बाप मरे। पाछें ये तीरथ कों चले। सो द्वारिकाजी आए। सो ता समै श्रीगुसाँईजी आप द्वारिकाजी विराजत हते। सो तहां श्रीगुसाँईजी नित्य श्रीसुबोधिनीजी की कथा कहते। सो इन दोऊ भाई सुने, जो-अमूक ठौर कथा होत है। सो दोऊ कथा सुनिवे कों आए। सो कथा सुनत ही इन दोऊन के मन में यह आई, जो-इन के सेवक हूजिए। पाछें इन दोऊ श्रीगुसाँईजी सों विनती कीनी, जो-महाराज! हम कों सेवक कीजिए। तब श्रीगुसाँईजी दोऊन की आरति देखि दोऊन कों नाम-निवेदन कराय सेवक किये। पाछें दोऊन ने विनती कीनी, जो-महाराज! अब कहा कर्तव्य है? तब श्रीगुसाँईजी दोऊन सों कहे, जो-तुम भगवत्सेवा करो। और वैष्णवन कों संग करो। तब दोऊ भाई कहे, जो-महाराज! कृपा करि भगवत्सेवा पधराइ दीजिये। तब श्रीगुसाँईजी दोऊन कों एक लालाजी कों स्वरूप पधराय दिये। पाछें सेवा की सब

रीति बताए। तब दोऊ भाई आज्ञा मांगि श्रोठाकुरजी कों पधराय अपने घर आये। तहां गाम के वैष्णवन की मंडली होंई। तामें ये नित्य भगवद्वार्ता सुनिवे कों जाने।

वार्ता प्रसंग—१

सो दोई भाई खेती करते। तहां वह गाम के राजा ने एक बड़ो तलाव खुदायो। ताके भीतर तें एक देवी कौ स्वरूप निकस्यो। सो एक सिला हाथ चारि की तामें देवी कौ स्वरूप। सो वह देवी नें राजा कों स्वप्न में कह्यो, जो - एक बड़ो देवालय करि कै और मेरी पूजा चलावो। तब राजा ने कही, आछो। पाछें प्रातःकाल उठि कै राजा ने विचार कियो, जो - यह देवालय बनायवे कौ काम है। सो यामें द्रव्य वोहोत लगोगो। सो कछू गाम सों लीजिए। कछू में लगाय कै मंदिर सँवराऊं। तब राजा ने कामदार कों बुलाय कै कह्यो, जो - गाम सों कछू द्रव्य लेहु। सो देवी कौ मंदिर वनावेंगे। तब कामदार ने सगरे गाम में यथासक्ति दंड कियो सब सों। सो कोई पै एक रुपैया कोई पर अरघ रुपैया, बड़े बड़े सेठ पर पचास पचास रुपैया। जैसी आसामी तैसो दंड कियो। सो देवी के मंदिर कौ नाम सुनि कै वोहोत प्रसन्न होइ कै दियो। सो दोई भाई पटेल श्री-गुसाईजी के सेवक हे। उन पर दोई रुपैया दंड कियो। सो राजा के मनुष्य रुपैया मांगन आये, जो-देवी कौ मंदिर वनेगो। तातें दोइ रुपैया तुम देउ। सवन ने दिये हैं। यह सुनि कै दोऊ भाई आपुस में वतराए। तब एक भाई ने कह्यो, जो - राजा के वसिये हैं तातें राजा कहे सो करनो। दोई रुपैया देऊ। तब दूसरे भाई ने कह्यो, जो - अपने घर में सगरो द्रव्य श्री-गुसाईजी कौ है। सो कैसे दियो जाँय? देवी के मंदिर के लिये?

भावप्रकाश—यामें यह जतायो, जो वैष्णव कों अपनी द्रव्य अन्य कार्य में

सर्वथा खरचनो नहीं । काहे तें, जो - वह द्रव्य तो प्रभु कौं है । ताते प्रभुन के उपयोग में ही ल्यावनो ।

तव दोऊ भाई पटेल ने राजा के मनुष्य सों कह्यो, जो - काल्हि तुम दोड़ रुपैया ले जैयो । आज हमारे पास नहीं है । तव राजा के मनुष्य ने कही, जो - काल्हि मैं नहीं फिरंगो । आज मैं जात हों । तुम जरूर रुपैया दोड़ करि राखियो । ऐमें कहिके राजा कौ मनुष्य गयो । पाछें दोऊ भाई पटेल ने कह्यो, अब कहा करिये ? दोड़ रुपैया श्रीठाकुरजी के वृथा जात हैं । तव छोटे भाई ने बड़े भाई सों कह्यो, एक उपाय है । एक अंधियारी कूप है । तामें कीच बोहोत है । ता कुआँ पे आपुन दोऊ चलि के वह तलाव पर देवी है ताको अर्द्धरात्रि में उठाय के वा कुआँ में धरि आओ । तव राजा दंड काहे कौ लेइगो ? तव बड़े भाई ने सुनि के कह्यो, जो - यह तू भलो विचार कियो । पाछें जब अर्द्धरात्रि भई तव दोऊ भाई पटेल उह तलाव पै जाय के अंध्यारे कुआँ में देवी कों धरि आए । तव देवी वाही समै विकराल रूप धरि के वा गाम के राजा पास वाही समै रात्रि कों गई । सो जाँइ के राजा कों जगायो । राजा-रानी दोऊ विकराल स्वरूप देखि के डरपे । मन में कहें, जो - अब हम न वचेंगे । यह हमारो प्रान लेइगी । तव राजा मन में धीरज धरि के कह्यो, जो - तुम कौन हो ? और कहा निमित्त इहां आए हो ? तव देवी कह्यो, तू मोकों बोहोत दुःख दियो है । तातें मैं अब तोकों खाउंगी । तव राजा ने जानी, जो - यह देवी है । तव राजा ने कह्यो, जो माता ! मैं तुम कों कहा दुःख दियो है ? सो तुम कहो । तुमने तलाव पै मंदिर

वनवाइवे की कही है सो गाम में तें कछू द्रव्य आयो है और कछू आवेगो । और कछू मैं अपने घर तें लगाउंगो । तुम्हारो मंदिर सिद्ध कराय के पूजा तुम्हारी चलाउंगो । और तुम कों कहा दुःख है ? तव देवी ने राजा साँ कही, मंदिर तो जव वनावेगो तव दीसेगी । परि मैं तो अंधियारे कूप में परी हों । यह सुनि के राजा मन में बड़ो आश्चर्य भयो । तव राजाने पूछी, जो- ऐसो जगत में कौन है, जो- तुम्हारो अपराध करि सके ! सो तुम अंधियारे कुआँ में कैसे गिरी हो ? सो बात तो कहो । कोई मेरे गाममें अपराध कियो होय तो ताकों मैं दंड करों । तव देवी राजा साँ कहे, जो- तेरे गाम के दोई भाई पटेल हैं सो तैं उनके ऊपर दंड क्यों कियो ? वे तो वैष्णव हैं । श्रीगुसाईजी के सेवक हैं । सो उनके ऊपर दंड तू कियो तातें उन पटेलन ने हम कों कुआँ में डारी है । सो यह तेरो दोष भयो । तातें मैं तोकों खाउंगी । तव राजा ने कही, जो- मैंने तो विना जाने उन ऊपर दंड करयो है । मैं उनको स्वरूप जान्यो नाहीं । अब मैं काल्हि उनके ऊपर कौ दंड माफ करूंगो । तुम मोकों काहे कों खात हो ? यह अपराध तो मोसाँ विना जाने कौ परयो है । सो छिमा करो । तव वह देवी ने कही, जो काल्हि उह पटेल के ऊपर कौ दंड माफ करियो । और उन दोउ भाई पटेल साँ डरपत रहियो । उन कों कछू दुःख देइगो तो तेरो भलो न होइगो । या प्रकार राजा कों सिखा करि के देवी गई । तव राजाने वाही समे अपने कामदार कों बुलाय के पूछयो, जो- फलाने पटेल दोऊ भाई हैं तिनके ऊपर कितनो दंड परयो है ? तव कामदार ने कही, जो- दोइ स्पेयान कौ

दंड उनके ऊपर परचो है । सो अब ही तो उन दिये नहीं । प्रातःकाल मनुष्य पठाय के मंगाय लेंगे । तब राजा ने कामदारों को कहा, जो - उन पटेलन के ऊपर कौ दंड माफ करो । अब मनुष्य उनके मति पठाईयो । तब कामदार कही, अब उनके घर ऊपर कौ दंड छोरे । अब मनुष्य न पठावेंगे । पाछे राजा को कामदार विदा मांगि के अपने घर गयो । पाछे प्रातःकाल राजा उठि के उह अंधियारे कूप के पास गयो । तहां उन मनुष्य को लगाय के देवी को उह कूप में तें काढ़ि के आपने घर ले गयो । एक ब्राह्मन को पूजा करावन लाग्यो । और राजा आप चलि के उन पटेल के घर आय के पटेल को कहा, जो - देवी को उठाय के कुआँ में डारि आये सो देवी मोको मारन आई । तासों आज तें अब तुम्हारे ऊपर दंड कवहू न करेंगे । और तुम कवहू देवी को दुःख मति दीजो । तब पटेल ने कहा, जो - राजा ! देवी को हम को कछू वेर तो नहीं हैं । हम तो काहू को दुःख नहीं देत है । यह तो हम इतनो याके लिये कियो है, जो - हमारे कछू द्रव्य नहीं हतो । तब राजाने रुपैया ४००) उन पटेलन के आगे धरयो । कहा, जो-यह तुम लेऊ । तुम बड़े वैष्णव हो । तुम को देवी दंड नहीं दे सकत तो मैं कैसे दंड देहुंगो । यह दंड अनजाने भयो ताते मेरो अपराध क्षमा करो । तब पटेल ने कहा, जो - हम काहू को द्रव्य लेत नहीं । खेती करत हैं । तामें आछी भांति घर को खर्च चलत है । सो तुम यह द्रव्य ले के काहू ब्राह्मन को पून्य करि दीजो । देवी के मंदिर में लगाइयो । तब राजा पटेल की बोहोत बड़ाई करि के अपने घर आयो । पाछे राजानें तलाव पै देवी को मंदिर समरायो । तहां देवी को



वैठारी । सो सगरो गाम उह देवी कों मानें । और पटेल वे दोऊ भाई कवहू उह देवी के मंदिर में न गए । कवहू दरसन न किये । ता पाछें श्रीठाकुरजी सानुभावता जनावन लागे । सो सगरे समाचार एक वैष्णव ने श्रीगुसांईजी के आगें कहे । सो सुनि कै श्रीगुसांईजी उन पटेलन ऊपर वोहोत प्रसन्न भए ।

भावप्रकाश—या वार्ता में वैष्णव कौ स्वरूप जताए, जो - वैष्णव सर्वोपरि हैं । देवी देवता सब उन सों डरपत हैं । उन की आज्ञा में रहत हैं । तातें वैष्णव कों अन्याश्रय सर्वथा न करतो । और अपने द्रव्य कों भगवद्अतिरिक्त काम में न लगावतो । काहेतें, जो-उह प्रभुन कौ द्रव्य है । सो प्रभुन के कार्य में खच होई । अन्य देवी-देवतान के अर्थ खर्च करे तो बहिर्मुख होई ।

ऐसैं दोऊ भाई पटेल अनन्य टेक के भगवदीय हते । जिन की बड़ाई श्रीमुख तें श्रीगुसांईजी करते । तासों उन की वार्ता कहां ताई कहिए ? वार्ता ॥१३३॥



अब श्रीगुसांईजी कौ सेवक, एक विरक्त, सो श्रीगोकुल में रहतो, तिनकी वार्ता कौ भाव कहत हैं—

भावप्रकाश—ये सात्विक भक्त हैं । लीला में इनको नाम 'विरहात्मिका' है । ये 'ब्रजमंगला' तें प्रगटी हैं । तातें उनके भावरूप हैं ।

वार्ता प्रसंग—१

सो विरक्त श्रीगुसांईजी कौ सेवक हतो । सो चुकटी मांगि कै निर्वाह करतो । सो मानसी सेवा वोहोत स्नेह सों करतो । श्रीआचार्यजी, श्रीगुसांईजी के ग्रन्थ वोहोत पाठ करत हतो । पुष्टिमार्ग में रूचि आछी हती ।

और श्रीगुसांईजी की सेवकिनी एक क्षत्रानी हती । ताके पास द्रव्य वोहोत हुतो । तासों उह विरक्त कौ स्नेह हतो । सो वह क्षत्रानी सों मिलि कै भगवद्वार्ता भगवदस्मरण करे । ता

पाछें महाप्रसाद लेहि । और वह विरक्त और ठौर चुकटी मांगे, परंतु वह क्षत्रानी के घर न मांगतो । कछु लौकिक कौ संबंध नाहीं । इतनी वह विरक्त के मन में आस ही, जो-कवहू मोकों कछु द्रव्य कौ काम परेगो तो अटकी न रहेगी, यह देखी । सो यह अन्याश्रय तें श्रीठाकुरजी वा विरक्त कों सानुभावता न जनावत ह ।

तव श्रीगुसाईजी विचारें, जो-वैष्णव कों रंचकहू अन्याश्रय होई तो भगवद् प्राप्ति न होई । तातें याकों अन्याश्रय तें छुडावनो । सो वह विरक्त जब श्रीगुसाईजी के दरसन कों आयो, तव श्रीगुसाईजी उह वैष्णव सों कहे, जो-तू वह क्षत्रानी कौ स्नेह छोरि दे । तव वा विरक्त ने कह्यो, जो-महाराज ! वह क्षत्रानी कौ स्नेह तो मेरे प्रान के संग ह । सो मोसों छूट नाहीं । सो मैं आप के आगे झूठ काहे कों वोळूं ? और मेरे लौकिक संबंध कछु नाहीं । सो आप अंतरयामी हो । सो सब जानत हो । यह सुनि के श्रीगुसाईजी चुप होइ रहे । पाछें श्रीगुसाईजी दिन दस-पंद्रह पाछें वह विरक्त सों कहे, जो-वैष्णव ! हम कों रुपैया हजार पांच चाहिए । सो हमारे दस-बीस दिन में हुंडी आवेगी । तव तुम कों देहिंगे । तुम्हारे काहू सों पहिचान होई तो ल्याय देउ । तव वह विरक्त ने कह्यो, जो-महाराज ! रुपैया चाहिए सो तैयार है । मैं लाउंगो । पाछें वह वैष्णव वह क्षत्रानी पास गयो । और कह्यो, जो-आज मेरो एक काम परयो है । सो तासों तू नाहीं मति कीजो । तव वह क्षत्रानी ने कह्यो, जो-मैं तुम्हारी हों, सब घर तुम्हारो है, तुम कहो सो मैं करों । तव वैष्णव कही, हजार पांच रुपैया श्री-

गुसाईजी मोसों मांगे हैं, सो दिन दसवीस में आप के यहां हुंडी आवेगी तव मैं ल्याय देउंगो । सो मोकों देउ । तव वा क्षत्रानी ने कही, जो रुपैया चाहो सो तुम ले जाऊ । परंतु तुम ही मोकों ल्याय दीजो । मैं श्रीगुसाईजी की सेवकिनी हूं । तासों मैं उन सों रुपैया नहीं मांगूंगी । तव उन विरक्त वैष्णव ने कही, जो - तू चिंता मति करे । श्रीगुसाईजी कह्यो है सो हुंडी मैं तोकों ल्याय देउंगो । यह सुनि कै वह क्षत्रानी पांच हजार रुपैया की थेली निकसि वा विरक्त कों दीनी । सो वह विरक्त वे थेली ले कै श्रीगुसाईजी के पास महा आनंद सों आयो । मन में वैष्णव ने विचारयो, जो - आज क्षत्रानी वोहोत काम आई । जो - वह रुपैया न देती तो मैं श्रीगुसाईजी कों कहा देतो ? तातें यह क्षत्रानी बड़ी हितकारनी है । पाछें पांचो हजार रुपैया लेकै श्रीगुसाईजी के आगे धरि कै दंडवत् कियो । तव श्रीगुसाईजी (ने) उह वैष्णव की वोहोत बड़ाई करी । कह्यो, जो - वैष्णव ! तू भले समे रुपैया ल्यायो । हमारे जरूरी काम हतो । तव वैष्णव ने कह्यो, जो - महाराज ! वह क्षत्रानी के पास तें ले आयो हूं । यह सुनि कै श्रीगुसाईजी कहे, जो - प्रीति स्नेह ऐसो ही चाहिए । जो - मांगिये सो मिले । पाछें वैष्णव कों एक वीरा दे कै श्रीगुसाईजी विदा कियो । ता पाछें एक काठ के सिंढूक में पांचों थेली धरि तारौ लगाय के धरती में गड़ाय दिये । और वैष्णव वीरा ले कै उह क्षत्रानी के पास आयो । आधो वीरा वह क्षत्रानी कों दियो । वह वैष्णव मन में चाहोत प्रसन्न भयो ।

पाछें श्रीगुसाईजी कछु बोले नहीं । कब हू रुपैया देव

की बात नहीं कहे । सो महिना दोई बीति गए । तब वह क्षत्रानी विरत सों कह्यो, जो-महिना दोइ बीति गए तुम रुपैया ल्याये नहीं । तब इन कह्यो, जो-जा दिन तें मैं रुपैया श्रीगुसाईजी कों दिये हें ता दिन तें आप मोसों बोलत नहीं । और काहू दिन उन रुपैयान की चर्चा हू नहीं किये । सो अब मैं कैसे करों ? तब वह क्षत्रानी ने कही, तुम श्रीगुसाईजी सों पूछो तो सही । तब उह वैष्णव जाँइ के श्रीगुसाईजी के पास बैठ्यो । परंतु संकोच करि के पूछि न सक्यो । ऐसैं ही दोइ दिन बीति गए । तब वह क्षत्रानी ने वैष्णव सों कह्यो, जो-ऐसैं संकोच किये कैसें वनेगी ? तुम जरूर आज श्रीगुसाईजी सों पूछो । तब वह वैष्णव आइ के संकोच सहित श्रीगुसाईजी सों विनती करी, जा-महाराज ! वह क्षत्रानी के पांच हजार रुपैया जो हें, सो मैं उधार ल्याय के दियो हूं । सो वह क्षत्रानी मोसों मांगति हें । तब श्रीगुसाईजी कहे, जो-वैष्णव ! हमारे पांच हजार रुपैया अब ही कहां तें आए ? दोई-चार बरस कौ परदेस करेंगे । तब खरच बचेगो तब हम देखेंगे । और तुम्हारी तो वह क्षत्रानी सों बड़ी प्रीति हें । तुम सों वह क्यों मांगति है ? यह श्रीगुसाईजी के वचन सुनि के वह वैष्णव सूकि गयो । मन में कह्यो, जो-मैं बोहोत बुरी करी । जो-उह क्षत्रानी कौ द्रव्य लियो । अब मैं क्षत्रानी कों कहा जुबाब देउंगो ? पाछें वह वैष्णव उठि के सोच करत उह क्षत्रानी के पास आयो । तब वा क्षत्रानी वा वैष्णव सों कही, जो-तुम श्रीगुसाईजी सों रुपैयान की पूछी हती ? तब वह वैष्णव ने कही, जो-मैं

पूछी हती । सो श्रीगुसांईजी कहें, जो - दोइ-चारि वरस पर-  
 देस करेगे तव कहूं परदेस तें दोइ-चारि हजार आवेंगे । सो  
 खरच तें रुपैया वचेंगे तव रुपैया मिलेंगे । अव ही तो रुपैया  
 नाहीं है । तव वह क्षत्रानी ने कही, जो - मैं तुम सों पहिले  
 ही कही हती, सो तुम मेरे रुपैया ल्याय देऊ । अव ही तुम  
 श्रीगुसांईजी के पास जाऊ । कहूं तें उधार काढ़ि के श्रीगुसां-  
 ईजी देखेंगे । कव परदेस पधारेंगे सो कह्यो न जाई । और  
 तुम मेरे रुपैया ल्यावोगे तो मेरी तुम्हारी प्रीति रहेगी । तव  
 वैष्णव ने उह क्षत्रानी सों कह्यो, जो - कदाचित् अव ही रुपैया  
 न मिले तो कहा करूं ? यह सुनि के उह क्षत्रानी ने अपने  
 दो मनुष्य बुलाय के उह वैष्णव के पीछे करि दिये और कह्यो,  
 जो - अव ही तो ये मनुष्य तुम्हारे पीछे किये हैं । और रुपैया  
 न ल्यावोगे तो मथुरा में जाँइ के बंदीखाने तुम को देउंगी ।  
 तातें अव ही जाँइ के रुपैया को ले आउ । तव वैष्णव श्रीगु-  
 सांईजी के पास चलयो । और वे दोइ मनुष्य संग चले । सो  
 श्रीगुसांईजी भोजन करि गादी तकिया पर विराजे हते । ता  
 समै यह वैष्णव जाँइ श्रीगुसांईजी को दंडवत् कियो । तव  
 हंसि के श्रीगुसांईजी उह वैष्णव को पूछे, जो - वैष्णव ! तुम  
 क्यों आये ? और ये दोई मनुष्य तुम्हारे संग कैसे आये ? तव  
 वैष्णव कह्यो, जो - महाराज ! उह क्षत्रानी ने मेरे पीछे करि  
 दिये हैं । और मोसों कह्यो है, जो - तुम रुपैया न ल्यावोगे  
 तो मैं तुम्है बंदीखाने मथुरा को जाँइ के दिवाउंगी, तातें  
 रुपैया आज ल्याऊ । सो महाराज मोको बड़ो संकट परयो है ।  
 तव श्रीगुसांईजी कहे, जो - हम तो तुम सों पहिले ही कही

हती. जो - या क्षत्रानी सों स्नेह छोरि देहु । सो तुम नहीं मानी । तव वैष्णवने कही, जो - महाराज ! आप की आज्ञा नहीं मानी तो इतनो दुःख पावत हों । तव श्रीगुसाईजी कहें. जो - वैष्णव ! हम तुम कों उधार रूपैया कहें ते ल्याय के देहि पांचों हजार. तो तुम फेरि वा क्षत्रानी सों स्नेह तो न राखोगे ? तव वैष्णव ने कही. महाराज ! मैं कबहु वाके घर के द्वार उपर नहीं जाऊंगा । जो - अब मेरो पीछे छूटें तो । तव श्रीगुसाईजी वह रूपैयान की सिद्धक मंगाइ के कहें, जो - वैष्णव ! यह तेरे लाये रूपैया पांच हजार ज्यां के त्यों धरे हैं । हम कों तेरे और क्षत्रानी के रूपैया कहा करने हैं ? यह तेरो अज्ञान और अन्याश्रय दूरि करिवे के ताई उपाय कियो हो । तातें रूपैया ले जाऊ । तव वह वैष्णव पांच हजार रूपैया ले के वह क्षत्रानी के पास आयो । तव वैष्णव ने कही. जो - ये अपने रूपैया ले । आजु पाछें तेरो मुख नहीं देखुंगो । तव वह क्षत्रानी बोहोत ही कही, परि वैष्णव वाकी बात सुनी नहीं । तहां ते तत्काल वह वैष्णव उठि के अपने घर आयो । पाछें वह वैष्णव आय श्रीगुसाईजी के पास दंडवत् किये । कह्यो. महाराज ! मोकों बड़ो अन्याश्रय हतो । सो मैं अज्ञान करि के कबहु न छोरतो । सो आपु कृपा करि के छुरायो । तव श्रीगुसाईजी वह वैष्णव सों कहे, जो - तोकों भगवद् प्राप्ति में यह प्रतिबंध हतो सो दूरि भयो । अब तू भगवद् सेवा सुखेन करियो । तव वह वैष्णव विरक्त मानसी सेवा आली भांति सों करन लाग्यो ।

भावप्रकाश—या वार्ता कौ अभिप्राय यह है, जो - वैष्णव कों अन्याश्रय तें बोहोत डरपनो । सो अन्याश्रय कौ स्वरूप कहा है ? जो - काहू बात की

अपेक्षा मन में आवे सोइ अन्याश्रय है । ताते भगवान सिवाय अन्य की कामना ना करे । और स्नेह कौ स्वरूप जताए । जो साँचे स्नेही तो एक नंदनंदन ही हैं । और सब मतलब के हैं । सो भाव या पद में जाननो —

राग . सोरठ

साँचे स्नेही श्रीनंदकुमार ।

और नहीं कोई दुःख कौ बेली सब मतलब के यार ॥

मनुष्य जाति कौ नहीं भरोसो छिनु विहार छिनु पार ।

चित्त बचन कौ नहीं ठिकानो छिनु छिनु पृथक विचार ॥

मातपिता भगिनी सुत दारा रति न निभत एकतार ।

सदा एकरम तुमहीं निभावो 'रसिक' प्रीतम प्रतिपार ॥

ताते श्रीगुसाईजी आप पून पुरुषोत्तम हैं । सोई साँचे स्नेही हैं । सो या वैष्णव कौ या प्रकार अन्याश्रय तें छुड़ाये । ताते एक दृढ़ प्रीति उनही में करनी ।

सो वह विरक्त के ऊपर श्रीगुसाईजी आप ऐसी कृपा किये । ताते वह वैष्णव बड़ो भगवदीय हो । सो इनकी वार्ता कहां ताई कहिए ? वार्ता ॥१३४॥



अब श्रीगुसाईजी कौ संघक एक क्षत्री वैष्णव, आगरे में रहन हुतो, ताकी वार्ता कौ भाव कहत हैं—

भावप्रकाश—ये राजस भक्त हैं । लीला में इन कौ नाम 'नागर-रंजनी' है । सो नागर जो - श्रीठाकुरजी तिनके मन कौ ये रंजन करत हैं । ये 'ब्रजमंगला' तें प्रगटी हैं । ताते इनके भावरूप हैं ।

वार्ता प्रसंग—६

सो वाके आगरे में वजाज की दुकान हती । सो वाके यहां बस्त्रन कौ व्यौपार हतो । सो वाके बस्त्र वोहोत ही उत्तम तें उत्तम आवते । सो श्रीगुसाईजी एक समे आगरा पधारे । सो मारग में याकों श्रीगुसाईजी के दरसन भए । सो दरसन होत ही वाके मन में आई, जो-हों इन कौ सेवक होउं तो आछौ । पाछे श्रीगुसाईजी आप तो रूपचंदनंदा के घर पधारे ।

तब यह क्षत्री हू रूपचंदनंदा के घर आयो। पाछें श्रीगुसांईजी सों विनती कियो, जो - महाराज ! मोकों अपनो सेवक कीजिए। तब श्रीगुसांईजी इनकों देवी जीव जानि नाम गुनाए। ता पाछें दूसरे दिन निवेदन कराए। पाछें श्रीगुसांईजी आप वा क्षत्री सों कहे, जो - वैष्णव ! तुम रूपचंदनंदा को संग करियो। तातें तुम्हारो कल्याण होइगो। तब यह क्षत्री नित्य रूपचंदनंदा के घर जातो भगवद्वाता सुनतो। पाछें श्रीगुसांईजी तो कळक दिन में श्रीगोकुल पधारे। सो यह जब सरनि आयो। तब वाके मन में यह मनोरथ भयो, जो हों श्रीगुसांईजी के सब बालक बहू बेटीन को उत्तम तें उत्तम वस्त्र पहिराउं। सो वाकी हाट में तो वस्त्र उत्तम तें उत्तम बोहोत आवे। सो सारी जरीन की तथा गुजराती कीनखाव तथा जरीन के थान, सो सब जूदे काढ़ि के धरे। सो सब बरस दोई तीन में दोई गांठि भरि के जो वस्त्र भेले किये सो एक में पुरुष के पहिरवे के वस्त्र और दूसरी में स्त्रीन के पहिरवे के वस्त्र, सो गांठि दोइ न्यारी न्यारी करि के वह क्षत्री वैष्णव वजाज दोऊ गांठि वस्त्र की लेके आगरे सों चल्यो। सो श्रीगोकुल आयो। सो श्रीगुसांईजी गादी तकिया पर विराजे हते। सो वह क्षत्री वैष्णव आइ के श्रीगुसांईजी को साष्टांग दंडवत् कियो। तब श्रीगुसांईजी आपु वासों पूछे, जो - तू कव आयो ? तब वह वैष्णव क्षत्री ने कयो, जो - महाराजाधिराज ! आगरे तैं अवही आवत हूं। सो महाराजाधिराज ! मोकों बहोत ही दिन तैं महाराज के दरसन को मनोरथ हतो, जो - मैं अब के सब बालक बहू-बेटी सबन को उत्तम तें उत्तम वस्त्र पहिराउं। सो महाराजाधिराज ! बोहोत



दिन में वस्त्र इकठौरे कीने हैं । सो महाराजाधिराज ! आप अंगीकार कीजे । तव श्रीगुसांईजी नें कह्यो, जो-वह गांठि कहां हैं, ल्याऊ । जो सब वस्त्र-वस्तु देखें । तव वह क्षत्री वैष्णव दोऊ गांठि मंगाइ कै श्रीगुसांईजी के आगें धरी । श्रीगुसांईजी ने दोऊ गांठि खोलि कै देखी । सो वे वस्त्र सब देखि कै उत्तम तें उत्तम, श्रीगुसांईजी आपु वोहोत ही प्रसन्न भए । और श्रीमुख तें कहे, जो-वस्त्र तो श्रीस्वामिनोजी लायक हैं । सो एक गांठि वस्त्र की स्वामिनीजी के वस्त्र की हती, तामें जरी के थान और धरि कै वह गांठि श्रीयमुनाजी के मध्यधारा में पधराय दीनी । पाछें दूसरी गांठि हू पधराय दीनी । तव वह क्षत्री वैष्णव तो वोहोत ही सोच करन लाग्यो । और अपने मन में कही, जो - ऐसैं मैंने अपनो मनोरथ क्रियो हो । सो केतेक दिनन में तो सब एकठोरो करि कै ल्यायो । सो श्रीगुसांईजी महाराज आप योंही श्रीयमुनाजी में पधराय दीने । सो मेरो तो मनोरथ मन कौ मन ही में रह्यो । सो भगवद्दृच्छा । सो याही भांति सो सोच करत रात्रि भई । सो न कछू खायो न कछू पियो । भूखो उहां ही परि रह्यो । सो श्रीगुसांईजी आप तो साक्षात् पूरन पुरुषोत्तम ईश्वर, सो सब वाके मन में की बात जानी । जो-वह क्षत्री वैष्णव के मन में वोहोत ही खेद भयो है । सो श्रीगुसांईजी आप तो परम दयालु हैं । जो - भक्त-वत्सल करुनासिंधु दयासागर हैं । सो खेद सहि न सके । तव श्रीगुसांईजी आप विचारे, जो-जामें या क्षत्री वैष्णव कां खेद निवृत्त होइ सो करिए । सो जब अर्द्धरात्रि भई, तव श्रीगुसांईजी आप मेवा कौ डवरा भरि कै अपने श्रीहस्त में ले के उठे ।

श्रीहस्त सों धरे । तव वह क्षत्री वैष्णव महाप्रसाद ले के पाछे श्रीगुसाईजी की बैठक में आयो, ढंढवत् कियो । तव श्रीगुसाईजी आप वाकों वीरा दे के विदा कियो । सो वह क्षत्री आगरे में अपने घर आयो ।

भावप्रकाश—या वार्ता कौ अभिप्राय यह है, जो-श्रीयमुनाजी के विषे सकल लीला विद्यमान है । सो श्रीआचार्यजी, श्रीगुसाईजी की कृपा होई तव या प्रकार दरसन होई । ताते उन कौ एक दृढ़ आश्रय कर्नो । और वैष्णव कौ श्री-यमुनाजी कौ स्वरूप अलौकिक करि जानतो, यह जताए ।

सो वह क्षत्री वैष्णव श्रीगुसाईजी कौ ऐसी कृपापात्र भगवदीय हो । ताते इनकी वार्ता कहां ताई कहिए ।

वार्ता ॥ १३५ ॥



अब श्रीगुसाईजी के सेवक मेहाधीमर रावल के पास गोपालपुर गाम है, तहां रहतो, तिनकी वार्ता कौ भाव कहत है—

भावप्रकाश—ये तामस भक्त हैं । लीला में इनको नाम 'मंजिरा' है । ये 'सुमन्दिरा' ते प्रगटी है । ताते इनके भावरूप है ।

ये रावल के पास 'गोपालपुर' गाम है, तहां एक धीमर के जन्म्यो । सो बरस बीस कौ भयो तव याकों व्याह भयो । पाछे इनके मा-बाप मरे । सो ये मलाह कौ धंधा करन लाग्यो । सो ये श्रीयमुनाजी में मछली मारि अपनो निर्वाह करतो ।

वार्ता प्रसंग—१

सो एक समै श्रीगुसाईजी गुजरात कौ परदेस करि के पाछे श्रीगुसाईजी गोवर्द्धन पधारे । तहां श्रीनाथजी की सेवा सिंगार करि के दिन तीन तहां रहे । पाछे चौथे दिन राजभोग आरति करि श्रीनाथजी कौ अनोसर कराय के श्रीगोकुल पधारिवे कौ विचार करयो । तहां तें घोड़ा पै असवार होइ के दसपांच वैष्णव संग ले के पधारे । सो 'मई' के घाट पार उतरि के संध्या

समै श्रीगुसांईजी सगरे वैष्णवन सहित रावल पधारे । सो वा दिन श्रीगोकुल पधारिवे कौ सुहूर्त आछो नाही हतो । तासों श्रीगुसांईजी आज्ञा किये, जो - आज सुहूर्त आछौ नाही है । तासों रावल के पास 'गोपालपुर' गाम है, तहां डेरा करो । प्रातःकाल श्रीगोकुल चलेंगे । तव सगरे वैष्णव सेवक टहलुवा भारकस ले के गोपालपुर डेरा किये । वहां डेरा में श्रीगुसांईजी पधारे । पाछें आप वागा उतारि के श्रीयमुनाजी के किनारे संध्यावंदन करन पधारे । तव वैष्णव दसपांच संग गये । सो घाट पै पहोंचे । तव श्रीगुसांईजी देखें तो एक मलाह जाल लिये मछली पकरत है । तव वैष्णव वह मलाह के पास जाँइ के कह्यो, जो - तू इहां तें मछली मति पकरे । श्रीगुसांईजी यहां पधारे हैं । तातें तू उठि जा । तव मेहा धीमर ने कही, जो - आज प्रातःकाल तें कछू खायो नाही है । सो मैं जाल कैसें निकासों ? तव वैष्णव ने एक रुपैया मेहाधीमर कों दियो । और कह्यो, जो - वेगि तू जाल निकारि । तव धीमर ने तत्काल जाल निकार लियो । तव वैष्णव ने मेहा सों कह्यो, जो - तू डेरा तें नेक दूरि वैठयो रहियो । तव तोकों खाइवे कों देइंगे । अब तू इहां तें उठि जा । तव वह मेहा धीमर अपनो जाल लेके वेगि ही उठि के अपने घर गयो । पाछें श्रीगुसांईजी श्रीयमुनाजी के तीर वैठि के संध्यावंदन किये । पाछें अपने डेरा में वैष्णव सहित पधारे । सो पाक करि भोग धरें । पाछें आप आरोगे । तव सगरे वैष्णव हते तिनकों जूठनि की पातरि श्रीगुसांईजी धरन लागे । तव वैष्णव श्रीगुसांईजी सों विनती करी, जो - महाराज ! एक पातरि और धरनी

हे । या गाम में एक हीन जाति कौ रहत हे । ताकों दन कहें हैं । सो वह भूखो रहंगो । तव श्रीगुसाईजी कहें, जो - मैं जानत हों ! ताके लिये तो आज इहां डेरा किये हैं । यह मुनि के सब वैष्णव चुप करि रहे । तव एक ब्रजवासी मां श्रीगुसाईजी कहें, जो - या गाम में मेहा धीमर रहत हे । ताकों बुलाय के वाहिर ठाढ़ो करो । तव ब्रजवासी डेरा सां वाहिर जाँइ के गाम के पास मेहा कां पुकारयो । सो मेहा पहिले ही तें महाप्रसाद के लिये दूर बैठयो हतो । वैष्णव प्रथम कहें हते । तासां डेरा वाहिर नेक दूरि बैठयो हतो । सो मेहा ब्रजवासी के पास आय के पूछयो, जो - तुम मोकां काहे के लिये बुलावत हो ? तव ब्रजवासी ने कही, जो - तोकां श्रीगुसाईजी बुलावत हैं । तव मेहा ब्रजवासी के संग चलयो । सो ब्रजवासी मेहा कां वाहिर ठाढ़ो करि के ब्रजवासी ने श्रीगुसाईजी सां चिनती करी, जो - महाराज ! मेहा वाहिर ठाढ़ो हे । तव श्रीगुसाईजी पातरि भरि करि के अपनी जूठनि अपने श्रीहस्त में लेके डेरा के वाहिर पधारे । सो मेहा कां दिये । और मेहा सां कहें, जो - तू अपनी स्त्री के संग लीजो । दोऊ मिलि के । तव मेहा आधी पातरि अपनी स्त्री कां दियो । और आधी आप लियो । सो दोऊ महाप्रसाद लियो । सो महाप्रसाद लेत ही दोऊन की बुद्धि निर्मल होइ गई । तव स्त्री मेहा सां पूछयो, जो - आज यह महाप्रसाद कहां तें ल्याये हो ? तव मेहाने कही, जो - श्रीगुसाईजी श्रीविठ्ठलनाथजी आगे मथुरा में रहते सो अब श्रीगोकुल में रहत हैं । सो आज इहां पधारे हैं । सो वैष्णव आज मोकां एक रुपैया दियो हे । और श्रीगुसाईजी मोकां अपने श्रीहस्तकमल

सों यह प्रसाद दियो है । ये साक्षात् ईश्वर कहियत हैं । तव स्त्रीने कही, जो - चलो इनकी सरनि जैये । तव मेहा ने अपनी स्त्री सों कही, जो - हम तो ज्ञाति करि के हीन हैं । हम कों सरनि कैसे लेइंगे ? तव स्त्रीने कही, जो - तुम चलो तो सही । जैसे प्रसाद दिये हैं कृपा करि तैसे ही सरनि लेइंगे । तव मेहा और मेहा की स्त्री दोऊ जनें श्रीगुसाईजी के डेरा पास रात्रि कों बैठि रहे । तव ब्रजवासी उन सों पूछी, तुम कौन हो ? और या समै रात्रि कों डेरा के निकट क्यों बैठे हो ? तव मेहा ने कही, जो - हम कों श्रीगुसाईजी महाप्रसाद दिये हैं । तातें हम बैठें हैं । तव वा ब्रजवासी ने कही, जो - अब तो तुम उठि जाउ । इहां मति रहो । कछु काम होइ सो कहो । तव मेहा ने कही, जो - हम अब कहां जाँइ, सो कहो ? अब हम श्रीगुसाईजी की सरनि आए हैं । अब हम कों कहुं ठौर नहीं है । यह हमारी विनती है, सो श्रीगुसाईजी सों कहो । पाछें हम कों उठाइयो । तव ब्रजवासी श्रीगुसाईजी सों कही, जो - महाराज ! मेहा धीमर स्त्री सहित बैठयो है । सो कहत है, जो - हम श्रीगुसाईजी की सरनि आये हैं । हम बोहत कही। परि वह जात नहीं । मेहा ने यह कही, जो - हम कों और ठौर नहीं है । यह भांति दोऊ जनें डेरा के बाहिर बैठे हैं । तव श्रीगुसाईजी ब्रजवासी सों कहे, जो - तू जाँइ के मेहा सों कहि आऊ, जो - आज तुम सोय रहो । काल्हि प्रातःकाल तुम्हारे अंगीकार करेंगे । तुम चिंता मति करो । तव ब्रजवासी डेरा सों बाहिर आय के मेहा सों कही, जो - आज तुम सोय रहो । काल्हि प्रातःकाल तुम दोऊ जनें कों अंगी-

कार श्रीगुसाईजी करेंगे । या भांति सां आप आज्ञा करी हे । तव मेहा ने कही, जो - अब हम कहां जाय । याही ठौर बैठे हैं । श्रीगुसाईजी के डेरा की चांकी देत हैं । नींद आवेगी तो इहां साय रहेंगे । तुम हमारी चिंता मति करो । तव ब्रजवासी अपने कामकाज कों गयो । श्रीगुसाईजी आपु पौढे । और मेहा और वाकी स्त्री सगरी रात्रि जागत रहे ।

पाछें प्रातःकाल श्रीगुसाईजी श्रीयमुनाजी कों पधारे । तव मेहा स्त्री सहित देहकृत्य करि के विनती करी, जो - महाराज ! मेरो अंगीकार करो । तव श्रीगुसाईजी मेहा सों कहे, जो - जीव की तू हत्या करत हे । तेरो अंगीकार कैसें करें ? तव मेहा ने कही, जो - महाराज ! आज पाछें जीव क्वहू न मारुंगो । तव श्रीगुसाईजी कहे, जो - अपना निर्वाह कौन प्रकार करेगो ? तव मेहा ने विनती करी, जो - महाराज ! मैं खेती करि के अपना निर्वाह करुंगो । तव श्रीगुसाईजी मेहा सों पूछे, जो - स्त्री तेरे अनुकूल हे ? तव मेहा ने कही, जो - मोसों अधिक धर्म स्त्रीमें हे । याही की प्रेरना सों मैं आप की सरनि आयो हूं । यह सुनि के श्रीगुसाईजी प्रसन्न भए । तव आज्ञा करी, जो - तुम दोऊ जनें न्हाइ आओ । तव श्रीगुसाईजी दोऊन कों नाम सुनाये । तव मेहा ने रुपैया एक वैष्णव सों पायो हतो सो श्रीगुसाईजी की भेंट करयो । और कह्यो, जो - महाराज ! यह रुपैया आपही के वैष्णवन ने मोकों दियो है । तासों यह आप कौ है । और चारि चारि पैसा और दोऊ जनेंन और भेंट करे । पाछें मेहा ने श्रीगुसाईजी सों विनती करी, जो - महाराज ! मोकों भगवत्सेवा पधराय देऊ । तव श्रीगुसाईजी पूछे, जो - तेरो

मन वस्त्र-सेवा पै है के स्वरूप-सेवा पे ? तव मेहा ने विनती करी, जो - महाराज ! मेरो मन स्वरूप-सेवा पै हैं । जो - बालक की नाई सेवा करों । यह सुनि कै श्रीगुसाईजी आज्ञा किये, जो - यहां तू एक हाथ धरती खोदि इहां स्वरूप निकरेंगे । तव मेहा ने श्रीयमुनाजी के किनारे खोद्यो । सो एक छोटी सो स्वरूप गौर वरन परम सुंदर निकरयो । सो श्रीगुसाईजी उह स्वरूप कोँ अपने डेरा पै ले आए । एक संपुट में पधराय कै भोग धरि कै पाछें मेहा कोँ दिये । सब सेवा कौ प्रकार कहे । और कहे, जो - सेवा में सावधान रहियो । तव मेहा स्त्री सहित श्रीगुसाईजी कोँ दंडवत् किये । पाछें एक कीर्तन गायो—

राग भैरव

श्रीविठ्ठल प्रभु महा उदार ।

महा पतित सरनागति लीनो निर्भै करि दीनो निद्वार ।

वेद पुरान सार जो कहियत सो पुरुषोत्तम हाथ दियो ।

‘मेहा’ प्रभु गिरिधर फिरि प्रगटे पुष्टि भक्ति सुदृढ कियो ।

यह कीर्तन सुनि कै श्रीगुसाईजी वोहोत प्रसन्न भए । जाने, याकोँ स्वरूप कौ ज्ञान भयो । पाछें श्रीगुसाईजी श्रीगोकुल पधारे । और मेहा गोपालपुर में भली भांति सोँ सेवा करे । कवहू संदेह परे उत्सव में मार्ग की रीति में तो श्रीगोकुल जाँइ श्रीगुसाईजी सोँ पूछि आवें ।

भावप्रकाश—यामें यह जतायो, जो - सेवा गुरु की आज्ञा प्रमान करे । मन कल्पित प्रकार सोँ न करे । नातरु प्रभु प्रसन्न न होई । सो श्रीआचार्यजी महाप्रभु ‘नवरत्न’ ग्रंथ में लिखे हैं । सो श्लोक—

‘सेवा कृतिर्गुरोराज्ञा चाधनं वा हरिच्छया ।’

ताते गुरु की आज्ञा प्रमान सेवा करे, यह सिद्धांत भयो ।

और मेहा अकेले श्रीठाकुरजी को कबहू छोरे नहीं । एक दिन मेहा श्रीगोकुल आवें । श्रीगुसाईजी के दरसन करि जाई । एक दिन मेहा की स्त्री दरसन करि जाई । और मेहा ने घर में मृत्तिका को मंदिर बनाय के तामे किवाड़ काष्ट के रंगीन करे । सो तामे श्रीठाकुरजी को सिंघासन पर पधराये । तहांई सिज्या रहे । सो रात्रि को किवाड़ लगाय दोऊ अपने अपने ओसरे रखवारी करे । और मेहा ने श्रीयमुनाजी के किनारे खेती करी । सो मेहा खेत पर जाई । तव मेहा की स्त्री अकेली रखवारी करे । या भांति दोऊ मिलि के अत्यंत स्नेह सो सेवा करे । सो या भांति कछुक दिन वीते । सो एक दिन श्रीगुसाईजी विचार कियो, जो - अन्नकूट के दिन दस रहे हैं । तव सब वैष्णव सेवक सो कहे, जो - अन्नकूट के दरसन को श्रीजीद्वार चलनो हे । सो कौन कौन चलेगो ? तव वैष्णव विनती करी, जो - महाराज ! आपु जाको आज्ञा देउगे सो चलेगो । तव श्रीगुसाईजी दस पांच वैष्णव और ब्रजवासी इन को श्रीगोकुल राखे । और सवन को आज्ञा दिये । ता समे मेहा श्रीगुसाईजी के दरसन को आये हते । तव श्रीगुसाईजी मेहा सो पूछे, जो - तू अपने घर रहेगो के श्रीजीद्वार चलेगो ? तव मेहा ने कही, जो - महाराज ! मेरे मन में यह है, जो - श्रीठाकुरजी को पधराइ के आप के संग चलों । और आप आज्ञा करो तैसें करों ? तव श्रीगुसाईजा कहे, जो - सुखेन चलो । पाछे मेहा आपने घर गयो । तव जाई के विचार कियो, जो - खेती करी है ताको कहा करों ? सो वा गाम में एक गोरवा रहत हतो, भलो मनुष्य हतो । ताको



खेती घर सोंपि अपनी स्त्री, श्रीठाकुरजी सहित श्रीगोकुल आए ।  
 पाछें दिन द्वै-एक में श्रीगोकुल तें श्रीगुसाईंजी श्रीजीद्वार  
 पधारे । तव मेहा श्रीठाकुरजी कों लेकें स्त्री सहित गोपालपुर में  
 आए । तव श्रीगुसाईंजी गाँइ की खरिक् में एक कौठा मेहा कों  
 वतायो । तामें मेहा लीप कै खासा करि कै रह्यो । सो अन्न-  
 कूट की ठौर करयो । मृतिका कौ मंदिर बनायो । यथासक्ति  
 थोरी थोरी सामग्री करयो । श्रीगुसाईंजी, श्रीनवनीतप्रियजी  
 सहित सातों स्वरूप ले श्रीगोकुल तें पधारें । गोवर्द्धन-पूजा  
 श्रीनवनीतप्रियजी ने करी । पाछें सातों स्वरूप सहित श्रीना-  
 थजी अन्नकूट आरोगे । सो मेहा श्रीनाथजी के अन्नकूट के  
 दरसन करि विवस भयो । सो मेहा कों साक्षात् अनुभव भयो ।  
 सो भाव सहित मेहा अपने घर आयो । तव मेहा की स्त्री  
 दरसन कों गई । सो वाहू कों साक्षात् अन्नकूट लीला कौ  
 दरसन भयो । पाछें आप खरिक् में आय कै अपने श्रीठाकुर-  
 जी कों अन्नकूट भाव सहित पूजे । सो साक्षात् दरसन श्री-  
 ठाकुरजी के मेहा और मेहा की स्त्री कों भए । ता समै मेहा  
 ने ये कीर्तन सारंग में गाये ।

राग सारंग

हमारो देव गोवर्द्धन पर्वत. गोधन जहां मुखारो ।  
 सुरपति कौं वलि भाग न दीजे, कीजे मतो हमारो ॥  
 पावक पवन चंद्र जल सूरज, वर्तत आज्ञा लीने ।  
 ता सुरपति कौं कियो सब होत हैं, कहा ईंद्र के दीने ॥  
 जाके आसपास सब ब्रजकुल, सुखी रहें पसु पालें ।  
 जोरो सकट अछूतें लेले, भलो मतो को टारें ॥

बड़ड़े बैठि विचार मतो करि, पर्वत कों वलि दीजें ।  
 नंदराय को कुंवर लाड़िलो, कान्ह कहे सो कीजें ॥  
 माखन दूध दह्यो घृत पक लेलें, चले सकल ब्रजवासी ।  
 मिट्यो भाग सुरपति जिय जान्यो, मध दियो मुकराई ।  
 'मेहा' प्रभु गिरि कर धरि राख्यो, नंदकुंवर मुखदाई ।

राग - मारग

सुनिए तात हमारो मत, गोवर्द्धन पूजा कीजे ।  
 जो तुम जज्ञ रच्यो सुरपति कौ, सो सब इहां ले दीजे ॥  
 कंदमूल फल यह फल की निधि, जो मांगो सो पावो ।  
 यह गिरि वास हमारो निसदिन, निभें गाँइ चरावो ॥  
 दूध दही के माट भरावो, विजन अमृत अपार ।  
 मधु मेवा पकवान मिठाई, भरि भरि राखे थार ॥  
 बड़ड़े बैठि विचारि मतो करि, कान्ह कहे सो कीजे ।  
 विविध भांति के अन्नकूट करि, पर्वत कों वलि दीजे ॥  
 यह नग नाना रूप धरत हैं, ब्रजजन कौ रखवारौ ।  
 देवन में यह बड़ो देवता, मोहू कों अति प्यारौ ॥  
 नंदनंदन यही रूप धरि, आपुन भोजन कीयौ ।  
 'मेहा' प्रभु गिरिधरन लाड़िले, मांगि मांगि कै लीयो ॥

इत्यादि अन्नकूट के कीर्तन मेहा गावत हैं। सो सांझ होंई ।  
 सो देहानुसंधान भूलि गयो । मेहा की स्त्री हू कों कछू देह की  
 सुधि रही नाहीं । सो एक वैष्णव खरिक में मेहा की दसा  
 देखि कै श्रीगुसांईजी सों जाँइ कही । तब श्रीगुसांईजी आपु  
 खरिक में पधारे । तब श्रीगुसांईजी मेहा के कान में कहे, जो-  
 कहा समाचार है ? तब मेहा ने श्रीगुसांईजी कों दंडवत् कियो ।

तव मेहा साँ श्रीगुसाँईजी ने कही, जो - वेगि भोग सरावो श्रीठाकुरजी वैठि रहे हैं । यह कहि के श्रीगुसाँईजी पधारे । सो स्नान करि के पर्वत ऊपर पधारे । संखनाद करि के श्रीनाथजी काँ उत्थापन करे । पाछें सेनताँई पहाँचि अनोसर कराय के पर्वत तें नीचे पधारे । सो महाप्रसाद सवन काँ दिये । पाछें बालकन सहित आपु भोजन कियो । पाछें श्रीनवनीतप्रियजी काँ पधराय के सातोँ स्वरूपन सहित श्रीगुसाँईजी श्रीगोकुल पधारे । पाछें मेहा श्रीगुसाँईजी साँ विदा होई के गोपालपुर में अपने घर आए । सो मेहा के ऊपर श्रीगुसाँईजी की ऐसी कृपा हती ।

वार्ता प्रसंग—२

और कछूक दिन म मेहा की स्त्रीकाँ गर्भ रह्यो । सो पूरे दिन आये । तव मथुरा में मेहा की ज्ञाति काँ झगरो भयो ! सो सवन ने कही, जो - मेहा भलो मनुष्य है उह आय के कहे सो करिये । तव झगरो चुके । सो दोड़ मनुष्य मथुरा तें मेहा काँ बुलावन आए तव मेहा ने अपनी स्त्री साँ कह्यो, जो - मोकाँ जरूर अब मथुरा जानो पर रह्यो है । सो तेरे लरिका होयगो तव श्रीठाकुरजी वैठि रहेंगे । अब मैं कैसेँ करों ? तव स्त्रीने कही, अब ही तो पीर पेट में नाहीं होत । तुम उत्थापन तें सेन पर्यंत पहाँचि के जाउ । अटकियो मति । तव मेहा राज-भोग पहाँचि अनोसर कियो । पाछें महाप्रसाद लियो । पाछें दोड़ घरी पहिले उत्थापन कराय, सेन पर्यंत पहाँचि के स्त्री साँ कह्यो, जो - सावधान रहियो । तव मथुरा गयो । सो जात ही ज्ञाति काँ काम करनो हतो सो किये । रात्रि काँ सब कियो ।

करी, जो - महाराज ! मेरो अपराध क्षमा करो, मैं भूल्यो । और महाराज ! ऐसे मैं यासों सेवा कौन भांति कराई ? तब श्री-ठाकुरजी कहे, जो - याकों रात्रि कों विरह ताप वोहोत भयो हतो । सो मोसों सह्यो न गयो । तब मैं आज्ञा दीनी । अब तोकों गिलानी आवे तो अपरस काढ़ि के दूसरे दिन सिंगार करि राजभोग धरि । स्त्रीकों काहेंकों मारत है ? यह तो मेरी आज्ञा तें कियो है । यह सुनि के मेहा श्रीठाकुरजी कों दंडवत् कियो । वोहोत विनती कियो । जो - महाराज ! मैं चूक्यो । अब मेरो अपराध आप कृपा करि के क्षमा करा । पाछें मेहा न्हाय के सगरी अपरस काढ़यो ।

भावप्रकाश—यामें यह जनाए, जो - वैष्णव कौ सेवा में श्रीआचार्यजी महाप्रभुन की मर्यादा कौ पालन अवस्य करनो । तातें श्रीठाकुरजी प्रसन्न होत हैं । और जो कदाचित् प्रभुन की विसेस आज्ञा होंई तो ता प्रकार करनो । तामें बाधक नाहीं ।

श्रीठाकुरजी कों श्रीयमुनाजल सों स्नान कराय के फेरि के मंगलभोग तें राजभोग ताई पहोंच्यो । या भांति सों मेहा की ऊपर, मेहा की स्त्री ऊपर, श्रीठाकुरजी कृपा करते ।

वार्ता प्रसंग—३

पाछें कछूक दिन में मेहा की स्त्री की देह छूटी । सो श्री-गुसाईजी के चरनकमल कौ स्मरण करि के वह स्त्री देह छोरि लीला में प्राप्त भई । तब मेहा कों महादुःख भयो । जो - अब भगवद्सेवा अकेले कौन प्रकार सों होइगी ? ता पाछें मेहा कौ लरिका बरस दस कौ भयो । तासों मेहा बारबार कहे, जो - तू श्रीगुसाईजी कौ सेवक होऊ, भगवद् सेवा करि । तब वह पुत्र मेहा सों कहे, जो - मैं सेवक न होउंगो । वा पुत्र के वचन

सुनि कै मेहा मन में जान्यो, जो-यह दैवी जीव नहीं है । तातें श्रीगुसांईजी की सरनि नहीं आवेगो । पाछें मेहा अकेलो भगवद्सेवा करें । सो एक दिन चारि वैष्णव मथुरा तें चले । श्रीगोकुल कों, श्रीगुसांईजी के दरसन कों । तव दिन थोरो रह्यो । तव वैष्णवन विचार करयो, जो - मथुरा के घाट आज उतरि रहे । प्रातःकाल गोकुल पहुँचेंगे । सो पार मथुरा के घाट चारों जनें उतरे । तव एक वैष्णव ने कह्यो, जो-चलो गोपालपुर में मेहा श्रीगुसांईजी कौ भलो वैष्णव है । ताके घर में रात्रि कों रहेंगे । भगवद्द्वार्ता कछू सुनेंगे । यह सुनि कै सवन के मन में यह बात आई । सो चारों जनें चले । सो घरी दोइ रात्रि गई ता समै मेहा के घर आय पहुँचे । ता समै मेहा के इहां सेनभोग धरयो हतो । तव मेहा ने वैष्णवन कों वोहोत सन्मान करि अत्यंत प्रीति सों उतारो दियो । पाछें सेनभोग सराय के पाछें चारों वैष्णवन कों दरसन कराय भली भांति सों प्रसन्न किये । सो चारों वैष्णवन के मन में यह आई, जो-हमकों यह स्वरूप पधरावें तो हम सेवा करें । पाछें मेहा ने अनोसर करि कै वैष्णव के पास आय पूछ्यो, जो - महाप्रसाद लेऊ । दूध की सामग्री हैं । और अनसखड़ी हू हैं । सो तुम्हारो मन होइ सो लेऊ । तव वैष्णव ने कही, जो-हम महाप्रसाद लेके चले हैं । और तुम्हारे इहां दूध की सामग्री हैं, सो लहिंगे । तव मेहा दूध के पेड़ा, खोवा, मलाई, दूध. यह महाप्रसाद ल्याय दियो । घर में गाँइ भैंसि वोहोत हुती । तातें दूध वोहोत होतो । सो चारों वैष्णव ने महाप्रसाद लियो । पाछें मेहा महाप्रसाद लेके वैष्णवन के पास आयो । सो भगवद् वार्ता करन लागे ।

और तू काहू बात की चिंता मति करियो । मध्याह्न समे तेरी देह छूटेगी । वोहोत दुःख तू मति करे । श्रीगुसांईजी कों वोहोत दुःख होत हैं । तेरो दुःख नाहीं सहि सकत । तब मेहा उठिके चरनामृत लियो । श्रीगुसांईजी कों दंडवत् क्रियो । और कह्यो, चाचाजी ! अब मोकों धीरज भयो हे । जो - या समे मोकों तुम सारिखे वैष्णव दरसन देने आये । और श्रीगुसांईजी मोकों सुधि क्रिये । मैं तो महा पतित हों । प्रभु बड़े दयाल हैं । या भांति वार्ता करत मध्याह्न कौ समे भयो । तब मेहा ने सारंग में नयो कीर्तन क्रियो ।

राग : सारंग

श्रीविठ्ठल की सरनि न आयो जनम आपुनो खोयो हो ।  
जो सेवा-रस स्वाद न चाख्यो जनम जनम सो रोयो हो ॥  
यह कलिकाल कराल व्याल सम महा अघन कौ मूल हो ।  
'मेहा' प्रभु गिरिधर विनु सुमिरे सहे त्रिविध दुःख सूल हो ॥  
यह कीर्तन मेहा करि देह छोरि लीला में प्राप्त भयो ।  
पाछें चाचाजी आदि सब मिलि कै मेहा कौ संस्कार क्रियो ।  
पाछें मेहा के लरिका ने सुनी, जो - मेहा की देह छूटि गई ।  
तब वह मेहा के घर में आयो । जो - घर में आय के देखे तो  
श्रीठाकुरजी घर में नाहीं है । और हू कछू वस्तु घर में नाहीं  
है । तब उन वैष्णव सों पूछ्यो, जो - घरमें की वस्तु कहां  
गई ? तब चाचाजी कहे, जो - हम तो आज आए हैं । तू  
अपने गाम में पूछि देखि । तब वह महा कौ लरिका वा गाम  
के लोगन के पास आयो । और कह्यो, जो - मेहा तो मरयो,  
घर में कछू वस्तु नहीं है । सो इन वैष्णवन लीनी होइगी ।

तब वह गौरवा ने कह्यो, जो - मेहा तो वैष्णव हतो । सो अपना काल आयो पहिले ही जान्यो । सो सब के दाम करि के काल्हि मोकों दस-चीस रुपैया दियो । ताते तू अब खाली घर हे वामें रहे, चाहे मति रहे । तब वह रोई के बेठि रह्यो । पाछे चाचाजी आदि सब वैष्णव श्रीगोकुल आए । तब सब समाचार श्रीगुसांइजी सों कहे । तब श्रीगुसांइजी मेहा के ऊपर प्रसन्न होइ के श्रीमुख सों सराहना किये ।

भावप्रकाश—यामें यह जताए, जो - वैष्णव कों भगवत्सेवा विना जीवनो व्यर्थ है । ताते भगवत्सेवा में काल कौ व्यतीत करनो ।

सो मेहा और मेहा की स्त्री बड़े भगवदीय कृपापात्र हते ताते इनकी वार्ता कौ पार नाहीं । सो कहां ताई कहिए ।

वार्ता ॥ १३६ ॥



अब श्रीगुसांइजी के सेवक हृषिकेश क्षत्री, आगरा म रहते, तिनकी वार्ता कौ भाव कहत हैं —

भावप्रकाश—ये राजस भक्त हैं । लीला में इन कौ नाम 'मनआतुरी' है । ये 'सुमन्दिरा' तें प्रगटी हैं । ताते उनके भावरूप हैं ।

ये आगरा में एक क्षत्री के जन्मे । सो बरस बीस के भए तब इनको विवाह कियो । पाछे कछुक दिन में माता-पिता मरे । तब हृषिकेश घोड़ान की दलाली करन लागे । सो व्यौहार-काज में हृषिकेश कौ रूपचंदनंदा सों मिलाप भयो । सो ये रूपचंदनंदा के घर नित्य जाते । सो एक समे घरी दिन चढ़े श्री-गुसांइजी आगरा पधारे । तब रूपचंदनंदा के घर विराजे । सो ता समे हृषिकेश रूपचंदनंदा के घर कछु व्यौहार-काज कों आए हुते । सो इनको श्रीगुसांइजी के दरसन भए । सो हृषिकेश ढोऊ हाथ जोरि के ठाढ़े रहे । श्रीगुसांइजी हृषिकेश की ओर देखे । पाछे हृषिकेश कों आज्ञा किये, जो - हृषिकेश ! अब कहा विलंब है ? तब ही हृषिकेश कों श्रीगुसांइजी आप साक्षान् श्रीमदनमोहनजी के स्वरूप सों दरसन दिये । सो हृषिकेश मूर्च्छित होई गए । वह स्वरूप हृदय में धारण करि न

सके । सो घड़ीभर मृच्छा रही । पाछें जागे । तव हृषिकेश श्रीगुसांईजी मां विनती किये, जो - महागज ! वंगि अंगीकार कीजिए । अब विलंब मद्यो जात नहीं । तव श्रीगुसांईजी हृषिकेश कां नाम मुनाए । और कहे, जो - अब कहा समाचार है ? तव हृषिकेश ने कही, जो - महागज ! जा म्वरुव मां आप दग्सन दिए । उन की सेवा करों ऐसी ईच्छा है । तव श्रीगुसांईजी हृषिकेश कां कहे, जा, न्हाड ले । हम तोकां सेवा पधगई देइंगे । तव रूपचंदनंदा पास टाढ़े हतं । उन कयो, जो - चलो हों न्हाड देत हों । पाछें हृषिकेश रूपचंदनंदा के उहाँई न्हाए । पाछें रूपचंदनंदा ने नए वस्त्र पहरिये को टिये । सो हृषिकेश पहरि क श्रीगुसांईजी आगें टाढ़े भए । तव श्रीगुसांईजी वाकां नाम-निवेदन कराए । पाछें श्रीमदनमोहनजी कां स्वरूप पाम में हुतो । सो श्रीगुसांईजी आपु हृषिकेश कां पधराड दिए । और आज्ञा किये, जो - ये मेगेई स्वरूप है । तातें इनकी नीकी भांति सां सेवा करियो । और रूपचंदनंदा कां संग करियो । पाछें हृषिकेश यथामक्ति भेंट किये । ता पाछें घर जाँई स्त्रीपुत्रादि सब कां ले आये । सो उनकां हृ श्रीगुसांईजी सां विनती करि नाम निवेदन कराए । पाछें हृषिकेश प्रीतिपूर्वक श्रीठाकुरजी की सेवा करन लागे । और वे नित्य रूपचंदनंदा के इहां भगवद्वार्ता सुनिवे जाते ।

वार्ता प्रसंग—१

सो हृषिकेश आगरे में घोड़ान की दलाली करते । ऐसे करत वोहोत दिन वीते । सो सोदागर वोहोत घोड़ा आगरे में ल्यावते । सो जितने वे घोड़ा आगरे में विकते सो सब हृषिकेश की मारफत विकते । सो एक दिन हृषिकेश के मन में यह आई, जो - मोकां वोहोत दिन घोड़ान की दलाली करत भए हैं । परंतु कोई घोड़ा श्रीगुसांईजी कां भेंट नहीं कियो । तातें विना ऐव कां घोड़ा, एकहू दोष न होइ ऐसो घोड़ा एक श्रीगुसांईजी कां भेंट अवस्य करनो । सो हृषिकेश के घर में खरच वोहोत । स्त्री पुत्र कुटुंब वोहोत । सो पैसा घर में रहे नहीं । जो दलाली कां द्रव्य आवे सो सब उठि जाँई । सो हृषिकेश के मन में वोहोत आरति भई । जो -



एक वोहोत सुंदर घोड़ा श्रीगुसाईंजी की भेंट तो अवस्य करना। सो ऐसो विचार मन में करत वोहोत दिन भए। तव<sup>१</sup> एक सोदागर दो हजार घोड़ा ले कै आगरे में बेचन कों आयो। तव वह सोदागर हफिकेस कों बुलाय कै कह्यो, जो - ये दोइ हजार घोड़ा हैं। सो सब कों देखि कै इनकी विकरी कराय देऊ। तव हफिकेस ने सब घोड़ान कों देखे. आछी भांति सों। तामें एक घोड़ा अवलख रंग कौ वोहोत सुंदर देखे। तामें एक हू ऐव नाहीं। तव हफिकेस ने अपने मन में विचारयो, जो - यह घोड़ा श्रीगुसाईंजी के लायक है, परंतु मैं अब कौन प्रकार यह घोड़ा श्रीगुसाईंजी की भेंट करों ? मेरे घर में तो कछू द्रव्य नाहीं है। पाछें हफिकेस ने उह सोदागर सों कहे, जो - सगरे घोड़ा तुम कों इहां बेचि कै दाम करि कै देउंगो। ता सभै अकवर देसाधिपति आगरे में हतो। सो फोज हती। सो हफिकेस सगरे जमातदारन सों पूछि कै हजार घोड़ा तो वह सोदागर के बेचाय दिये। और वह अवलख घोड़ा काहू कों दिखाए नाहीं। तव वह सोदागर हफिकेस के ऊपर वोहोत प्रसन्न भयो। तव हफिकेस सों वह सोदागर ने कही, जो - मेरे हजार घोड़ा और बेचि देऊ। तो तुम्हारी दलाली और एक घोड़ा मैं अपनी ओर तें देउंगो। तव हफिकेस ने कही, जो - मैं तुम्हारे सब घोड़ा विक्राय देउंगो। परंतु अब मैं घोड़ा ले जाँइ कै दोइ-दोइ चार-चार मथुरा में, जहां तहां तें तुम्हारे दाम कराय देउंगो। तुम कहोगे तो तुम कों अपनी घर लरिका वताइ देउंगो। यह सुनि कै सोदागर ने कह्यो, जो - हमें तो तेरो विस्वास है। तातें जहां मन आवे तहां

घोड़ा ले जाऊ। यह सुनि के हृषिकेस मन में बोहोत प्रसन्न भए। तब वह अवलख रंग कौ घोड़ा वह सोदागर के ह्यां तें ले के अपने घर ल्याय पाछें विचार कियो, जो - घोड़ा तो हाथ में आयो। अब वाके ऊपर सुंदर ज़ीन चाहिए। तब एक आगरे में सेठ हतो ताके घर गए। तब वह सेठ सों हृषिकेस ने कह्यो, जो - तुम्हारे घर नई मखमल के साज की ज़ीन बनी है सो हम कों देउ, तो हम कों (ऐसी) दूसरी बनवानी है। फलाने सोदागर हजार दोइ घोड़ा ल्याये हैं। तामें तें हजार घोड़ा तो विक चुके हैं। सो कछूक घोड़ा एक उमराव ने लिये हैं। ताकों ज़ीन हू बनवाय देनो है, सो तुम देउ तो आछौं है। तब उन सेठ ने कह्यो, जो - ले जाऊ, घर तुम्हारो है। दस-पांच दिन राखियो। हमारे अब ही असवारी कों दिन दस-पंद्रह की ढील है। तब हृषिकेस ज़ीन ले के आयो। सो घर में आइ वा घोड़ा पर ज़ीन करि पाछें अपनी स्त्री लरिकान सों कहे, जो - मैं श्रीगोकुल जात हों। तुम नीकी भांति सों ठाकुरजी सों पहोंचियो। और कोई जो पूछन आवे तो ऐसे कहियो, जो - घोड़ा बेचन गये हैं। परि श्रीगोकुल कौ नाम मति लीजियो। तब स्त्री-पुत्र ने कह्यो, जो - तुम सुखेन जाउ। हम ऐसे ही कहेंगे। तब हृषिकेस घोड़ा की लगाम पकरि चाबुक अपने हाथ में ले या भांति अवलक घोड़ा कों ले आपु पांडन सों श्रीगोकुल चले। मन में यह विचारे, जो - यह घोड़ा श्रीगुसाईजी कौ है। सो यापैं हों कैसे चढों ? या प्रकार चले। सो श्रीगोकुल के साम्हें 'मोहनपुर' में आय पहोंचे। सो घरी दोइ रात्रि रही। तातें 'मोहनपुर' में रहे। पाछें प्रातःकाल भयो तब इहां श्रीगुसाईजी न्हाय के श्रीनवनीतप्रियजी कों जगाए। पाछें

मंगला करि सिंगार करि पाछें गोपीवल्लभ सों पहोंचि के मन में यह विचार किये, जो - अवलख रंग कौ घोड़ा ता पर मखमल की ज़ीन होई ऐसो घोड़ा होई तो ता पर चढ़ि श्रीनाथजी, द्वार जइयें । सो इहां हृषिकेश प्रात ही मलाह कों कछूक पैसा दे वेगि ही पार उतरि के श्रीगुसांईजी के द्वारें आइ के घोड़ा ले के ठाढ़े होई रहे । तव विष्णुदास पोरिया ने कही, जो - तुम कौन हो ? कहां ते आए हो ? और घोड़ा लिये द्वार के पास ठाढ़े क्यों हो ? तव हृषिकेश ने विष्णुदास पोरिया सों कह्यो, जो - यह घोड़ा श्रीगुसांईजी की भेंट है । और मैं श्रीगुसांईजी कौ सेवक हों । हृषिकेश मेरो नाम है । आगरे में रहत हों । यह सुनि के विष्णुदास श्रीगुसांईजी के पास आय के विनती कीनी, जो महाराज ! आगरे में हृषिकेश रहत हैं । सो आप कौ सेवक है । सो घोड़ा वोहोत सुंदर भेंट ल्यायो है । सो द्वार ऊपर ठाढ़ो है । यह सुनि के आप श्रीगुसांईजी द्वार ऊपर पधारें । तव हृषिकेशने श्रीगुसांईजी कों दंडवन् करि विनती कीनी, जो - महाराज ! यह घोड़ा आपु की भेंट है । या प्रकार हृषिकेश की विनती सुनि के घोड़ा कों देखि के वोहोत प्रसन्न भए, श्रीगुसांईजी । तव आपु श्रीमुख सों आज्ञा किये, जो - आजु मेरे मन में यह आई हती, जो - अवलख रंग कौ घोड़ा और मखमल के साज की ज़ीन ता पर चढ़ि के श्रीनाथजीद्वार चलिये । सो तू मेरे मन की जानी । तव हृषिकेश ने विनती कीनी, जो - महाराज ! हम तो अज्ञानी जीव हैं । कछू जानत नाही । और आपु तो दयाल हो । सो हमार ऊपर कृपा करत हो । यह दैन्यता के वचन सुनि के श्रीगुसां-

ईजी बोहोत प्रसन्न भये । कहे, आज मेरे मन में हती सो भयो । पाछें श्रीगिरिधरजी सों आज्ञा किये, जो-गोपीवल्लभ ताई मैं पहोंच्यो हूं । अब राजभोग में तुम पहोंचियो । मैं तो अब श्रीनाथजीद्वार जात हों । यह सुनि कै तत्काल श्रीगिरिधरजी तो न्हाय कै मंदिर में पधारे । तव श्रीगुसाईजी उह घोड़ा ऊपर असवार होइ कै हृषिकेस कों आज्ञा किये, जो-तू मेरे संग पास पास चलि । तव हृषिकेस चाबुक अपने हाथ में ले श्रीगुसाईजी के वाम चरनारविंद के पास परस करत चले । तव श्रीयमुनाजी उतरि कै पास जब चले तव मार्ग में श्रीगुसाईजी ने वा हृषिकेस सों पूछ्यो, जो-हृषिकेस ! तू तो धन करि कै रहित है । और ऐसी सुंदर घोड़ा और ऐसे भारी साज की जीन कहां तें ल्यायो ? तव हृषिकेस डरपि कै मन में कह्यो, जो - श्रीगुसाईजी तो अंतरजामी हैं । इहां मेरी झूठ चलेगी नहीं । और गुरु के आगे झूठ कैसें बोलों ? यह विचारि कै हृषिकेस ने श्रीगुसाईजी सों विनती कीनी, जो - महाराज ! एक सोदागर हजार दोय घोड़ा ल्यायो है । सो कछूक तो विकाय दिये हैं । कछूक और बेचि देउंगो । तामें दलाली कौ द्रव्य बोहात आवेगो । सो जीनवाले कों देउंगो । और वा सोदागर ने मोकों एक घोड़ा देन कह्यो है । सो मैं अपनी महनत कौ ले आयो हूं । यह सुनि कै श्रीगुसाईजी बोहोत ही प्रसन्न भये । ता समै दुपहरी की ताप बोहोत भई । सो सूर्य कों देखि कै श्रीगुसाईजी सों हृषिकेस ने विनती करी, जो - महाराज ! श्रीनाथजी और श्रीनवनीतप्रियजी एक ठोर विराजे तो आप कों श्रम न होइ । ऐसें घाम में पधारत हो । सो हम कों देखि

के महादुःख होत है । यह सुनि के श्रीगुसांईजी हृषिकेश सों कहे, जो - सदा श्रीजी और श्रीनवनीतप्रियजी पास विराजे तो इतनी आरति हम कों न होंइ । काहेतें, जब श्रीनवनीतप्रियजी के निकट हम रहत हैं तब तो श्रीनाथजी कौ स्मरण होत है । तब विरह होत है । पाछें जब श्रीजीद्वार जात हैं । तब श्रीनवनीतप्रियजी कौ स्मरण होत है, जो - वालक हैं, वेगि जायो चाहिए । या प्रकार आरति सिद्ध होत है । तातें श्रीजी श्रीगोवर्द्धन पर्वत पर सदा विराजे । श्रीनवनीतप्रियजी श्रीगोकुल में सदा विराजे । ताही में आछौ है ।

भावप्रकाश—यह कहि यह जताए, जो - सेवा में संयोग-विप्रयोग दोऊ भाव राखने, तातें रूचि बढें ।

यह सुनि के हृषिकेश ने श्रीगुसांईजी कों दंडवत करि के विनती करी, जो - महाराज ! हम तुच्छ बुद्धि हैं । तातें महाराज ! हम आप के भाव कों कहा जानें ? और आप करत हो सो तो हमारे हित के लिये अब आछी करत हो । या प्रकार सगरी राह श्रीगुसांईजी सों भगवद्वार्ता करत श्रीजीद्वार आए । तब श्रीगुसांईजी तत्काल स्नान करि के उत्थापन की झारी भरि के श्रीनाथजी के मंदिर में पधारे । श्रीनाथजी के दरसन करे । ता पाछें हृषिकेश कों दरसन कराए । सो हृषिकेश दरसन करि के वोहोत प्रसन्न भए । ता समे हृषिकेश ने एक एक कीर्तन नट राग में गायो । सो पद —

परम कृपाल श्रीवल्लभनंद ।

भक्त मनोरथ पूरन कारन भुव पर आये आनंद कंद ॥

गिरिधरलाल प्रगट दिखराए पुष्टिभक्ति रसदान किये ।

‘हृषिकेश’ सिर सदा विराजो यह जोरी सुख नन दिये ॥

यह कीर्तन सुनि के श्रीगुसांईजी हृषिकेश अपर वोहोत ही प्रसन्न भए । पाछे सेन तांई पहोंचि के अनोसर कराय के सेन कौ दूध श्रीगुसांईजी आपने श्रीहस्त में ले आयें । सो एक मल्ला में थोरो सो प्रसादी दूध हृषिकेश कों दियो । सो हृषिकेश ने श्रीगुसांईजी की बैठक में जाँइ के लियो । सो लेत ही देहानुसंधान भूलि गये । सो बैठक ही में बैठि रहे । वाही ठौर परि रहे । और हृदय भीतर स्वरूपानंद कौ अनुभव होन लाग्यो । तव वैष्णव सब डरपन लागे, जो - हृषिकेश कों कहा भयो ? तव श्रीगुसांईजी कहे, जो - कछु चिंता मति करो । काल्हि आछौ होइ जाइगो । तव सब वैष्णव विदा होइ के अपने डेरा गए । पाछें जब घरी दोई रात्रि पाछिली वाकी रही । तव हृषिकेश की मुर्छा वीती, सावधान भए । ता सभे श्रीगुसांईजी उठे । जब हृषिकेश सों पूछे, जो - कह्यो, समाचार कहा है ? तव हृषिकेश ने विनती करी, जो - महाराज ! आप की कृपा है तहां सदा जागत में सोवत में सब ठौर कल्याण है । जागत में आपको दरसन है सोवत में स्वप्न में आपको दरसन । और मैं कहा कहों ? मेरो सामर्थ्य कहिवे कौ नाहीं । यह सुनि के श्रीगुसांईजी वोहोत प्रसन्न भए । श्रीमुख सों कहे, जो वैष्णव कों ऐसोइ चाहिए । या प्रकार तीन रात्रि श्रीजीद्वार श्रीगुसांईजी और हृषिकेश रहे । पाछें श्रीगुसांईजी श्रीगोकुल वह अवलख घोडा पै चढि के पधारे । तव हृषिकेश संग ही श्रीगोकुल आए । तहां श्रीनवनीतप्रियजी के उत्थापन के दरसन हृषिकेश ने किये । पाछे श्रीगोकुल ही में रात्रि कों रहे । पाछें प्रातःकाल हृषिकेश श्रीगुसांईजी सों विनती करि के कह्यो, जा -

महाराज । मोकों घर जाँड़वे की आज्ञा होइ । तव श्रीगुसाईजी आज्ञा किये, जो - राजभोग आर्ति पाछें तोकों विदाय करेंगे । तव दंडवत् करि कै हृषिकेश स्नान करिवे कों गये । पाछें राजभोग ताई दरसन किये । पाछें श्रीगुसाईजी अनोसर कराय कै बैठक में पधारे । पाछें आपु श्रीगुसाईजी सब बालकन सहिन भोजन किये । ता पाछें हृषिकेश कों श्रीगुसाईजी ने जूठनि की पातरि धरी । पाछें आप गादी पर विराजे वीरा आरोगत भए । तव हृषिकेश महाप्रसाद ले कै पाछें आय कै श्रीगुसाईजी कों दंडवत् कीनी । पाछें विदा मांगी । तव श्रीगुसाईजी ने खवास सों प्रसादी उपरेना मंगाए । तव हृषिकेश ने श्रीगुसाईजी सों विनती करि कै प्रसादी उपरेना की नाहीं कराई । तव श्रीगुसाईजी ने कही, जो - तू प्रसादी उपरेनाकी नाहीं काहे कों करावत है ? तव हृषिकेश विनती किये, जो - महाराज ! मोसों कछू राज की सेवा नाहीं वनि आई । और आप के घर कौ खरच अधिक करायो है । एक मनुष्य घोड़ा की चाकरी कों चाहिए । दाना घास भंडार तें खरच होइगो । सो कहा करों महाराज ! मेरो कछू वस नाहीं है । आप तो अंतरजामी हो । सब जानत हो । ऐसैं हृषिकेश के दैन्यता के वचन सुनि कै श्रीगुसाईजी वोहोत ही प्रसन्न भए । पाछें खवास सों उपरेना की नाहीं किये । पाछें हृषिकेश कों पास बुलाय कै अपने श्रीहस्त में उगारु ले कै हृषिकेश कों दिये । सो ले कै हृषिकेश वोहोत प्रसन्न भए । पाछें हृषिकेश श्रीगुसाईजी कों दंडवत् करि कै अत्यंत प्रीति सों विदा भए । तव हृषिकेश की प्रीति देखि श्रीगुसाईजी कौ हृदो भरि आयो ।

जो - ऐसो वेणव पास रहें तो अष्टप्रहर भगवद्राव में मन रहें । या प्रकार हृषिकेश विदा होइ के चले । सो दूसरे दिन आगरं आय पहोंचें । तव हृषिकेश सोदागरन के पास गये । कहें, जो - तुम्हारे घोड़ा ल्यावो बेचि ल्याउं । तव सोदागर ने कह्यो, जो - तुम्हारे मन में आवे सो ले जाउ । तव हृषिकेश राजा टोडरमल की सौज में ले जाँइ के सगरे घोड़ा बेचि ल्याये । सो सब के रूपैया हजार चारि की हुंडी कराय के सोदागर को दिये । तव सोदागर बोहोत प्रसन्न भए । तव सोदागर ने हृषिकेश तें कह्यो, जो - तुम अपनी दलाली लेहु । और एक घोड़ा मेरी पास तें लेउ । तव हृषिकेश ने कह्यो, जो - घोड़ा तो मैं ले चुक्यो हूं । अब मेरी दलाली होइ सो देहु । तव सोदागर ने कह्यो, जो - मैं तो जानत नहीं, जो तुम कहा लियो । और तुम लियो तो कहा भयो ? तुमने मेरो काम बोहोत कियो हें । तातें एक घोड़ा और दोय सैं रूपया दलाली के ले के जाउ । तव हृषिकेश, दोय सैं रूपया और एक घोड़ा ले के चले । सो तहां तें चले सो ज़ीनवाले सेठ के घर गए । तव सेठ ने कही, जो - ज़ीन ल्याए । तव हृषिकेश ने कही, जो - ज़ीन तो गई । ज़ीन के दाम लगे होइ सो भरि लेहु । तव सेठ ने कही, जो - मेरी सुंदर ज़ीन तुम क्यों बेचि डारी ? तव हृषिकेश ने कही, जो - ज़ीन तो बेचि नहीं । तव सेठ ने कही, जो - तुम साँच कहो, ज़ीन तुम कहां करी ? तव हृषिकेश ने कही, जो - एक सोदागर हजार दोइ घोड़ा ल्यायो हतो । तामें एक अबलख रंग कौ घोड़ा बोहोत सुंदर हतो । सो मैं तुम्हारी ज़ीन सहित श्रीगोकुल ले जाँइ श्रीगुसाईंजी की भेंट करी ।



और वह सोदागर के घोड़ा बेचि दिये हैं तामें रुपैया दोइसैं और घोड़ा दोइ मेरी दलाली में मिले हैं । तामें एक घोड़ा तो श्रीगुसाईंजी की भेंट कियो है । और एक घोड़ा और दोइसैं रुपैया तुम्हारे पास ल्यायो हूं । सो तुम लेऊ । और मैं कमाय कै भरि देउंगो । यह सुनि कै सेठ ने विचार कियो, जो - जीन तो परमार्थ कियो है । अपने घर नाही राख्यो । अब यासों मैं कहा लेऊँ ? या प्रकार विचार करि कै सेठ ने एक घोड़ा हतो सो हृषिकेश सों ले लीनो । और दोइसैं रुपैया हृषिकेश कों फेरि दीने । और सेठ ने हृषिकेश सों कह्यो, जो - तिहारे घर कछू खाइवे कों नाही है तासों ए रुपैया दोइसैं ले जावो । और जीन मेरी भेंट करी तामें यह घोड़ा लियो । परंतु आज पाछें ऐसो काम मति करियो । मैं तो तुम कों छारि देत हूँ परि और कोई छोरेगो नाही । तव हृषिकेश दोइसैं रुपैया ले कै अपने घर आए । और मन में वोहोत प्रसन्न भए ।

भावप्रकाश—या वार्ता कों अभिप्राय यह है, जो - जीव कों जा भांति जनि आवे ता भांति गुरु की सेवा करनी ।

पाछें हृषिकेश ने अपने मन में विचार कियो. जो - यह सर्व कार्य श्रीगुसाईंजी की कृपा तें भयो है । मेरे घर में तो एक पैसा हू नाही हतो । और यह मनोरथ सिद्ध भयो । और दोइसैं रुपैया और हाथ आए । सो ये रुपैया तो श्रीगुसाईंजी के हैं । सो मैं अपने घर में कैसे खर्च करों ? यह विचार के वे दोइसैं रुपैया गांठि बांधि के घर तें चले सो मथुरा आए । पाछें दूसरे दिन श्रीगोकुल आइ राजभोग आरति के दरसन श्रीनवनीतप्रियजी के किये । सो हृषिकेश दरसन करि कै

बोहोत प्रसन्न भए । ता समे हृषिकेस ने सारंग में यह कीर्तन कियो । सो पद—

राग : मारग

हरि कर माखन लीने नीके ।

ब्रजवनिता सब विवस भई हैं सोभा निरखि हरखि अति जीके ॥

किलकि हँसति प्रतिविंव निरखि कै नैनन अंजन अतिसय भावे ।

‘हृषिकेस’ मन अटकि रूप पर उपमा कों पटतर नहीं आवे ॥

यह कीर्तन कियो । ऐसो अनुभव ता समे हृषिकेस कों श्रीनवनीतप्रियजी ने जनायो । पाछें अनोसर कराय कै श्रीगुसाईजी अपनी बैठक में पधारे । तव हृषिकेस ने दंडवत् करि कै वे दोइसैं रुपैया श्रीगुसाईजी की भेंट किये । तव श्रीगुसाईजी श्रीमुख सों कहे, जो - हृषिकेस ! यह तू कहा करत है ? तेरे घर में खरच कौ संकोच है । इतनी भेंट क्यों कियो ? तव हृषिकेस ने कह्यो, जो - महाराज ! यह तो आपके रुपैया हैं । भेंट तो मैं कछू अपनी सत्ता तें कमायो होऊ ता होइ । तव श्रीगुसाईजी ने हृषिकेस सों पूछी, जो - ये रुपैया कैसें आये हैं ? तू वतावे तव भंडार में जाँय । तव हृषिकेस ने सब प्रकार भयो सो कह्यो, जो - महाराज ! रुपैया मेरी दलाली के हैं । ये आप कृपा करि अंगीकार किये चाहिए । तव श्रीगुसाईजी खवास सों कहे, जो - ये रुपैया भंडार में दे आउ । तव खवास रुपैया ले भंडार में दे आयो । भंडारी कों सोंपि आयो । सो वसंत पंचमी के दिन दाइ बाकी रहे हते । तव श्रीगुसाईजी चांपा संकर भंडारी सों कहे वसंत की सामग्री में और डोल उत्सव की सामग्री में हृषिकेस के दोइसैं रुपैया आए हैं सो खरच

करियो । तव चांपा संकर ने उह दोइसैं रुपैया की सामग्री ल्याइ राखी ।

और हृषिकेश के मन में यह आई, जो - अब वसंत पंचमी आई है तासों डोल ताई श्रीगुसाईंजी के पास रहों । तव एक दिन हृषिकेश ने श्रीगुसाईंजी सों विनती करी, जो - महाराज ! डोल उत्सव ताई मेरो मन आप के पास रहिवे को है । सो सेवा विनु दिना वीते नाही । तासों आप कछू सेवा वतावो तो रहूं । तव श्रीगुसाईंजी कहे, जो - चाहो तो फूल-घर में रहो । चाहो भंडार में कछू सेवा करो । तव हृषिकेश विनती करी, जो - महाराज ! मैं आप के संग श्रीजीद्वार जायो चाहूं । तातैं अपने पास की कछू सेवा वतावो । तव श्रीगुसाईंजी कहे, जो - खवासी करो । तव हृषिकेश श्रीगुसाईंजी की खवासी में रहे । सो वांछित प्रीति सों सेवा करते । सो श्रीगुसाईंजी हृषिकेश के ऊपर वांछित प्रसन्न रहते ।

सो श्रीगुसाईंजी वसंतपंचमी के दिन इहां श्रीनवनीत-प्रियजी कों खिलाय के पाछें श्रीजीद्वार पधारे । सो उत्थापन की झारी भरे । तव हृषिकेश संग गये । सो श्रीनाथजीद्वार श्रीगुसाईंजी होरीदांडा रोपनी तहां किये । पाछें पून्यो के दिन उत्थापन समै श्रीगोकुल पधारे । सो आठ दिन ताई होरी के, फेर श्रीनवनीतप्रियजी कों खिलाए । तव हृषिकेश श्रीगोकुल रहे । पाछें आठें के दिन फागुन वदि ८ कों श्रीगुसाईंजी श्रीजीद्वार पधारे । तव उत्थापन की झारी भरे । सो डोल ताई श्रीगुसाईंजी श्रीजीद्वार रहे । सो एक दिन हृषिकेश ने यह धमार गाई. कल्याण राग में । सो धमारि—

## भाग फल्यान

ब्रजराज लडेंतो गाड़ये, बल मोहन जाकौ नाम हो ।  
 खेलत फाग सुहावनो, रंग भीज रह्यो सब गाम हो ॥ १  
 ताल पखावज वाजहि हो, डफ सहनाई भरि हो ।  
 श्रवन मुनत सब ब्रजवधु हो, अंडन आई धरि हो ॥ २  
 इतहि गोप सब राज ही हो, उत सब गोकुल नारि हो ।  
 अति मीठी मन भामती हो, देति परस्पर गारि हो ॥ ३  
 चोवा चंदन छिरक रही हो, डारत अवीर गुलाल हो ।  
 मुदित परस्पर खेल ही हो, हां हां हो बोलत ग्वाल हो ॥ ४  
 धरि सखी मोहन गहि आने, प्यारी पकरे हाथ हो ।  
 गोपी भेख बनाइ के, रचि बनी गूंथी माथ हो ॥ ५  
 बहुरि मतो करि सुंदरी हां, हलधर पकरे जाय हो ।  
 नव कुंकुम मुख मांडि के हो, आए हैं आंखि अंजाय हो ॥ ६  
 पीतांबर मुख मूदि के हो, निरखि हँसे नंदलाल हां ।  
 दाऊजी आजु भले बने, कूके दे सब ग्वाल हो ॥ ७  
 सिमिट सकल ब्रजसुंदरी हां, ब्रजपति पकरे आन हो ।  
 भरत सकल ब्रजसुंदरी हां, नेक न राखत कान हो ॥ ८  
 तब नंदरानी बीच कियो हो, मेवा दियो है मँगाय हो ।  
 पट भूखन पहिराय के हो, 'हृषिकेस' बलि जाय हो ॥ ९

यह धमार हृषिकेस ने गाई । सो सुनि कै श्रीगुसाईजी  
 वोहोत ही प्रसन्न भए । सो श्रीगुसाईजी की कृपा तें हृषि-  
 केस को यह अनुभव भयो । पाछें डोल उत्सव ताई श्रीजीद्वार  
 रहे । पाछें श्रीगुसाईजी गोकुल पधारे । तब हृषिकेस हू श्री-  
 गोकुल आए । पाछें श्रीगुसाईजी सों आज्ञा मांगी, जो-मैं

अपने घर जाऊं। तब श्रीगुसांईजी प्रसन्न होइ के एक गुलाब कौ फूल श्रीनाथजी कौ प्रसादी हृषिकेश कों दियो। तब हृषिकेश फूल ले दंडवत् करि श्रीगोकुल तें चले। सो दूसरे दिन आगरे में अपने घर आये। सो गुलाब कौ फूल हृषिकेश ने अपने जप के साज में राख्यो। नित्य दरसन करि के उह फूल कों दंडवत् करे। ऐसं करत वोहोत दिन वीते।

घाता प्रसंग—३

और एक दिन हृषिकेश राजभोग तें पहोंचि के महाप्रसाद ले के उठे। ताही समे दोइ वैष्णव श्रीगुसांईजी के सेवक आगरे में आए। सो हृषिकेश सों भगवद्वाता स्मरन किए। तब हृषिकेश वोहोत प्रसन्नता सों कहे, जो - महाप्रसाद लेऊ। तब वैष्णवन ने नाहीं करी। तब हृषिकेश ने कही, जो - सीधो लेऊ, कोरे वासन लेऊ, रसोई करो। और कृपा करि हमारे यहां लेऊ तो सोऊ सिद्ध है। तब वैष्णव नाहीं करि के उठि गए। तब हृषिकेश के मन में महादुःख भयो। जो - मैं बड़ो अभागो हूं। जो - वैष्णव मेरो नाहीं अंगीकार करत हैं। या प्रकार सगरी रात्रि खेद करत रहे। और वे वैष्णव आगरे में श्रीयमुनाजी के किनारे एक चोंतरा पर सोइ रहे। उष्णकाल कौ दिन हतो। सो खरची कौ खडिया कुत्ता ले गयो। सो प्रातःकाल उठि के उह वैष्णव देखे तो खरची कौ खडिया नाहीं है। तब वे वैष्णव चिंता करन लागे, जो - अब कहा करें। पालें मन में विचारे, जो - हम काल्हि हृषिकेश के घर गए। सो. वह वैष्णव (कों) वोहोत दुःख भयो होइगो। ता करि के हमारी खरची गई। हम दुःखी भए। तातें आजु हृषिकेश के घर अव-

स्य चलनो । उह कहें तैसें करनो । हृषिकेश श्रीगुसांईजी के सेवक हैं, कृपापात्र हैं । यह विचार करि के दोऊ वैष्णव देह कृत्य करि पाछे श्रीयमुनाजी में स्नान करि के पाछें जप पाठ करि के हृषिकेश के घर आए । तब हृषिकेश देखि के बोहोत प्रसन्न भए । सन्मान करि के बैठाए । पाछें उन वैष्णव सां पृछे, जो - तुम काल्हि मेरे घर तें भूखे गए सो मेरो कहा अपराध है ? अब आजु कछु कृपा करि के अंगीकार करिए । तो मेरो मन प्रसन्न होइ । तब वैष्णव ने हृषिकेश सां कहें, जो - हम काल्हि तुम्हारो कह्यो नहीं मान्यो तासां हमारो खरच कौ ग़डिया रात्रि कों जात रह्यो । तातें अब आज तें जैसें तुम कहोगे तैसें हम करेंगे । तब हृषिकेश ने पूछी, श्रीठाकुरजी पाछें यहां प्रसाद लेहुगे के न्यारी रसोई करोगे ? तब वैष्णव ने कही, जो - हमारे मनमें तो न्यारी रसोई करिवे की है । परंतु अब आज तुम प्रसन्न होइ के कहोगे तैसेंई हम करेंगे । तब हृषिकेश सीधो सामान सब ल्याये । कोरे वासन में जल भरि ल्याए । तब वैष्णव न्हाय के रसोई किये । पाछें श्रीठाकुरजी कों भोग धरि के पाछें महाप्रसाद लियो । पाछें रात्रि कों वे वैष्णव हृषिकेश के घर ही में रहे । भगवद्-वार्ता कीर्तन भयो । पाछें प्रातःकाल वे वैष्णव चलन लागे । तब हृषिकेश ने कही, जो - आज तौ औरहू रसोई करि के जाउ । तब वैष्णव सीधो ले रसोई करी । पाछें श्रीठाकुरजी कों भोग धरि के पाछें महाप्रसाद लियो । तब हृषिकेश अपने घर में तें कछु वासन गहने धरि के रुपैया दस १०) वैष्णव कों दिये । और विनती किये, जो - तुम बड़ी कृपा किये । फेरि बेगि आवोगे । तुम्हारी खरची गई सो हम कों बोहोत दुःख भयो ।

तव वैष्णवन कही, जो - धन्य तुम हो जो ऐसि भांति अपनो धर्म तुम राखत हो। या प्रकार विदा होइ के वैष्णव हृषिकेश की बड़ाई करत गए।

भावप्रकाश—या वार्ता में यह जनाए, जो - घर आए वैष्णव कों जा भांति वनि आवें ता भांति समाधान करनो। उन कों प्रसन्न करने।

सो वे हृषिकेश श्रीगुसांईजी के ऐसैं कृपापात्र भगवदीय हते। सो उन की वार्ता कौ पार नाही, सो कहां ताई कहिए।  
वार्ता ॥ १३७ ॥



अब श्रीगुसांईजी के सेवक एक पटेल, जाने दरांति वेचि कै टका भेंट धरघो, तिनकी वार्ता कौ भाव कहत है —

भावप्रकाश—ये सात्विक भक्त हैं। लीला में इनका नाम 'ब्रह्म-विद्या' है। ये 'सुमन्दिरा' ते प्रगटी हैं, ताते उन के भावरूप हैं।

ये गुजरात में एक पटेल के जन्म्यो। सो बरस बीस कौ भयो तब चाके माता पिता मरे। पाछें वह पटेल घास-लकरी ल्याई अपनो निर्वाह करन लाग्यो। ऐसैं करत कछुक दिन में श्रीगुसांईजी द्वारिकाजी पधारे। श्रीरनछोरजी के दर्सनार्थ। सो मारग में वाकौ गाम आयो। सो तहां डेरा किए। तब वा पटेल कों श्रीगुसांईजी के दरसन भए। तब वह पटेल मन में कयो, जो - हों इन कौ सेवक होउ तो आछौ। पाछें वह पटेल श्रीगुसांईजी सों विनती कियो, जो - महाराज ! मोकों कृपा करि अपनो सेवक कीजिए। तब श्रीगुसांईजी कृपा करि वाकों नाम निवेदन कराय सेवक किये। पाछें श्रीगुसांईजी द्वारिकाजी पधारे। सो श्रीरनछोरजी के दरसन करि, ता पाछें आप श्रीगोकुल पधारे।

वार्ता प्रसंग—१

पाछें एक गुजरात कौ संग श्रीगोकुल चलयो। तब वाने विचारयो, जो - मैं हूँ श्रीगोकुल जाउं। सो वा पटेल अपनो घास लकरी वेचि कै निर्वाह करतो। सो वा दिन मार्ग में घास खोदत हतो। सो उन पटेल ने पूछी, जो - यह संग कहां जात है ? तब उन वैष्णवन कही, जो हम श्रीगोकुल जात हैं। तब उन पटेल

हत्या गंगा स्नान तें हू न छूटगी । ऐ तो बड़ा अपराध भयो । ताते याकौ निर्णय नाही । सो अब तो अन्न-जल त्यागि के देह छोरेनी । जहाँ ताँई देह चले तहाँ ताँई मेवा करंगे । ऐसो विचार करि के बोहोत पश्चात्ताप करन लागे ।

सो ऐसैं करत दोइ दिना भए । तीसरे दिना प्रातही श्री-गोकुलनाथजी श्रीरनछोरजी के दरसन करि के पाछे राजनगर पधारे । सो भाइला कोठारी के घर विराजे । सो समस्त राजनगर के वैष्णव दरसन कों आए । सो श्रीगोकुलनाथजी के दरसन करि दंडवत् करि बैठे । परंतु वे दोऊ स्त्री-पुरुष नहीं आए । वे ऐसैं कहते, जो - हमने गऊहत्या कीनी हे । सो मैं गऊहत्यारो हूँ । सो मोहोंडो कैसे दिखाऊँ ? ऐसैं रोवे, विल-विलावे । तव और वैष्णव ने ये समाचार श्रीगोकुलनाथजी सों कहे । और विनती करी, जो - महाराज ! श्रीकाकाजी महाराज के कृपापात्र हैं । भले वैष्णव हैं । सो अब तो उन मन में ऐसो संकल्प कीनो है, जो - अन्नजल त्यागि के देह कौ त्याग करनो । ऐसैं विचारि के आज वा वैष्णव कों तीन दिना भए हैं । जल हू नहीं लियो हे । तव श्रीगोकुलनाथजी आज्ञा किये, जो - उनकों बुलावो । तव वैष्णव ने जाँइ के उन दोऊ स्त्री पुरुष सों कही, जो - तुम कों श्रीगोकुलनाथजी बुलावत हैं । तव वे वैष्णव आए । दूरि ठाढ़े भए । तव श्रीगोकुलनाथजी आज्ञा किये, जो - आगे आउ । पाछें श्रीगोकुलनाथजी पूछें, जो - कैसेँ भई ? तव इन वैष्णवन कही, जो - कृपानाथ ! दोष तो मेरो है । सो ए दोष कैसेँ मिटे ? तव आपने आज्ञा करी, जो - यामें तो तुम कों कछू दोष नाही । तैनेँ मारी नाही, दूबली



हती सो धक्का तें गिरि परी । सो वाकौ अंतकाल भयो । यामें तुम्हारो कछु दोष नहीं । तव वा वैष्णव ने कही, जो - महाराज ! मेरे हाथ तें मरी है । तव श्रीगोकुलनाथजी ने आज्ञा करी, जो - एक निष्कंचन अकासवृत्तिवारौ वैष्णव होंइ तिन कों बुलाइ के श्रीठाकुरजी पाछें महाप्रसाद लिवाय दीजो । तव इन वैष्णव ने कही, जो - महाराज ! मो हत्यारे के घर कौन वैष्णव आवेगो ? तव आपने आज्ञा करी, जो - हमारो नाम लेनो ! पाछें वह वैष्णव अपने घर जाई के सुंदर भांति की सामग्री करि के श्रीठाकुरजी कों भोग समर्पि के पाछें एक निष्कंचन वैष्णव देखि के उन तें हाथ जोरि के कही, जो - श्रीगोकुलनाथजी की आज्ञा तें मेरे घर चलो । तव उन वैष्णव ने कही, जो - भले, आपकी आज्ञा चहिए । जो चाहे सो करे । तातें चलो । सो उन वैष्णव कों घर ल्याये । पाछें जो - जो सामग्री श्रीठाकुरजी आरोगे सो - सो सामग्री वा वैष्णव के आगें धरी । तव वा वैष्णव निष्कंचन नें थोरो थोरो महाप्रसाद सब सामग्रीन में तें ले के एक कौर ले के उठयो । तव इन वैष्णव ने कही, जो - महाप्रसाद कृपा करि के आछी भांति सां लेऊ । तव उन निष्कंचन ने कही, जो - तोकों एक हत्या है, सां तो गई । याही के लिये महाराज ने आज्ञा करी हती । और लिवावनो होंइ तो और दिना लिवाइयो । आज तो इतनोइ लेइंगे । ऐसे कहि उठि गयो । पाछें वह वैष्णव श्रीगोकुलनाथजी की पास आयो । दंडवत् करी । तव आपने पूछी, जो - महाप्रसाद वैष्णव कों लिवायो ? तव वैष्णव ने कही, जो - महाराज ! आपकी आज्ञा तें वह वैष्णव ने आय के एक कौर लीनो । मैंने

वोहोत निहारा करे परि उन वैष्णव ने और न लीनो । तव श्रीगोकुलनाथजी आज्ञा कीने, जो - अब तेरो दोष मिटि गयो । तव इन वैष्णव ने विनती करी, जो - कृपानाथ ! और वैष्णव कैसें मानेंगे ? तव आपने आज्ञा करी, जो - न माने तो न्हाय आउ । पाछें वह वैष्णव न्हाय आयो । तव आप आज्ञा किये, जो - जा, जलघरा में तें चांदी की लोटी ले के जलपान भरि ल्याउ । तव वह वैष्णव लोटी ले के भरि ल्यायो । तव आप जल आरोगे । और वोहोत वैष्णव बेटे हते । तव आपने उन तें कही, जो - अब तो मानोगे ? तव समस्त वैष्णवने कही, जो - कृपानाथ ! आपकी आज्ञा ही तें दोष तो मिटि गयो । ता उपरांत वैष्णव ने महाप्रसाद लियो । और आप साक्षात् इनके हाथ कौ जल आरोगे । तव फिर कहा संदेह रह्यो ? अब हम सब वैष्णव इन तें व्यौहार करेंगे । तव श्रीगोकुलनाथजी कृपा करि के इन वैष्णव तें आज्ञा किये, जो - अब घर जाँइ के महाप्रसाद लेहु । तव यह वैष्णव गद्गद् कंठ व्हे साष्टांग दंडवत् करि के घर जाँइ के दोऊ स्त्री पुरुष ने महाप्रसाद लियो । पाछें भलीभांति सों सेवा करन लागे । पाछें गाँई घर में न राखी । जहां गाँइ होंइ तहां पातरि दे आवते । पाछें श्रीगुसाँईजी की कृपा तें श्रीठाकुरजी सानुभावता जतावन लागे । जो चहिए सो मांगि लेते । ताते वे दोऊ भले वैष्णव भए ।

भावप्रकाश—या वार्ता में यह जताए, जो - वैष्णव कों सेवा में सावधान रहनो । काहेते, जो - सेवा करत अनेक अपराध होत हैं, ताते वासों बचनो । और दीनता कौ हू स्वरूप बताए । जो दैन्यता तें प्रभु प्रसन्न होत हैं । ताते सब दोष की निवृत्ति होत हैं ।

सो वे स्त्रीपुरुष श्रीगुसाँईजी के ऐसे कृपापात्र भगवदीय

हते । तातें इनकी वार्ता कौ पार नाहीं. सो कहां ताई कहिए ।  
वार्ता ॥ १३९ ॥



अब श्रीगुसांईजी के सेवक हरिदास, जिनने मोहनदास कौ राखिबे कौ अपने वेदा कौ मारयो, तिनकी वार्ता कौ भाव कहत हैं—

भावप्रकाश—सो हरिदास तामस भक्त हैं । लीला में इनका नाम 'श्रवन-प्रिया' है । सो श्रवनप्रिया की श्रीठाकुरजी के गुनानुवाद मुनिबे में अत्यंत प्रीति है । और श्रवनप्रिया की दो अंतरंग सखी हैं । 'प्रीतिरूपा' और 'भावरूपा' । सो 'प्रीतिरूपा' तो इहां हरिदास की खो भई । और 'भावरूपा' हरिदास कौ वेदा भयो । सो श्रवनप्रिया 'कंदर्पा' की सखी हैं । उन तें प्रगटी हैं । तातें उनके भावरूप हैं ।

ये गुजरात में एक गाम है तहां एक बनिया के जन्मे । सो बरस पंद्रह के भए । तब माता-पिता ने इन कौ व्याह कियो । स्त्री सुपात्र मिली । पाछे केनेक दिन में उन के एक वेदा भयो । ता पाछे हरिदास के मातापिता मरे ।

सो हरिदास कौ एक मित्र हतो । उन कौ नाम मोहनदाम हुतो । सो हरिदास के गाम तें कोस बीस पर रहतो । सो हरिदास वा मोहनदाम सो मिलि के व्यौहार करन लागे । सो एक समै श्रीगुसांईजी द्वारिकाजी पधारे । सो मारग में मोहनदास कौ गाम आयो । तहां आप डेरा किये । सो मोहनदास श्रीगुसांईजी कौ दरसन पायो । सो साक्षात् पूरन पुरुषोत्तम देखे । तब मोहनदाम अपने मनमें कहे, जो - देखो ! जिनकां कन्हैया कहत है सो आज मेरे सन्मुख ठाढ़े व्हें दरसन देत हैं । तातें अब तो इनके सगनि जाइ कृतार्थ होइ तो आछी । पाछे मोहनदाम ने श्रीगुसांईजी सों विनती कीनी, जो - महाराज ! कृपा करि मोकों सरनि लीजिए । आज मेरे बड़े भाग्य उदय भए, जो - मोकों साक्षात् कन्हैया के दरसन भए । तातें महाराज ! अब वेगि कृपा कीजिए । तब श्रीगुसांईजी प्रमन्न व्हें वाकों नाम निवेदन कराए । पाछे मोहनदास अपने घर आय स्त्री सों कहे, जो - वेगि चलि, साक्षात् कन्हैया के दरसन होत है । सो स्त्री हृ देखी हती । तातें मोहनदास के संग आई । सो श्रीगुसांईजी के दरसन किये । पाछे मोहनदास श्रीगुसांईजी सों विनती किये, जो - महाराज ! इन को नाम - निवेदन कराए । तब श्रीगुसांईजी कृपा करि स्त्रीकों हृ नाम - निवेदन कराइ सरनि लिये । तब फेरि मोहनदास विनती किये, जो - महाराज ! अब हमकों कहा कर्तव्य है, सो कृपा करि कहिए ।

तब श्रीगुसांईजी दोउन कों आज्ञा किये, जो - तुम दोऊ भगवत्सेवा करो । तब मोहनदास कहे, जो - महाराज ! श्रीठाकुरजी पधराइ दीजिए । तब श्रीगुसांईजी उन के माथे लालजी कौ स्वरूप पधराइ दिए । पाछे सेवा की सब रीति कृपा करि बताए । मानसी कौ ह प्रकार सब कियो । पाछे आप तो श्रीद्वारिकाजी पधारे ता पाछे मोहनदास ब्रजभक्तन की भावनापूर्वक भगवद् सेवा करने लागे । सो सब लीला हृदय में स्फूर्त भई । श्रीठाकुरजी मानुभावना जनावन लागे ।

पाछे एक दिन मोहनदास हरिदास सो मिले । तब हरिदास कों मोहनदासने कियो, जो - तुम श्रीगुसांईजी के सेवक होउ तो आछों । मैं हू श्रीगुसांईजी कौ सेवक भयो हूँ । श्रीगुसांईजी माझान् कह्यो है । तब हरिदास कहे, जो - मोकों तुम सेवक करावो । मैं श्रीगुसांईजी कौ सेवक होऊँगो । तब मोहनदास ने कही, जो - श्रीगुसांईजी द्वारिकाजी पधारे हैं सो कछुक दिन में पाछे उहां पधारेँगे । तब मैं तुम सो कहूँगो । ता पाछे केतेक दिन में श्रीगुसांईजी द्वारिकाजी सो फिरे । सो मोहनदास के गाम में डेरा किये । तब मोहनदास ने हरिदास को खबरि पठाई । जो - श्रीगुसांईजी इहां पधारे हैं । ताते तुम इहां बेगि अउयो । और मोहनदास ने श्रीगुसांईजी को अपने घर पधराए । सो दिन चारि लों राखे । पाछे हरिदास आए । तब मोहनदास श्रीगुसांईजी सो विनती किये, जो - महाराज ! ये हरिदास दैवी जीव हैं । सो आपके सरनि आयो है । तब श्रीगुसांईजी कृपा करि कै हरिदास कों नाम निवेदन कराए । पाछे हरिदास ने श्रीगुसांईजी सो विनती कीनी, जो - महाराज ! कृपा करि कै मेरे गाम-घर पधारिए । स्त्री-पुत्र सब कों सरनि लीजिए । तब श्रीगुसांईजी मोहनदास कों संग ले हरिदास के गाम पधारे । सो हरिदास के घर विराजे । पाछे हरिदास की स्त्री और हरिदास के पुत्र कों नाम निवेदन कराइ सरनि लिये । पाछे श्रीगुसांईजी सो हरिदास विनती किये, जो - महाराज ! अब भगवद् सेवा पधराइ दीजिए, तो कछु आपकी कानि तें टहल करे । तब श्रीगुसांईजी हरिदास कों एक लालजी कौ स्वरूप पधराय दिए । पाछे आज्ञा किये, जो - मोहनदास कों सेवा की सब रीति पूछि लीजो । और मोहनदास कौ संग करियो । ताते तोकों भगवद्भाव स्फुरायमान होइगो । ता पाछे श्रीगुसांईजी आप उहां तें श्रीगोकुल पधारे । और हरिदास के घर मोहनदास दस-पांच दिन रहे । सेवा की सब रीति बताए । ता पाछे मोहनदास हरिदास सो विदा व्हे अपने घर आए । पाछे महिना में दस पांच दिन हरिदास मोहनदास के पास जाई । भगवद्वाता सुने । सो मोहनदास के संग सो हरिदास मास्य कौ सब सिद्धांत जानन लागे ।

घाता प्रसंग—१

सो एक समै हरिदास के घर मोहनदास आए। सो हरिदास देखि के वोहोत प्रसन्न भए। तव दोऊ मिलि के भगवद् सेवा करते और भगवद्घाता करते। भगवद्घरस में लुके रहते। ऐसैं करत केतेक दिन वीते। तव मोहनदास ने कही, जो - अब वोहोत दिन भए सो अब हम चलंगे। तव हरिदास ने चलत चलत मोहनदास कों और हू पांच सात दिन अपने घर आग्रह करि के राखे। तव फेरि मोहनदास ने कही, जो - अब तो अवस्य सवेरे जाइंगे। तव हरिदास ने अपनी स्त्री सों कही, जो - अब तो ये सवेरे जाइंगे। तो राखिवे कों कहा उपाय करनो ? तव स्त्रीने कही, जो - तुम कहो सो करे। तव हरिदास के घरस सात कौ एक लरिका हतो। सो हरिदासने अपनी स्त्री सों कही, जो - अपने वेटा कों मारि। तव इन वैष्णव कों सोच होइगो तव ये रहंगे। तव स्त्री ने ऐसैं ही करयो। पाछें मोहनदास सवारे जाँइवे लगे तव हरिदास और हरिदास की स्त्री ने कही, जो - वेटा तो मरि गयो। अब तुम कहां जाउगे ? तव मोहनदास देखे तो वेटा मरयो हे। तव मोहनदास ने अपने मन में विचारयो, जो - काल्ह रात्रि कों तो यह लरिका आछौ खाँत खेलत हुतो। सो सवेरे ही ये कैसे मरयो ? पाछें मोहनदास ने जान्यो, जो - मोकों रोक्विवे के ताँई इन अपने वेटा कों विप दे मारयो है। सो मोहनदास कों रामांच व्हे आए। पाछें इन श्रीगुसाँईजी कौ स्मरण करि चरनोदक मुख में मंलि अष्टाक्षर कहि के वा लरिका कों जिवायो। ता पाछें लरिका सों कह्यो, जो - मैं जात हों मोसों जैश्रीकृष्ण ता करि। तव

कमर न परे । तो तुम को यह माग्न स्फुरेगो । पाछे देवजी उहां कलुक दिन गहि श्रीगुमांडजी के श्रीमुख की कथा सुने । ता पाछें श्रीगुमांडजी मां विदा च्छे पोरबदर अपने घर आए ।

वार्ता प्रसंग—१

सो वे देवजीभाई नित्य भगवद मंडली में वार्ता सुनिवे कों जाते । सो नित्य नेम सों वर्षा में टंड में सदेव जाते । सो एक दिना ज्वर आयो । तोऊ भगवद्वार्ता मंडली में गए । पाछें ऐसो ज्वर आयो सो पांच सात लंघन भए । तोऊ गए । पाछें बोहांत असक्त भए । सो वा दिन जानो न बन्यो । तब सब वैष्णवन ने सुधि करी, जो - आज देवजी भाई आय न सके । तब वैष्णव-मंडली में एक मुखिया हतो । सो उनने कही, जो - आज सब वैष्णव मिलि के देवजी भाई के घर चलो । पाछें भगवद्वार्ता होई चुकी । तब सब वैष्णव मिलि के देवजी भाई के घर आए । सो उन में तें एक वैष्णव ने आगे जाँइ कै खवरि करी । जो-आज सब मंडली तुम्हारे घर आवे हैं । सो देवजी भाई कों ता समे ज्वर चढ्यो हतो । सो इतने में वा वैष्णव ने कही । सो सुनि कै हरख सों उठि कै वैष्णवन के साम्हे आए । सो दंडवत् जेश्रीकृष्ण करि के आदर सों अपने घर पधराए । अपनी पास आसन दे के सन्मान सों बैठाए । पाछें हाथ जोरि के विनती कीनी, जो - आज मेरे अहोभाग्य है । जो-मेरे घर वैष्णव कृपा करि कै पधारे । तब उन वैष्णवन ने कही जो - देवजी भाई ! तुम आज आय न सके तातें तुम कों देखिवे कों आए हैं । तब देवजी भाई बोले, जो - आज कौन सो प्रसंग वांच्यो ? कौनसी वार्ता भई ? सो कृपा करि कै सुनावो । तब उन वैष्णवन ने सब सुनायो । तब देवजी भाई ने हाथ जोरि कै

विनती करि सब वैष्णवन सों कह्यो, जो - तुम कृपा करि के देउ तो एक वस्तू की मोकों अपेक्षा है । तव उन वैष्णवन ने कही, जो - या समय श्रीगुसाईजी की कृपा सों जो मांगो सो सब सिद्ध है । तव देवजी भाई ने यह मांग्यो, जो - मेरो नित्य नेम भगवद् मंडली में वार्ता सुनिवे कौ न छूटे । और देह कौ दंड है सो तो भुक्तेंगे । सो कृपा करि के यही मोकों देउ । जो - भगवदमंडली न छूटे । तव सब वैष्णव प्रसन्न होई के यह आसीर्वाद दियो । जो श्रीगुसाईजी की कृपा तें तुमकों भगवदमंडली सदैव स्फुरेगी । पाछें सब वैष्णव उठि के श्रीकृष्ण-स्मरण करि के अपने घर कों गये । पाछें श्रीगुसाईजी की कृपा तें उनके आसीर्वाद तें वाही दिन तें उन कों ज्वर उतरि गयो । भोग निवर्त भयो । पाछें नित्य भगवद् वार्ता सुनिवे कों नेम सों जान लागे ।

भावप्रकाश—या वार्ता में यह जताए, जो - वैष्णव मंडली कौ स्वरूप महा अलौकिक है । साक्षात् प्रभुन कौ ही स्वरूप है । तातें मंडली में अलौकिक बुद्धि सों नित्य नियम पूर्वक जानो । भगवद् वार्ता सुननो । और वाकों फल रूप करि के जाननो, तो सब कारज सिद्ध होई ।

सो वे देवजीभाई श्रीगुसाईजी के ऐसे कृपापात्र भगवदीय हते । तातें इनकी वार्ता कौ पार नाही । सो कहां ताई कहिए ।

वार्ता ॥१४१॥



अब श्रीगुसाईजी की सेवकिनी एक डोकरी, जानें दांतिन भोग में धरी, तिनकी वार्ता कौ भाष कहत है—

भावप्रकाश—ये सात्विक भक्त हैं । लीला में इन कौ नाम 'भाव-प्रवीणा' है । ये भगवद् भाव में अत्यंत निपुण हैं । तातें श्रीचंद्रावलीजी की इन पर शोहत प्रीति है । ये 'मधुएनी' तें प्रसिद्धी हैं, तातें उन के भावमय हैं ।

ये राजनगर में एक बनिया के प्रगटी । मो बगस नौ की भई । तब याव व्याह भयो । सो याकौ धनी निष्कंचन हतो । लरुड़ी बंचि के निर्वाह करतो । त पाछे ये बगस माठ की भई तब याकौ धनी मग्घो । तब ये चग्घा कांति के निर्वा करन लागी । सो याके घर के पास एक वैष्णव रहत हृतो । मो याके यहां भगव वार्ता नित्य होंई । सो या डोकरी ने विचारयो, जो - या वैष्णव के इहां बोहो लोग कथा सुनिवे आवत हैं । तातें मैं हू नित्य कथा सुनिवे कों जाऊ तो आछो पाछे दूसरे दिन वा वैष्णव में डोकरी पूछयो, जो - तुम्हारे यहां बोहोत लोक भगवद्वार्ता कथा सुनिवे कों आवत है । मो मोकों हू सुनिवे की इच्छा है । ता जो - तुम कहो तो हों हैं तुम्हारे घर आयो करों । तब वा वैष्णव ने कही, जो वाई ! हमारे घर कथा - वार्ता होत है । मो तो हमारे मार्ग की होत है । ता हमारे मार्ग की जो - कोऊ होंई मो सुनत है । तू यामें कहा ममझेगी ? तब वा डोकरी ने कयो, जो - तुम्हारे कौनसो मार्ग है ? तब वैष्णव कयो, जो - हमारे बल्लभी मार्ग है । तब वा डोकरी ने वा वैष्णव सों विनती करी, जो - तुम कृप करि, मोकों बल्लभी करो । अब घर में अकेली बैठि रहति हूँ । तातें मेरो समय जात नाही । सो हों बल्लभी होऊ तो तुम्हारी कथा वार्ता नित्य सुनों । तातें तुम इतने कृपा मोपें करो तो भलो है । तब वा वैष्णव ने कयो, जो - वाई ! हमारे गुरु श्री विठलनाथजी हैं । सो श्रीगोकुल में विराजत हैं । उन की सरनि जाडवे तें बल्लभ होंई । सो तू उन की सरनि जाई तब बल्लभी वैष्णव तोसों भगवद्वार्ता-कथा कहें तब वा डोकरी ने कयो, जो - मैं श्रीगोकुल कैसे जाऊं ? मेरे पास तो द्रव्य हू नाहीं है । और सरीर हू थकयो हूँ । तातें तुमही मोकों वैष्णव करो तो आछो । तब वा वैष्णव ने कयो, जो - श्रीगुसाईजी थोरे दिनमें यहां पधारेंगे । तब तू उन की सरनि जइयो । तब वा डोकरी ने कही, जो - जब लों मेरे दिवस कैसे कटेंगे ? तातें तुम मोकों वैष्णव करो । तो मैं नित्य कथा सुनों । तब वा वैष्णव ने कही, जो - वाई तेरी आरति है तो तू नित्य कथा सुनिवे आइयो । परि हम तो तोकों वैष्णव करि सकत नाही । तब वा वाई ने कही, जो - भलो ! कथा सुनिवे आउंगी । पाछे जब श्रीगुसाईजी पधारे तब तुम मोसों कहियो । मैं वैष्णव होउंगी । पाछे वह डोकरी नित्य कथा सुनिवे वा वैष्णव के घर जाई । सो याकौ भाव बोहोत बढयो । पाछे श्रीगुसाईजी के दरसन की हू आरति बोहोत भई । कहे, जो - कब श्रीगुसाईजी पधारे और हों सेवक होउं, श्रीठाकुरजी की सेवा करों ? ता पाछे केतेक दिन में श्रीगुसाईजी राजनगर पधारे । तब वा वैष्णव ने या डोकरी सों कही, जो - वाई श्री-



गुसाईंजी पधारे हैं । तेरे सेवक होनो होइ तो चलि । हों विनती करों । तव वह डोकरी तत्काल वा वैष्णव के मंग चली । सो श्रीगुसाईंजी के दरसन किये । पाछे वा वैष्णव ने विनती करी, जो - महाराज ! या डोकरी की सेवक होंन की वोहोत आरति हैं । तातें आप इन कों कृपा करि सेवक कीजिए । तव श्रीगुसाईंजी कहे, जो - या डोकरी के लिये ही तो हम यहां आए हैं । पाछे डोकरी कों न्वाइ नाम निवेदन करवाए । तव वा डोकरी ने कही, जो - कृपानाथ ! भगवत्सेवा पधराय दीजिए । तव श्रीगुसाईंजी वाकों कृपा करि एक लालजी कौ स्वरूप पधगय दिये । तव वह डोकरी भक्ति-भाव संयुक्त श्रीठाकुरजी की सेवा करन लागी ।

घाता प्रसंग—६

सो वह डोकरी राजनगर में रहती । सो निष्कंचन हती । सो नित्य जो - वने सो सामग्री करि के भोग समर्पती । सो एक दिना 'मिलमा' की सामग्री करी हती । सो सिद्ध भई हती । इतने काहू वैष्णवने कही, जो - श्रीगुसाईंजी पधारे ह । सो श्रीगुसाईंजी श्रीरनछोरजी के दरसन करि के राजनगर पधारे हते । सो वा डोकरी ने श्रीगुसाईंजी पधारे सुनि के वेगिवेगि ताजी सामग्री समर्पि के चमचा घर में न हतो सो एक दांतिन छिलि के खासा करि के चमचा के बदले धरी । और श्रीठाकुरजी तें विनती करी, जो - महाराज ! यातें सामग्री हलाय के सीरी होइ तव आरोगियो । मैं श्रीगुसाईंजी के दरसन करि आउं । सो वा डोकरी कों दरसन की वोहोत आतुरता हती । सो भोग धरि के दरसन कों गई । सो श्रीगुसाईंजी के दरसन किये । पाछे आय के भोग सरायो । आचमन मुख वस्त्र करायो । इतने में एक वैष्णव आयो, श्रीठाकुरजी के दरसन किये । सो देखे तो भोग में एक दांतिन धरी हे । तव वैष्णव ने अपने मन में विचारी, जो - ए पुरातन वैष्णव हे । सो इनने दांतिन धरी हे सो रीति होइगी । तातें एतो निष्कंचन हे तातें एक

धरी हैं । अपने दोड़ धरेंगे । सो वा वैष्णव ने अपने घर राज-भोग में सामग्री के संग दोड़ दांतिन धरे । सो उन के यहां और हू वैष्णव आवते । सो उननें हू यही जानी, जो - दांतिन धरन की रीति होगी । तातें उन नें चारि धरी । उनके चारि देखि के चौथे वैष्णव ने आठ धरी । पाछें उन के आठ देखि के पांचमें वैष्णव ने एक जूड़ी धरी । सो उन के यहां एक भगवदीय वैष्णव आए । सो उन ने देखी । सो इन तें पूछी, जो - तुमने यह दांतिन धरी ताकौ कारन कहा ? तव उन ने कही, जो - फलाने वैष्णव के यहां देखि के मैंनें धरी । तव उन वैष्णव तें पूछी, जो - तुमने आठ दांतिन क्यों राखे ? तव उन कही, जो - फलाने वैष्णव के चारि दांतिनि देखि के मैंनें आठ धरे । तव उन वैष्णव ने जाँइ के पूछी, जो - तुमने चारि दांतिन क्यों धरी ? तव उन कही, जो - फलाने के दोड़ देखी तासों मैंनें चारि धरे । तव उन वैष्णव तें जाँइ के पूछी, जो - तुमने दोड़ दांतिन क्यों धरी ? तव उन कही, जो - फलानी डोकरी पुरातन है, सो उननें एक धरी तातें मैंनें दोड़ धरी । पाछें वह वैष्णव वा डोकरी के घर आए । तव डोकरी ने श्रीकृष्ण-स्मरण करि के बैठाए । और पूछी, जो - आज मेरे घर कैसें आवनो भयो ? तव उन वैष्णवने कही, जो - तुमने सामग्री में दांतिन क्यों धरी ? तव वा डोकरी ने कही, जो - हों तो श्रीगुसाईजी के दरसन कों जात हुती, और सामग्री ताती हुती । सो घर में चमचा न हुतो । तातें चमचा के बदले में मैंनें दांतिन धरी । जो - श्रीठाकुरजी के हाथ न दाझे । याके लिये दांतिन धरी । तव वह वैष्णव सुनि के प्रसन्न भए । ता पाछें श्रीगुसाईजी जब राजनगर में

पधारे तव वैष्णवन श्रीगुसांईजी आप सों यह सब समाचार विस्तार सों कहे । तव श्रीगुसांईजी यह मुनि के आज्ञा किये, जो - वैष्णवन कों जो कछू सेवा संबंधी कार्य करनो होइ सो भगवदीयन कौ सत्संग करि कै करनो । भगवदीयन तें पूछि कै करनो । जो - देखा देखी करे तो उलटो अपराध माथे पड़े । तातें विचार कै करनो ।

भावप्रकाश—या वार्ता कौ अभिप्राय यह है, जो - सेवा भगवदीयन कों संग करि, भाव समझि कै, प्रीति संयुक्त करनी । देखा देखी नहीं करनी ।

सो वह डोकरी श्रीगुसांईजी की ऐसी कृपापात्र भगवदीय हती । तातें इनकी वार्ता कौ पार नाही, सो कहां तांई कहिए ?  
वार्ता ॥१४२॥



अब श्रीगुसांईजी के सेवक एक स्त्री-पुरुष, मथुराजी के, तातें मंडली में घन चांटे, तिनकी वार्ता कौ भाव कहत हैं —

भावप्रकाश—ये सात्विक भक्त हैं । लीला में इन कौ नाम 'गेहनी' 'देहनी' हैं । ये दोऊ 'मधुएनी' तें प्रगटी हैं, तातें उन के भावरूप हैं । सो पुरुष कौ नाम तो 'गेहिनी' है । और स्त्री कौ नाम 'देहिनी' । ये दोऊ मथुरा में रहते । सो श्रीगुसांईजी मथुराजी में वास किये तब ये सेवक भए हैं । सो उनके माथे श्रीगुसांईजी आपु लालजी कौ स्वरूप सेवा कों पधराय दिये हैं ।

वार्ता प्रसंग—६

सो वे स्त्रीपुरुष श्रीठाकुरजी की सेवा बोहोत स्नेह सों करते । सो श्रीठाकुरजी सानुभावता जनावते । और उनके घर वैष्णव-मंडली नित्य होती । और भगवद्वार्ता-कीर्तन नित्य होते । सो मथुरा के वैष्णव नित्य आवत हते । सो नित्य चना-चवेना कौ महाप्रसाद चांटते । तामें एक सेठ वैष्णव मुनिवें कों आवतो । सो उहां चना चवेना कौ महाप्रसाद चटयो । सो सेठने

लै कै वह महाप्रसाद डारि दीनो । सो वा मंडली में महादेवजी भगवदगुनानुवाद सुनिवे कों आवते । सो तिन चना प्रसादी वीनि वीनि के लिये । तव वैष्णव ने पूछी, जो - ये कौन है ? तव देखें तो महादेवजी है । तव वैष्णव ने कही, जो - यह तुम कहा करो हो ? तव महादेवजी ने कही, जो - सेठ ने चना डारि दीने हैं सो मैं वीनत हों । सो नित्य ऐसैं ही करे हैं । तव या क्षत्री वैष्णव ने सेठ तें पूछी, जो - तुम नित्य महाप्रसाद कौ अनादर करत हा ? तव सेठ ने नहीं करी । तव वैष्णव ने कही, जो - महादेवजी कहत हैं तुम झूठ क्यों बोलत हो ? तुम कों द्रव्य कौ अहंकार है । सो तुम्हारो अहंकार मिटेगो तव तुम कों वैष्णव-मंडली में बुलावेंगे । पाछें वा वैष्णव ने सवन सां कह्यो, जो - याकों कोई जैश्रीकृष्ण मति करियो । और वैष्णव-मंडली में मति आवन दीजो । ता पाछें कोई वैष्णव श्रीकृष्ण-स्मरण न करें । तव वह सेठ मथुरा तें श्रीगोकुल कों आयो । सो मन में कह्यो, जो - मैं श्रीगुसांईजी सां विनती करुंगो । सो मोकों वैष्णव-मंडली मिले । पाछें श्रीगुसांईजी कों दंडवत् करी । तव श्रीगुसांईजी पीठि फेरि कै बैठें । तव सेठ ने विनती कीनी, जो - महाराजाधिराज ! वैष्णव मंडली ने मेरो त्याग कियो है । और आप (हू) पीठि फेरि कै बिराजे हो । सो आप कृपा करि कै आज्ञा करिये, जो - मेरो कहा अपराध है ? तव आपने आज्ञा करी, जो - उहां वैष्णव मंडली ने त्याग कियो, तो मैं ही त्याग कियो । तव वाने विनती करी, जो - महाराज ! मेरो ठिकानो अब कहां ? तव आज्ञा करी, जो - जब वैष्णव, मंडली में लेंगे तब हम दरसन देइंगे । तव वह सेठ मथुरा आयो ।

पाछें कितनेक दिन में इन के द्रव्य कौ नास भयो । तव बाकों दीनता आई । पाछें उन वैष्णव मंडली में जाँइ विनती करी, जो - अव मेरे द्रव्य कौ नास भयो । अव मेरो अहंकार मिट्यो । सो अव मोकों वैष्णव-मंडली में लेऊ । तव वैष्णवन ने कही. जो - अव महाप्रसाद कौ अनादर करोगे ? तव वा सेठने दोऊ हाथ जोरि कै विनती करी, जो - अव मैं कवहू महाप्रसाद कौ अनादर न करोंगो । अनादर कर्यो ताको फल मैं भोग्यो । अव कृपा करि कै मोकों जैश्रीकृष्ण करो । जब आज्ञा करो तव मैं मंडली में आउं । तव वैष्णवन कों दया आई । तव वैष्णवन ने जैश्रीकृष्ण कहि कै मंडली में बुलायो । और कही, जो - अव महाप्रसाद कौ अनादर मति करियो । तव वाने विनती करी, जो - अव अनादर कवहू न करुंगो । सो ऐसैं ही महाप्रसाद सों वैष्णवन कों डरपत रहनो । पाछें वह नित्य वैष्णव मंडली में आवे । भगवद्वार्ता सुने । तव वैष्णव सब प्रसन्न रहते । पाछें श्रीगोकुल आय कै श्रीगुसांईजी कों दंडवत् करी । तव श्रीगुसांईजी आप प्रसन्न भए । और आज्ञा किये, जो - वैष्णव प्रसन्न भए तव हम हूं प्रसन्न भए । सो यह सेठ मथुरा में रहि कै भगवदसेवा करतो । और वैष्णव मंडली में नित्य जातो ।

भावप्रकाश—या वार्ता में यह जतायो. जो - वैष्णव-मंडली कों भगवद्-स्वरूप करि जाननी । उहां जाँई दीनता सों भगवद्वार्ता सुननी । तो वेगि प्रभु कृपा करें । और द्रव्यादिक को अभिमान बाधक कहे । सो प्रभु जा पर कृपा करें ताके द्रव्यादि कौ नास करि अभिमान निवृत्त करत हैं । ताते वैष्णव द्रव्य पाय अभिमान न करें ।

सो वह सेठ और वह क्षत्री वैष्णव श्रीगुसांईजी के तेस परम कृपापात्र भगवदीय हते । ताते इनकी वार्ता कौ पार नाही,

मो कहाँ ताई कहिण ?

वार्ता ॥ १५३ ॥

ॐ

ॐ

ॐ

ॐ

अप श्रीगुमांडजी की संघर्षिनी पत्नी जोर होतरी, जाने मरु सेर काय करयो, मिनकी गार्ना की भाव कहत है—

भावप्रकाश—ये राजम भक्त है। लीला में इन की नाम 'अन्नकृष्ण' है। ये 'मगुर्नी' में प्रसारी है, ताते उन के भाव्य है।

गार्ना प्रथम २

मो वह डोकरी राजनगर में रहती। मो तब श्रीगुमांडजी राजनगर पधारें तब बोहोत में देवी जीव वेण्णव भण है। तामें यह सेवक भई है। मो वा डोकरी के माथे श्रीबालकृष्णजी विराजत हते। मो वह बालपने ते विधवा भई हती। मा बालपने ते सेवा करत करत बृद्ध भई।

तब एक दिना काल आयो। मो अन्नकृष्ण पं आयो। मो वा डोकरी कां श्रीगुमांडजी की कृपा ते वह काल मृनिमान दीसे। तब काल ने कही, जो - अब यहां ते चलो। तब वा डोकरी ने कही, जो - मरे श्रीठाकुरजी के अन्नकृष्ण को उत्सव आयो। ताते में नाहीं आऊँ। तब काल तो फिरि गयो। मो अन्नकृष्ण पाछें फेरि काल आयो। तब डोकरी ने कही, जो - अब तो प्रबोधिनी आई ताते में तो नाहीं आऊँ। तब काल पाछो गयो। मो कतेक दिन पाछें वह फेर आयो। तब डोकरी ने कही, जो अब तो श्रीगुमांडजी को उत्सव आयो, ताते में अबही नाहीं आऊ। ता पाछें काल फिरि गयो। पाछें वसंतपंचमी पं काल आयो। तब डोकरी ने कही, जो - अब तो वसंतपंचमी को उत्सव आयो। ताते हों तो नाहीं आवति हूँ। तब काल फेरि गयो। सो काल फेरि डोल पं आयो। तब डोकरी ने कही, जो - अब तो डोल

उत्सव आयो है । तातें अब ही तो मैं नहीं आउं । तव काल पाछो गयो । पाछें काल फेरि श्रीआचार्यजी महाप्रभुजी के उत्सव पै आयो । तव डोकरी ने कही, जो - अब तो श्रीआचार्यजी महाप्रभुजी के उत्सव पाछें आउंगी । तव काल फिरि गयो । सो कितनेक दिन पाछें फेरि आयो । तव डोकरी ने कही, जो - जन्माष्टमी कौ उत्सव करि के आउंगी । तव काल फिरि गयो । सो केतेक दिन पाछें फेरि आयो । तव डोकरी ने कही, जो - यह उत्सव राधाष्टमी कौ करि के आउंगी । तव काल फिरि गयो । तव काल तो दिक् होइ के धर्मराज तें कही, जो - महाराज ! वा डोकरी ने तो बरस दिन में आठ फेर करवाए । जब मैं जाउं तव कहे, जो - अब तो फलानो उत्सव है । तातें नहीं आऊंगी । सो मैं तो कायो होइ गयो । तव धर्मराज ने कही, जो - वह तो भगवदीय हैं । तातें उन पे मेरो दंड लगे नहीं । मेरो बल चले नहीं । तव काल तो सुनि के अपने ठिकाने बैठयो ।

भावप्रकाश—या चार्ता कौ अभिप्राय यह है, जो कोऊ भगवत्सेवा भाव श्रुति संयुक्त करत हैं तिन कौ काल बाधा करि सकत नहीं । ऐसो सेवा कौ प्रभाव है ।

चार्ता प्रसंग—२

बहोरि एक समै श्रीगुसाईजी राजनगर पधारे । सो भाईला कोठारी के घर विराजे । सो वैष्णव सब दरसन कौ आए । सो वह डोकरी हू आई । तव श्रीगुसाईजी ने श्रीमुख तें कही, जो - आवो 'अष्टपदी' । तव वैष्णवन श्रीगुसाईजी सां विनती कीनी, जो - महाराज ! अष्टपदी सो कहा ? तव श्रीगुसाईजी ने कही, जो - भीष्मपिता ने एक बेर काल कौ पाछो फेरयो । और या

डोकरी ने आठ बर काल कों पाछो फरयो । पाछे श्रीगुसांईजी ने वा डोकरी तं कही, जो - भलो ! आठ बर काल कों फरा खवाण, सो कल तो दया विचारि । भलो, काल कों मान देनो । तव डोकरी ने कही, जो - महाराज ! मैं तो आप के बर हो, काल के बर नाही । और मेरे लालजी की सेवा कौन करंगो ? तव श्रीगुसांईजी ने कही, जो - हमारे घर लालजी पधराऊ । तव डोकरी ने कही, जो - भले महाराज ! आप की निधि आप पधरावो । तव वा डोकरी ने वैभव मलिन श्रीठाकुरजी, श्रीगुसांईजी के घर पधराण । और जो घर में हतो, सो सब श्रीगुसांईजी कों समायो । तव श्रीगुसांईजी ने कही, जो - कल तो राखि ले । तव वा डोकरी ने कही, जो - अब मेरे कला करनो हे ? पाछे थोरमे दिन रहि के वा डोकरी ने लौकिक देह छोरि के अलौकिक देह तं काल के माथे पग दे के व्यापि बकुंठ के विषे प्रवेश करत भई ।

भावप्रकाश—यामें यह जतायो, जो - भगवदीय वैष्णव काल के आरौन नाही हे । ताते गोपालदासजी गाण हैं—

‘चित्रगुप्त कागद फारि उरि मग्न जो जन जाण्यो ।’

ताते मन, वच, कर्म करि जो-जोय श्रीमहाप्रभुजी की मग्न उठ गजन हैं तामें काल हू उग्रत हे । यह सिद्धांत कयो ।

सो वह डोकरी श्रीगुसांईजी की ऐसी कृपापात्र भगवदीय हती । ताते इन की वार्ता कौ पार नाही, सो कहां ताई कहिण ।

वार्ता ॥१४४॥



अब श्रीगुसांईजी के संघक एक विरक्त हतो, सो यह गुजरात में रहतो, तिनकी वार्ता कौ भाष कहत हैं—

भावप्रकाश—ये सात्विक भक्त हे । लीला में इन कौ नाम ‘पंचु’ गोप हे ।



सो लीला में अनेक पशु पक्षी हैं । तिन सवन के एक-एक के न्यारे-न्यारे अनेक भाव हैं । सो सब स्वरूपात्मक हैं । तामें यह पेंचु 'तमचर' के भावरूप है । सो प्रातःकाल होंई तब वह नंदालय में आवत है । पाछें मधुर कोमल स्वर सो प्रभुन कों जगावत हैं । तातें श्रीठाकुरजी इन पर सदा सर्वदा प्रसन्न रहत हैं ।

वार्ता प्रसंग—१

सो एक समै श्रीगुसांईजी के दरसन करिवे कों एक साथ गुजरात कौ गोकुल आयो हतो । सो वा साथ में एक विरक्त हू हुतो । सो इन श्रीगुसांईजी के दरसन पाए । सो दरसन करि कै वोहोत प्रसन्न भयो । ता पाछें वा विरक्त ने श्रीगुसांईजी सों विनती कीनी, जो - महाराज ! मोकों नाम सुनाइए । तब श्रीगुसांईजी ने वाकों नाम सुनायो । ता पाछें श्रीगुसांईजी आप वाकों कृपा करि निवेदन कराए । तब वा विरक्त ने श्रीगुसांईजी सों विनती कीनी, जो - महाराज ! अब मोकों कहा कर्तव्य है ? तब श्रीगुसांईजी वा विरक्त कों आज्ञा किये, जो - तुम नाममंत्र कौ हृदय में जप करो । तासों तुमकों भगवद्भाव सिद्ध होयगो । सो ता दिन तें वह विरक्त नित्य नाममंत्र कौ अपने हृदय में जप करन लाग्यो । सो केतेक दिन में वाकों श्रीगुसांईजी की कृपा तें भगवद्भाव उत्पन्न भयो । तब वह श्रीनवनीतप्रियजी के नित्य दरसन करे । पाछें श्रीगुसांईजी के दरसन करे । या प्रकार रहतो ।

पाछें वह विरक्त वैष्णव श्रीगुसांईजी सों आज्ञा मांगि श्रीगोवर्द्धननाथजी के दरसन कों गयो । सो दरसन करि कै उहां ते ब्रज परिक्रमा कों गयो । सो परिक्रमा करि श्रीगोकुल आयो । पाछें वह अहरनिस फिरिवोई करे । कहुं स्वतंत्र रहे नाहीं । सो उत्तम स्थल, उत्तम वार्ता में अहरनिस रहे । भगव-

दीय वैष्णव होइ ताकौ संग करे । पाछें वह विरक्त पृथ्वी पर्यटन करन लाग्यो ।

ऐसैं करत एक दिन वह एक गाम में आयो । सो तहां काहू वैष्णव के बेटा कों सर्प ने डस्यो । सो वह मरयो । तब वाकी महतारी रोवन लागी । सो बोहोत विलाप करि कें रोवन हुती । सो ता मार्ग में वह विरक्त वैष्णव और औरहू वैष्णव भगवदीय चले जात हुते । तब वा विरक्त वैष्णव ने पृच्छी, जो - ये क्यों रोवत है ? तब दूसरे लोग ठाढ़ हते तिन सर्व वृत्तांत कह्यो । तब वा विरक्त वैष्णव कों दया आई । तब वा विरक्त वैष्णव ने भगवन्नाम कौ उच्चार कियो । सो वह जीयो । तब सब लोग वाके पाछें परे । और कहन लागे, जो - यह विद्या आपके पास है सो हमकों सिखावो । तब वा विरक्त वैष्णव ने कह्यो, जो - हों सिखाऊं तो सही, परंतु तुमकों हमारो विश्वास नहीं आवेगो । तब उन वा विरक्त वैष्णव सों कह्यो, जो - विश्वास कैसें नहीं होइगो । प्रत्यच्छ देखि कें विश्वास न आवे सो कैसें मानें ? पाछें विरक्त वैष्णव ने कह्यो, जो - हम तुम कों यह मंत्र सिखावत हैं । सो तुम हू अहर्निस कहियो । जो - 'श्रीकृष्णः शरणं मम' अहर्निस कहते रहियो । तब उन, विरक्त वैष्णव सों ह्यो, जो - ए तो मंत्र हम जानत ही हैं । परि दूसरो मंत्र क्यों नहीं कहत हो ? तब वा विरक्त वैष्णव ने कह्यो, जो - यह मंत्र सर्वोपरि है । ता पाछें वह विरक्त वैष्णव उहां तें आगें कों चलयो । सो ऐसैं अहर्निस फिरयो करतो । सो जहां ताई विरक्त वैष्णव की देह चली, तहां ताई फिरिवो कियो । सो ता पाछें वह विरक्त वैष्णव की देह छूटी । सो

श्रीगोवर्द्धननाथजी के चरनारविंद में प्राप्त भयो ।

भावप्रकाश—या वार्ता कौ अभिप्राय यह है, जो - वैष्णव कौ विश्वास-पूर्वक अष्टाक्षर मंत्र कौ जप करनो । तातें सर्व कार्य की सिद्धि होत हैं । अविश्वास बाधक हैं । सो श्रीआचार्यजी महाप्रभु 'विवेकधैर्याश्रय' ग्रंथ में लिखे हैं । सो श्लोक—

‘ अविश्वासो न कर्तव्यः सर्वथा बाधकस्तु सः ’ ।

तातें वैष्णव कौ अविश्वास सर्वथा न करनो । काहेतें, जो - यह आसुर धर्म है । तातें भक्ति में बाधक कह्यो है ।

सो वह विरक्त वैष्णव श्रीगुसांईजी कौ ऐसो कृपापात्र भगवदीय हतो । तातें इनकी वार्ता कहां तांई कहिए ?

वार्ता ॥ १४५ ॥



अब श्रीगुसांईजीकौ सेधक एक नाऊ हुतो, सो वह गुजरात में रहतो, तिनकी वार्ता कौ भाष कहत हैं—

भावप्रकाश—ये तामस भक्त हैं । लीला में इन कौ नाम 'अनन्या' है । ये तमचर के भावरूप हैं । सो ये निकुंज की सेवा करति हैं । भोर होत ही सब वृक्षन कौ सम्हारति हैं । सो एक समै आधी राति कौ ये जगी । जाने, जो - भोर भयो । सो वृक्षन कौ सम्हारन लागी । ताकौ आहट भयो । सो श्रीठाकुरजी सुने । तब जाने जो सवेरो भयो, सो उठे । तब ललितादिक सखी ने कही, जो - अबही रात्रि वोहोत है । तब श्रीस्वामिनीनी क्रोध करि कै अनन्या कौ साप दिए । कहे, जो - समै विना मन कौ खेद करायो । तातें जाऊ भूमि पर गिरो ।

सो यह गुजरात म एक नाऊ के जन्म्यो । पाछें बरस पचोस कौ भयो । तब याके मा-बाप मरे । सो याकौ व्याह तो भयो नाहीं हतो । सो ये अपना धंधो करि निर्वाह करत हुतो ।

वार्ता प्रसंग—६

सो एक समै श्रीगुसांईजी गुजरात कौ पधारे हुते, सो श्री-रनछोरजी के दरसन कौ । सो वा मारग में एक नाऊ ने एक दिन श्रीगुसांईजी की सीक लीनी । सो वोहोत भली भांति सो

लीनी। तव श्रीगुसांईजी वापे वोहोत प्रमन्न भण् । सो ता ममे वा नाऊ कों श्रीगुसांईजी के ऐसैं दरसन भण् मानां माक्षात पूरन पुरुपोत्तम हैं । तव वा नाऊ ने श्रीगुसांईजी कों विनती कीनी, जो - महाराज ! मोकों नाम गुनाइण् । तव श्रीगुसांईजी ने कृपा करि के नाम गुनायो । तव वह नाऊ बडो भगवदीय भयो । सो ता पाछें और कौ वा नाऊ ने वृत्तो नहीं कियो । तव वैष्णवन उन तें पूछे, जो - तुम और की मोक क्यों नाहीं वनाओ । तव वा नाऊ नें कह्यो, जो - श्रीगुसांईजी के नख ऊतारि के और के कैसे ऊतारुं ? और अपने रात्र हुते सो सब कुआँ में डार दिए । और कछु ब्यौहार करि के अपना निर्वाह करन लाग्यो । ता पाछें श्रीगुसांईजी श्रीरनछोड़जी के दरसन कों पधारे । सो दरसन करि के श्रीगुसांईजी फेरि वा नाऊ के गाम आये । तव वा नाऊ ने जो कछु हुतो सो श्रीगुसांईजी कों भेंट करि दियो । ता पाछें श्रीगुसांईजी श्रीगोकुल पधारे । और वह नाऊ तो अपने गाम में रह्यो । सो जहां पर्यंत अपनी देह चली तहां ताँई और कछु वार्ता करी नाहीं । अष्टाक्षर कौ नित्य स्मरण करे । श्रीगुसांईजी के स्वरूप कौ ध्यान नित्य करिवो करे । ऐसैं करत कछुक दिन में याकी देह छूटी । सो लीला में प्राप्त भयो ।

भावप्रकाश—या वार्ता कौ अभिप्राय यह है, जो - वैष्णव कों अनन्यता ही बडो पदार्थ हैं । काहेतें, जो - अनन्यता सों मन कौ निरोध सिद्ध होत है ।

सो वह नाऊ श्रीगुसांईजी कौ ऐसो कृपापात्र भगवदीय भयो । तातें इन की वार्ता कहां ताँई कहिए । वार्ता ॥१४६॥



श्रीगुसांईजी के सेवक एक पठान कौ बेटा, दिल्ली में रहतो, तिनकी भाव कहत हैं—

वप्रकाश—ये राजस भक्त हैं, लीला में ये 'रासो' गोप है । सो ए के संग हथियार बांधि कै चलतो । ये तमचर के भावरूप हैं ।  
ये यह दिल्ली में एक पठान के जन्म्यो । सो बरस बीस कौ भयो । तव वैष्णव कौ सग भयो । तव वा वैष्णव ने उन सौं कह्यो, जो - तू देवी ऐसैं मोकों जानि परत हैं । तातैं तू वैष्णव होइ कै अपनो जनम कृतारथ वा या पठान ने कही, जो - मैं कैसे मानों, जो - तुम साँच कहत हों । तव ने वाकों बालपने की सब बात कही । तव वा पठान ने जानी, जो - ये पुरुष है । तातैं इन कौ कह्यो करनो । याही में मेरो भलो है । पाछें या पूछी, जो - वैष्णव कैसे होई ? तव वा वैष्णव ने कह्यो, जो - 'निगमबोध' श्रीगुसांईजी विराजत हैं । उन की पास जाइ नाम सुनि । तव तू इगो । तव वा पठान के बेटा ने दृढ़ निश्चै कियो, जो - श्रीगुसांईजी के उन कौ सेवक होनो ।

वार्ता प्रसंग—१

ये एक समै श्रीगुसांईजी के पास वह पठान कौ बेटा नाम कौं आयो हुतो । सो वाकों श्रीगुसांईजी ने नाम दियो । पठान कौ बेटा वैष्णव भयो । ता पाछें वा पठान कौ 'सेरसाह' पात्साह पास पुकारयो । कह्यो, जो - मेरो बेटा के धर्म में गयो है । तव पात्साह ने पठान के बेटा कौं । तव पठान कौ बेटा आयो । तव पात्साहने पठान के कौं कह्यो, जो - तू यह धर्म छोरि दे । तव उन पठान के पात्साह सौं कह्यो, जो - हों यह मार्ग क्यों छोरों ? तू में मैं प्रीति करी है । सो जासों प्रीति करिये तासों नहीं । तव सेरसाह पात्साह ने माला-तिलक देखि यो, जो - ये वेष कहा है ? तव उन पठान के बेटाने कह्यो, ये वेष उन कौं बोहोत प्यारो लागत है । तव पात्साह ने

कह्यो, जो - तू नहीं छोरेगो ? तव वा पठान के वेटा ने कह्यो, जो - हों सर्वथा नहीं छोरेगो । तव पात्साह ने कह्यो, जो - हेरे कौऊ ? मेरी तरवारि ल्याओ । याकों मारों । तव मवन ने जान्यो, जो - अब यह पठान के वेटा कों मारेगो । तव उन पठान के वेटा ने अपनी तरवारि निकारि पात्साह के हाथ में दीनी । तव पठान के वेटा सों पात्साह ने कह्यो, जो - या मार्ग सों तें प्रीति करी हे और मैं तासों रिस करी हे । अब देखे तेरी चौकी-रक्षा कौन करे हे ? तव पठान के वेटा ने पात्साह सों कह्यो, जो - तुम्हारे करनी होइ सां करिये । परि हमारे तो येही बात हैं । तव सेरसाह पात्साह ने वा पठान के वेटा कौ साँच देखि वोहोत प्रसन्न भयो । तव पात्साह ने वा पठान के वेटा कौ मिरोपाव देके अपने घर पठवायो ।

ता पाछें यह सब समाचार काहू वैष्णव ने श्रीगुसाईजी सों कहे । तव श्रीगुसाईजी श्रीमुख तें कहे, जो - वैष्णव कौ ऐसो ई धर्म है । जो - काहू सों कहिए नाहीं । गोप्य ही राखिए । वा पठान के वेटा नें अपनी देह कौ त्याग करनो आदरयो परि अपनो धर्म न छोरेयो । सो वैष्णव कौ धर्म ऐसोई हे । तातें वैष्णवन कों दृढ़ आश्रय चहिए । और एक आश्रय श्रीगोवर्द्धननाथजी कौ होइ तो वे अपनी रक्षा-पालन क्यों न करें ? तातें जीव कों विस्वास चहिए । सो 'निजेच्छात् करिष्यति' । श्री-प्रभुजी की ईच्छा होइगी सो कार्य होइगो । काहू बात की चिंता नहीं करनी । ऐसं श्रीगुसाईजी श्रीमुख तें आज्ञा दीनी । तव सब वैष्णव सुनि कै वोहोत प्रसन्न भए ।

भावप्रकाश--यामें यह जताए, जो वैष्णव निर्भय व्हे अपनो धर्म पालन

करें ताकों प्रभु निश्चै सहाइ होंइ ।

सो वह पठान कौ बेटा श्रीगुसांईजी कौ ऐसो कृपापात्र  
भगवदीय भयो । तातें इन की वार्ता कहां तांई कहिए ।

वार्ता ॥१४७॥



अब श्रीगुसांईजी के सेवक स्त्री-पुरुष, कनोजिया ब्राह्मन, आगरे में रहते,  
तिनकी वार्ता कौ भाव कहत हैं —

भावप्रकाश—ये सात्विक भक्त हैं । लीला में पुरुष 'मृदुभाषिणी' हैं, और  
स्त्री 'कोमलांगी' । ये दोऊ श्रुतिरूपा के जूथ के हैं । सो एक सेठ की वार्ता में  
आगे कहि आए हैं । ये दोऊ 'कमला' तें प्रगटी हैं, तातें उनके भावरूप हैं ।

वार्ता प्रसंग—१

सो वे देवी के अनन्य सेवक हते । सो देवी तिनसों सा-  
नुभाव रहती । सो एक दिन चाचा हरिवंसजी आगरे में आये ।  
सो रात्रि प्रहर एक गई । ता समैं आगरे में आइ पहींचे ।  
तव चाचा हरिवंसजी ने मन में विचारयो, जो - अब या समैं  
कोई वैष्णव के घर जाइंगे तो वह वैष्णव रसोई करायवे कौ  
आग्रह करेगो । भूखे न रहन देहिगो । तातें वैष्णव के घर  
काल्हि जाइंगे । अब तो रात्रि वोहोत गई है सो रसोई न  
होइ सकेगी । तातें जो वैष्णव के घर जाइंगे तो वह दुःख  
पावेगो । तातें वनें तो यह आछो चोंतरा है । आज इहांई सोय  
रहेंगे । सो वा चोंतरा के पास कुआँ हतो । सो चाचाजी के  
संग वैष्णव चारि और हते । तिनसों चाचाजी कहे, जो - जल  
भरि लावो तो न्हाइ कै कछू महाप्रसाद लेहि । तव वे दोइ  
वैष्णव तो खारी जल भरन गए । दोइ जनें श्रीयमुना जल  
लेन गए । सो जल ले आए । तव चाचा हरिवंसजी न्हाए ।  
चारों वैष्णव हते सोऊ न्हाए । तव चाचाजी महाप्रसाद थोरो

सो हतो सां चार्यों जनन कों चाँटि लियो । सो मथुरा के चले आगरे पहोंचि हते । सां चाचाजी महति चारों वैष्णव हारि गए हते । सो सोइ रहें । इतन में चारों वैष्णव कौ नींद आइ गई । और चाचा जागन हते । सो वह चांतरा देवी उपासिक ब्राह्मन कनोजिया कौ हतो । सो जब अर्द्धरात्रि गई तब वह ब्राह्मन कनोजिया ने देवी की प्रार्थना करी । सो देवी आय के देखे तो चाचा हरिवंसजी चारों वैष्णव समेत चांतरा ऊपर सोये हैं । और ज्येष्ठ कौ दिन है । सो गरमी बोहान हती । और पांचों वैष्णव हारे हते । यह देवी जानि के विचारयो, जो - आज मेरी सेवा कौ दाव परयो है । श्रीगुसाईजी के अंतरंग सेवक हैं । इनकी सेवा करी चाहिये । तब देवी ने अपने चारि स्वरूप और प्रगट किये । सो चारों के हाथ पंगवा दे तिन सों कह्यो, जो - तुम चारों वैष्णव की सेवा करो । मैं चाचा हरिवंसजी की सेवा करत हों । तब देवी के चारों स्वरूप वैष्णव की सेवा करन लागे । देवी चाचा हरिवंसजी की सेवा करन लागी । तब चाचा हरिवंसजी यह सब अभिप्राय जानें । तब आपने मुख ऊपर ऊपरेना डारि के सोय रहे । और वे चारों वैष्णव नींद में । उनकों कछू खवरि नाही है । सीतल ब्यार लागी सो और हू नींद आई गई । या प्रकार देवी तो इहां चाचा हरिवंसजी की सेवा करन लागी । और उहां वह ब्राह्मन न्हाय के घी कौ दीयो चारि के देवी की स्तुति अनेक प्रकार की कियो । सो देवी नाही आई । सो ब्राह्मन कों महा क्षोभ भयो । भय भयो । जो - आज देवी मेरे ऊपर अप्रसन्न हैं । सो मोसों कछू चूक परी । सो अब मैं कहा करों ?



या प्रकार सगरी रात्रि स्त्री-पुरुष देवी की स्तुति बैठे बैठे किये । मनमें अनेक प्रकार सों विचार करत हैं । पाछें वे घरी रात्रि पाछली रही तव चाचा हरिवंसजी उठे । सो देखें तो देवी पंखा करत हैं । तव चाचा हरिवंसजी बोले, जो - तू कौन है ? सगरी रात्रि सेवा करी । तव देवी चाचा हरिवंसजी के पांयन परि गई और विनती करी, जो - मैं देवी हों । सो मेरे मनमें मनो-रथ वोहोत दिन सों हतो । जो - श्रीगुसांईजी की सेवा करों । सो श्रीगुसांईजी की सेवा में तो मेरो अधिकार नहीं है । तातें श्रीगुसांईजी की सेवा कहां तें मिले ? जैसे श्रीकृष्ण की सेवा में देवतान कौ अधिकार नहीं है । स्तुति करि, फूलन की वर्षा करि अपने लोक में चले जात हैं, तैसेही हमकों अधिकार श्री-गुसांईजी की सेवा में नहीं है ।

भावप्रकाश—यह कहि यह जतायो, जो - श्रीगुसांईजी कौ स्वरूप महा अलौकिक हैं । साक्षात् पूरन पुरुषोत्तम कोटि कंदर्पलावन्य हैं । ऐसे स्वरूप हैं । तातें देवता हू भूमि पर आई, आप की टहल करिवे की ईच्छा करत हैं । परि उनकों मिलत नहीं । तातें गोपालदासजी बल्लभाख्यान में गाये हैं । सो कारिका —

‘ विबुध वांच्छे वास वसुमति ऊपरे श्रीवल्लभकुंवर नी टहल करवा ’

सो श्रीगुसांईजी आप कौ ऐसे स्वरूप है ।

और आधिदैविक देवता जो हैं तिनकौ अधिकार है । सो जब पृथ्वी ऊपर प्रभु प्रगटे हैं तव उह देवता आधिदैविक सेवा के लिये प्रगट होत हैं । तिनके आगें हमारौ अधिकार नहीं । तातें मेरे मन में वोहोत दिन तें ही, जो - श्रीगुसांईजी के अंत-रंग सेवकन की सेवा मिले । सो कोई दिन तो मेरो जन्म सुफल होइ । सो आजु मो पर भगवान कृपा करी, जो - तुम्हारी सेवा मिली । यह सुनि कै चाचा हरिवंसजी कहे, जो - तुम सकित

हो । तुम कों हमारी सेवा करनी उचित नहीं है । तुम कों सगरो जगत पूजत है । यह मुनि के देवी ने बिनती करी, जो - भगवद्माया करि मोहित जो जीव हैं सो हमारी सेवा करत हैं । सो मेरी पूजा करत हैं तिन कों मैं लौकिकामक्ति कराय, तीन गुन माया के हैं तिन में डारि देति हों । ता करि जीव सदा दुःख पावत हैं ।

भावप्रकाश—काहे तें, जो - मेरी पूजा करत है तिन कों मैं जानति हो, जो - भगवान इन कों अंगीकार नहीं कियो है । तातें मैं उन कों मंगार में डारत हों ।

तातें आज मेरे बड़े भाग्य हैं, जो - तुम मारिखे बड़े भगवदीय कौ दरसन भयो । और कलक सेवा मिली । तव चाचा जी कहे, अब तुम जाऊ । तव देवी पांचों स्वरूप कौ एक स्वरूप करि के उह स्त्री-पुरुष ब्राह्मन पास आई । और चाचा हरिवंसजी ने यहां चारों वैष्णवन कों जगाये । कहे, इहां तें वेगि चलो । तव चारों वैष्णव सहित आगरे में संतदास के घर आए । तव संतदासजी चाचा हरिवंसजी कों बोहोत सन्मान करि भाव भक्ति सों अपने घर में राखे । तहां चाचाजी और चारों वैष्णव देहकृत्य करि दांतिन करि न्हाय के चाचाजी रसोई किये । और उह देवी प्रातःकाल उठि के वह स्त्री-पुरुष ब्राह्मन के पास गई । सो देखें तो घी कौ दीया धरि देवी के अर्थ होम करत हैं । देवी की स्तुति करत हैं । सो देवी कों देखि के दोऊ स्त्री-पुरुष उठि के ठाढ़े भए । सांष्टांग दंडवत् करि के देवी के पाँइन परि बोहोत बिनती करि पूछे, जो - माताजी ! आज तुम या समय आई ! सो तुम्हारी पूजा में मेरी कहा चूक परि है ? जो - अपराध

परचो होइ सो वतावो । और अपराध छिमा करि कै मोकों अर्द्धरात्रि के समै दरसन दियो करो । सो मैं तुम्हारो दरसन करि कै सोयो करोंगो । सो सगरी रात्रि-दिन तुमही मैं मन रहे । यह ब्राह्मन-ब्राह्मनी के वचन सुनि कै देवी प्रसन्न भई । कह्यो, तुम्हारो स्नेह हमारे ऊपर वोहोत है । सो तुम सों अपराध कव हू न होइगो । मैं तुम्हारे चोंतरा ऊपर चारि प्रहर रात्रि रही । तव स्त्री-पुरुष ने विनती करी, जो - माताजी ! तुम हमारे द्वार पै सगरी रात्रि रही ताकौ कारन कहा ? हमारे घर में क्यों नहीं आई ? तव देवी ने कही, जो - श्रीविठ्ठलनाथजी श्रीगुसाईजी के अंतरंग सेवक पांच मथुरा तें आज आये । सो इह चोंतरा ऊपर विश्राम रात्रि कों किये हे । सो मैं सगरी रात्रि उन पांचों वैष्णवन कों पंखा करत ही । सो वे सगरी रात्रि पाछें अब आज्ञा दीनी तव मैं तेरे पास आइ हों । तातें मैं तेरे पास आइ न सकी । यह देवी के वचन सुनि कै स्त्री-पुरुष चक्रत होइ रहे । कहे, माताजी ! हम तो यह जानत हते, जो - या जगत में तुम्हारे समान और कोइ नहीं है । और तुम तो कहत हो, जो - श्रीविठ्ठलनाथजी श्रीगुसाईजी के सेवक की टहल मैं करि आइ हों । ताकौ कारन कहा ? तुम मोकों भ्रम उपजावत हो के साँच कहत हो ? सो मोकों समुझ नहीं परत । सो मैं तो तुम्हारो दास हूं । तुम विना मैं औरकों नहीं जानत । और तुम्हारे कहे कौ मोकों आगे सों विस्वास है । ताते माताजी तुम साँच वात सगरी कहि देहु । यह सुनि कै देवी प्रसन्न होइ कै कह्यो, जो - हे ब्राह्मन ! मैं सत्य कहति हों । मैं तीन कारज में झूठ बोलति नहीं । झूठ तो या संसार में माया के जीव पडे

हैं सो बोलत हैं । और मैं या जगत में कोई जीव की आश्रित नहीं हों, जो - झूठ बोलों । तातें तुम मेरे अनन्य सेवक हो और निष्कपट होई के मेरी सेवा करत हो । तातें मैं तुम मां कहति हों । तुम सावधान होई के यह वचन मैं विश्वास राखि के सुनियो । तब तो दोऊ जनन विनती करी, जो - मानाजी ! कृपा करि के कहिये, हम सावधान हैं । तब देवी बोली, यह कलियुग समान कोई युग उत्तम नहीं भयो । जो - या युग में श्रीआचार्यजी और श्रीगुसांईजी प्रगट भये हैं । सो श्रीवल्लभाचार्यजी प्रगट होई पुष्टिमार्ग प्रगट किये हैं । और श्रीविठ्ठलनाथजी प्रगट होई पुष्टिमार्ग को विस्तार किये हैं । सो दोऊ स्वरूप साक्षात् पूरन पुरुषोत्तम हैं । सो श्रीविठ्ठलनाथजी प्रगट श्रीगोकुल में विराज हैं । तिनके सेवक के दास तिनकी दास पदवी को मैं वांछित हों । सो मोकों मिलत नहीं । यह बात तुम हृदे में सत्य मानियो । यह देवी के वचन सुनि के ब्राह्मन-ब्राह्मनी मन में कछु विचारि, फेरि पूछ्यो, जो - देवीजी ! तुम आज्ञा प्रसन्न होई के करो, तो हम श्रीविठ्ठलनाथजी की सरनि जांइ । उनके सेवक होइ । यह सुनि के देवी ने कह्यो, जो - तुम्हारे बड़े भाग्य हैं । जो - तुम मन में यह विचारे । तुम पृथ्वी पर हो तातें तुम्हारे अधिकार है । हम देवता हैं हमारे अधिकार नाही हैं । तातें हम को सरनि नाही लेत । तातें तुम सुखेन श्रीविठ्ठलनाथजी की सरनि जाऊ । तब उन ब्राह्मन-ब्राह्मनीन ने देवी सो कह्यो, जो - हम कौन प्रकार श्रीविठ्ठलनाथजी की सरन जाँइ सो उपाय बतावो । तब देवी ने कह्यो, जो - चाचा हरिवंसजी श्रीगुसांईजी के अनन्य सेवक हैं । सो वे आगरे में

संतदासजी के घर उतरे हैं। तिनके सरन जाऊ। उन द्वारा तुम को श्रीगुसांईजी के चरन प्राप्त होइंगे। तब उन ब्राह्मन ब्राह्मनी ने देवी को दंडवत् किये। और दोऊ जन उठे। तब देवी अंतरधान होइ गई। तब स्त्री-पुरुष द्वार पर तारौ लगाय कै पूछत पूछत संतदासजी के घर आये। ता समै चाचा हरिवंसजी संतदास, सगरे वैष्णव महाप्रसाद ले कै बैठे हते। सो दोऊ ब्राह्मन-ब्राह्मनी ने आय कै सगरे वैष्णवन को दंडवत् किये। तब संतदासजी और चाचा हरिवंसजी पूछे, जो-तुम कौन हो? और काहे को आए हो? तब ब्राह्मन ने विनती करी, जो-हम को देवी ने पठाये हैं। हम आगरे में फलानी ठौर रहत हैं। कनोजिया ब्राह्मन हैं। सो तुम परम वैष्णव हो। हम तुम्हारी सरनि आए हैं। सो कृपा करि कै हमारो अंगिकार करो। यह सुनि कै चाचा हरिवंसजी ने और संतदास ने कह्यो, जो तुम तो ब्राह्मन हो और हम क्षत्री हैं। सो तुम हम को दंडवत् करी सो वोहोत अनुचित बात करी। और हम तो श्रीविठ्ठलनाथजी के सेवक हैं। ताते तुम को सरनि जानो होइ तो श्रीगोकुल में श्रीविठ्ठलनाथजी विराजत हैं। तिन की सरनि जाउ। ता करि कै तुम्हारो सकल कार्य सिद्ध होइगो। यह सुनि कै ब्राह्मन-ब्राह्मनी ने विनती करी, जो-तुम को दंडवत् किये तें हमारे कोटान कोटि प्रतिबंध-पाप दूरि होत हैं। सो हम सो देवी ने कह्यो है। और हम तो तुम्हारे सरनि आए हैं। सो तुम हम को कृपा करि कै श्रीगुसांईजी के सेवक करावो। हम तो महादुष्ट हैं। जन्म जन्म तें दुष्ट कार्य करत आये हैं। सो तुम द्वारा हमारो उद्धार होइगो। यह सुनि कै संतदासजी चाचा हरि-

वंसजी साँ कहं, जो - अब कहा कर्तव्य हें ? जीव तो दोऊ देवी हें । और सरनि आइवे की आतुरता हें । यह गुनत ही चाचा हरिवंसजी काँ करुना आई । सो वाही सम उठि के ठाढ़े भये । और कह्यो, जो - ब्राह्मन-ब्राह्मनी हमारे संग चलेंगे । तव संतदासजी ने चाचा हरिवंसजी साँ कहं, जो - ये जेष्ठ के दिन हें दुपहरी काँ सम हें । तातें आज तो आये हो, काल्हि जैयो । ये तो सरनि आय चुके हें दोई दिन पीछे ले के जैयो । यह वचन संतदासजी के चाचाजी मुनि के कह्यो, जो - श्रीगु-साईजी काँ प्रागट्य देवी जीवन के उद्धारार्थ ही हें । सो जीवन के लिये तहां तें जगत में पधारे हें । इतनो श्रम क्रियो हे । सो हम ढील करं सो उचित नाहीं हें । तातें जीव काँ ले के अव-स्य अब ही जानो उचित हे । या बात में हमकाँ श्रम नाहीं हे ।

भावप्रकाश—यामें यह जतायो, जो - भगवदीय परमार्थी होत हें । जा भांति जीव काँ भगवत्प्राप्ति वेगि होई सोई कार्य करत हें । तामें उन काँ श्रम होत नाहीं । ऐसैं उदार होत हें । और उन काँ स्वास्थ्य लेस होत नाहीं । सो कृष्णदासजी गाए हें । सो पद—

राग मालध

श्रीविठ्ठलनाथ वमत जीय जाकेँ ताकी रीति प्रीति छवि न्यारी ।  
 प्रफुलित वदन कांति करुनामय नैनन में झलके गिरिधारी ॥  
 उग्र स्वभाव परम परमास्थ स्वास्थ्य लेस नहीं संसारी ।  
 आनंद रूप करत एक छिन में हरिजु की कथा कहत विस्तारी ॥  
 मन वच कर्म ताही काँ संग कीजे पयत ब्रज युवतिन मुखकारी ।  
 'कृष्णदास' प्रभु रसिक-मुकुटमनि गुन-निधान श्रीगोवर्द्धनधारी ॥

यह सुनि के संतदास कहे, धन्य चाचाजी ! तुम ऐसैं अंत-रंग वैष्णव हो । हम तुम्हारे सत्संग के लिये दोई दिन रहिवे की बात कही । तातें अब तो वेगि तुम इन जीवन काँ कृतार्थ

करो । तब यह चाचाजी की दयालता देखि कै ब्राह्मन और ब्राह्मनी के नेत्रन में तें आंसून की धार चली । जो - ऐसे दयाल श्रीगुसाईजी के सेवक हैं ? जो परमार्थ के लिये ऐसी दुपहरि में उठि चले । तब चाचाजी ने ब्राह्मन-ब्राह्मनी सों कह्यो, जो- तुम घर तें कछू कामकाज होई सो करि कै बेगि आओ । तहां ताई मैं ठाढ़ो हूं । तब ब्राह्मन विनती कियो, जो - महाराज ! अब हम कों घर तें कहा प्रयोजन है ? तुम कहोगे सो करेंगे । तातें चलो श्रीगोकुल चलिये । यह सुनि कै चाचाजी मन में बोहोत प्रसन्न भए ! जानें, घर आदि में इन कों वैराग्य अधिक है । तातें इन कों दान हू अधिक होइगो । पाछें चाचा हरि-वंसजी कहे, जो - ब्राह्मन ! हम जानत हैं । जो - तुम कों अब घर तें कछू प्रयोजन नाहीं हैं । तातें श्रीगुसाईजी की कछू भेंट करन कों ले चलो । तब ब्राह्मन-ब्राह्मनी घर आये । सो ब्राह्मनी तो अपना गहनो और रोक जो - कछू रुपैया हते सो लीने । और ब्राह्मन के पास कछू द्रव्य नाहीं हतो । जो पावे सो ब्राह्मनी कों देहि । काहेतें, स्त्री पतिव्रता सत्य पवित्र हैं तातें । सो ब्राह्मन के घर श्रीभागवत और दुर्गा पाठ की पोथी और सालिग्राम और एक देवी की मूरति ही । सो यह ले कै घर के द्वार ऊपर तारौ लगाय तत्काल चाचाजी के पास दोरे आये । तब चाचा-जी और चारों वैष्णव अपने संग के ले संतदासजी सों अत्यंत स्नेह सों विदा होइ कै श्रीगोकुल ब्राह्मन-ब्राह्मनी कों संग ले कै चले । सो मार्ग में भगवद्वार्ता, पुष्टिमार्ग कौ सिद्धांत चाचाजी चार वैष्णवन सों कहत चले । सो चारों वैष्णव और दोऊ ब्राह्मन-ब्राह्मनी कौ मन महारस में जाँय परयो । सो काहू कों देहाभ्यास

ब्राधक न भयो । कोई कों तृपा लघी कळ न लगी । और रात्रि परी ताहू की मुधि नाही । सो अर्द्धरात्रि तें कळ दोड चारि घरी ऊपर गई ता सें चचाजी वेण्णव, ब्राह्मन महित श्रीगोकुल साम्हे 'मोहनपुर' गाम हे तहां आय पहोंचे । तव वेण्णव कों मुधि राह की आई । सो चचाजी सों कहे, जो - चचाजी ! अपने श्रीगोकुल के साम्हे मोहनपुर गाम हे तहां आय पहोंचे हैं । तव चचाजी कहे, जो - रात्रि कों इहां रहिये । प्रातः श्रीगोकुल चलेंगे । तव दोऊ ब्राह्मन-ब्राह्मनी ने श्रीगोकुल कों माष्टांग दंडवत् किये । ताही सें मलाह वेंटे हते, सो चचाजी कौ बोल सुनि के आपुस में विचार किये, जो - श्रीगुसाईजी के सेवक चचाजी आए हैं । या सें जो-पार चले तो नाव बंधी हैं । पार उतारि दीजे । तव मलाहन के मन में आई, जो - आछौ । तव वह मलाह चचाजी के पास आइ विनती कियो, जो - महाराज ! नाव तैयार हैं । तव चचाजी कहे वेण्णवन सों और ब्राह्मन सों, जो - उठो चलो । या प्रकार अपने जीव कों श्रीगुसाईजी खेंचत हैं ? तव चारों वेण्णव, ब्राह्मन-ब्राह्मनी दोऊन कों लेके चचाजी नाव पर आये । तव मलाहन नाव पार लगाय दीनी । तव चचाजी कळ उतराई रुपैया एक प्रसन्न होइ देन लागे । तव मलाहन चचाजी सों कही, जो - महाराज ! आपकी कृपा तें हमारे सब कळू हे । कोई बात की न्यूनता नाही है । सगरो जगत हे, तहां लेवे कों थोरो ठिकानो हे ? तव चचाजी हँसि के चुप न्है रहे । तव ब्राह्मनी रुपैया देन लागी । तव मलाहन कही, जो - हम श्रीगुसाईजी के सेवक सों कळू लेत नाही । हम सों कळू सेवा टहल नाही बनि आवत



तो भलो कछु इन सों लियो तो न चहिए ।

भावप्रकाश—यह कहि यह जतायो, जो - श्रीगोकुलके मलाहन में हू श्रीगुसांईजी की कृपा सों एसो भगवद्धर्म दृढ़ हैं । ताते श्रीगोकुल सगरो अलौकिक जाननो ।

यह सुनि कै चाचाजी उन मलाहन के ऊपर वोहोत प्रसन्न भए । तव श्रीनवनीतप्रियजी कौ जो - महाप्रसाद प्राप्त हंतो सो दियो । तव मलाहन कह्यो, जो - हां ! हमें यह चाहिये । पाछें चारौ वैष्णव ब्राह्मन ब्राह्मनी सहित श्रीगुसांईजी के द्वार ऊपर जाँइ कै द्वार कों नमस्कार किये । तव विष्णुदास पोरिया ने कही भीतर तें, जो - या समै को यहां आयो है ? तव चाचाजी विष्णुदास सों भगवद् स्मरण किये । तव विष्णुदास तत्काल उठि कै किवार खोलि कै चाचाजी और सवन कों भगवद् स्मरण किये । तव विष्णुदास ने चाचाजी सों कह्यो, जो - श्रीगुसांईजी की बैठक में जाँइ कै वैष्णव सहित विश्राम करो । तव चाचाजी सब वैष्णवन कों लेकै श्रीगुसांईजी की बैठक कों नमस्कार किये । पाछें वैष्णव ब्राह्मन सहित सवन ने विश्राम किये । तव चाचाजी सब कौ समाधान करि कै आपहू विश्राम करे । सो ब्राह्मन-ब्राह्मनी के हृदय में एसो आनंद भयो । सो नींद नहीं आई । पाछें जब घरी दोई रात्रि पाछिली रही वाकी तव चाचाजी उठे । ब्राह्मन-ब्राह्मनी कों उठाये । चारों वैष्णवन कों उठाये । सो देह कृत्य करि कै न्हाय कै सब बैठे । इतने में श्रीगुसांईजी उठि कै बैठक में पधारे । तव चाचाजी दोऊ ब्राह्मन ब्राह्मनी कों दंडवत् कराये । चारों वैष्णव संग के हते सो दंडवत् किये । तव श्रीगुसांईजी चाचाजी सों पूछे, जो - तुम तो आगरे गये हते सो अब आये ? और इन ब्राह्मन-ब्राह्मनी कों

कहां तें लेत आए ? तव चाचाजी ने श्रीगुसांईजी सों विनती कीनी, जो - महाराज ! ये ब्राह्मण-ब्राह्मणी आगरे में रहत हैं । सो इनकी आरति आप के सरन आयवेकी बोहोन है । तातें इन कों लेके रात्रि कों हम आगरे तें आए हैं । तव ब्राह्मण ब्राह्मणीन ने दंडवत् करि विनती करी, जो - महाराज ! हम महादुष्ट हैं । सदा लौकिकसक्ति करि के पशु की नांड होइ रहे हैं । सो हम ऊपर कृपा करि के सरनि लेके हमारे उद्धार करिये । यह देन्यता के वचन सुनि के श्रीगुसांईजी प्रमत्त भए । तव उन ब्राह्मण सों श्रीगुसांईजी पूछे, जो - तुम कों ऐसो ज्ञान कहां तें भयो ? तव ब्राह्मण ने कही, जो-महाराज ! हम देवी की पूजा अनन्य भाव सों करते । सो अर्द्धरात्रि समें देवी हम कों साक्षात् दरसन देती । ता पाछें हम स्नानपान करते । सो चाचाजी वैष्णव सहित हमारे द्वार पर चांतरा ऊपर रात्रि कों रहे । सो वह देवी सगरी रात्रि चाचाजी कों पंगवा किये । पाछें प्रातःकाल हमारे पास आई । तव हम पूछ्यो । तव देवी ने आप कौ प्रताप आप कौ स्वरूप कह्यो है । तातें हम कों ज्ञान भयो है । नांतरु हम माया करि के मोहित कलियुग के जीव हैं । सो हम कों ज्ञान कहां तें होइ ? यह सुनि के श्रीगुसांईजी आज्ञा किये, जो - माहात्म्य ज्ञान सहित सरनि आवत हैं ताकौ दान विसेस होत हैं । ऐसैं कहि के श्रीगुसांईजी छीवे पधारे । पाछें दांतिन करि के न्हाये । पाछें तिलक करि उन ब्राह्मण ब्राह्मणी ने दंडवत् करि ब्रह्मसंबंध की विनती किये । तव श्री-गुसांईजी कहे, एक उपवास की रीति है । तव ब्राह्मण-ब्राह्मणीन कह्यो, जो - महाराज ! दोइ उपवास भये हैं । एक दिन तो

देवी नहीं आई तातें उपवास भयो । और दूसरे दिन घर तें यहां आपके चरनारविंद के सन्मुख चले सो उपवास भयो है । तव श्रीगुसाईजी कहे, जो - पहिले दिन कौ उपवास भयो सो तो देवी के लिये भयो । सो तो ब्रह्मसंवंध में काम न आवे । वा उपवास तें तो महाप्रसाद ले कै ब्रह्मसंवंध ले सो आछो । और काल्हि जो उपवास भयो सो ठीक है । तातें राजभोग सरे पाछें ब्रह्मसंवंध दोऊन कों करावेंगे । तव दोऊ जनें प्रसन्न होइ कै श्रीगुसाईजी कों दंडवत् किये । पाछें श्रीगुसाईजी मंदिर में पधारे । श्रीनवनीतप्रियजी कों जगाय कै पाछें मंगलभोग धरें । ता पाछें समै भये भोग सराइ कै मंगला आर्ति किये । सो सब वैष्णवन दरसन किये । वा ब्राह्मन ब्राह्मनी नें हू दरसन किये । पाछें श्रीगुसाईजी सिंगार करि कै पालने झूलाए । पाछें राजभोग धरे । समै भये तव भोग सराय कै पाछें ब्राह्मन ब्राह्मनीन कों मंदिर में बुलाये । श्रीगुसाईजी दोऊन के हस्त में तुलसीदल दे कै ब्रह्मसंवंध कराये । पाछें तुलसीदल ले प्रभुन के चरनारविंद आगें समर्पन किये । ताही समै ब्राह्मन ब्राह्मनीन कों महारस कौ दान भयो । सो लीला सहित श्रीनवनीतप्रियजी के दरसन भये । और श्रीगुसाईजी के निज स्वरूप कौ दरसन भयो । पाछें अनोसर भयो । तव दोऊ स्त्रीपुरुष श्रीगुसाईजी की वैठक में आय बैठे । पाछें श्रीगुसाईजी अपनी वैठक में पधारे । गादी तकिया ऊपर विराजे । तव स्त्री अपनो गहनो और जो कछू रोकडि हती सो सब श्रीगुसाईजी की भेंट कियो । और पुरुष ने सालिग्राम देवी की मूर्ति, भागवत की पोथी और दुर्गापाठ की पोथी भेंट करी । तव श्रीगुसाईजी कहे, जो - तुम

ब्राह्मण हो, अपनी पूजा और पोथी क्यों भेंट करत हों ? तब स्त्री-पुरुषने कही, जो - महाराज ! हम इनकों सर्वस्व जानत हते सो हम अब समर्पन किये । स्त्री को सर्वस्व द्रव्य हतो मो भेंट कियो । अब हमकों आप के चरन कमल को आश्रय हे । और काहू बात में मन नहीं । तातें अब आपु जो - वतावोगे सो करेंगे । जा प्रकार हमकों पुष्टिमार्ग के फल की प्राप्ति होई । अन्याश्रय न होई । सो उपाय आप कहोगे । सो हम करेंगे । हम अज्ञानी हैं कछू समझत नहीं । तातें हमारो भलो होइगो मो आप करोगे । यह मुनि के उह ब्राह्मण के ऊपर श्रीगुसाईजी वोहोत प्रसन्न भये । तब पंचामृत मंगाय के सालिग्राम को प्रथम न्हाये । सो श्रीमदनमोहनजी को स्वरूप भयो । पाछे देवी को पंचामृत सां न्हाये । सो श्रीस्वामीनीजी को स्वरूप भयो, हस्तमें कमल लिये । तब श्रीगुसाईजी उह ब्राह्मण और ब्राह्मणी सां कहे, जो - यह स्वरूप पुष्टिमागीय को सर्वस्व हें । इनकी सेवा पुष्टिमार्ग की रीति सां तुम करियो । पाछे श्रीगुसाईजी 'सर्वोत्तम' ग्रंथ अपनो कियो सो दियो । और आज्ञा किये, जो याके पाठ तें वेदपुरान श्रीभागवत, गीता, सास्र सब को पाठ भयो जानिया । यह दोऊ पदार्थ पुष्टिमार्ग के फलरूप जानि करियो । ता करि के तुम को सदा पुष्टिमार्ग को अनुभव होइगो । तब अत्यंत प्रेम सां श्रीमदनमोहनजी श्रीस्वामीनीजी सहित पधराए । पाछे श्रीगुसाईजी भोजन करन को पधारे । पाछे भोजन करि जूठनि की पातरि इन दोऊ स्त्री-पुरुष को धरी । सो दोऊ जनै न महाप्रसाद लिये । पाछे श्रीगुसाईजी अपनी वैठक में गादी तकियां ऊपर विराजे । तब दोऊ स्त्री

स्त्री-पुरुष, आगरे के

पुरुष महाप्रसाद ले के पाछें श्रीगुसांईजी के पास आय के दंड-  
 वत् करी । तव श्रीगुसांईजी दोऊन के ऊपर प्रसन्न होइ के  
 अपने श्रीमुख तें चर्चित तांबुल कौ उगार दिये । सो दोऊ जनेन  
 कों पुष्टिमार्ग कौ सिद्धांत हृदयारूढ भयो । पाछें दिन चारि  
 दोऊ स्त्री-पुरुष श्रीगोकुल में रहे । पाछें श्रीगुसांईजी श्रीनाथ-  
 जीद्वार पधारे । तव स्त्री-पुरुष श्रीगुसांईजी के संग श्रीजीद्वार  
 गए । तहां श्रीगोवर्द्धननाथजी के दरसन करे । सो श्रीगोव-  
 र्द्धननाथजी के दरसन श्रीगुसांईजी की कृपा तें इन दोऊ स्त्री  
 पुरुष कों लीला सहित भए । पाछें पांच रात्रि श्रीनाथजीद्वार  
 रहे । पाछें श्रीगुसांईजी श्रीगोकुल पधारे । तव स्त्रीपुरुष श्री-  
 गुसांईजी के संग श्रीगोकुल आए । तव स्त्री-पुरुष दोऊ जनें  
 अपने मन में विचारें, जो - अब आगरे में चलिए । नित्य श्री-  
 गुसांईजी के घर कौ महाप्रसाद लेनो उचित नाहीं है । तव दूसरे  
 दिन प्रातःकाल ब्राह्मन-ब्राह्मनीने श्रीगुसांईजी सों विनती करी,  
 जो - महाराज ! वैष्णव के संग विना हमारी बुद्धि दृढ़ कैसें  
 रहेगी ? और अब आगरे जाइवे कौ विचार है । सो आपकी कहा  
 आज्ञा है ? यह सुनि के श्रीगुसांईजी प्रसन्न न्है कहे, जो - आगरे  
 में संतदासजी श्रीआचार्यजी के सेवक हैं, तिनकौ संग नित्य  
 करियो । और चाचा हरिवंसजी तुम्हारे संग जाइंगे । तिन सों  
 सब प्रकार पूछि लीजियो । राजभोग के दरसन करि के जइयो ।  
 तव स्त्री-पुरुष दोऊ जनें श्रीगुसांईजी कों दंडवत् करि के पाछें  
 न्हाए । मंगला आर्ति करि के पाछें दरसन करे । ता सभे श्री-  
 गुसांईजी आज्ञा किये, जो - आजु तुम पालने के दरसन करियो  
 श्रीगुसांईजी आज्ञा किये, जो - आजु तुम पालने के दरसन करियो  
 श्रीगुसांईजी आज्ञा किये, जो - आजु तुम पालने के दरसन करियो

हम को श्रीगुसांईजी के चरनारविंद प्राप्त भये हैं । और हम अवही कछ पुष्टिमार्ग की रीति जानत नाही । तांत हमारे घर कृपा करि कै चलो । खासा-मर्यादा मेवकी सब मेवा को प्रकार रीतिभांति सब कृपा करि कै बतावोगे, तेंमें हम करें । तांत दोइ चार दिन हमारे घर मे कृपा करि कै रहो । पाछें संतदासजी के घर जइयो । या भांति सों दोऊ जनन की दीनता देखि कै चाचाजी वोहोत प्रसन्न भए । पाछें हरिवंसजी उन ब्राह्मन के घर गए । सो जात ही सगरो घर पुताये । मृत्तिका के पात्र सब काढ़ि डारे । सो सब नये लेकें सब जल भराय के खाया किये । कांसी पीतर के पात्र पलटाय के नये लिये । कोरे मृत्तिका के पात्र में कोरो अन्न धरे । पाछें सखड़ी, अनसखड़ी चूल्ही चौको मंदिर को ठिकानो किये । तहां श्रीठाकुरजी को पधराए । ता दिन हरिवंसजी रसोई किये । सामग्री सिद्ध भए पाछें भोग श्रीमदनमोहनजी को आये । पाछें समे भए भोग सराय राजभोग आर्ति करि कै पाछे अनोसर कराय, पाछें हरिवंसजी के संग चार वैष्णव हते और ये दोऊ स्त्री-पुरुष सहित हरिवंसजी महाप्रसाद लिये । पाछे सिंघासन खंड पाट खिलोना पिछवाई वागा वस्त्र सब सिद्ध कराये । पाछें उत्थापन तें लेकें सेन ताई पहुंचे । या प्रकार पांच दिन लों हरिवंसजी ने सेवा को प्रकार स्त्री पुरुष को बताये । पाछें हरिवंसजी संतदासजी के घर आए । तव संतदासजी वोहोत प्रसन्न भए । पाछें रात्रि को संतदासजी के घर भगवदवार्ता नित्य होती सो दोऊ स्त्री-पुरुष सेन मदनमोहनजी को कराय कै अनोसर करि कै संतदासजी के घर नित्यनेम करि कै आवते । सो उन पुरुष को श्रीमदन-

मोहनजी सानुभावता जनावन लागे । चहिए सो मांगि लेते ।  
या प्रकार उन स्त्री-पुरुष को हरिवंसजी की कृपा तें और श्री-  
गुसाईंजी की कृपा तें अनुभव होंन लाग्यो ।

वार्ता प्रसंग—२

पाछें एक दिन ब्राह्मनी के मन में यह संदेह आयो, जो -  
सालिग्राम तें श्रीमदनमोहनजी कैसे भए ? और देवी सों श्रीस्वामि-  
मिनीजी कैसे भए ? तव वह स्त्रीने अपने पुरुष सों पूछ्यो । तव  
ब्राह्मनने अपनी, स्त्री सों कह्यो, जो - चाचा हरिवंसजी परम  
भगवदीय हैं । तिन सों पूछेंगे । तव संदेह दूरि होइगो । पाछें  
रात्रि को संतदासजी के घर स्त्रीपुरुष दोऊ जनें आये । सो  
भगवद्वाता चाचाजी और संतदासजी करि चुके तव उह ब्रा-  
ह्मनने चाचाजी हरिवंसजी सों कही, जो - महाराज ! हमारे  
घर प्रथम सालिग्राम और देवी की मूरति हती । सो श्रीगुसाईंजी  
जव पंचामृत स्नान कराये तव सालिग्राम तें श्रीमदनमोहनजी  
भए । और देवी तें श्रीस्वामिनीजी होइ गए । सो कारन कहा ?  
तव चाचा हरिवंसजी उन ब्राह्मन सों समुझाय के कह्यो, जो -  
सालिग्रामजी अक्षरब्रह्मकौ स्वरूप है । अक्षर के भीतर लोक-  
वेद प्रसिद्ध पुरुषोत्तम हैं । लोकवेद प्रसिद्ध पुरुषोत्तम के भीतर  
लोक वेदातीत पुष्टि पूरन पुरुषोत्तम हैं । सो ऐसं पुरुषोत्तम के  
संवंधी श्रीगुसाईंजी हैं । तातें इन के श्रीहस्त परस तें रसात्मक  
पुरुषोत्तम कौ प्रादुर्भाव भयो । तातें श्रीमदनमोहनजी भये ।  
और देवी सो सक्ति हैं । सो सब लक्ष्मी कौ अंस हैं । सोऊ  
श्रीगुसाईंजी के श्रीहस्त कमल के परसतें देवी तें श्रीस्वामि-  
नीजी कौ प्रादुर्भाव भयो । तातें ऐसी निधि श्रीगुसाईंजी की

कृपा तें मिली हैं । तातें सावधान व्हें स्नेह संयुक्त सेवा करियो । यह सुनि के स्त्री-पुरुष दोऊ जनं चाचाजी कों नमस्कार किये । और मन में वोहोत प्रसन्न भए । पाछे अत्यंत स्नेह संयुक्त भगवद्सेवा दोऊ जनं करते । भाव करि विप्रयोग दया में अष्ट प्रहर रहते । या प्रकार चाचा हरिवंसजी महिना एक आगरे में रहि के पाछे संतदासजी सो अत्यंत प्रीति संयुक्त विदा हांडे के पाछे उन दोऊ स्त्री-पुरुष तें विदा होन आए । तव दोऊ ने चाचाजी की वोहोत स्तुति करी । जो - महाराज ! तुम कृपा करि के हम सारिखे महाघोर संसार में परे हते तिन पर दया करी । सो कही जात नाही । या भांति विनती वोहोत करि यथासक्ति दोऊ स्त्री पुरुषने अपनी अपनी न्यारी न्यारी भेंट दीनी । और चाचाजी सों कहे, जो - तुम हमकों अपने दाम जानि के बेगि ही फेरि दरसन दीजो । और श्रीगुसांईजी कों सब लालजीन कों, बहू-बेटीन कों हमारी दंडवत् कहियो । समस्त वैष्णवन सों भगवद् स्मरण कहियो । सो या प्रकार दोऊ स्त्री-पुरुष के वचन सुनि के चाचाजी मनमें वोहोत प्रसन्न भए । पाछे दोऊ जनं चाचाजी कों पहाँचावन चले । तव चाचाजी दोऊ जनंन कौ वोहोत समाधान करि घरकों पठाये । पाछे चाचाजी श्रीगोकुल आए । श्रीगुसांईजी कों दंडवत् किये । पाछे उन ब्राह्मण-ब्राह्मणीन की दंडवत् करि भेंट आगें धरी । तव श्रीगुसांईजी हरिवंसजी कों पूछे, जो - वे दोऊ वैष्णव आछें हैं ? तव चाचाजी दोऊनके सब समाचार कहे, । और वोहोत प्रसंसा करी । जो - इन दोऊ जनं कौ स्नेह वोहोत हैं । तव श्रीगुसांईजी कहे, सुद्ध पात्र में रस बेगि ठहरात हैं । उन माहात्म्य सहित



जानि के सरनि आए तातें बेगि उनकी सिद्धि भई । या प्रकार श्रीगुसांईजी कहे ।

सो वे दोऊ स्त्रीपुरुष श्रीगुसांईजी के परम कृपापात्र भगवदीय हते । तातें इनकी वार्ता कौ पार नाही, सो कहां तांई कहिए ।

वार्ता ॥ १४८ ॥



अब श्रीगुसांईजी के सेवक एक साहुकार, ताकौ बेटा और ताकी बहू सूरत में रहते, तिनको वार्ता कौ भाव कहत हैं—

भावप्रकाश—सो बहू तामस भक्त हैं । लीला में इन कौ नाम 'नवोढ़ा' है । इन कौ स्वरूप वोहोत सुंदर हैं । वे परम चतुर हैं । ये श्रीचंद्रावलीजी की अंतरंग सखी हैं । ये 'कमला' तें प्रगटी हैं । तातें इन के भावरूप हैं ।

वार्ता प्रसंग—१

सो वह साहुकार सूरत में रहत हतो । सो ताके बेटा की स्त्री कौ रूप वोहोत हतो । सुंदर हती, नवजोवन हती । सो एक समै स्त्री ऋतु-समै न्हाई के अपने घर के पाछें बाड़ा में केस सुकावति हती । सो ता समै एक म्लेच्छ राजा कौ चाकर सो घोड़ा ऊपर बैठि के तापी कौ जल प्यायवे कों जातो । सो घोड़ा ऊपर तें बाकी दृष्टि वा स्त्री पर परी । तव वाने घोड़ा कों एड़ मारी । सो घोड़ा बाड़ा उल्लंघि के वा स्त्री के समीप जाई के ठाढ़ो भयो । पाछें वाने घोड़ा तें उतरि के बाकौ हाथ पकरयो । तव वह स्त्री चक्रत होइ रही । परि वह स्त्री चतुर वोहोत ही हती । तातें मन में विचारी, जो-अब इहां तो कोऊ नाही, और यह बात रीत विरुद्ध भई । परि अब तो पुकारोंगी तो सब कोई आइ के जुरेंगे । तो लोक में यह बात प्रसिद्ध होइगी । लोक तो दुराचारी हैं । और मेरे मन की तो प्रभु जानत हैं । ऐसैं विचारि के वा तुरफ सों वह बोली, जो-तुम मेरो हाथ छोड़ो, तुम कहांगे

सो मैं करोंगी । तब वह तुरक प्रसन्न भयो और हाथ छारि दीनो । इतने ही भरि जोर तमाचा मारि के थपेड़ की बाके मुख पर दे के और घर में भाजि गई । और घर के किवाड़ मारि लीने । तब वा तुरक को घनो दुःख लाग्यो । कह्यो, जो - देवो, स्त्री जन न मोकों थपेड़ मारी । तो थिक मरो जीयवो । ता पाछे विचारी, जो - अब तो इहां कछु अर्थ नाहीं । ता पाछे वह तुरक घोड़ा कां गेड़ दे के बाहिर निकरयो । ता पाछे घोड़ा को जल प्याय के अपने घर गयो । ता पाछे विचारयो, जा - अब तो मरो नाम मही तब जो वा स्त्री कां दासी करों । ऐसे विचारि करि के राज-द्वार की चाकरी छारी । राज में कह्यो, जो - हां अब मेरे देग जाउंगो । ता पाछे अपनी चाकरी को ड्रव्य हो गो ले के अपने घर आयो । ता पाछे वा स्त्री के घर के आसपास नित्य फिरे । सो एक डोकरी बाके घर नित्य जाति हती । सो वह डोकरी बाकां न्हावे, चोटी करे । ऐसी टहल सब करे । सो वा डोकरी कां नित्य आवति जाति देखि के वह तुरक वा डोकरी के घर गयो । और वासों मैया कहि के वोल्यो । ता पाछे वा डोकरी पास जल माँग्यो, जो - मैया ! मोकों थोरो जल पिवाय देउगी ? तब वाने जल पिवाय दियो । सो वाने एक रुपैया काढि के वा डोकरी के हाथ में दीनो । तब डोकरी घनी प्रसन्न भई । ता पाछे वहां बैठयो । तब डोकरी ने आदर करयो । आसन दे के बैठारयो । ता पाछे वाने कह्यो, जो - मोकों भूख लागी हे । तब वा डोकरी ने रसोई करि के परोस्यो । तब दोइ रुपैया और दीने । पाछे वा डोकरी के घर नित्य आइ के बैठे । बातें करे, बाकां पूछे पाछे । खान-पान करे । ता पाछे एक रुपैया बाकां नित्य देवे ।

ता पाछें वा डोकरी सां पूछ्यो, नित्य तुम कहां जात हो ? तव उन डोकरी ने कह्यो, जो-अमूके साह के घर जात हों । तिन के बेटा की बहू कां नित्य न्हावत हों, चोटी करत हों । तव वह मोकों कछू अन्न देत है तासां मेरो निर्दाह होत है । तव तुरकने वा साहुकार कौ नाम पूछ्यो, ता पाछें कह्यो, जो - वह गोरी सी इतनेक बरस की, ऐसो मुख है, ऐसो रूप है, ताकौ नाम कहा है ? तव वा डोकरी ने वतायो और कह्यो, जो-वा साह के बेटा की बहू है । ता पाछें वाने नाम कह्यो । सो सब वा तुरक ने लिखि लियो । ता पाछें वा डोकरी सां नित्य वा स्त्रीके संबंधी के दोइ-चार नाम पूछे । तव डोकरी ने कह्यो, जो-हों तो जानति नाहीं । तव वह तुरक कहे, जो - आज पूछि आइयो । सो डोकरी नित्य पूछे, जो-अमूकी ! तेरे पिता कौ नाम कहा है, तेरे दादा कौ नाम कहा है ? सो वह स्त्री वतावें । सो वह डोकरी वा तुरक सां कहे सो वह तुरक लिखतो जाई । ऐसं दोइ चारि नाम नित्य लिखें । ऐसं करत सात पुरखा सुसरारि के और सात पुरखा पिता की ओर के नाम लिखे । ता पाछें आसपास के गाम में तें दूढ़ि के एक बेस्या की छोरी बेसेही समान वय की बेसी ही रूप की देखि के वाकों कछूक द्रव्य देनो करि के वाकों लायो । ता पाछें वाकों वे नाम सब पढ़ाय मिखाय के सावधान करि के ता पाछें वा साह की बहू की साड़ी चोली, वाकी रीति प्रमान सिंगार खोटे खरो करि के ता पाछें वाके सरीर की चिबुक पै कारो तिल हो, सो वा डोकरी सां पूछि राख्यो हतो । सो बेसोई स्याई कौ तिल करयो । हरत कौ ठाढ़ो करयो । ता पाछें सब वाकों सीखाई के कह्यो, जो - तुम ऐसं

राजद्वार में बोलियो । ऐसो कहियो । ता पाछें साहूकार के घर के पाछें वा बेस्या कों ठाढ़ी करि के कह्यो, जो - तोकों राजद्वार के मनुष्य बुलावन कों आवेंगे । तव तू वाके साथ चली आइयो । ता पाछें तोकों पूछे तव तोकों सिखायो हें तेसो ताकों उत्तर दीजियो । यह कहि वह तुरक राजद्वार में गयो । तव पुकारयो । कह्यो, जो - साहिवज् ! एक माह अमृके की वह कौ मेरे संग मिलाप हें । मो मेरे संग बिल्ली हें । मो अब हों मेरे देस चलिवे कों कहत हों, तव वह कहत हें, जो - हों तेरे संग चलंगी । सो घनी लागू भई हें । परि न जानें काल्हि कहा बात हें ? स्त्री जाति कौ विश्वास नाहीं । तातें सिपाई भेज के वाकों बुलाइए । और बुलाइ के पूछिये । मोकों लिख्यो दरवार कौ करवाय देहु । और तुम अपने लागे कौ द्रव्य मो पास तं लेहु । तव हाकिम ने कह्यो, जो - वे कहां हें ? तव वा तुरक ने कह्यो, जो - वाके घर हें । सो वाकों मनुष्य बुलायवे कों पठवाइ देऊ । तव वह स्त्री आवेगी । तव वाकों पूछि के लिखो करि दीजिए । तव हाकिम ने वाकों बुलायवे कों मनुष्य पठायो । तव वा तुरक ने मनुष्य सों कह्यो, जो - तुम अमृके साहूकार के घर के पाछें वह वाकी वहू ठाढ़ी हें सो बुलाय ल्याउ । तव वह मनुष्य बुलावन कों गयो । तव वह उहां ठाढ़ी ही । सो वासों मनुष्य-ने कह्यो, जो - तोकों राजद्वार बुलाई हें । तव राजद्वार में आई के वह ठाढ़ी भई । तव हाकिम ने पूछ्यो । जो - तू याके संग जायवे में राजी हें ? तव वा स्त्रीने कह्यो, जो - हों याके संग जाइवे में राजी हूं । मेरे आजु वरस दोय कौ संग हें । सो हों बिलल गई हों । सो हों याके संग जाउंगी । तव हाकिमने नवी-

सदान सों कह्यो, जो - तुम याकौ नाम सब कुटुंब कौ नाम, और याके सरीर के चिन्ह सब लिखि लेहु । सो वा तुरक ने उन नवींसदान सों कह्यो, जो - तुम मोकों लिखो याकौ करि देहु । ता पाछें उन सब वाकौ नाम, कुटुंब कौ, सात पुरुखा पिता कौ और सात पुरखा सुसरार के नाम, और सवन के नाम लिखे । और वाके मुखके वचन सुनि कै सब चिन्ह लिखे । पाछें सब राजद्वार के लोग और भले मानस के लोग सवन की गवाई करवाई । और राज की मोहोर छाप करवाई । ता पाछें लिख्यो करि कै वा तुरक कों हाथ में दीनो । विन कों विदाय कीनो । तव यह अपने डेरा आयकै वेस्या की छोरी कों वाके गाम पहाँ-चाय आयो । सो वाकों द्रव्य वदयो हतो सो वाकों दीनो । ता पाछें दिन चारि-पांच वीते तव राजद्वार जाँइ कै फिरि कै पुकारयो, जो - साहिव ! वह स्त्री अव फिरि वा साहुकार के घर में गई । मोसों कछू बात करत में बदल गई । सो अव कहत है, जो - तेरे संग सर्वथा न आउंगी । मोसों मिलि खायो, मोसों जल पियो और विटल के पाछें वाके घर में गई । मेरो द्रव्य खायो और राजद्वार में इतनो द्रव्य भरयो । तातें तुम हमारो न्याव करो । नाँतरु हों मरोंगो । तुम्हारे माथे जीव देउंगो । तव हाकिमने मनुष्य पठवाई कै वा साहुकार कों बुलायो । तव वासों हाकिम ने एकांत में ले जाँइ कै सब बात-समाचार कहे । और वह लिख्यो वतायो । और कह्यो, जो - तुम कों इतनी घर की सुधि नाही ? ऐसी कहा है ? भले, भई सो भई । परि तुम भली जानो तो वा स्त्री कों घर में राखो मति । वह स्त्री विटल गई है । वाने यहां आइ कै सब कह्यो हे ।

तातें तुम बाकों या तुरक के साथ करि देऊ । याही में तुम्हारे भलो है । तव या साहुकार ने कह्यो, जो - हों घर में जाँई के पूछों । पाछें कहंगो । मोकों या बात की टीक नहीं । तव हाकिम ने कह्यो, जो - अब कहा टीक करोगे ? वह तो राज-द्वार में आई के इह लिख्यो करवाई के गई है । और अब स्त्री-की जाति को इतवार नहीं । तातें हम अब कैमें छोगें ? सर्वथा बाकों दिवावेंगे । पाछें तुम राजी होऊ सो करो । पंगो कहि के हाकिम ने अपने चार मनुष्यन सो कह्यो, जो - या साहुकार के साथ तुम चार जनें जाँई के बाके बेटाकी वह जो - तुम्हारे कहे सृधी आवे ता भली और नहीं ता तुम बाके घर भीतर धसि के बाकी चोटी पकरि के इहां ल्याउ । पाछें उन मनुष्यन के साथ साहुकार ने जाँई के घर में यह बात सुवन सो कही । तव वह स्त्री तो कहे, जो - हों तो घर के बाहिर हू नहीं गई । सो तुम घर की स्त्रीन सो घर के लोगन सो पूछो । और हों तो कछु या बात में जानति नहीं । और घर के हू सब स्त्री-लोगन ने कह्यो, जो - ऐतो कहूं घर के बाहिर जात नहीं । हमारे पास आठों पहर बैठि रहति है । ऐसे कही । परि व राज के मनुष्य माने नहीं । और कह्यो, जो - हम बाकों तुम्हारे पीछवारे तें बुलाय के लै गए है । और याने सब लिख्यो करवायो है । तातें हम नो बाकों लिए विनु नहीं जाँहि । हमारे धनी की आज्ञा है । ऐसे कहि के बाके घर में धसि के वा स्त्री की चोटी पकरि के घीसी । तव वह स्त्री रोवे । धनो विलाप करें । कोऊ सुने नहीं । बाकों तो राजद्वार ले जान लगे । तव वाने अपने ससुर सो कह्यो, जो - भले ! तुम मेरे साथ राज-

द्वार में आवो । और मेरे पिता को बुलाउ । तुम सब ठीग ठाढ़े रहो । ता पाछे जुवाव तो सुनोगे । पाछे तुम कहोगे सो हों करोंगी । ता पाछे बाको राजद्वार में ले जाँइ के ठाढ़ी करी । तब तो घूँघट लाज कछू करयो नाही । और बूझयो सो संव कह्यो । पाछे वा तुरक ने कही, जो - अब यह स्त्री-चरित्र कहा फेलायो है ? अब चले नाही । यह कछू ख्याल नाही । इतनेकी गवाही हैं । ऐसें लिख्यो तें करवायो है । ता पाछे वह लिख्यो और पुरुषान कौ नाम और देह के चिन्ह सब वांचि सुनायो । तब वा स्त्री ने कह्यो, जो - हों तो कछू जानति नाही, जो - यह कैसे भयो है । और यह कहाँ कौ ? ऐसें कहि कै रोवे और मूँड पीटे । तब राजद्वार के सब कोऊ कहे, जो - यह स्त्री झूठी है । तातें याकी कोऊ कछू मानो मति । स्त्री जन कौ विश्वास नाही । तब हाकिमने कही, जो - याकों या तुरक को. देहु । और दोउन को वाहिर काढ़ि देहु । तब वा स्त्री ने कह्यो, जो - न जाने यह कहा कोप भयो है ? और कैसे लिख्यो भयो है ? परि प्रभुन कौ कछू कोप है । परि भले, हों अब तो झूठी भई हों । तातें मेरो कह्यो कौन माने ? परि पृथ्वीपति पास हम दोऊन को दिल्ली आगरे पठवाउ । उहां पृथ्वीपति पात्साह पास चलो । काहे तें, जो - हों तो कछू जानत नाही और कछू देख्यो हू नाही । और न जाने यह लिख्यो कैसे भयो ? परि हों मेरी देह त्याग करूंगी । मेरो भोग पूर्व जन्म कौ आयो है । परि हों याकों मेरे सरीर को हाथ लगावन नाही देउंगी । हों तो देह त्याग करूंगी । तुम्हारे यावद् जीवन लों यह कलंक टरेगो नाही । तातें तुम मेरी साथ चलो । कदाचित् पृथ्वीपति

में प्रभु को अंस है और उहां जो या वात की ममझि परं तो तुम्हारे और मेरो कलंक मिटे । पाछें माहुकार ने हाकिम सां कही, जो - पृथ्वीपति पास न्याव होयगो । तांतं हमकां पृथ्वीपति पास भेजो । तव हाकिम और राजद्वार के लोग मिलि कै वे तुरक को पत्र लिखि दीनो । ता पाछें वे सब उहां तं चले । सो केतेक दिन में पृथ्वीपति पास आये । तव पृथ्वीपति ने घनो न्याय कियो, चतुराई करी । और राजकाज के लोगन सां मिलि कै विचारयो । परि कछु ममुझ परे नाहीं । तव वा स्त्री सां पूछ्यो, जो - यह कहा है ? तव वाने कही. हों तो कछु जानत नाहीं, जो - यह कहा कोप है ? पाछें वा तुरक ने तो सवन कां लिख्यो दिखायो । तव वह लिख्यो साँचो भयो और वह स्त्री झूठी भई । ता पाछे वाके संग पृथ्वीपति ने वह स्त्री करि दीनी । तव वह ले के चल्यो । सो जमनाजी के पार उतरयो । तव आगें वह तुरक चल्यो जात है पाछें वह स्त्री चली जात है । सो पाछे देखत जाति है और रोवत जाति है । और भाटे सां मूड फोरे है । सो रुधिर निकस्यो है । सो सारी रुधिर सां भरी है । और मन में प्रभुजी को चिंतन करे है । ऐसैं कल्पत चली जात है ।

सो ता समै ' निगमवोध ' श्रीजमनाजी को घाट है । सो किला के नीचे ही है । सो श्रीगुसाईजी ता समै उहां पधारे हे । सो निगमवोध घाट ऊपर स्नान करत हे । ता समै पृथ्वीपति और वीरवल और राजा टोडरमल झरोखा में बैठे देखत हैं । ता समै श्रीगुसाईजी की दृष्टि वा स्त्री पर गई । सो वाने पाछें फिरि कै देख्यो, तव ही श्रीगुसाईजी ने पहिचानी । जो - यह



एक साहुकार के बेटा की वह, सूरत की

दैवी जीव है। ता पाछें ओर लोग उहां ठाढ़े हते। तिन सों श्रीगुसाईजी ने पूछ्यो, जो-यह स्त्री कौन है? क्यों रोवत है? और याके साथ में म्लेच्छ है सो कौन है? तव मनुष्यन ने सब समाचार कहे।

सो इतने ही पृथ्वीपति ने राजा (टोडरमल) सों कह्यो, जो-देखो। हम याकों स्त्री दीनी। परि कछू संदेह रह्यो है। काहेतें, वह अपने सरीर कों घनो कल्पांत करत है। माथो भाटा सों फोरत है और रोवत है। तातें कछू कारन है। सो ऐसो कह्यो, सो श्रीगुसाईजी ने सुन्यो। तव श्रीगुसाईजी ने पृथ्वीपति के सन्मुख देख्यो। तव वाने श्रीगुसाईजी के सन्मुख देख्यो। तव श्रीगुसाईजी ने पृथ्वीपति सों कह्यो, जो-तुम ऐसो न्याव कहा कियो? वह तुरक तो झूठै है। और स्त्री साँची है। वह तो प्राण त्याग करेगी। परि वाकों परस नाहीं करेगी। ऐसी पतिव्रता है। सो तुम्हारे सिर देह त्याग करेगी। तातें तुम इन दोऊन कों मनुष्य पठवाइ के पाछें बुलाय मँगावो। याकौ न्याय हम आय कै करेंगे। तव पृथ्वीपति तो प्रसन्न भयो। और अपने चाकर चारि चोपदार पठवाए। और कह्यो, जो-वे दोऊ स्त्री और तुरक कों पाछें फेरि ल्याओ। तव वह चोपदार तुरत ही दोरे। सो दोऊन कों पाछें फेरि ल्याए। सो दोऊन कों न्यारे न्यारे राखे। और ऊपर चोकी राखी। ता पाछें पृथ्वीपति ने श्रीगुसाईजी सों विनती करी, जो आप पाँव धारिये। ता पाछें श्रीगुसाईजी संन्यावंदन करि कै पोहोंत्रि के ता पाछें पाँव धारे। जहां पृथ्वीपति हतो तहां पधारे। सो पृथ्वीपति उठि कै श्रीगुसाईजी के सन्मुख हाथ जोरि कै ठाढ़ो रह्यो। तव श्री-

गुसाईजी श्रीमुख तें आज्ञा किये, जो - तुम बैठो । तव पृथ्वी-पति बैठयो । पाछें श्रीगुसाईजी पृथ्वीपति मां कह्यो, जो - याकौ न्याव या प्रकार करो । जो - कोऊ एक मनुष्य मां कह्यो, जो - तुरक सों तुम छिपि जाँड़ के क्वाड़ मारि के आज हमारी आज्ञा तें भीतर जागत बैठियो । परि वह तुरक जानें नाही, जो - इहां कोऊ जागत है । और रात्रि में यह दोऊन की वार्ता होंहि सो सब सुनि के याद राखियो । सब बात राजद्वार में स-वारे आइ कहियो । ए काम हमारो जानि के करना, ऐसी बातों कह्यो । सो आज कौ दिन लौकिक प्रतीति के लिये हम कहें सो करियो । तव पृथ्वीपति ने एक साहकार भलो मनुष्य हां ताकों बुलाइ के सब बात समझाय कह्यो । सो वह वेण्णव हता ।

ता पाछें श्रीगुसाईजी ने वा स्त्रीकों एकांत बुलाय के वामों कह्यो, जो - तुम्हारे दोड़ पींजरा न्यारे या वेण्णव के द्वारे बांधेंगे । सो जब सब कोउ सोवे तव तुम वा तुरक सों हंसि के बोलियो । इतने वह घना मन में प्रसन्न होइगा । ता पाछें तुम कहियो, जो - सुनोजू ! अब तो पृथ्वीपति ने तुम कां दीनी । सो तो हां होई चुकी । परि तुम यह लिख्यो कैसें कीनो । सो बात मांसों कही चाहिए । जो - हां तुम्हारे पुरुपार्थ जानों तो तुम्हारे संग प्रस-न्नता सों चलौंगी । ऐसी बात करि के वा पास सब कहवाइयो । और वह सब मेरी ईच्छा तें कहेंगो । वाकौ पाप पूरो होइ गयो है, सो फूटेगो । सो यह सुनि के राजद्वार में कहियो । सो इतने ही प्रतीति होइगी । सो तू तो चतुर है ।

पाछें श्रीगुसाईजी वा स्त्रीकों लै के राजद्वार गए । ता पाछें वे पींजरा दोड़ मँगाये । वामें दोऊ कों बैठारे । ता पाछें तारौ

दोऊ पीजरा कों मारि कै पाछे एकांत में वा साहुकार बेष्णव कों बुलाय कै पाछे पृथ्वीपति कों देखाइ कह्यो, जो - जागत रहियो । और जो - वात होइ सो सब हम सों सवारे कहियो । ता पाछे दोऊ पीजरा साहुकार के द्वारे लै जाँइ कै धरे । ता पाछे संध्या रात्रि भई और सब लोग तो सोये । तव वा स्त्रीने वा तुरक कों पुकारयो, कह्यो, जो - तुम काहे कों सोय रहे हो ? जागो तो कछु वात करें । तव वा तुरक ने जान्यो, जो - आज मेरो बड़ो भाग्य है, जो - मोसों यह स्त्री बोली । ता पाछे वा स्त्रीने कह्यो, जो - अब तो पृथ्वीपति ने हों तुम कों दीनी । परि एक वात हों तुम तें पूछत हों, जो - तुम लिख्यो कौन भांति सों करवायो है, सो वात मोसों कहिये । जो - हों जानों, जो - ऐसो तुम्हारो पराक्रम है, ऐसैं तुम चतुर हो । और तो कोऊ नाहीं. जो सुने । तव भगवद् इच्छा सों वाकौ मन भ्रमित भयो । तातें पाप गोप्य रह्यो नाहीं । ता पाछे वा तुरक ने कह्यो, जो - यह वात तोसों हों कहोंगो पाछे । तव वा स्त्रीने कह्यो, जो - अवही काहे नाहीं कहो ? यहां तो तुम हम दोऊ हैं । और तीसरो तो कोऊ नाहीं । तातें जो हों तुम्हारो सामर्थ्य जानों तो सुखेन तुम्हारे साथ चलें । ता पाछे वा तुरक ने कह्यो, जो - वे दिना की तुम कों सुधि है ? जो - मोकों तू थपेड मारि कै घर में भाजि गई । तेरे घर के पाछे उहां तुम वार सुखावति हती तव मेरी दृष्टि परी । सो हों घोड़ा कों ँड दे कै भीतर आइ के उतरयो । उतरि कै हाथ पकरयो तव वा स्त्रीकों सुधि आई । तव कह्यो, जो - हां ! अब तो सुधि आई । परि हों थपेड याही तें मारी. जो - याकों याद रहे । और तुम करोगे भले । तव और कहे, जो - ता पाछे

कौन उपाय कीने ? तव वा तुरक ने कह्यो, जो - मेरे बाही ममे मन में दुःख लग्यो । जो - देखो स्त्री जन मोकों थपेड मारे तां मेरो जीवनो वृथा हे । ताते मैं ऐसो उपाय कियो । तव वा स्त्रीने कह्यो, जां - तोसों इतने नाम किन कहं ? और कैसे लिखे ? और वह ऐसो लिख्यो और यह सब कैसे भयो ? नां बात कहिये । तव वा तुरक ने कह्यां, जां - वह अम्की डाकरी तुम्हारे घर आवति हती सो बासो मिलि के नाम सब तांगों पृच्छि आवती । सो मोसो कहं सो हों लिखत जातो । बाकों हों मया कहि बोल्यो । और बाकों द्रव्य हू दीनो । पाछें जो प्रकार वा तुरक ने कीने सो सब बात विस्तार के कही, जो - ऐसों एक बेरया की छोरी ल्यायो, ऐसों बाकों सिखायो । सो सब बात कही ।

ता पाछें सब विगत कहि रह्यो तव वह साहुकार वैष्णव रखवारो खांस्यो । तव वा स्त्री ने कह्यो, जो - तुम सुनते होंहि तो सुधि राखियो । तव वा साहुकार ने कह्यो, जां - मैं सब सुन्यो हे और सब सुधि हे । ताते तुम अब काहू बात की चिंता मति करियो । तेरे सन्मुख प्रभुजी ने देख्यो । ऐसों कह्यो । सो सुनत ही वा तुरक को तो प्राण उड़ि गया । और मन में कह्यो, जो - यह ऐसो कहा भयो ? ता पाछें थोरीसी देर में प्रातःकाल भयो । ता पाछें श्रीगुसाईजी वेगि ही दंतधावन करि के पधारे । तव राजद्वार आये । तव पृथ्वीपति ने वोहोत ही सन्मान कियो । ता पाछें वे दोऊ पींजरा खोलि के मँगवाये । पाछें जा वैष्णव के द्वार पींजरा बांधे हते बाकों बुलायो । ता पाछें श्रीगुसाईजी ने मनुष्य पठवाये । वा स्त्री के पिता-सुसर को बुलाये । ता पाछें प्रधान राजा टोडरमल तथा वीरवल तथा

और हूँ सब कामदारन को बुलाय कै सभा सब सिद्ध करि कै ता पाछें पृथ्वीपति सों श्रीगुसाईजी ने कह्यो, जो - अब तुम या साहुकार सों पूछो, जो - रात्रि कहा बात भई ? तव पृथ्वीपति ने कह्यो, जो - सेठजी ! इन दोऊन के पींजरन में परस्पर कहा बातें भई ? तुमने कहा सुन्यो, सो सब कहिए । तव वा साहुकार ने कह्यो, जो - मैं तो सब बात समाचार सुने हैं । यह स्त्री साँची है । और वह तुरक तो महापतित है । परि या तुरक सों पूछो, जो - वह कहा बात करी ? और यह भूले तव हों कहोंगो । ता पाछें वाकों पूछ्यो । तव वा तुरक के मुख सों उत्तर नाही निकसे । वे तो पींजरा में विन मारे ही मरि रह्यो । मरे भए के से सुखाइ गयो । ता पाछें वा वैष्णव साहुकार ने सब बात कही, विस्तारि कै । तव वह बाड़ा में आइ कै याकौ हाथ पक-र्यो, पाछें स्त्रीने छुडायो सो कही । वाकों थपेड मारी सो कही । ता पाछें वा डोकरी के समाचार सब कहे । वाकों नाम और याके सरीर के चिन्ह लिखवाये, सो बात कही । ता पाछें वह वेस्या की छोरी लायो और वाकों सब सिखायो, सो सब कह्यो । ता पाछें राजद्वार जाँइ कै वा वेस्या की छोरी को बुलाय कै लेखो सब करवायो । और राजद्वार में जाँइ के द्रव्य दीनो, सो सब वतायो । ता पाछें वे आइ कै वा वेस्या काँ अपने गाम में पोहोँचाइ कै आयो, सो कह्यो । और वाकों द्रव्य दीनो । ता पाछें दिन चारि पांच में फिरि कै राजद्वार में आय कै पुकार्यो, सो कह्यो । और सब बात विस्तारि कै कह्यो । और कह्यो, जो - यानें जो बात कही सो तो मैं तुमसों कह्यो । और अब या बात को तुम विवेक करि लेहु । ता पाछें पात्साह वा तुरक

पर कोणो, कह्यो. जा - याकों खरच करंगे । तव श्रीगुसाईजी श्रीमुख तें पात्साह मां कह्यो. जा - हम या बात में आप तातें अब काहु कां जीवत तां मति मांगे । और एक बात हां कहों सो सुनो । और ऐसं करो. जा - तुम एक मनुष्य पठवाय के उहां के हाकिम कां बुलावो । वा डोकरी कां बुलाओ. जो - या बात की प्रतीति सवन कां पूरी होई । और न्याय तो प्रगो ही करो । जिन जिन द्रव्य ले के गंगो न्याय खांटे करव्यो हे उन को ठीक पारि के दंड देहु । तव लां हम रहेंगे । ना पाछे वा तुरक कां बंदीखाने में दियो । ना पाछे पृथ्वीपति ने श्रीगुसाईजी सों बांहात ही स्तुति करि के कह्यो. जो - मेरो धर्म राख्यो । नांतरु यह दोष और या स्त्री की हत्या मेरे माथें पड़ती । तातें आप बड़ ही ईश्वर हो । जो - ईश्वर विनु गंगो न्याय कौन करें ? ता पाछे उनकां एक मनुष्य पठवायो । और कह्यो जो - उनकां तुरत ही ल्याऊ । ता पाछे श्रीगुसाईजी डेरा पाँव धारे । ता पाछे वा स्त्री सों कह्यो. जो - तू तेरे पिता. मुसर के पास जा । तव स्त्रीने कह्यो. जो - महाराजाधिराज ! हां अब कहां जाऊं ? मेरे तो राज विना और कोऊ नाहीं । कदाचित् मेरे कोऊ और जो होता तो मांकां छोरि के कैसे जाता ? तातें अब तो राज के चरन कमल विनु और आश्रय नाहीं । तव श्रीगुसाईजी ने वा स्त्री सों कह्यो. जो - तू हमारी बेटी है । तातें अब तू काहु बात की चिंता मति करे । परि हम कहें सो करि । तू अपने घर जाहि । और अब तेरे स-मुग्व प्रभु ने देख्यो है । अब तांकां सब स्फुरत हैं । तातें तू अपने घर जाँइ के श्रीठाकुरजी की सेवा करि । ता पाछे वाके पिता,

सुसर को बुलाय के श्रीगुसाईजी ने उन सों कह्यो. जो - यह कोऊ अलौकिक जीव है । याको धीरज धन है । या समान धीरज कोऊ नाही । तातें तुम याको समुझाय के घर लै के जाउ । और यह कहे सो तुम करियो । ता पाछे वा स्त्री ने कह्यो. जो - महाराज ! हम तो कोऊ वैष्णव नाही । और अब तो हों इन के संग नाही जाउं । ता पाछे वह सब श्रीगुसाईजी सों विनती करि के सरनि आए । तव श्रीगुसाईजी ने कृपा करि के वाको आत्मनिवेदन करवायो । और वाके घर को, सब को सरनि लिए । तव ये वैष्णव भए । ता पाछे ये सब श्रीगुसाईजी पास उहांही रहे । पाछे वा हाकिम वा डोकरी सब आए । तव पृथ्वीपति ने श्रीगुसाईजी को बुलाये । तव श्रीगुसाईजी पधारे । पाछे सब सभा जुरी । तव राजा ने श्रीगुसाईजी सों कह्यो, जो - अब इन को कहा पूछनो, कहा करनो ? सो आपकी आज्ञा प्रमान करिए । तव श्रीगुसाईजी ने कह्यो, जो - वा डोकरी सों सब बात पूछो । तव वा डोकरी सों पूछ्यो, जो - सब साँची कहि । तव वा डोकरी ने जो बात भई सो सब कही । और कह्यो, जो - हों तो भोरी, सो मैं तो दगा ना जान्यो । सो ये तुरक मांसों कहे ता प्रमान नाम या स्त्री सों पूछिपूछि के यासों कहती । और याके देह के लक्षण चिन्ह हू मैं बताये । ऐसे कीनो । अब आपकी ईच्छा में आवे सो मोकां करिये । ता पाछे वा वेस्या को पूछ्यो, तव वाहू ने जो प्रकार कर्यो सो सब कह्यो । जैसे इन सिखायो और इन नाम सिखाए । तेसे ही मैं कह्यो । और कीनी, जो - हमारो तो यह उद्यम है । जो - द्रव्य देहि ताको कहों । जो - कछु कहि सों करना । ऐसी सुंदर देह

द्रव्य की लालच तें उन के अर्पण करत हें । ता पाछें हाकिम  
 सों पूछ्यो, और कह्यो, जो - तेंनेठ द्रव्य की लालच मां न्याव  
 कियो हे ? तव हाकिम ने कह्यो. जां - माह्व ! मांकों याके  
 कपट की कछु समुञ्जि परी नाही । तव श्रीगुसाईजी ने कह्यो.  
 जो - तें पाछें ते याके गुसर कों काहेकों बुलायो ? तें पहिले  
 ही याके गुसर संबंधीन कों बुलाय पूछ्यो क्यों नाही ? जो -  
 यह कहा कहत हें ? सो सत्ता तें उन्मत होड के गंगोर्ड न्याव  
 करत हे ? तव हाकिम ने कह्यो, जो - हां चूक्यो तो सही ।  
 तव श्रीगुसाईजी ने कह्यो, जो - तुम तो चूके परि इन को तो  
 सर्वस्व गयो ? और या स्त्री के प्रान जात । गंगो करम कियो ।  
 पाछें पात्साह ने हुकम कियो, जो - यह सवन कों ग्वरच करो ।  
 तव श्रीगुसाईजी ने कह्यो, जो - ऐस मति करो । हां कहां मो  
 करो । पाछें श्रीगुसाईजी ने कह्यो, जां - वा डोकरी कों तो  
 कछु द्रव्य को दंड करो । और या बेस्या को घर सब लृटि लेहु ।  
 और या हाकिम कों हटाई के और हाकिम करो और सब  
 द्रव्य लृटि लेहु । जासों और कोऊ ऐसो न्याव करे नाही ।  
 और वा तुरक की नाक काटि के सब द्रव्य छिन लेहु । और  
 याकों छोरि देहु । ता पाछे जैसे श्रीगुसाईजी ने कह्यो वेमे ही  
 पात्साहने कियो । पाछें पात्साह श्रीगुसाईजी कों भेट द्रव्य  
 वोहोत देन लाग्यो । परि कछु लीनो नाही । ता पाछें पात्साह  
 नें घनी प्रनपति करि के कह्यो, जो - हां आप को चाकर हों ।  
 जो - कार्य मो लायक जैसो होइ तैसो आप कृपा करि के कहोगे !  
 और आप मो पर कृपा राखोगे । मेरी राज-काज की लाज आप  
 राखी है, सों हां आप को दास हों । ता पाछें श्रीगुसाईजी उहां



तें विजय किये । सो श्रीनाथजीद्वार पाँव धारे । और वह स्त्री और वाकौ पिता-सुसर सब साथ ही हैं । सो इन सबन ने श्री-गोवर्द्धननाथजी के दरसन किये । ता पाछें ब्रज की परिक्रमा करी । पाछें केऊ दिन श्रीगोकुल में रहि कै श्रीगुसांईजी पास श्रीमुख की कथा सुनी । ता पाछें मारग की रीति श्रीगुसांईजी सों पूछी, सो श्रीगुसांईजी ने कृपा करि कै कही । ता पाछें वा स्त्रीने श्रीगुसांईजी सों विनती करि कै, लालजी की सेवा पधराय कै, श्रीगुसांईजी सों विदा होइ कै अपने देस कों सब चले । तब श्रीगुसांईजी वा स्त्री कौ घनो समाधान कियो । और वाके सुसर, धनी सों कह्यो, जो-तुम सुनो । तुम्हारो धर्म और लौकिक लाज या स्त्रीने राखी है । और याकौ ताप श्रीठाकुरजी सहि ना सके । और याकी आर्ति सों तुम हू वैष्णव भये । तुम या वाई कहे सो, और जा वात में यह वाई राजी रहे सो करियो । याही मैं तुम्हारो भलो है । यह अलौकिक जीव है, आधिदैविक है । या समान धीर कोऊ नाहीं । जो - अत्यंत दुःख पड़े धीरज राख्यो । अपनो धर्म खोयो नाहीं । ताही कों दैवी कहिये । ता पाछें सब लोग विदा होइ कै अपने घर आये । ता पाछें जेसं श्रीगुसांईजी की आज्ञा ही तैसं ही सेवा करन लागे । आज्ञा प्रमान सब कारज करे । ऐसं करत थोरेसे दिन में श्रीठाकुरजी सानुभावता जनावन लागे । और वा स्त्री के सकल मनोरथ पूरन करे । और घर के लोग हू सब याकी आज्ञा में चलन लागे । ऐसं जो अपनो धर्म राखे वाके आधीन सब होई ।

भावप्रकाश—या वार्ता में यह जताए, जो - वैष्णव कैसोह संकट आमें तामें धीरज न छोरे । जानें, जो - प्रभु सब भली कर्त हैं । तातें या प्रकार विम्वाम

राखि उन ही कौ आश्रय करे । ताते मव कागज सिद्ध होई ।

सो वह स्त्री श्रीगुसांईजी की ऐसी कृपापात्र भगवतीय हती ।  
ताते इन की वार्ता कहां ताई कहिण् ? वार्ता ॥१४१॥



अब श्रीगुसांईजी के सेवक उद्धव त्रवाडी नागर शासन गुजरात में रहते,  
तिनकी वार्ता कौ भाव कहत हैं —

भावप्रकाश—ये राजस भक्त हैं । लीला में उनकी नाम 'वृष्णा' है ।  
ये 'कमला' तें प्रगटी हैं, ताते उनके भावरूप हैं ।

वार्ता प्रसंग—१

सो एक समै श्रीगुसांईजी गुजरात कों पधारे हुते । तव  
उद्धव त्रवाडी कौ नाम दियो हतो । पाछे ये श्रीगुसांईजी के  
पास रहें । सो बड़े कृपापात्र भगवतीय भये । जिनके ऊपर  
श्रीगुसांईजी सदा प्रसन्न रहते ।

सो कितनेक दिन पाछे उद्धव त्रवाडी ने श्रीगुसांईजी सों  
विनती कीनी, जो - महाराज ! जिनके ऊपर आप की कृपा  
होई तिन कों अन्य संबंध कैसें होई ? तव श्रीगुसांईजी ने कह्यो,  
जो - जिनके हृदय में स्वरूप दृढ़ भयो है तिन कों अन्य संबंध  
उपजे नाहीं । यह सुनि के उद्धव त्रवाडी बोहोत प्रसन्न भए ।  
पाछे उद्धव त्रवाडी ने श्रीगुसांईजी सों विनती कीनी, जो -  
महाराज ! आपकी कृपा जीव कों बताओ तव जानि परे ।  
और आपको स्वरूप हृदयारूढ होइ तव अन्याश्रय करे नाहीं ।  
तव जानिए, जो - जीव कों श्रीआचार्यजी महाप्रभुन कौ स्वरूप  
हृदयारूढ भयो । मार्ग सगरो स्फुरचो । तव श्रीगुसांईजी आप  
श्रीमुख तें आज्ञा किये, जो - त्रवाडी ! है तो ऐसेई ।

वार्ता प्रसंग—२

बहारि एक समै श्रीगुसांईजी द्वारिकाजी पधारे । तव

उद्धव त्रवाडी संग हुते । साँ श्रीरनछोरजी के दरसन करि के वोहोत प्रसन्न भए । सो केतेक दिन श्रीगुसाईजी श्रीरनछोरजी के दरसन किये । ता पाछे श्रीगुसाईजी श्रीगोकुल पधारे । तव उद्धव त्रवाडी हू श्रीगोकुल आये । सो श्रीगुसाईजी तो स्नान करि के श्रीनवनीतप्रियजी के मंदिर में पधारे । सो राजभोग पर्यंत की सेवा साँ पहाँचि के अपनी बैठक में पधारे । तव उद्धव त्रवाडी श्रीनवनीतप्रियजी के दरसन करि के श्रीगुसाईजी के पास आये । तव श्रीगुसाईजी ने उद्धव त्रवाडी साँ पूछी, जो - त्रवाडी ! तुमने श्रीनवनीतप्रियजी के दरसन किये ? तव उद्धव त्रवाडी ने कही, जो - महाराज ! आपकी कृपा तें दरसन किये है । परि श्रीगोवर्द्धननाथजी के दरसन करवाओ तो वोहोत आछौ है । पाछे श्रीगुसाईजी भोजन को पधारे । और त्रवाडी को महाप्रसाद की पातरि धरवाई । ता पाछे तत्काल श्रीगुसाईजी उद्धव त्रवाडी को संग ले श्रीगोवर्द्धन आए । सो स्नान करि के श्रीगुसाईजी श्रीगोवर्द्धननाथजी के मंदिर में पधारे । सो सेन भोग के दरसन किये । तव उद्धव त्रवाडी ने हू दरसन किये । सो दरसन करि के दंडवत् कीनी । तव त्रवाडी देह को अनुसंधान भूलि गए । तव श्रीगुसाईजी ने श्रीगोवर्द्धननाथजी को चरनामृत दे के सावधान किये । ता पाछे श्रीगुसाईजी अपनी बैठक में पधारे । तव उद्धव त्रवाडी हू बैठक में आये । सो आय के दंडवत् कीनी । तव श्रीगुसाईजी श्रीसुबोधिनी की टिप्पणी की, कथा कहं । सो मुनि के उद्धव त्रवाडी वोहोत प्रसन्न भए । ता पाछे श्रीगुसाईजी आप पोढे । तव त्रवाडी हू सोय रहे । पाछे प्रातःकाल त्रवाडीजी ने श्रीगुसाईजी साँ विनती कीनी ।

जो - महाराज ! आपकी आज्ञा होई तो ब्रजपरिक्रमा करिण । तब श्रीगुसांईजी ने आज्ञा दीनी, जां - परिक्रमा अवश्य करनी । पाछें उद्धव त्रवाडी के संग एक वैष्णव पठायो । गो वा वैष्णव सों कह्यो, जो - इन उद्धव त्रवाडी कों ब्रजयात्रा करवाय ल्याओ । तब वह वैष्णव और त्रवाडी प्रथम तां विदा हांड के चले । सो श्रीगिरिराजजी की परिक्रमा कीनी । पाछें केतेक दिन में चौरासी कोस की परिक्रमा करि के फेरि श्रीगोवर्द्धननाथजी के दरसन किये । ता पाछें उद्धव त्रवाडी ने श्रीगुसांईजी के दरसन करि के विनती कीनी, जो - महाराज ! आपकी कृपा तें सर्व मनोरथ सिद्ध भये हैं । तब श्रीगुसांईजी ने श्रीमुख तें कह्यो, जो - श्रीगोवर्द्धननाथजी तो भक्त के मनोरथ पूरन करत हैं । यह सुनि के त्रवाडी बांहेत प्रसन्न भए । पाछें उद्धव त्रवाडी श्रीगुसांईजी सों विदा व्हे अपने देस आये ।

भावप्रकाश—या वार्ता की अभिप्राय यह है, जो - श्रीआचार्यजी, श्रीगुसांईजी के स्वरूप में दृढ निष्ठा होई तब मगगे पुष्टिमार्ग स्फुरायमान होई । और अन्य संबंध ह न होई ।

सो वे उद्धव त्रवाडी श्रीगुसांईजी के ऐसे कृपापात्र भगवदीय हते । तातें इनकी वार्ता कहां तांई कहिए ?

वार्ता ॥ १५० ॥



अब श्रीगुसांईजी की सेवकियो, सीताबाई और उनकी माता अचलबाई नागर ब्राह्मणी, बडनगर में रहती, तिनकी वार्ता की भाव कहत हैं —

भावप्रकाश—ये सीताबाई सात्विक भक्त हैं । लीला में इनकी नाम 'गोवर्द्धनी' है । और गोवर्द्धनी की एक सहचरी है । वाकी नाम 'शिला' है । सो यहां माता भई । ये 'ईश्वरी' तें प्रगटी हैं, तातें उन के भावरूप हैं ।

ये बडनगर में एक द्रव्यपात्र नागर ब्राह्मण के घर जन्मी । सो बरस आठ

की भई । तव इनकौ व्याह एक जाति के लरिका सों भयो । ता पाछे महिना एक पाछे वह लरिका सीतला के रोग में मरयो । सो सीतावाई ने लौकिक कछ जान्यो नाहीं । सो वह वोहोत ही मुग्ध हूती ।

घाता प्रसंग—१

सो एक समै श्रीगुसाईजी द्वारकाजी कों श्रीरनछोरजी के दरसन कों पधारे हुते । तव मार्ग में वडनगर आयो । सो श्रीगुसाईजी ने तहां डेरा किये । तव वह सीतावाई नागर ब्राह्मनी कों श्रीगुसाईजी के दरसन भए । सो दरसन करि कै वोहोत प्रसन्न भई । सो ता समै और हू वैष्णव श्रीगुसाईजी के दरसन कों उहां ठाढ़े हुते । सो कोऊ नाम पावत हुतो । कोऊ विनती करत हुतो । सो सीतावाई देखे । तव सीतावाई ने हू श्रीगुसाईजी सों विनती कीनी, जो-महाराज ! मोकों सेवक कीजिए ।

और सीतावाई की महतारी हती । वाकौ नाम अचलवाई हुतो । सो वह वोहोत वृद्ध हती । सो हू सीतावाई के संग हती । सो श्रीगुसाईजी सीतावाई कों आज्ञा किये, जो - तुम दोऊ स्नान करि कै आवो । तव सीतावाई और वाकी महतारी अचलवाई दोऊ स्नान करि कै आई । तव श्रीगुसाईजी ने उन के ऊपर कृपा करि कै नाम सुनायो । ता पाछे वाकी महतारी नाम पाइवे कों बैठी । तव श्रीगुसाईजी श्रीमुख तें महावाक्य अष्टाक्षर मंत्र कौ उच्चार कियो । सो वह मंत्र तीनि बेर कयो । ता पाछे उन श्रीगुसाईजी सों कह्यो, जो-महाराज ! ऐसी रीति के वचन तो मोकों आवत नाहीं है । तव श्रीगुसाईजी मुसिक्याय कै उन सों कहे, जो - मेरो नाम तो जानत है ? तव वावाई ने श्रीगुसाईजी सों विनती कीनी, जो-महाराज ! ए तो मैं जानत हूं । ता पाछे श्रीगुसाईजी ने कह्यो, जो - मेरो नाम

कों जप करियो। ऐंमं वा वाई सों कहं । पाछें सब वैष्णवों कों जतायो, जो - तुम सब हमारे नाम कों गुमिरन मति करियो । काहेतें, जो - तुम कों तो अष्टाक्षर कों ज्ञान कियो ह । तातें तुम अष्टाक्षर जपियो ।

भावप्रकाश--यह कहि श्रीगुरुसाईजी आपु अपने नामकी गोप्यता जनाए । सो श्रीगुरुसाईजी कों नाम परम फलरूप है । तातें जाको वं कृपा करि ज्ञान करे वाही कों वा नाम कों अधिकार प्राप्त होई ।

ता पाछें वा वाई ने श्रीगुरुसाईजी सों विनती कीनी, जो - महाराज ! हम कों निवेदन कराइए । पाछें मेवा पधराइ दीजिए । तब श्रीगुरुसाईजी ने कृपा करि के उन वाईन कों निवेदन कराइ भगवत्सेवा पधराय दीनी । सो सीतावाई श्रीठाकुरजी कों मंदिर वनवाय के श्रीठाकुरजी कों पाट बैठाये । सो भली भांति मेवा करन लागी । सो श्रीगुरुसाईजी वा वाई कों सखड़ी, अनसखड़ी के प्रकार कों ज्ञान बताए । और उहां केतेक दिन विराजे । ता पाछें श्रीगुरुसाईजी वा वाई सों विदा होइ के श्रीठारिकाजी कों आए । सो श्रीरनछोरजी के दरसन किये । ता पाछें उहां केतेक दिन रहि के श्रीगुरुसाईजी श्रीगोकुल पधारे ।

ता पाछें वा वाई कों श्रीठाकुरजी सानुभावता जनावन लागे । और बातें करते । जो चाहिए सो मांगि लेते । सो ऐसैं करत बोहोत दिन बीते । तब इनकी माता मरी । ता पाछें वा वाई की देह हू असक्त भई । सो इन ने हू देह छोरी । सो समाचार केतेक दिन में वैष्णवों श्रीगुरुसाईजी के आगें आय के कहे । तब श्रीगुरुसाईजी सीता वाईकी बोहोत सराहना किये । और कह्यो, जो - वा वाई कों स्वभाव तो बोहोत आछो हतो । जो - कछू बात में समुझति नाही ।

सो वह सीतावाई और उनकी माता श्रीगुसाईजी की ऐसी कृपापात्र भगवदीय हती । तातें इनकी वार्ता कौ पार नाही । सो कहां ताई कहिए ? वार्ता ॥ १५१ ॥



अब श्रीगुसाईजी के सेवक एक श्रोता, एक वक्ता, दोऊ राजनगर असारवा में रहते, तिनकी वार्ता कौ भाव कहत हैं—

भावप्रकाश—ये सात्विक भक्त हैं । लीला में श्रीचंद्रावलीजी की दोऊ मखी हैं । 'वचनमाधुरी' और 'श्रवनमाधुरी' इन के नाम हैं । सो श्रोता तो श्रवनमाधुरी है और वक्ता वचनमाधुरी । ये 'ईश्वरी' तें प्रगटी हैं । तातें उन के भांवरूप हैं ।

ये दोऊ राजनगर असारवा में बनियान के जन्मे । सो दोऊन के घर भाईला कोठारी के घर के पास हते । सो दोऊन की बालपने ते प्रीति बोहोत हुती । सो दोऊ संग रहते । कथा-वार्ता सुनते । पाछें दोऊन कौ ब्याह भयो । ता पाछें कछुक दिन में दोऊन के माता-पिता मरे । तब ये भाईला कोठारी के घर जाँइवे लगे । सो भाईला कोठारी दोऊन कौ देवी जानि उन पर बोहोत प्रीति करते । नित्य भगवद्वार्ता कहते । सो दोऊन की प्रीति श्रीगुसाईजी के स्वरूप में भई ।

वार्ता प्रसंग—१

वहोरि श्रीगुसाईजी राजनगर असारवा पधारे तब भाईला कोठारी के घर विराजे । तब भाईला कोठारी के संग तें वे दोऊ जनें श्रीगुसाईजी के सेवक भए । नाम-निवेदन पाए । पाछें स्त्रीन कौ हू सेवक कराए । सो भाईला कोठारी के घर दोऊ जनें नित्य भगवद्वार्ता सुनिवे कौ जाते । सो उहां तें भगवद्वार्ता सुनि कै जब पाछें घर आवते तब ये दोऊ जनें मिलि के उहां सुनी होई सो वार्ता करते । सो वक्ता कहतो, श्रोता सुनतो । पाछें केतेक दिन में ये दोऊ जनें अपनी स्त्रीन कौ संग ले के श्री-गोकुल कौ आए । श्रीगुसाईजी के दरसन किये । तब श्री-गुसाईजी ने इन तें पूछी, जो - वैष्णव । तुम कब आए ? तब इन कही, जो - राज की कृपा तें श्रीनवनीतप्रियजी के राज-

भोग के दरसन आय करे । तब श्रीगुसांईजी ने उन वैष्णवन पै कृपा करि के कही, जो - महाप्रसाद यहाँई लीजो । पाछे श्रीगुसांईजी भोजन कों पधारे । सो जब भोजन करि चुके तब आचमन करि के वीडा आरोगे । गादी ऊपर विगजे । ता पाछे उन वैष्णवन ने महाप्रसाद जूटन लीनो । पाछे पांच गान दिन श्रीगोकुल मे रहि के पाछे श्रीगुसांईजी मां विनती करी, राज की आज्ञा होइ तो ब्रजयात्रा करें । तब श्रीगुसांईजी ने कही, जो - आछो, करि आवो । तब वे दोऊ ब्रजयात्रा करि के श्रीनाथजीद्वार आए । श्रीनाथजी के दरसन करि के पाछे फेरि श्रीगोकुल आए । सो श्रीनवनीतप्रियजी के सेन के दरसन किये । पाछे श्रीगुसांईजी कथा कहन लागे । सो इन वैष्णवन श्रीमुख के वचन सुने । पाछे कथा होइ चुकी, तब दोऊ वैष्णवन तें श्रीगुसांईजी ने पृच्छी, जो - वैष्णव तुम कब आए ? तब उन कही, जो - महाराजाधिराज ! श्रीनवनीतप्रियजी के सेन के दरसन किये । पाछे वे दोऊ वैष्णव उठि के अपने डेरा कों गए । पाछे पांच-सात दिन श्रीगोकुल में रहि के पाछे वे दोऊ वैष्णव श्रोता और वक्ता इन विचार कियो, जो - ब्रज में कोई एकांत स्थल होइ तहां चलो । तब वे दोऊ जनें श्रीगोकुल तें चले । और उन दोऊन की स्त्री श्रीगोकुल में रही । पाछे वे दोऊ श्रोता और वक्ता सुंदर एकांत स्थल देखि के उहां बैठे । सो भगवद्वार्ता करन लागें । सो श्रोता सुने और वक्ता कहे । सो दोऊ जनें भगवद्रस में लीन भए । सो उन कों देहानुसंधान कछू न रह्यो । सो कछू लौकिक संबंधी कछू देह कौ बाधा न करें । सो ऐसे करत त्रालीस दिन विते ।



पाछें एक दिन ग्वारिया गाँइ चरावन आवते सो उन ने कही, जो-ये दोऊ महापुरुष हैं। देखो, इन कों चालीस दिना भए। कछू अन्न जल लीनो नाही। तातें इन कों कछू दूध देइ तो आछो। पाछें इन ग्वारियान ने अपने लोटा में गऊ दुहि कै दूध सों लोटा भरि कै उन के आगें धरयो। तव उन वैष्णवन कही, जो - भगवद् इच्छा तें आय प्राप्त भयो है। तव उन वैष्णवन ने भोग धरि कै वह प्रसादी दूध लियो। पाछें भगवद्-वार्ता करन लागे। सो ऐसैं ग्वारिया नित्य दूध दे जाँय। सो उतनो दूध लेनो। और बैठे भगवद्वाता करनी। सो ऐसैं करत छह महिना व्यतीत भए। ता पाछें एक दिन उन दोऊ वैष्णवन की भगवद्वाता करत देह छूटि गई। दोऊ भगवल्लीला में प्राप्त भए। पाछें उनकी देह कों जीव-जंतु भक्षण करि गए। और उन के अस्थी उहां परे रहे। पाछें उन दोऊन की स्त्री श्री-गोकुल में हती। सो दोऊ जनीं उनकों द्रुंढत द्रुंढत वाही ठौर जाँई निकली। सो देखे तो उहां उन ग्वारियान गाँइ चरावत हते। तव इन वैष्णव चाईन नें वा ग्वारियान तें पूछी, जो - यहां कोइ दोइ वैष्णव देखे? तव उन कही, जो - हां हां! दोई वैष्णव इहां बैठे हते। सो हमने छह महिना तांइ देखे। पाछें उन दोऊ जनैन की देह छूटि गई। ऐसैं ग्वारियान ने कही। तव उन वैष्णवन की स्त्री नें पूछी, जो-वे कहां बैठे हते? तव उन ग्वारियान ने वह स्थल बतायो। सो उहां देखे तां अस्थी परी हैं। तव उन स्त्रीन नें कही, जो - अब कैसें खवरि परे? तव वा श्रोता की स्त्री ने कही, जो मैं तो अपने पति की अस्थी पहचानि लेउंगी। तव उन वक्ता की स्त्रीने कही, जो - कैसें

पहचानेगी ? तब श्रोता की स्त्री ने कही, जो - मेरे पति तो श्रोता है । सो भगवद्वाता मुनि के उनकी अस्थी में छेद पर हैं । पाछें श्रोता की स्त्री ने छेद वारं अस्थी मच वीनि लीन । और वक्ता की स्त्री ने विना छेद के लीन । पाछें उन दोऊन कौ अग्नि-संस्कार कीनो । पाछें वे दोऊ स्त्री श्रीगोकुल में आय रही । और वे दोऊ वैष्णव नित्य लीला में जाँड़ प्राप्त भए ।

भावप्रकाश—या वार्ता कौ अभिप्राय यह है, - जो वैष्णव कौ भगवद्वाता या प्रकार कहनी मुननी । काहे ते, जो भगवद्वाता स्वप्नान्मक है । ताते उनकौ प्रीति पूर्वक हृदय में धारन किये तें देह के अभ्यास मच दृष्टि जात है । सो भगवद्वाता ऐसो पदार्थ है ।

सो वे श्रोता और वक्ता दोऊ श्रीगुसाईजी के ऐसे कृपा-पात्र भगवदीय है । ताते इनकी वार्ता कौ पार नाही, सो कहाँ ताँई कहिए ?

वार्ता ॥ १५२ ॥



अब श्रीगुसाईजी के सेवक एक कायस्थ आगरे कौ, सूरत के सूवा पास दीवानगीरी करतो, तिनको वार्ता का भाग कहत है —

भावप्रकाश—ये राजम भक्त हैं । लीला में इनकौ नाम 'दर्शनातुरी' है । ये बड़े उपनंदकी बेटी हैं । सो यह श्रीठाकुरजी के स्वरूप में आमक्त हैं । ताते यह 'दर्शनातुरी' श्रीयसोदाजी के घर वाग वार श्रीठाकुरजी के दरसन कौ आवति हैं । सो श्रीयसोदाजी वाकौ वरजति हैं । कहति हैं, जो - तू मेरे मंदिर में मति आवे । तू वावरी भई है । ताते मेरे लाला कौ दीठ लगेगी । या प्रकार श्रीयसोदाजी 'दर्शनातुरी' कौ श्रीठाकुरजी के दरसन करावति नाही । ये 'ईश्वरी' तें प्रगटी हैं, ताते उनके भावरूप हैं ।

वार्ता प्रसंग—१

सो वह कायस्थ सूरत के सूवा के पास दीवानगीरी करतो । सो एक समै वह कायस्थ राजनगर कछू कार्यार्थ आयो । सो ता समै श्रीगुसाईजी राजनगर में बिराजत हुते । तब इन कायस्थ

कों श्रीगुसांईजी के दरसन भये । तव इन श्रीगुसांईजी सों विनती करी, जो - राज ! मोकों सरनि लीजिये । तव श्रीगुसांईजी ने वाकों नाम सुनायो । पाछें वह कायस्थ तो सूरत गयो । और श्रीगुसांईजी ब्रज में पधारे । ता पाछें देसाधिपति ने सूरत के सूवा कों बुलायो । सो सूवा देसाधिपति के पास आयो । तव वह कायस्थ दीवान संग हतो । सो देसाधिपति सों मिलि कै पाछें चले । सो श्रीगोवर्द्धन में डेरा भए । तव सूवा ने कही, जो - तीसरे पहर कों यहां तें कूच करेंगे । तव यह कायस्थ ने विचारी, जो - श्रीगोवर्द्धननाथजी के दरसन करें तो आछौ । तीसरे पहर कूच होइगो । तव वह कायस्थ गोपालपुर आयो । श्रीगुसांईजी के दरसन किये । सो श्रीगोवर्द्धननाथजी की राजभोग आति तो होइ चुकी हतो । पाछें श्रीगुसांईजी कों भेंट धरि विनती करी, जो - राज के पास मैंने राजनगर में नाम पायो हतो । ता दिन आप के दरसन भए, के आज भए । तव श्रीगुसांईजी ने पूछी, जो - श्रीगोवर्द्धननाथजी के दरसन किये ? तव कायस्थ ने कही, जो - महाराज ! मोकों तो जनम भरि में एक हू बेर दरसन नहीं भये है । तव श्रीगुसांईजी ने कही, जो - अब तो राजभोग होइ चुके हैं । अब तो सांझ के उत्थापन के दरसन करियो । तव कायस्थ ने कही, जो - महाराज ! पराई चाकरी है । सो तो तीसरे पहर कूच करेंगे । जो - आज रहंगो तो दरसन कखंगो । और श्रीगुसांईजी के आगे कछू कहि न सकयो । पाछें वह कायस्थ जाँइ कै चांपाभाई भंडारी सों मिल्यो । सो भंडारी तें पूछी, जो - दरसन कौन समे होइंगे ? तव भंडारी ने कही, जो - पाछिलो दिन घरी छह

रहेगो तव हांडंगे । तव कायस्थ ने कही, जो - हमारे सूत्रा को पहर दिन ते कूच होइगो । सो आज पहर दिन ते पहिले उदग्यन होइ तो पचीस हजार रूपया श्रीनाथजी के आगे भेंट करों । और दस हजार रूपया तुम को देंगो । तव चांपाभाई ने आय के श्रीगुसाईजी को चरनारविंद दावि के जगाए । तव श्रीगुसाईजी ने भंडारी ते कही, जो - या समे केमे आयो ? तव भंडारी ने श्रीगुसाईजी सो विनती करी, जो - महाराज ! दीवान आयो हे, सो ऐरो कहे हैं । जो - नित्य ते घरी दोइ पहिले उत्थापन होइ तो पचीस हजार रूपया भेंट करों । तव श्रीगुसाईजी ने कही, जो - हमारे पास आयो हतो । पहर दिन ते कूच होइगो । तव भंडारी ने कही, जो - पहर दिन ते पहिले उत्थापन होइ तो आछौ । तव श्रीगुसाईजी ने कही, जो - आछौ । तव भंडारी ने आय के कायस्थ ते कही, जो - श्रीगुसाईजीने आज्ञा करी हे । सो आज वेगि उत्थापन करेगे । पाछे श्रीगुसाईजी तो नित्य ते दोइ घरी अवेरे जागे । और यहां तो सूत्रा के तो कूच के नगारे वजे । सो सूत्रा ने मनुष्यन ते कही, जो - दीवान को बुलाय ल्यावो । सो हलकारा गए । सो गोपालपुर आय दीवान को बुलाय के ले गए । पाछे इन को तो कूच होइ गयो । तव दीवान को तो श्रीगोवर्द्धननाथजी के दरसन को वोहोत ताप भयो । सो मारग मे देह छोरी । और इहां श्रीगुसाईजी स्नान करि के ऊपर मंदिर में पधारे । पाछे संखनाद करवाए । उत्थापन भोग के दरसन भए । तव श्रीगुसाईजी ने भंडारी ते कही, जो - बुलाओ, वह कहां है कायस्थ ? तव भंडारी ने कही, जो - महाराज ! उनको तो कूच होइ गयो । और आपने तो

नित्य तें दोड़ घरी अवेरी करी । तव श्रीगुसाईजी ने कही, जो-  
रूपैयान के लिये बेगि उत्थापन करें ? पाछें आप बोले नाहीं ।  
ता पाछें संध्या सेन के दरसन भए ।

भावप्रकाश—या वार्ता में यह जतायो, जो-द्रव्य अर्थ भगवद्सेवा करे तो  
बाधक होंई । सेवा कौ विक्रय होंई । तातें द्रव्य के लालच सों प्रभुन कों  
बेगि जगावने नाहीं । और या दीवान कों श्रीगुसाईजी आप श्रीगोवर्द्धननाथजी  
के दरसन यातें नहीं कराए, जो - याने द्रव्य कौ आश्रय कियो । द्रव्य के बल  
पै दरसन कियो चाहौ । सो प्रभु तो द्रव्य के अधीन नाहीं । तातें दरसन न कराए ।

पाछें दूसरे दिन श्रीगुसाईजी श्रीगोवर्द्धननाथजी के राज-  
भोग धरि कै गोविंदकुंड संध्यावंदन करिवे कों पधारे । तव आप  
भंडारी तें आज्ञा किये, जो - दोड़ मजूर और फावडा ले कै तुम  
गोविंदकुंड पै आइयो । ऐसे कहि कै आप गोविंदकुंड पधारे ।  
पाछें चांपाभाई भंडारी दोड़ मजूर और फावडा लिवाय कै गए ।  
तव श्रीगुसाईजी संध्या करि चुके । पाछें आप खेत में जाँइ कै  
उन मजूरन तें कही, जो - यह ठौर खोदो । तव मजूरन नें उहां  
खोद्यो । सो निरे सोने की ईंट निकसी । तव श्रीगुसाईजी भं-  
डारी तें आज्ञा किये, जो - तेरे चहिए जितनी ले ले । तव  
भंडारी कहन लाग्यो, जो - महाराज ! लक्ष्मी आप के चरनार-  
विंद में हैं । तव श्रीगुसाईजी ने कही, जो - लेनो होंइ तो अव  
ले, नहीं तो पछतावेगो । ता समय भंडारी तो संकोच तें बोल्यो  
नाहीं । पाछें श्रीगुसाईजी ने मजूरन तें बापें माटी डरवाय कै  
आप तो मंदिर में पधारे । ता पाछें दूसरे दिन भंडारी सवारें  
अँधियारे ही में आय कै वा ठौर खोदि कै देखे तो उहां कछू  
नाहीं । तव भंडारी अपने मन में पछितान लाग्यो । मन में कही,  
जो - काल्हि लेतो तो द्रव्य मुक्तो हतो । ऐसे कहि कै पछि-

तान लाग्यो ।

भावप्रकाश—यामें यह जताए, जो - गुरु आगें मांचो रहे तो कार्य होंटें ।

सो वह कायस्थ श्रीगुसांईजी कों ऐगो कृपापात्र हतो ।

तातें इन की वार्ता कहां तांई कहिए ? वार्ता ॥१५३॥



अब श्रीगुसांईजी के सेवक एक ब्रजवासी, एक मोची-वनिया, एक ब्राह्मण  
तिनकी वार्ता कों भाव कहत हैं —

भावप्रकाश—ये तामम भक्त हैं । लीला में ब्रजवासी तो 'गेहिन' गांव है ।  
और मोची-वनिया 'कालिका' हैं । और कालिका की एक महचरी है तिन की  
नाम 'संमया' है । सो 'संमया' यहां ब्राह्मण कों प्रागट्य जानतो । ये 'सुगंधिनी'  
तें प्रगटी हैं, तातें इन के भावरूप हैं ।

वार्ता प्रसंग—?

सो एक समे श्रीगुसांईजी श्रीद्वारिकाजी कों पधारें । सो  
ब्रजवासी आप के संग हते । सो एक गाम में डेरा भए । सो  
वा गाम में एक वनिया जोड़ा बंचतो । सो वासों मोची कहते ।  
सो वा मोची-वनिया कों देवी कों वरदान हतो । सो वह जासों  
कहे, जो - मरि जा, सो मरि जातो । देवी वा मोची सों बोलतो ।  
सो वा मोची-वनिया की दुकान पे एक ब्रजवासी जोड़ा पहरिबे  
गयो । सो वा मोची ने ब्रजवासी सों मोल ठहराय के जोड़ा  
पहराय दियो । इतने में पांच-सात ग्राहक आय गए । सो  
उन कों जोड़ी दिखायवे लाग्यो । और वा ब्रजवासी ने कही,  
जो - तेरे दाम ले । परि वह तो लेऊ लेऊ करे और लेई नाहीं ।  
औरन कों जोड़ी पहिरावें । सो दोइ चारि वार वा ब्रजवासी ने  
कही, जो - दाम ले । परि वह तो सुने नाहीं । तव वा ब्रज-  
वासी कों रिस चढ़ी । सो जोड़ा सहित वा मोची कों लात  
मारी । तव वाने कही, जो - मरि, मरि, परि कछु न भयो ।

पाछें ब्रजवासी तो दाम दे कै डेरा गयो । और वह मोची उठि कै घर में जाँई के देखे तो देवी कांपे हैं । तव इन मोची ने देवी साँ कही, जो - तू कांपे क्यों है ? तेरो वचन तो नहीं चल्यो । तव देवी बोली, जो - ये तो वैष्णव ब्रजवासी श्रीगुसाँईजी के सेवक हैं । औरन कोँ सराप लगे । तैनें इन साँ ऐसो कह्यो तातें मैं कांपत हूं । तव मोची ने कही, जो - तुम हू तें और बड़े हैं ? तव देवी बोली, जो - मोतें बड़े वैष्णव हैं । वैष्णव तें बड़े श्रीगुसाँईजी । तव उन मोची ने कही, जो - मैं उनही की सरनि जाउंगो । पाछें वह मोची जहां श्रीगुसाँईजी के डेरा हते तहां आयो । सो इन ब्रजवासी के पाँइन परि कै कही, जो - मोकोँ वैष्णव करो । तव वा ब्रजवासी ने श्रीगुसाँईजी साँ विनती करी, जो - महाराज ! मोची सरनि आवत है । सो याकोँ सरनि लेऊगे ? तव श्रीगुसाँईजी ने कही जो - मोची है ? जोड़ा वेचे हैं ? तव उन मोची ने कही, जो - महाराज ! वनिया हूं, उद्यम मोची कौ है । सो अब यह उद्यम न करुंगो । कपड़ान की दुकान करुंगो । तव श्रीगुसाँईजी ने कृपा करि कै बाकोँ नाम सुनायो । पाछें वा मोची ने घर आय कै जोड़ा सब बेचि डारे । रातोरत सब घर लीप्यो पोत्यो । सवारे स्त्री कोँ श्रीगुसाँईजी के पास नाम सुनवायो । ता दिन ब्रत किये । पाछें देवी कोँ तो खाड में पटकी । दूसरे दिना श्रीगुसाँईजी ने स्त्री-पुरुषन कोँ ब्रह्मसंबंध करवायो । पाछें इन विनती करी, जो - महाराज ! अब कहा आज्ञा है ? तव श्रीगुसाँईजी ने कही, जो - श्रीठाकुरजीकी सेवा करो । पाछें आप तो एक ब्रजवासी तें आज्ञा किये, जो - याके घर जाँई के

खासा सेवकी, मेवा की विधि कराग आउ । पाछे ब्रजवासी ने जाँइ के सब घर खासा कराग के पाछे वासन बढलाए । जल-धराकी विधि सब बताई । पाछे श्रीगुमांडजी ने मेवा पधराय दीनी । और पांच सात दिन आप (वाही गाम में) डेरा राखे । सब सेवा की विधि सिखाई । पाछे आप तो श्रीरत्नछोरजी के दरसन करि के ब्रज में पधारे । और ये दोऊ स्त्री-पुरुष भली भाँति साँ सेवा करन लागे । साँ एक दुकान कपड़ान की करी । पाछे नित्य सवारे उठि के स्त्री-जन मामग्री करे । आप मंगला करि के सिंगार धराय के पाछे दुकान पे जातो । पाछे स्त्री सिंगार भोग, राजभोग धरे । सो यह राजभोग आर्ति समे जाँइ के राजभोग आर्ति करे । अनोसर करि के गाँइ कोँ दे के महाप्रसाद ले के दुकान पे जातो । सो बाकी कपड़ान की दुकान हती ।

सो एक दिन एक ब्राह्मन वैष्णव वा गाम में आयो । सो उनकी दुकान के आगे होंइ के निकरयो । तव मोची देखि के उठि के मिल्यो । श्रीकृष्ण-स्मरण करि के दुकान पे ल्यायो । भाव सहित बोहोत आदर कियो । पाछे अपने घर वा ब्राह्मन वैष्णव कोँ ले गयो । सो आप तो न्हाइ के राजभोग आर्ति करी । इन ब्राह्मन वैष्णव ने श्रीठाकुरजी के दरसन किये । पाछे अनोसर करि के इन ब्राह्मन वैष्णव कोँ अपने घर में सब दिखाए । जो ये खासा, ये सेवकी, ये हमारी सेवकी न्यारी है । और यह श्रीठाकुरजी की खासा । यह सखड़ी, अनसखड़ी, दूधघर सब दिखायो । प्रसादी और भोग न्यारे न्यारे धरतो । सो बोहोत उज्ज्वलता साँ करतो । तव यह ब्राह्मन वैष्णव



उज्ज्वलता देखि कै वोहोत प्रसन्न भयो । पाछें इनकों न्हायो और पूछी, जो - तुम्हारी ईच्छा होइ तो दूधघर की सामग्री लेउ । तब इन ब्राह्मन-वैष्णव कों कछू लौकिक जाति-व्यवहार की सूधि न रही । न जाति पूछी । उज्ज्वलता देखि कै कही, जो - सखड़ी लेउंगो । न उनने इन तें पूछी । पाछें सखड़ी अन-सखड़ी भली भांति सों महाप्रसाद लिवायो । पाछें वीरी ले कै ये तो गाम में गयो । मोची अपनी दुकान पै गयो । पाछें गाम में एक और वैष्णव ने ब्राह्मन वैष्णव कों देखि कै 'श्री-कृष्ण-स्मरण करयो । और पूछी, जो - तुम कव आए हो ? तब ब्राह्मन ने कही, जो - मैं तो सबेरेही कौ 'आयो' हूं । तब इन पूछी, जो - उतारो कहां कियो ? तब कही, जो - अब तांई तो फलाने वैष्णव के घर है । तब कही, जो - चलो ! महा-प्रसाद लेउ । तब इन ब्राह्मन ने कही, जो - उनके घर महा-प्रसाद लियो । तब उन वैष्णव ने कही, जो - तुम तो ब्राह्मन हो और वे तो मोची है, जोड़ा कौ व्योपार करतो । अब सेवक भयो है । तब तें कपड़ान की दुकान कीनी है । तब यह सुनि कै इन ब्राह्मन के मन में ग्लानी आई । सो संदेह होत मात्र कपाल में सुफेद कोढ़ निकस्यो । तब उन कही, जो - संदेह कियो तातें यह कोढ़ भयो । पाछें विचार कियो, जो - अब तो श्रीगुसांईजी के पास जानो । वे कृपा करेंगे तब आछो होइगो । पाछें वह ब्राह्मन वैष्णव श्रीगुसांईजी के पास आयो । सो श्री-गुसांईजी कौ दरसन कियो । पाछें विधिपूर्वक सब समाचार श्रीगुसांईजी के आगें कहे । तब श्रीगुसांईजी ने कहीं, जो - तेनें संदेह कियो तातें यह कोढ़ भयो । अब ब्रज-परिक्रमा

करो । सब कुंड में चढ़ाई के सब कुंड की रज याके ऊपर लगावो । सो इन ब्राह्मन वैष्णव ने ब्रजयात्रा करी । सब कुंड की रज लगाई । सो आधा कोढ़ मिटयो । आधा रह्यो । तब फेरि श्रीगुसाईजी के पास आई विनती कीनी, जो - महाराज ! आधा कोढ़ तो गयो है और आधा अब हूँ है । तब श्रीगुसाईजी ने कही, जो - द्वारिकाजी के मार्ग में हरिदास की बेटी है । उनके पास जाऊ । वे आछो करि देंगे । तब वह वैष्णव हरिदास की बेटी के पास आयो । तब उन आदर सों भली भांति सों उतारो दीनो । पाछे पूछी, जो - कहां तें आये हो ? तब इन कही, जो - श्रीगुसाईजी ने तुम्हारे पास पठायो हूँ । तब वह बोहोत प्रसन्नता सों कही, श्रीगुसाईजी ने बड़ी कृपा करी । पाछे राजभोग-आर्ति करि के दरसन करवायो । पाछे वैष्णव तें कही, जो - उठो न्हाओ । महाप्रसाद लेउ । तब वह ब्राह्मन स्नान करी के अपरस ही में आय बैठ्यो । तब हरिदास की बेटी ने वा ब्राह्मन सों पूछयो, जो - सखड़ी लेउगे के अन-सखड़ी लेउगे ? तब इन कही, जो - सखड़ी लेउंगो । तब इन सखड़ी महाप्रसाद धरयो । सो वा ब्राह्मन ने प्रसन्नता सों लियो । पाछे महाप्रसाद ले के वह ब्राह्मण बैठ्यो । तब हरिदास की बेटी ने पूछी, जो - तुम्हारो आवनो कैसे भयो ? तब उन ब्राह्मन वैष्णव ने सब समाचार कहे । तब उन हरिदास की बेटी ने अपने धनी मानिकचंदजी सों जाँइ के कही, जो - श्रीगुसाईजी ने पठाए हैं । ताते इनकों आछो करयो चाहिए । तब मानिकचंद ने कही, जो आछो होइ सो करो । तब वह हरिदास की बेटी ने कही, जो - रुपैया दोइ हजार चाहिए । तब वैष्णव

भलो होंइ । तव मानिकचंद ने कही, जो - भलो, जो खर्च होंइ सो करेंगे । तव हरीदास की बेटी ने कही, जो - सब गामन में 'कंकोत्री' लिखि कै सब वैष्णव कों बुलाओ । तव मानिकचंद ने वैसेही कियो । सो सब वैष्णव बुलाए । ध्वजा ठाढ़ी करी । मंडप रोपे । सब वैष्णव आए । सवन कों महाप्रसाद लिवायो तव हरिदास की बेटी ने इन ब्राह्मन वैष्णव तें कही, जो - सब वैष्णव महाप्रसाद ले उठे तव एक डवरा में थोरी थोरी सवन की जूठनि भेली करि लीजो । ऐसैं तीन दिन ताई लेनो । सवन की पातरि उठावनी, सब सुद्ध करनो । पाछें उन ब्राह्मन वैष्णव ने विश्वासपूर्वक वैसे ही एक डवरा में सवन की जूठनि भेली करि कै आप ले गयो । सब जगह सुद्ध करी । सो दूसरे दिन कोढ़ आधो रह्यो । फेरि दूसरे दिन लीनी । तव कोढ़ चोथाई रह्यो । पाछें फेरि तीसरे दिन लीनी । तव देह कंचन सी भई । पाछें वह ब्राह्मन-वैष्णव हरिदास की बेटी सां विदा व्है श्रीगुसांईजी के पास आयो । सो सब समाचार श्रीगुसांईजी के आगें कहे । और कह्यो, जो - महाराज ! उहां बड़ो आनंद भयो । हजारन रुपैया श्रीगोवर्द्धननाथजी की भेंट भए । पाछें श्रीगुसांईजी की भेंट हू वोहोत भई ही सो सब श्रीगुसांईजी के पास पहोंचाए ।

तातें वैष्णव कों जो करनो सो विचारि कै करनो । और जो - बिना विचारे करे तो संदेह न करनो ।

भावप्रकाश—या वार्ता कौ अभिप्राय यह है, जो - भगवदीय वैष्णवन में जाति-बुद्धि सर्वथा न करनी । किये तें अपराध होंइ । तातें भगवदीय वैष्णव कौ स्वरूप अलौकिक जानतो ।

सो वे ब्रजवासी, ब्राह्मन, मोची. ए तीन्यो श्रीगुसांईजी के

ऐसे कृपापात्र भगवदीय हं । तातें इन की वार्ता कौ पार नहीं  
सो कहां ताई कहिए । वार्ता ॥१५४॥



अथ श्रीगुसाईजी के श्रेष्ठक एक वनिया, एक ब्राह्मण, दूयो में निगाट उतागि  
लिये, तिनकी वार्ता कौ भाष कहत हैं—

भावप्रकाश—ये वनिया मान्दिक भक्त हैं । लीला में इन कौ नाम 'ग्मा-  
वेसिनी' है । और ग्मावेसिनी की तीन मर्या और हैं । तिन के नाम 'मग्मासनी',  
'प्रकासिनी', 'विलासिनी' । सो मग्मासनी या वनिया की स्त्री मई । और प्रका-  
सिनी, विलासिनी दोऊ ब्राह्मण-ब्राह्मणी कौ प्रागट्य जाननो । ये ग्मावेसिनी,  
'सुगंधिनी' तें प्रगटी हैं । तातें उन के भावस्य हैं ।

वार्ता प्रसंग—१

सो एक समे श्रीगुसाईजी द्वारिकाजी श्रीरनछोरजी के दर-  
सन कों पधारे । सो मारग मे या वनिया कौ गाम आयो । सो  
तहां आप डेरा किये । सो या वनिया कों श्रीगुसाईजी के दर-  
सन भए । सो साक्षात् पूरन पुरुषोत्तम के दरसन भए । तव यह  
वनिया अपनी स्त्री सहित सरनि आयो । नाम-निवेदन पायो ।  
पाछें श्रीगुसाईजी सों विनती करि श्रीठाकुरजी पधराय सेवा  
करन लाग्यो । पाछें वा गाम में और ह वैष्णव हते, सो उहां  
भगवन्मंडली नित्य होई । सो तहां ये दोऊ स्त्री-पुरुष भगवद्-  
वार्ता सुनिवे कों जाइवे लगे । सो ऐसे करत या वनिया कों  
वैष्णव पर भाव बोहोत भयो । सो यह वनिया और उन की  
स्त्री उन के घर जो कोऊ वैष्णव आवतो तिन कों वे आग्रह करि  
महाप्रसाद लिवावते । ता पाछें जो वच तो आप लेतें, नांतरु  
सेन में श्रीठाकुरजी आरोगे सो लेते । और जो कहूं अचा-  
नक वैष्णव आवते तो रसोई करि के पुस्तक कों भोग धरि  
के वैष्णवन कों महाप्रसाद लिवावते । और जो रात्रि कों सेन

भए पाछें मध्यरात्रि कों वैष्णव आवते तो वाही समै रसोई करि कै पुस्तक कों भोग धरि कै वैष्णवन कों महाप्रसाद लिवावते ।

सो एक दिन वर्षा भई । सो उपरा लकरी सब भीजि गए । और रात्रि घरी चारि गई । तव अचानक वैष्णव आए । तव उन वनिया-वैष्णव ने स्त्री सों कही, जो - न्हाय कै सामग्री रसोई सिद्ध करो । तव उन स्त्रीने कह्यो, जो - उपरा लकरी तो सब भीजि गए हैं । सो कैसें रसोई करें ? सो तुम जाँइ कै कहूं तें सूकी लकरी ले आवो तो रसोई सिद्ध करुंगी । तव वैष्णव ने कही, जो - या समै रात्रि कों लकरी कौन पै तें ले आउं ? परंतु तुम सामग्री काढ़ि कै स्नान करो । तैयारी करो । मैं जाऊं हूं । पाछें वैष्णव कुल्हारी बगल में ले कै गाम तें वाहिर निकस्यो । सो एक देवी कौ मंदिर हतो तामें दोइ किवाड़ लगे हते । सो यह वैष्णव जाँइ कै सांकरि खोलि कै एक किवार उतारि, फारि कै, पिछोरी में बांधि कै ले आयो । सो अपुनी स्त्री कों दीनी । तव वा स्त्रीने कही, जो - या समै सूकी लकरी ऐसी कहां तें ल्याए ? तव वा वैष्णव ने कही, जो - मैं तो देवी कौ किवार उतारि कै ले आयो, फारि-तोरि कै लकरी करि ल्यायो । परि काहू सों कहियो मति । ता पाछें रसोई करी । तव रसोई सिद्ध भई । तव भोग धरि कै वैष्णवन कों महाप्रसाद लिवायो । पाछें भगवद्वार्ता-कीर्तन किये । पाछें विछोना करि कै वैष्णवन कों सुवाय कै आप सोय रहे । सो उन वनिया-वैष्णव की श्रीठाकुरजी पै तथा वैष्णव पै ऐसी वात्सल्यता हती । पाछें सवेरो भयो । तव दोऊ स्त्री-पुरुष सेवा में न्हाए । मंगला सिंगार करि कै राजभोग समर्पे । समय भए भोग सराय के आर्ति

करि कै वैष्णव कों महाप्रसाद लिवाया । पाछें आप महा-  
प्रसाद लियो । पाछें वह वैष्णव चलन लागे । तव वह बनिया-  
वैष्णव उन कों विदा करि के नेक दरि लों पहों चावन गयो ।

शाना प्रसंग—२

और इनके पारोस में स्त्री-पुरुष ब्राह्मन रहते । सो वे देवी  
के पूजारी हते । सो वा ब्राह्मन की स्त्री ने इन बनिया-वैष्णव  
की स्त्री ते पूछी, जो - तुम्हारे घर उपरा लकरी तो सब भीज  
गए हते और तुमने रात्रि रसोई तो बेगि करी । सो लकरी  
कहां तें ल्याए ? तव वा वैष्णव की स्त्रीने कही, जो - मेरा घनी  
जाँइ के देवी के एक किवार तोरि के ले आयो । तव उन कही-  
जो - देवी तो जागती ज्योति हे । सो तुम तें कछू न बोली ?  
तव इन कही, जो - हम तें तो न बोली ।

सो वह ब्राह्मन कों नित्य दोऊ बेर ताती रसोई भाँवती ।  
ठंडी न लेतो । सो यह वैष्णव न्हाय के सेवा में गए तव सांझ  
परी । तव वा ब्राह्मन ने आय के अपनी स्त्री तें कही, जो -  
तुम सूकी लकरी ले आवोगे तो हों रसोई करोंगी । तव उन  
ब्राह्मन ने कही, जो - अब तो रात्रि परी, या समय लकरी कहां  
तें ले आउं ? तव इन स्त्रीने कही, जो - काल्हि यह वैष्णव  
जाँइ के देवी को एक किवार तोरि के ले आयो हे और एक  
हे सो तुम ले आवो । तो रसोई होई । तव उन ब्राह्मन कही-  
जो - देवी रुठेगी । तव उन स्त्रीने कही, जो - देवी तो गरीब है ।  
वह तो कछू बोलेगी नाहीं । अपने पै तो रुठमान् हे । तातें  
तुम जाँइ के बेगि ले आवो । पाछें वह ब्राह्मन कुल्हारी ले के  
गयो । सो जाँइ के देवी के किवार में एक घाव कुल्हारी को

कियो । तहां कुल्हारी बाही किवार में चिपक गई । और वा ब्राह्मन के हाथ वा कुल्हारी तें चिपकि रहे । सो बोहोत बल करे उपाड़ करे । परि छूटे नाहीं । तव वह अपने मन में धिक्कार करन लाग्यो । और कही, जो - मैंने स्त्री की कही करी तातें देवी मोपै रूठी । ऐसैं करत पहर रात्रि गई । तव वा स्त्रीने कही, जो - ब्राह्मन कव कौ गयो सो आयो नाहीं । तातें मैं जाँड़ के खवरि तो काढों ? सो वह ब्राह्मनी आय के देखे तो ब्राह्मन परयो है । तव वा स्त्री ने कही, जो - लकरी फारत तुम कों नींद आइ गई कहा ? तव वा ब्राह्मन ने कही, जो - रांड ! मेरो करम फूट्यो है, जो तेरी कही मानी । तातें देवी मोपै रूठी । मेरे तो हाथ चिपके हैं । तव वा ब्राह्मनी ने कही, जो - मैं छुडाउं । ऐसैं कहि के वह छुराइवे लगी । सो बाहू के हाथ चिपकि गए । तव दोऊ बोहोतेरो बल करे, परि छूटे नाहीं । तव देवी तें दोऊ विनती करन लागे । तव देवी बोली, जो - ले जा ! मेरो किवार लेवे आयो है ? सो अब तो तेरे हाथ न छूटेंगे । तव इन ब्राह्मन कही, जो - न छूटेंगे तो भूखे मरि जाइंगे । तो तोकों हत्या लगेगी । तव देवी ने कही, जो - तू मेरे किवार नए करि देउ । और वा वैष्णव के घर दोइ भारा लकरी नित्य ल्यायो करि । तव वा ब्राह्मन ने कही, जो - ऐसैं ही करेंगे । परि मैयाजी ! हमारे हाथ काहू तरह छूटे । तव देवीने कही, जो - हाथ तो तवही छूटेंगे जब हों तुम्हारी आछी भांति फजीती करोंगी । काहंतें ? जो - फेरि कोऊ ऐसैं न करे । ऐसैं करत सवेरो भयो । तव सब गाम के मनुष्य आये । राजा आयो । सब लोग हँसन लागे और कहन लागे, जो - देवी के

किवार लेवे आयो । एक तो ले गया तोह देवी न बोली ।  
 आज और दूसरो लेवे आयो । अब ले जा ! और वा स्त्री तें  
 कही, जो - अब पति के हाथ छुगइ ले ! देखो, देवी कौ गंगो  
 प्रताप हे । ऐसैं सगरे दिन वा ब्राह्मन की मर्दा भानि मां  
 फजीती भई । सो वे तो मूंड दे के नाचो माथो करि के गुनिवो  
 करे । जो - जाके मन आवे सोई कहें । ऐसैं करत रात्रि भई  
 सब मनुष्य गए । पाछें वा ब्राह्मन ने देवी तें विनती करी, तव  
 देवी ने कही, जो - पहिले तो तू मेरे मंदिर के किवार कराय  
 दे । और नित्य दोई भारा लकरी वा वैष्णव के घर पहुंचायो  
 करि । नाही तो खडग ले के दोऊन के माथे काटोंगी । तव  
 ब्राह्मन तो डरप्यो । तव हाथ छूटि गए । सो घर गए । तव  
 उन ब्राह्मन ने देवी के किवार कराय दिये । और दोई भारा  
 लकरी नित्य उन वनिया-वैष्णव के घर पहुंचावे । ऐसैं करत  
 केतेक दिन गए । तव उन वैष्णव ने कह्यो, जो - अब तो सग-  
 रो घर लकरीन तें भरयो हे, राखिवे कौ ठौर नाही । तातें अब  
 तुम मति ल्यावो । तव उह ब्राह्मन ने हाथ जोरि कै कही, जो -  
 हम लकरी न लावे तो देवी मारि डारेगी । तव उन वैष्णव ने  
 कही, जो - तुमने देखा देखी करी । तातें इतनो दुःख पाए ।  
 और देखो श्रीगुसाईजी कौ ऐसो प्रताप हे । तव उन ब्राह्मन ने  
 कही, जो - कृपा करि कै मोहू कौ श्रीगुसाईजी कौ सेवक करि  
 वैष्णव करो । तव उन वैष्णवने कही, जो - तुम दोऊ मिलि कै  
 श्रीगोकुल जाँइ कै श्रीगुसाईजी के पास नाम-समर्पन पाय आवो ।  
 और श्रीठाकुरजी की सेवा पधराय ल्यावो । तव उन ब्राह्मन ने  
 कही, जो - देवी ! हमारो पिंड नहीं छोरे हैं । तव इन वैष्णव कही,



जो - हम देवी तें कहि आवेंगे । पाछें वह वैष्णव जाँप कै देवी सों कही, जो - हमारे तो लकरी वोहोत है । अब वा ब्राह्मन कौ नाम मति लीजो । तव वा देवी ने कही, जो - अब तो तुम मेरो किवार न लेउगे ? तव वैष्णव ने कही, जो - अब न लेइंगे । और वह वैष्णव होइगो । तव देवी ने कही, जो - अब नहीं बोलूंगी । पाछें वा वैष्णव ने आइ कै वा ब्राह्मन तें कही, जो - देवी ने कही, जो - अब नहीं बोलूंगी । तातें अब तुम श्रीगोकुल जाँइ कै श्रीगुसाँइजी के पास नाम-समर्पन करवाय कै ब्रजयात्रा करि कै श्रीगोवर्द्धननाथजी के दरसन करि कै पाछें श्रीगुसाँइजी सों विनती करि कै पाछें सेवा पधराय के आज्ञा मांगि कै यहां आइयो । तव दोऊ स्त्री-पुरुष ब्राह्मन श्रीगोकुल आए । श्रीगुसाँइजी के दरसन किए । तव श्रीगुसाँइजी ने कही, जो - तुम तो देवी के पूजारी हो । तातें सवरे व्रत करियो । परसां श्रीयमुनाजी में न्हाय कै अपरस में चले अइयो । पाछें दोऊ जनै न व्रत कियो । पाछें श्रीयमुनाजी में न्हाय कै अपरस में दोऊ जनै आय ठाढ़े भए । तव श्रीगुसाँइजी ने कृपा करि कै उन दोऊन को समर्पन करवायो । पाछें वे दोऊ आज्ञा मांगि कै ब्रजयात्रा, श्रीगोवर्द्धननाथजी के दरसन किये । फेरि श्रीगुसाँइजी के दरसन किये । पाछें श्रीगुसाँइजी सों विनती करो. जो - महाराज ! अब कहा आज्ञा है ? तव श्रीगुसाँइजी ने कही. श्रीठाकुरजी की सेवा करो । पाछें श्रीगुसाँइजी उन को वस्त्र-सेवा पधराय दीनी । पाछें उन ब्राह्मन वैष्णव ने श्रीगुसाँइजी सों विनती कीनी, जो - महाराज ! मैं कछू सेवा की रीति भांति जानत नाही । तव श्रीगुसाँइजी ने कही, जो - तोकों वह वैष्णव

सब सिखाय देइगो । पाछें श्रीगुसांईजी मां विदा होठ के वे दोऊ अपने घर आए । सो वा वनिया-वैष्णव तें श्रीकृष्णस्मरण करि के अति प्रसन्न भए । ता पाछे वा वनिया वैष्णवने वाकों मेवा की रीति सब सिखाय दीनी । ता पाछे वह स्त्री-पुरुष ब्राह्मण वैष्णव श्रीठाकुरजी की तथा वैष्णव की मेवा आछी भांति करन लाग्यो । जो कोई वैष्णव आवें तिन को आदर सन्मान करि के महाप्रसाद लिवावें । रात्रि को भगवद्वार्ता करते । सो वा वनिया वैष्णव के संग तें वे दोऊ ब्राह्मण स्त्री-पुरुष भले वैष्णव भए ।

भावप्रकाश—या वार्ता को अभिप्राय यह है, जो - घर आए वैष्णव को समाधान जा भांति वनि आवे ता भांति अवश्य करना । और वैष्णव को स्वरूप जताए, जो - वैष्णव सर्वोपरि है । ताते निगंक रहत हैं । देवी-देवता सब उन नें दरपत है ।

सो वे वनिया वैष्णव तथा ब्राह्मण वैष्णव श्रीगुसांईजी के ऐसे कृपापात्र भगवदीय हतें । ताते इन की वार्ता को पार नहीं । सो कहां ताई कहिए । वार्ता ॥१५५॥



अथ श्रीगुसांईजी के सेवक एक वीनकार, श्रीनाथजीद्वारा में रहतो, तिनकी वार्ता को भाव कहत हैं —

भावप्रकाश—ये सात्विक भक्त हैं । लीला में उनको नाम 'वीणा' है । ये सुंदर गावति हैं । इनको स्वर वीन जैसा है । ताते श्रीठाकुरजी को ये अत्यंत प्रिय हैं । ये 'सुगंधिनी' तें प्रगटी हैं । ताते उनके भावरूप हैं ।

ये गोपालपुर में एक सनाढ्य ब्राह्मण के जन्म्यो । सो बाल्य में ये श्रीगुसांईजी को सेवक भयो, नाम पायो । पाछें ये वरम दस को भयो तब इनके माता पिता मरे । तब ये अपने नाना के यहां मथुरा जाई रह्यो । सो वह वीनकार हुतो । सो वीन बोलोत आछी बजावतो । सो वानें इनको वीन सीखायो । सो कुछ दिन में यह वीन बोलोत सुंदर बजावन लाग्यो । पाछें यह वरस बीस को भयो, तब याको व्याह भयो । तब वह वरु को ले अपने घर गोपालपुर में आय

रहो । पाछे लरिका-लरिकी भए । तव इन को खान-पान को संकोच भयो । तव काहू ने श्रीगुसाईंजी सों कह्यो, जो - महाराज ! अमूको वीन बोहोत आछी बजावत है । और वह आप को सेवक हूँ है । परि वह गृहस्थी है । वाकों खान-पान को संकोच बोहोत है । तव श्रीगुसाईंजी वाकों बुलाय कहे, जो - तू श्रीनाथजी के आगें वीन बजायो करि, और तेरो नेग लियो करि । तव या वीनकार ने बिनती करी, जो - महाराज ! मोहू को यही इच्छा ही ।

वार्ता प्रसंग—१

सो वह वीनकार श्रीनाथजी के सन्निधान वीन बजावतो । सो सबेरे संखनाद तें पहिले चारि घरी तें बजावतो । और सेन पाछे घरी चारि ताई बजावतो । सो ऐसी सुंदर वीन बजावतो सो उन पै श्रीनाथजी रोज प्रसन्न भए । और श्रीगुसाईंजी हूँ प्रसन्न रहते । सो वह वीनकार अपने घर में गृहस्थ हतो । सो उनके घर व्याह-काज के दिन आए । सो उनको कछू रोजगार तो हतो नहीं । कछू महीना न हतो । श्रीनाथजी के यहां तें नेग महाप्रसाद मिलतो । सो पहिले प्रसाद कोऊ न्योछावरि सों न देते । जो कछू नेग दे तामें चचे सौ वैष्णवन को ल्वावते । सो उन वीनकार ने मन में विचारी, जो - अब कछू गुजराति के परदेस जाई कै द्रव्य ले आवे । तो व्याह-काज होई । ऐसैं अपने मन में परदेस जाइवे को विचार कियो । तव श्रीनाथजी ने विचार कियो, जो - ये तो गुजरात जायगो । तो वीन कौन बजावेगो ? और गृहस्थी को तो द्रव्य विना चले नहीं । सो सेन पाछे जब सब अपने अपने घर गए तव श्रीनाथजी ने एक सोने की कटोरी हती सो ले कै वीन में धरि कै आप तो पोठें । पाछे जब प्रातःकाल भयो । तव वीनकार आइ कै वीन बजाइवे लग्यो । सो ये देखे तो, भीतर एक सोने की कटोरी

परी है । तब वीनकार ने विचारी, जो ये तो श्रीनाथजी की कटोरी है । ता पाछें जब श्रीगुसाईंजी ऊपर पधारं । मां मंगल-नाद करवाय के आप भीतर पधारं । मां देखे तो मैया के पाप सोने की कटोरी नहीं । तब श्रीगुसाईंजी ने मन में कही, जो - जहां होइगी तहां ते आइ जाइगी । पाछें आप मंगल भोग धरि के तिवारी में विराजे । तब वीनकार ने वह कटोरी ले के श्रीगुसाईंजी के आंग धरी । तब श्रीगुसाईंजी ने पूछी, जो - ये तेरे पास कैसे आई ? तब इन कही, जो - महाराज ! वीना में धरी हती । तब श्रीगुसाईंजी आप तो अंतरजामी हैं । मां जानि गए, जो - श्रीनाथजी इन पे रीझि के दीनी है । तब श्रीगुसाईंजी ने वीनकार तें कही, जो - कटोरी श्रीनाथजी ने तोकों दीनी है सो तू राखि ले । तब वीनकार ने कही, जो - महाराज ! मैं श्रीनाथजी की कटोरी कैसें राखां ? ये तो श्रीनाथजी के पास रहेगी । तब श्रीगुसाईंजी ने कही, जो - हमारी आज्ञा है तू राखि । तब वीनकार ने कही, जो - महाराज ! आप की आज्ञा है तो ये मैंनें लीनी, और मैं तो आप को सेवक हों । तातें मैंनें भेट करी । ऐसे कहि के आगे धरि के दंडवत् करी । तब श्रीगुसाईंजी ने खासा करवाय के भीतर धरी । पाछें श्रीगुसाईंजी ने वीनकार के मन की जानी । सो आपने वीनकार तें पूछी, जो - तेनें कहुँ जाइवे की मन कियो है ? तब वीनकार ने कही, जो - महाराज ! गृहस्थ हैं सो व्याह काज के लिए द्रव्य चाहिए । तातें परदेस जाइवे की मन हतो । तब श्रीगुसाईंजी ने कही, जो - तू परदेस मति जाहि । तो पै श्रीनाथजी प्रसन्न हैं । तोकों द्रव्य चाहिए तो श्रीनाथजी

के भंडार में तें दिवावे । तव वीनकार ने कही, जो - महाराज ! मैं श्रीनाथजी कौ देव-द्रव्य कैसें लेउ ? तव श्रीगुसांईजीने कही, जो - हमारे यहां तें देइ ? तव इन कही, जो - आप कौ गुरु द्रव्य कैसें लेउ ? तव आप कहे, जो - - तोकों वैष्णव द्वारा करवाय देइंगे । परि परदेस मति जा । पाछें एक गुजरात कौ संग आयो । तामें एक वैष्णव द्रव्यपात्र हतो । सो उन तें श्रीगुसांईजी ने आज्ञा करी, जो - यह वीनकार है, सो श्रीनाथजी कौ द्रव्य लेत नहीं । श्रीनाथजी ने सोने की कटोरी दीनी सो याने लीनी नहीं । हमारो हू लेत नहीं । और श्रीनाथजी यापै रीझे हैं । और यह तो गृहस्थ है । व्याह में द्रव्य चहिए तातें ये तो परदेस जात है । और श्रीनाथजी कों सुहात नहीं । सो तुम इन कों व्याह में द्रव्य लगे सो देउ । पाछें वा सेठ ने वीनकार कों द्रव्य दियो । सो उन व्याह-काज में लगायो । पाछें जब व्याह-काज आवे तव श्रीगुसांईजी आप वैष्णवन में सां कराय देते । उन वीनकार कों परदेस नहीं जाइवे दियो । सो उन वीनकार पै श्रीगोवर्द्धननाथजी तथा श्रीगुसांईजी आप सदा प्रसन्न रहते ।

भावप्रकाश--या वार्ता में यह जताए, जो - श्रीनाथजी के निकट जो वस्तु रहत हैं सो सर्व स्वरूपात्मक हैं । ताते वैष्णव कों उन में लौकिक बुद्धि करनी नहीं । और वैष्णव कों देव-द्रव्य, गुरु-द्रव्य सर्वथा न लेनो, यह कहे ।

सो वह वीनकार श्रीगुसांईजी कौ ऐसो कृपापात्र भगवदीय हतो । तातें इनकी वार्ता कौ पार नहीं, सो कहां तांई कहिए ।

वार्ता ॥ १५६ ॥



अब श्रीगुसाईजी का संवत् प्रेमजी लडाणा, हालार की बार्ता, तिनकी बार्ता को भाव कहत हैं—

भावप्रकाश—ये राजस भक्त हैं। लीला में इन की भाव 'प्रेम-प्रकाशिका' हैं। ये 'सुंदरी' ते प्रगटी हैं, तातें उन के भावरूप हैं।

बार्ता प्रसंग- ६

सो एक सभे हालार की संग श्रीगोकुल कां आयो। तामें वह प्रेमजी हू आयो। सो श्रीगुसाईजी के दरसन किये। पाछें प्रेमजी ने श्रीगुसाईजी सां विनती कीनी, जो - महाराज ! कृपा करि कै सरनि लीजें। तब श्रीगुसाईजी ने कृपा करि कै नाम सुनायो। पाछें दूसरे दिन व्रत करवाय के ब्रह्मसंबंध करवायो। ता पाछें संग तो श्रीगोवर्द्धननाथजी के दरसन को चलयो। तब प्रेमजी हू श्रीगुसाईजी सां आज्ञा मांगि कै गयो। ता पाछें श्रीगोवर्द्धननाथजी के दरसन किये। फेरि संग श्रीगोकुल आयो। तब दस-पांच दिना रहि कै संग तो ब्रजयात्रा करिवे कां चलयो। तब प्रेमजी हू श्रीगुसाईजी की आज्ञा मांगि कै ता संग के साथ ब्रजयात्रा कां गयो। सो केतेक दिन में संपूरन ब्रजयात्रा करि कै श्रीगोकुल आयो। पाछें श्रीगुसाईजी के दरसन किये। तब श्रीगुसाईजी ने पूछी, जो - प्रेमजी ! ब्रजयात्रा करि आयो ? तब प्रेमजी ने कही, जो - महाराज ! आप की कृपा तें ब्रजयात्रा करी। पाछें प्रेमजी ने श्रीगुसाईजी सां विनती करी, जो - महाराज ! अब कहा आज्ञा है ? तब श्रीगुसाईजी प्रेमजी सां आज्ञा किये, जो - भगवत्सेवा करो। तब प्रेमजी ने विनती करी, जो - महाराज ! सेवा सूक्ष्म होइ तो करों। तब श्रीगुसाईजी वस्त्र-सेवा पधराय दीनी। और आज्ञा किये, जो - यही सूक्ष्म है और यही असाधारन है। जो सिंगार करो तो सिंगार करो। न वनें तो वस्त्र

धरावो । भोग धरो । ता पाछें प्रेमजी केतेक दिना श्रीगोकुल में रहि कै सातों स्वरूपन के दरसन किये । पाछें संग विदा भयो तब प्रेमजी हू श्रीगुसांईजी सों विदा होइ कै अपने घर हलार में आयो । सो भली भांति सों सेवा करन लाग्यो । मंगला, सिंगार राजभोग करि कै अनोसर करि पाछें जो कोई वैष्णव आवे ताकों महाप्रसाद की पातरि धरतो । ता पाछें आप महनत - मजूरी करिवे जातो । सो उत्थापन के समै आय जातो । इतने में खरच लायक मिलि जातो । फेरि न्हाय कै उत्थापन-भोग, सेन करि कै पाछें भगवद्दार्ता में जातो । या प्रकार भली भांति सेवा करतो ।

सो एक दिना प्रेमजी के मन में ऐसी आई, जो - और वैष्णव के इहां तो श्रीठाकुरजी वोलत हैं । और मैंने तो श्रीगुसांईजी सों कही, जो - सूक्ष्म साधारन सेवा पधरावो । परंतु श्रीगुसांईजी ने कही, जो - यही सूक्ष्म साधारन है और यही असाधारन है । सो ये तो कछु वोलत नाहीं । पाछें उत्थापन के समै न्हाय कै उत्थापन किये । ता समय देखें तो समस्त ग्वाल-मंडली के दरसन भए । वस्त्र के तार-तार स्वरूप देखें । सगरे गादी पै स्वरूपन के दरसन भए । तब मन में विचारी, जो - मेरे मन में जो मनोरथ हतो सो श्रीगुसांईजी पूरन किये । देखो, यही असाधारन हैं । और यही साधारन है । परि इतने स्वरूपन कौ सेवा-सिंगार मोतें कैसे वनेगो ? पाछें भोग धरे । ता पाछें भोग सरायवे गयो । सो देखें तो प्रथम हतो तेसई वस्त्र-सेवा हैं । तब प्रेमजी मन में कहे, जो - श्रीगुसांईजी तो परम दयाल हैं । जैसे भक्तन के मन कौ मनोरथ होइ सो पूरन करे हैं । पाछें प्रेम-भाव सहित प्रेमजी भली भांति सों सेवा करतो ।

भगवद् मंडली में जाते। सो श्रीगुरुजी मानुभावता जनावन लागे।

भावप्रकाश—यामे यह जताए, जो-वैष्णव को श्रीगुरुजी के वचन में विश्वास राखनो। और सेवा भाव-प्रीति संयुक्त करनी। तो प्रभु अनुग्रह करि सानुभावता जनावे।

सो वे प्रेमजी श्रीगुरुसाईजी को गंगा परम कृपापात्र भगवदीय हतो। ताते इन की वार्ता पार नाही, सो कहां ताई कहिए।  
वार्ता ॥१५७॥



अब श्रीगुरुसाईजी के संघक वृन्दावनदास, छवीलदास, आगरे के, तिनकी वार्ता की भाव कहत हैं —

भावप्रकाश—ये नाम भक्त हैं। लीला में वृन्दावनदास 'आगधिका' है, और छवीलदास 'प्रबोधिका' है। ये दोऊ 'मुंडरी' के प्रगटी हैं, ताते उनके भावरूप हैं।

वार्ता प्रसंग—१

सो उन वृन्दावनदास छवीलदास को आपुम में बडो सनेह हतो। सो ये दोऊ मेवक न हते, परि संतदास के घर नित्य मंडली में रात्रि को भगवद् वार्ता सुनिवे को जाते। सो एक दिन वार्ता में ऐसा प्रसंग आया, जो - जिन को नाम (दीक्षा) न होइ तिनके हाथ को जल नहीं लेनो। सो सुनि के वृन्दावनदास और छवीलदास ने विचारी, जो - अपने हाथ को जल कोई वैष्णव न लेइगो। ताते अब तो श्रीगुरुसाईजी के पास नाम पावनो। तब ही जल लेना। ऐसैं वृन्दावनदास ने कही। तब छवीलदास ने कही, जो - ऐसैं कैसे वने ? मोको तो जल लिये विना न चलेगो और श्रीगोकुल तो यहां तें मँजलि एक है। सो जल विना क्यों चले ? तब वृन्दावनदास ने कही, जो -



तुम लीजो । परि मैं तो नाम पाउंगो तव ही जल लेउंगो । ता पाछें सवेरो भयो तव दोऊ जन श्रीगोकुल कों चले । सो सेन पाछें श्रीगोकुल आये । सो श्रीगुसाईजी अपनी बेठक में विराजे हते । सो ये दोऊ जन आय कै श्रीगुसाईजी कों दंड-वत् किये । तव श्रीगुसाईजी ने पूछी, जो - वृंदावनदास ! कव आये ? तव कही, जो - राज के दरसन अव ही आय कै किये हैं । पाछें दोऊन विनती करी, जो - राज ! आपकी सरनि आए हैं । सो कृपा करि कै सरनि लेउ । नाम सुनावो । तव आपने कही, जो - सवारे नाम सुनावेंगे । तव छवीलदास ने श्रीगुसाईजी सों विनती कीनी, जो - महाराज ! वृंदावनदास ने तो जल हू नहीं लीनो है । उह तो कहत है, जो - जव नाम पाउंगो तव जल लेउंगो । इनकौ गलो सूक्यो है । वोल्यो हू नहीं जात है । और मैंने तो जल लीनो है । तव इनकी ताप-आतुरता देखि कै श्रीगुसाईजी ने कही, जो - आगे आउ । ता पाछें दोऊन कों नाम सुनायो । पाछें खवास तें आज्ञा करी, जो - इनकों प्रसादी जल लिवाउ । तव खवास नें प्रसादी जल लिवायो । सो गुलाव जल पधराय कै श्रीनवनीतप्रियजी कों अरोगावते, सो प्रसादी जल लेत ही इन कों बड़ा सुख भयो । सीतलता भई । पाछें श्रीयमुना जल लिवायो । तव दोऊन कों तृप्ति भई । तव श्रीगुसाईजी आज्ञा किये, जो - महाप्रसाद लेउ । तव वृंदावनदास नें कही, जो - महाराज ! जल तें मन तृप्त होइ गयो है । अव तो आप आरोगो पाछें धीरे धीरे लेइंगे । पाछें आप पोथी खाली, कथा कही । सो दोऊ जन सुनि कै अत्यंत प्रसन्न भए । पाछें आप भोजन करिवे कों पधारे ।

सो भोजन करि आप पधारे पाछे दोऊन को जूठनि की पातरि धरी । सो इनने महाप्रसाद लियो । पाछे जगह बतार्ई तहां दोऊ सोय रहें । सो सबेरे उठि के श्रीगुसांईजी के दरसन किये । तब वृंदावनदास छबीलदास ने श्रीगुसांईजी में विनती कीनी, जो - महाराज ! कृपा करि के निवेदन कराइए । तब श्रीगुसांईजीने कही, जो व्रत करो । तब दोऊन विनती कीनी, जो - महाराज ! जो - आज्ञा । परि कृपानाथ ! बीच में एक दिन जायगो । तातें आज ही कृपा करो तो आछो । तब इन को विरह-ताप देखि के आप तो कृपाल है सो आज्ञा दिये, जो - तुम मंगला के दरसन करि के यहां बैठे रहियो । और खवास तें आज्ञा करी, जो - सिंगार के दरसन समय दोऊन को न्हाय के अपरस में, पाछे खवरि करियो । पाछे मंगला के दरसन भए । ता पाछे श्रीगुसांईजी आप तो श्रीनवनीतप्रियजी के सिंगार करन लागे । पाछे खवास ने इन को अपरस में न्हाय के बैठाए । तब सिंगार करि के दोऊन को श्रीगुसांईजी आप कृपा करि निवेदन करवायो । पाछे राजभोग धरि आप बाहिर पधारे । समय भये भांग सराय राजभोग आर्ति किये । ता पाछे अनोसर करि के श्रीगुसांईजी आप बैठक में पधारे । तब तहां वृंदावनदास छबीलदास ने भेट करी । पाछे आप भोजन को पधारे । सो भोजन करि के वृंदावनदास छबीलदास को जूठनि की पातरि धरी । सो दोऊ जननेन ने महाप्रसाद लियो । ता पाछे श्रीगुसांईजी सो विनती करी, जो - महाराज ! अब कहा आज्ञा है ? तब श्रीगुसांईजी ने आज्ञा करी, जो - सेवा करो । तब वृंदावनदास छबीलदास ने

विनती कीनी, जो - राज ! कृपा करि कै श्रीठाकुरजी पधराय देउ । तव श्रीगुसाईजी ने कृपा करि कै सेवा पधराय दीनी । और आज्ञा कीनी, जो - हषिकेस कौ सत्संग करियो । तव इन कही, जो - राज ! हषिकेस हमारे काका लगत हैं । तव श्रीगुसाईजी ने कही, जो तव तो तुम्हारो घर एक है सो तुमकों सेवा की विधि सब बताय देइंगे । पाछें वृंदावनदास छवीलदास दोऊ श्रीगुसाईजी सों विदा होइ कै आगरा आए । सो हषिकेस तें सब समाचार कहे, जो - श्रीगुसाईजी आज्ञा किये हैं तातें सेवा की रीति भांति सब सिखावो । तव हषिकेस ने सब विधि पूर्वक खासा सेवकी सब सेवा कौ प्रकार बताय दिए । पाछें दोऊ जनें भली भांति सों सेवा करन लागे । सो ओसरे सों सेवा करते । एक दिन सिंगार वृंदावनदास करे, एक दिन छवीलदास करे । तव वृंदावनदास सामग्री करे । दूसरे दिन सिंगार वे करे तव सामग्री वे करें । ऐसैं एक तें एक चढती सामग्री-सिंगार होडा होडी सों हुलास तें करते । पहर दिन चढ़े राजभोग आर्ति करि कै गाँई कौ महाप्रसाद दे कै वैष्णवन कों भाव सहित महाप्रसाद लिवावते । वैष्णवन पै वड़ी प्रीति राखते । पाछें महाप्रसाद ले उद्यम-व्योपार करिवे जाते. सो उत्थापन के समै ताँई जो प्राप्त होई सो ले कै घर आवते । पाछें न्हाय कै सेन पर्यंत सेवा सों पहाँचि पाछें भगवद्वार्ता मंडली में जाते । सो उहां वार्ता सुनि कै बडे प्रसन्न होते । गदगद कंठ रोमांच होइ आवते । पाछें दोऊ जनें घर आई कै घोस्यते । ऐसैं वड़ो प्रेम उत्पन्न दोउन कों भयो । सो वृंदावनदास की अनेक वार्ता है ।

पाछें एक समय श्रीगुसांईजी आगरे पधारे । सो रूपचंद-  
नंदा के घर उतरे । तब सब वेंणवन ने श्रीगुसांईजी में कही,  
जो - महाराज ! वृंदावनदाम छवीलदाम आप के सेवक भाए  
हैं । सो ये दोऊ जने श्रीठाकुरजी की सेवा-मामग्री में बड़े चतुर  
हैं । और भगवद्वार्ता में बड़े प्रेम विस्वास हैं । सो मुनि के  
श्रीगुसांईजी बोहांत प्रसन्न भाए । सो उन पे श्रीगुसांईजी मदा  
प्रसन्न रहते ।

भावप्रकाश—या वार्ता में यह जताए, जो - वेंणवन को टेक चलिए । और  
भगवत्सेवा को स्वल्प बताए, जो - नित्य-नंतन मामग्री सिंगार उन्गाहपूर्वक करने ।

सो वे वृंदावनदाम छवीलदाम श्रीगुसांईजी के ऐसे परम  
कृपापात्र भगवदीय हते । ताते इन की वार्ता कहां तांई कहिए ।

वार्ता ॥१५८॥



अब श्रीगुसांईजी के सेवक स्त्री-पुरुष, ब्राह्मण, गुजरात के, सो सो रूप के  
नीचे द्रव्य लेइये गई, तिनकी वार्ता को भाष कहत हैं —

भावप्रकाश—ये दोऊ सात्विक भक्त हैं । लीला में इन को नाम 'कलसिका'  
'कर्णिका' हैं । सो स्त्री 'कलसिका' को प्रागट्य है और पुरुष 'कर्णिका' को प्रागट्य  
जानतो । ये दोऊ 'सुंदरी' तें प्रगटी हैं । ताते उन के भावरूप हैं ।

ये दोऊ गुजरात में ब्राह्मण के जन्मे । सो दोऊन को ब्याह भयो । पाछें  
दोऊन के माता-पिता मरे । तब दोऊ बरस पचोम-तीस के हे । सो दोऊन आपुस  
में विचार किये, जो - होंई तो कासी विस्वेस्वर के दरसन करि आवे । पाछें दोऊ  
कासी विस्वेस्वर के दरसन को गुजरात तें चले । सो केतेक दिन में कासी आए ।  
सो ता समै श्रीगुसांईजी आप कासी विराजत हुते । सो उहां विस्वेस्वरजी के मंदिर  
आगे मायावादिन तें सास्त्र-चर्चा कर रहे हते । तहां इन स्त्री-पुरुष को श्रीगुसांईजी  
आप के दरसन भए । सो महा अलौकिक दरसन भए । तब दोऊन के मन में आई,  
जो, - इन के सेवक हूजिए तो आछो । पाछें श्रीगुसांईजी मायावादिन को निरुत्तर  
करि सेठ पुरुषोत्तमदास के उहां पधारे । तब ये दोऊ स्त्री-पुरुष ह श्रीगुसांईजी के

मंग आए । पाछे पुरुष विनती कियो, जो - महाराज ! कृपा करि हम को सेवक कीजिए । हम आप के सरनि आए हैं । तब श्रीगुसाईजी हंसि के आज्ञा किये, जो - ब्राह्मण ! तुम तो विस्वेस्वरजी के दरसन को आये हो ? सो दरसन क्यों नहीं किये ? तब पुरुष विनती कियो, जो - महाराज ! आप के दरसन भए पाछे अब कौन के दरसन करें ? तब कृपा करि बेगि सरनि लीजिए । तब श्रीगुसाईजी इन की आतुरता देखि दोऊन को नाम दे के सेवक किये । पाछे दूसरे दिन निवेदन कराए । तब पुरुष ने विनती कीनी, जो - महाराज ! अब कहा कर्तव्य है ? तब श्रीगुसाईजी आप दोऊन को आज्ञा किये, जो - तुम साहात्म्य प्रीति संयुक्त भगवत्सेवा करो । तब उन विनती कीनी, जो - महाराज ! सेवा कौ स्वरूप कृपा करि समझाइए तो आछौ । तब श्रीगुसाईजी वाको 'सेवाफल' ग्रन्थ पढाए । ता पाछे वाको सेवा कौ स्वरूप समझाए । तब पुरुष विनती कियो, जो - महाराज ! कृपा करि भगवत्स्वरूप पधराय दीजिए, तो सेवा करें । तब श्रीगुसाईजी वाको एक लालजी कौ स्वरूप पधराय दिये । और आज्ञा किये, जो - निष्कंचन भाव सों परम प्रीति संयुक्त इन की सेवा करियो । पाछे वे दोऊ स्त्री-पुरुष भगवत्स्वरूप पधराइ, श्रीगुसाईजी सों बिदा व्है अपने देस को चले । सो कुछक दिन में अपने घर आए ।

धार्ता प्रसंग—१

सो वे दोऊ निष्कंचनता सों सेवा करते । सो श्रीठाकुरजी की सेवा वोहोत प्रीति-भाव सों करते । सो पुरुष कौ श्रीठाकुरजी सानुभावता जनावन लागें । सो ऐसैं करत केतेक दिन भए । सो एक दिन श्रीगुसाईजी कौ सेवक एक सेठ, तिन के घर दरसन करिवे को स्त्री गई हती । सो उहां वैभव वोहोत देख्यो । सो देखि के घर आय के स्त्री न्हार्ई नहीं । ओर सोइ रही । तब वाहिर सों वाकौ पुरुष आयो । तब वाने अपनी स्त्रीसों कह्यो, जो - तू सेवा में न्हार्ई क्यों नहीं ? तब स्त्री बातें कह्यो, जो - आज तुमही न्हाउ । तब पुरुष न्हाय के सेवामों पहोंचि के स्त्री के पास आय के पूछ्यो, जो - तोकों भयो कहा ? तब स्त्रीने कही, जो - मैं तो सेवा तब करूं जब वैभव सों करों ।

तव पुरुष ने कही, जो - आलो ! वेभव सां करियो । पांछे दोऊ स्त्री-पुरुष सवेरे उठे । सो उठि के पुरुष ने स्त्री सां कही, जो - तू एक काम करि । तव स्त्रीने कही, जो - कहा ? तव पुरुष ने कही, जो - यहां तें कोस एक ऊपर एक रुख है । सो तहां जाय के ता रुख के नीचे खोदियो । सां द्रव्य निकस्यो । सो टोकरी भरि, ल्याय के वेभव सां सेवा करियो । तव स्त्री वा रुख नीचे गई । तव द्रव्य निकस्यो । सो टोकरी भरी । तव रुख में सां वानी भई । जो - हम कां तू कल्लू दे जा । तव द्रव्य ले जा । तव स्त्रीने कही, जो - तुम कां कहा चाहिण ? तव वाने कही, जो एक झारी का फल दे जा, तव यह द्रव्य की टोकरी ले जा । तव वाने कही, जो - येतो न देउंगी । तव वाने कही, जो - अधिक होंइ सो तू राखियो । घटती होंइ सो मैं राखंगी । अब तू अपने मन सां विचारि, जो - तू कितनी झारी भरे है ? तव वह स्त्री अपने घर आई । सो सब समाचार अपने पुरुष सां कहे । तव पुरुष ने कही, जो - निष्कंचनता सां झारी भरे, सेवा करे, ताके फल कां कहा कहनो । एक एक पेड़ का फल सो अश्वमेध यज्ञ तें हू ज्यादा है । अब तू विचारि, जो - झारी कां फल कितनो है और ये द्रव्य कितनो है ? पाछे वह स्त्री ने कवह द्रव्य की कामना कीनी नाहीं । और अपने मन में कहे, जो - मैं झारी ही भरियो करुंगी । सो वह स्त्री निष्कंचनता सां झारी भरे, और सेवा करे । तव श्रीठाकुरजी इन कां हू अनुभव जतावन लागे । सो वे स्त्री-पुरुष निष्कंचनता सां सदैव सेवा करते ।

भावप्रकाश—या वार्ता कां अभिप्राय यह है, जो - कोऊ निष्कंचन दीन न्है निष्काम भाव सां भगवत्सेवा करत है, तापे श्रीठाकुरजी आप प्रसन्न होत हैं । और झारी कां माहात्म्य जताए, जो - ताके बराबर कोऊ फल नाहीं ।

सो वे स्त्री-पुरुष श्रीगुसांईजी के ऐसैं भगवदीय कृपापात्र सेवक हते । तातैं इन की वार्ता कहां ताई कहिए ।

वार्ता ॥ १५९ ॥



अब श्रीगुसांईजी के सेवक एक भगवदीय, एक तादसी, गुजरात के, तिनकी वार्ता कौ भाव कहत हैं —

भावप्रकाश—ये दोऊ राजस भक्त हैं । लीला में 'कमलाक्षी' और 'हिरणाक्षी' इन के नाम हैं । सो भगवदीय तो 'कमलाक्षी' कौ प्रागट्य जाननो और 'हिरणाक्षी' तादसी हैं । ये 'मधुरा' तें प्रगटी हैं, तातैं उन के भावरूप हैं ।

वार्ता प्रसंग—६

सो श्रीगुसांईजी गुजरात पधारे तब ये दोऊ भगवदीय, तादसी सेवक भए हैं । सो श्रीगुसांईजी की कृपा तें दोऊन में भगवद्धर्म दृढ़ हतो । सो वे भगवदीय वैष्णव 'राजनगर' में रहते । और वे तादसी वैष्णव 'धोलका' में रहते । परि उन दोऊन कौ मिलाप न भयो हतो । परंतु भगवदीय के मन में हती, जो - उन तादसी वैष्णव सों मिलनो । सो एक समै इन भगवदीय वैष्णव की बेटी कौ विवाह आयो । तब इन भगवदीय वैष्णव ने 'कंकोत्री' वैष्णवन कों लिखि पठाई । सो उन तादसी वैष्णव कों हू लिखी । जो अपने बेटी कौ विवाह है । सो तुम कृपा करि कै पधारोगे ।

सो ए दोऊ स्त्री-पुरुष सेवा सों पोहोंचि कै राजभाग-आर्ति करि कै एक दाय वैष्णवन कों नित्य महाप्रसाद लिवावते । पाछें आप महाप्रसाद लेते । परि उत्थापन तें सेन पर्यंत सेवा करि कै पाछें श्रीठाकुरजी कों सेन करावते । पाछें और गाम के वैष्णव आवते । सो भगवद्वार्ता कीर्तन नित्य करते । उनके घर मंडली होती ।

पाँच ब्याह के दिन आय पहोंचि । तब मवारं बंगि उठि के मेवा सिंगार राजभोग सों पहोंचि के पाँचें लौकिक कार्य कियो । पाँचें सब वैष्णव कों बुलाए । सो उन तादसी वैष्णव के मन में ऐसी हती, जो - इन भगवदीय वैष्णव की परीक्षा लेनी । ताँतें जब कन्यादान कौ समय होइ तब चलेंगे । पंगें विचारि के उहाँ तें निकसे । सो या वैष्णव भगवदीय के गाम के बाहिर आय बेटे । और पाँच-सात वैष्णव मंग आए हत । ताँतें तें एक वैष्णव कों पठायो । और कही, जो - जा सँम कन्यादान कौ सँम होइ ता सँम उन कों ग्वरि करियो । सो वह वैष्णव उहाँ जाय बैठयो । पाँचें जब कन्यादान कौ सँम भयो तब उन कही, जो - वह तादसी वैष्णव आये हँ । तब यह मुनि के वह भगवदीय वैष्णव उठे । सो पाँच-सात वैष्णव मंग ले के उन तादसी के साम्हें जाँइ के श्रीकृष्ण-स्मरन करि के अति हरख सों मिलि के अपने घर पधराय ल्याये । पाँचें उन कों स्नान करवाय के सवन कों महाप्रसाद लिवायो । विछौना करि के सवन कों सुवाए । पाँचें आप विवाह कार्य में गए । तब ब्राह्मन ने कही, जो - लगन घरी तो निकसि गई । तब भगवदीय वैष्णव ने कही, जो - और लगन घरी देखो । तब ब्राह्मन ने और घरी देखी । सो घरी दोइ पाँचें मुहूर्त हतो । सो वा सँमै लगन कन्यादान करि के पाँचें जब पाँचिली रात्रि घरी छह रही तब वे दोऊ स्त्री-पुरुष सेवा में न्हाए । सो स्त्री ने तो सामग्री सिद्ध करी । उन भगवदीय वैष्णव ने श्रीठाकुरजी कों सिंगार करि के राजभोग समर्प्यो । समय भए भोग सराय राजभोग-आर्ति करि के इन तादसी वैष्णव कों श्रीठाकुरजी



के दरसन कराये । पाछें श्रीठाकुरजी को अनोसर करि के पाछें इन वैष्णवन को न्हाय के महाप्रसाद सब वैष्णवन को लिवायो । पाछें लौकिक कार्य करन लागे । तब उन तादसी ने मन में विचारी, जो - मैं इन भगवदीय की परीक्षा लीनी । सो लौकिक कार्य में तो यह भगवदीय कुसल है । परंतु अब अलौकिक में परीक्षा लेनी । पाछें जब उत्थापन का समय भयो तब दोऊ स्त्री-पुरुष न्हाय के सेन पर्यंत सेवा तें पहोंचि के फेरि इन वैष्णवन को ब्यारु करवाय के विछौना करन लागे । तब इन तादसी ने कही, जो - हम तो श्रीठाकुरजी की देहरी में सिरहानो धरि के सोवेंगे । तब उन भगवदीय ने उहांई विछौना करि दियो । पाछें उन वैष्णवन को सुवाय के पाछें आप लौकिक कार्य करन लागे । ता पाछें सवेरे वेगि न्हाय के वह स्त्री जन तो रसोई में गई । और यह वैष्णव आप न्हाय के अप-रस पहरि के आय के देखे तो यह तादसी वैष्णव सोवे हैं । तब इन मन में विचार कियो, जो - अब मैं इन तादसी को नींद में तें कैसे जगाऊं ? और ये जागे तब श्रीठाकुरजी के किवाड़ खुले । देहरी ऊपर माथो है । सो मंदिर में कैसे जाँय ? ऐसे विचार करि के पाछें तिलक-मुद्रा करन लागे । पाछें जप करन लागे । और इन तादसी के मन में इन की परीक्षा लेनी, तातें जागें तो हैं परि बोले नहीं । ऐसे करत रसोई होइ चुकी और जप हू करि चुके । पाछें ठाढ़े रहे । परंतु उन वैष्णव को जगावे नहीं । ऐसे विचारं. जो-यह वैष्णव नींद में सोवत है । सो मैं इनको कैसे जगाऊं ? ऐसे विचार के ठाढ़े होय रहे । सो ठाढ़े ठाढ़े पहर एक भयो । तब इन तादसी ने मन में विचारी.

भगवदीय वैष्णव ने मन में विचारी, जो - ये तो पूरे तादसी हैं। लौकिक में तो इनकी परीक्षा लीनी। परंतु अब अलौकिक में देखें, ये कैसे हैं? पाछें उत्थापन की समय भयो। तब यह तादसी वैष्णव स्नान करि के उत्थापन-भोग, मंग्या-भोग सेन-भोग धरि के मन-आर्ति करि के श्रीठाकुरजी को पांडाय के पाछे भगवद्वाता करते। सो भगवदीय वैष्णव भगवद्वाता करन लागे। सो करत करत सुबेरो होइ गयो। घरी दोइ चारि दिन चढयो। ऐसं नित्य करें। तब इन भगवदीय ने मन में विचारी, जो - ये तो संपूरन तादसी हैं। तातें अब श्रीठाकुरजी को अवेर होइ, जो - नित्य या समय राजभोग आर्ति हांइ। सो अब उठो स्नान करो। तब तादसी उठि के स्नान करि के श्रीठाकुरजी को जगाय के मंगल-भोग धरि के रमोई की सामग्री वालभोग की सब सिद्ध करी। पाछें सिंगार करि के राजभोग समर्पि के आर्ति करि के श्रीठाकुरजी को अनोसर करि के पाछें उन वैष्णवन को स्नान करवाय के महाप्रसाद लिवायो। पाछें वह भगवदीय ने चलिबे की तैयारी करी। तब उन तादसी ने कही, जो - मरे घर दोइ चारि दिना कृपा करि के रहो। तब उन कही, जो - अब तो चले तो आछी है। पाछें उन सो विदा भए। अति प्रसन्नता सो अपने घर आए। सो उन वैष्णवन को श्रीगुसाईजी पै, श्रीठाकुरजी पै, वैष्णवन पै, ऐसो भाव हतो।

भावप्रकाश—या वार्ता में बड़ो संदेह है, जो - तादसी, भगवदीय वैष्णवन की परीक्षा सर्वथा नहीं करनी, जो - करें तो अपराध होई। ऐसो श्रीआचार्यजी आप कुंभनदास प्रभृति वैष्णवन को आज्ञा किये हैं। और इन तादसी - भगवदीय दोऊन आपुस में परीक्षा किये? ताको कारन कहा? तहां कहत हैं, जो - इन

दोऊ परीक्षा के सिप तादसी भगवदीयन के धर्म प्रगट किये हैं । जो - तादसी, भगवदीयन के धर्म ऐसे होत हैं । तातें आगें के जीवन कों अहकार न होंई । और जो - कोऊ साधारन वैष्णव होंइ (कै) तादसी भगवदीय की परीक्षा करे तो वाकों बाधक होंई । परि ये तो दोऊ असाधारन वैष्णव हैं, तातें आगें के जीवन कों सिक्षार्थ या प्रकार चरित्र किये । यह भाव जाननो ।

सो वे दोऊ तादसी और भगवदीय श्रीगुसांइजी के ऐसे कृपापात्र भगवदीय हते । तातें इनकी वार्ता कौ पार नाही, सो कहां ताई कहिए ? वार्ता ॥ १६० ॥



अब श्रीगुसांइजी कौ सेवक एक वैष्णव, जाकों श्रीगिरिराज ऊपर चढते देखि श्रीगुसांइजीने अपनो मस्तक हलायो, तिनकी वार्ता कौ भाव कहत हैं —

भावप्रकाश—ये तामस भक्त हैं । लीला में इन कौ नाम 'मुक्ता' है । ये 'मथुरा' तें प्रगटी हैं, तातें उनके भावरूप हैं ।

ये गुजरात में एक बनिया के जन्म्यो । सो यह बरस दस कौ भयो तब इनके माता-पिता मरे । पाछे गाम में वैरागी आए । सो याकों वैरागीन कौ संग भयो । सो कछुक दिन में वे वैरागी वा गाम तें कासी कों चले । सो येह इन के संग चलयो । सो कासी आयो । सो वह वैरागीन के संग कासी में रह्यो । ता पाछे वह बरस सत्ताईस कौ भयो । तब याके मन में आई, जो - हों कबहू मथुरा-वृन्दावन देख्यो नाही । तातें ब्रज-यात्रा करों तो भलो है । सो ये कासी तें चलयो सो मथुरा आयो । तहां विश्रांत स्नान कियो । पाछे श्रीगोकुल कों चलयो । सो श्रीठकुरानी घाट पै आयो । सो ता सँम श्रीगुसांइजी आप ठकुरानी घाट पै संध्यावंदन करत हे । सो इन दरसन पायो । सो दरसन करत ही याके मन में आई, जो - इनके सेवक होंइए तो आछौ है । पाछे ये चिनती कियो, जो - महाराज ! कृपा करि मोकों सगनि लीजिए । तब श्रीगुसांइजी वासों कहे, जो-श्री-यमुनाजी में न्हाय लेऊ । तब यह श्रीयमुनाजी में स्नान कियो । पाछे श्रीगुसांइजी वाकों कृपा करि कै नाम-निवेदन कराए । ता पाछे यह वैष्णव कछुक दिन श्रीगोकुल में रहि कै श्रीगुसांइजी के दरसन किये । ता पाछे यह श्रीगुसांइजी सों विदा वहै श्रीगोवर्द्धन आयो । सो तहां श्रीगोवर्द्धननाथजी के दरसन किये । पाछे गोवर्द्धन पर्वत की सोभा देखे । सो वाकों मन उहां लगि गयो । सो उहांई रागो । और कहं गयो नाही ।

शार्ता पत्रग-१

सो एक सँम श्रीगुसाँडजी आप श्रीजीद्वार पथारं हं । तहां सव वैष्णव साथ हुते । सो तहां देखे तो श्रीगुसाँडजी आप या वैष्णव कां पर्वत के ऊपर चढत देख्यो । सो उतार पर दोऊ गेल पर गोवर देख्यो । तव उह वैष्णव राह छोड़ि के गोवर्द्धन कां पग लगाय उपर चढ्यो । तव श्रीगुसाँडजी देखि के सिर हलायो । तव और वैष्णव पास बैठे हुते तिन पृच्छी, जा - महाराजाधिराज ' यह सिर हलायो सो कारन कहा है ? सो कह्यो चहिए । तव श्रीगुसाँडजी आप श्रीमुख सां कहे, जो - श्रीगोवर्द्धन मनिमय जटिन साक्षात् भगवद्स्वरूप हैं । ता पर मूढ-मूर्ख हैं सो या भांति सां श्रीगिरिराज के ऊपर चढत हैं । और श्रीगोवर्द्धन पर्वत के ऊपर दोड़त हैं । सो तहां ' ब्रह्मवैवर्त पुरान ' कां एक इतिहास है । सो श्रीगुसाँडजी आप कहे —

जा - एक बार श्रीकृष्णचंद्रजी और नारदजी आप बैठे हते । तव श्रीकृष्णचंद्रजी ने नारद सां कह्यो, हम पानी-प्यामे हैं । तव श्रीनारदजी पानी कां चले । सो आगे जाँड़ के देखें तो एक बड़ा सरोवर है । ताके पास दोई लरिका बैठे हैं । सो तपस्या करत हैं । और पास बड़ा पर्वत हाड़न कां दर परयो है । जा - वह देखि के नारदजी फिर आए । तव श्रीठाकुरजी पूछे, जो - जल ल्याए नाहीं ? तव इन सव वृत्तांत कह्यो । सो मुनि के आप मुसिकाए । तव श्रीनारदजी ने पूछ्यो, जा - महाराजाधिराज ! याकां कारन कौन भांति सां है ? सो आप कहिये । तव श्रीठाकुरजी आप श्रीमुख सां कह्यो, जो - ये दोऊ योगेस्वर हैं, सो गोवर्द्धन पर्वत के दरसन के लिये तपस्या करत हैं । सो

ऐसे जन्म भए हैं। सो इन के अस्थिन का पर्वत भयो है। सो जब कृपा होइगी तब दरसन होइंगे। अज हू ढील है। सो श्री-गोवर्द्धन लीलात्मक भगवत्स्वरूप आनंदमय हैं। सो ऐसे हैं। सो गोवर्द्धन पर्वत आपुन कां श्रीआचार्यजी महाप्रभुन आपकी का'नी करि के दरसन देत हैं। परि जीव कां ज्ञान नाहीं है। ताते हमने माथा हलायो। जो - श्रीगोवर्द्धन हरिदासवर्य हैं। सो ऐसे कहि के या वैष्णव के मिष सब वैष्णवन कां शिक्षा दीनी।

भावप्रकाश—या वार्ता में यह जताए, जो - श्रीगोवर्द्धन पर्वत महा अलौकिक हैं। काहेते, जो - उन में सकल लीला विद्यमान हैं। ताते ये आनंदमय भगवत्स्वरूप ही हैं। सो वैष्णव कां उनके ऊपर पाँव धरनो नाहीं। भगवत्सेवा, भगवत्दर्शनार्थ ऊपर चढनो परे तो हू दंडवत करि पाछे गेल-गेल जानों। और ठौर पाँव नहीं धरनो। नांतरु लीलान कां अतिक्रम होई। तो जीव लीला तें बाहिर परे।

सो वह वैष्णव श्रीगुसांईजी कां ऐसो कृपापात्र भगवदीय हतो। ताते इन की वार्ता कहां ताई कहिए। वार्ता ॥१६१॥



अब श्रीगुसांईजी के सेवक एक विरक्त ब्राह्मण वैष्णव, गुजरात का, तिनकी वार्ता कां भाव कहत हैं—

भावप्रकाश—ये सात्विक भक्त हैं। लीला मे इनकी नाम 'भाव-निष्णा' हैं। ये श्रीचंद्रावलीजी की अंतरंग सखी हैं। 'मथुरा' तें प्रगटी हैं। ताते उनके भावरूप हैं।

ये गुजरात में एक ब्राह्मण के जन्म्यो। सो बालपने सो विरक्त दसा में रहे। सो बरस बीस कां भयो तब इनके माता-पिता मरे। सो याकां व्याह भयो नाहीं। तब ये तीरथ कां चलयो। सो पहिले मथुराजी में आयो। तहां इनकां एक वैष्णव सो मिलाप भयो। सो वह वैष्णव श्रीगुसांईजी कां सेवक हुतो, विरक्त हुतो। सो या ब्राह्मणने वासों पूछयो, भाई ! कोई ऐसो महापुरुष है, जो - या जन्म-मग्न की व्याधि तें छुडावे ? तब वा वैष्णवने कयो, जो - हां हां ! श्रीविठ्ठलनाथजी गुसांई ऐमें ही हैं। उनके सरनि जाँइवे तें सगरो अज्ञान दूरि व्हें महासुख की प्राप्ति होत है। मैं हू इन कां सेवक हूँ। जो - तुम्हारी ईच्छा होई तो श्रीगोकुल

जाई उनके सेवरु होऊ। तब वह ब्राह्मन वा वैष्णव में रहें, जो - तुम गंग चलो तो आओ। तब वह वैष्णव वा ब्राह्मन के मग श्रीगोचरु आयें। पाछे श्रीगुसाईजी के पास जाई विनती कीनी, जो - महाराज ! या ब्राह्मन की सेवरु कीजिए। तब श्रीगुसाईजी कृपा करि वार्ता नाम-निवेदन कराय सेवरु करिये। पाछे श्रीगुसाईजी वार्ता ओर कृपा-दृष्टि भरि चिते।

वार्ता प्रसंग--१

सो वा विरक्त ब्राह्मन वैष्णव को भगवद्गीता की ज्ञान भयो। सो गोप्य वार्ता जानवे लाग्यो। तब वा विरक्त ब्राह्मन वैष्णव ने श्रीगुसाईजी में विनती कीनी, जो - महाराज ! अब मोको ऐसो उपदेश देउ सो दुःखरूपी मंगार तें छुट्यो, और भगवद्गीता में प्राप्ति होई। तब श्रीगुसाईजी ने श्रीमुख तें आज्ञा दीनी, जो ये बात तो बोहात कठिन है। जो - श्रीठाकुरजी कृपा करें तब यह दसा की प्राप्ति होई। तब वा विरक्त वैष्णव ने सब वैष्णव के उद्धार निमित्त पृथी, जो - महाराज ! आप की कृपातें कितनीक बात है ? राज के अध्यात्म के वचन सुनि के जीव कृतार्थ होई जाई है। सो ऐसं वचन वा विरक्त ब्राह्मन वैष्णव के सुनि के श्रीगुसाईजी ने कह्यो, जो - पहिले तो वैष्णव ऐसं हते, जो - अवकास होई तब श्रीयमुनाजी के तीर के विषे बैठि के कीर्तन करते। और अब के वैष्णव तो ऐसं है, जो - कीर्तन-वार्ता सुनत नाही और लौकिक-वार्ता बोहात सुनत हैं। सो ताके ऊपर कह्यो, सो श्लोक--

ननु ते देव निहताः ये चाच्युत-कथासुधाम् ।

हित्वा श्रयन्त्य सदगाथांपुरीष मिव विड्भुजः ।

और कह्यो, जो - 'सर्वधर्मान्परित्यज्य' सो कैसे होई ? सो ऐसं कहे, जो - हों अकिंचन हों। और मन में विचार करे,

जो - हों तो श्रीठाकुरजी के चरनारविंद को आश्रय करत हों। तो सर्व दोष सहज ही में छूटे। और लौकिक धर्म हैं सो सब वृथा हैं। ऐसो जाने तव सेवक को धर्म सहज में प्राप्त होई। और भगवदीय वैष्णव, जो सेवा के धर्म आचरे तो बाधक नहीं उपजे। सो काहेतें, जो - श्रीठाकुरजी जानें, जो - मेरी सेवा करत हैं। सो ताही तें श्रीठाकुरजी आप सेवाही को फल देत हैं। और ब्रजभक्तन की जैसी प्रीति होइ, तव अंगीकार होइ। लौकिक प्रपंच को लेस ही मन में न राखे। सर्वस्व करि के श्री-गोवर्द्धननाथजी को जाने, और सर्व बात को त्याग करे। और वेनुनाद सुने। सो ये भगवदीय वैष्णव की लीला-प्राप्ति के लक्षण। ताही तें कुसुमित फल है, सो फलित होइ। और रोमांचित होइ। और अपने मन में हरखे। मधुर धारा (वचन) वरखे। तातें भगवदीय वैष्णव को धर्म ऐसोई है, जो - भगवद् प्राप्ति तथा भगवदीय वैष्णवन के अर्थ सर्व समर्पत हैं। यह तो सर्व बात एकवार होत है। सो श्रीठाकुरजी तथा ब्रजभक्तन को बोहोत भयो। तातें या प्रकार सो भगवदीय वैष्णव को सदा रहनो।

और वैष्णव को तीन वस्तु की रक्षा करनी। सो प्रथम तो विवेक, ता पाछें धैर्य, ता पाछें आश्रय। सो इन तीनों को जतन करनो। सो प्रथम तो विवेक को तात्पर्य कहत हैं, जो - श्रीमहाप्रभुजी आज्ञा करत हैं, जो - प्रभु ! सब आछोही करत हैं। ऐसो विस्वास राखनो। कैसी ही स्थिति प्राप्त होइ परि श्री-ठाकुरजी सो प्रार्थना करनी नहीं। प्रभुजी की इच्छा होइगी सोई करेंगे। तातें सर्वथा करि के भगवदीय वैष्णव को प्रार्थना नहीं करनी। मन में एक निर्धार करनो, जो - श्रीप्रभुजी सब

जानत हैं। प्रार्थना काहेंकों करिण? प्रार्थना कौ तो प्रथमही सिद्ध करि के राखे हैं। और मनुष्य अपने मन की हृ नहीं जानत, जो - कहा हे? और अपने अद्रष्ट हृ जानत नहीं, जो - अद्रष्ट में कहा लिख्यो हे? तो श्रीप्रभुजी के धर्म केंम जानिण? नातें सर्वथा करि के काहू बात की प्रार्थना नहीं करनी। श्रीगोवर्द्धन-नाथजी ने विचारयो होइगो मोई होइगो। मो मव भलो करंगे। ता पाछे वा विरक्त वैष्णव सों कथ्यो, जो - जीवकों अभिमान सर्वथा नहीं करना। और ऐसो नहीं विचारनो जो हांतो ऐसी रीति सों सेवा करत हों और प्रभुजी तो हमारी ईच्छा तें कार्य करे नहीं हैं। आपकी इच्छा प्रमान कार्य करत हैं। मो ऐसो मरे मरीर की सेवा कौ कष्ट हे। मैं कहा करों? मैं तो अब बैठ्यो रहोंगो। ऐसो जीव जो विचार करि के परचो रहे, तव वा जीव कौ कार्य सिद्ध कहांतें होई? सो ऐसो नहीं करना। मो वैष्णव कों गुरु की आज्ञा प्रमान चलनो। गुरु की आज्ञा लोप नहीं करनी। आज्ञा कौ उल्लंघन करे तो बड़ा अपराध हे। तातें सेवक कों तो सदा स्वामी के आधीन रहनो। जब सेवक निवेदन करचो हे, पुत्र, दारा, गृह धनादिक सब समर्पन करचो हे, तव अब या जीव कौ कहा हे? सो अभिमान करत हे? तातें प्रभुजी जो करंगे सो आछी ही करंगे। ऐसो निश्चय राखनो।

और दूसरो, हौं सेवक हों तातें सेवा ही करनी मरो धर्म हे। तामें तीनों प्रकार के दुःख कों सहन करे। ऐसो विवेक, धैर्य जिन कों आयो होइ ताकों प्रार्थना सर्वथा नहीं करनी। और कोई कहे, जो - श्रीमुख देखिवे की प्रार्थना नहीं करनी? तहां कहत हैं, जो - ये तो भगवदीयन कौ मुख्य धर्म हे। जो -



श्रीमुख निरखनो । जो - बैठ्यो नहीं रहनो । प्रयत्न करना । श्रीठाकुरजी कौन भांति सों अंगीकार करत हैं, जो - एक तो अपने घर बैठे अंगीकार करत हैं । और एक निकट आवे तब अंगीकार होई । ताते, श्रीप्रभुजी की इच्छा जानिये कों कोई समर्थ नहीं है । ताते या जीव कों सर्वदा सेवा में रहनो, यह आश्रय है । और काहू बात की चिंता नहीं करनी । बैठि नहीं रहनो ।

पाछें 'अंतःकरण प्रबोध' को वर्णन किये, जो - निवेदन भक्ति को प्रकार जाकों दृढ़ होई ताकों कैसो हू दोष न उपजे । सो प्रथम श्रीआचार्यजी महाप्रभु आप श्रीमुखत अधरामृत रूप वचन कहे हैं । जो - मैं आज्ञा दोइ को भंग कियो है । तिनको पश्चात्ताप नहीं करना । जानिये, जो - मैं हू सबक हू । म तो सर्वस्व श्रीप्रभुजी कों समर्प्यो है । ताते कहा चिंता है ? सो ताके ऊपर और हू कह्यो है, जो - देह को वात्सल्य जानि कै रहिये को प्रयत्न करें, और सेवा में सावधान न रहे. तो श्रीप्रभुजी आपु अपसन्न होई । ताके ऊपर दृष्टांत कहें, जैसें वधू प्रौढ भई होइ तब माता-पिता स्नेह करि कै घर राखे, और बाके वर को आदर समाधान वोहोत करे, परि वधू कों घर न पठावे तो वर को मन संतोष पावे नहीं । और पुत्री कों बाके घर पठावे तब बाको वर वोहोत संतोष कों पावत है । ताही प्रकार अपनी देह कों समझि कै सेवा में सावधान रहे तो प्रसन्न होई ।

ऐसें श्रीगुसाईजी ने वा विरक्त वैष्णव सों कह्यो । सो, वह विरक्त वैष्णव वचनामृत सुनि कै वोहोत प्रसन्न भयो । पाछें श्रीगुसाईजी अपनी बैठक में पधारे । तब विरक्त वैष्णव हू श्री-नवनीतप्रियजी आदि सातों स्वरूप के दरसन करि कै श्रीगुसां-

ईजी के पास आय के दंडवत् करी। तब श्रीगुसांईजी ने पृथ्वी, जो - वैष्णव ! श्रीनवनीतप्रियजी के दर्शन किये ? तब वा विरक्त वैष्णवने श्रीगुसांईजी मां विनती कीनी, जो - महाराज ! आप की कृपा तं सातों स्वरूप के दर्शन किये। मां ताकी बड़ाई कहां ताई जीव करि मके ? परि महाराज ! इन के स्वरूप-भाव जानिण तो आछी। तब श्रीगुसांईजी ने वा वैष्णव मां कह्यो —

श्रीयसोदाजी के इहां प्रभुन ने बाल्लील्य करी हे। सो स्वरूप श्रीनवनीतप्रियजी कौ हे।

और श्रीजसोदाजी के इहां बड़े भये तब गौचरन लील्य किये हैं सो स्वरूप श्रीमथुरानाथजी कौ हे। सो जा गमे श्रीमथुरानाथजी श्रीगोपीजनन के घर माखन की चोरी कां जात हैं तब सखान कां ले के श्रीस्वामिनीजी के घर जात हैं। तहां दूध, दही माखन की चोरी करत हैं। तहां एकांत में आय के श्रीस्वामिनीजी ने कह्यो, जो - आज मैं पकरि के श्रीनंदरायजी श्रीयसोदाजी की आगे ले जाउंगी। तब श्रीमथुरानाथजी की दोई भुजा श्रीस्वामिनीजी ने पकरी। तब श्रीमथुरानाथजी आप दोई भुजा और प्रगट करि के श्रीस्वामिनीजी सां विनती कीनी, जो - मैं तो तुम्हारे बस हों। तुम को पास ही राखत हों। सो मेरे नीचे श्रीहस्त में संख हे। सो तुम्हारी ग्रीवा के आकार है। तातें मैं धारन किये हों। दूसरे श्रीहस्त मे पद्म हे। सो तो कमलवत् है। और तुम्हारे मुख है सो हू कमल हे। तातें मैं तिनके आकार में धारन किये हों। और ऊपर वाम हस्त में गदा है। सो तुम्हारे कुच के आकार रूप है तातें राखे हों। और एक श्रीहस्त में चक्र है। सो तुम्हारे आभूषण जो कटि किंकनी हैं

तथा श्रीहस्त में कंगन हैं. सो ताकी आरति करि के मैं अपने श्रीहस्त में राखे हों । तातें मोकों छोरि देहु । तव रंचक अध-  
रामृत कौ पान करि के छोरि दिए । सो ऐसी लीला श्रीमथु-  
रानाथजी में है ।

और जब कात्यायनी व्रत कियो, तव आप 'चीरहरन' लीला करी है । सो स्वरूप श्रीविठ्ठलसजी कौ है । सो श्रीस्वामिनीजी के भाव में मगन हैं । सो ताहीतें गौर स्वरूप प्रगट हैं । और वस्त्रन में जो स्याम स्वरूप होइ तो सब गोपिका श्रीठाकुरजी कों जानि जाँइ । तातें श्रीठाकुरजी गौर होइ के, श्रीगोपिका के सहस होइ के, वस्त्रचीर चोरि के कदंब पै जाँइ बैठे । ता पाछे उहां गोपिकान के मन में लज्जा रूप अंतराय रह्यो है । सो श्री-विठ्ठलसरायजी दूरि करि के सवन के वस्त्र दिये । सो लीला श्रीविठ्ठलसरायजी में है ।

अब 'रासपंचाध्याई' में सब ब्रजभक्तन कों पुलिन में बैठाए सो स्वरूप श्रीद्वारकानाथजी कौ है । और उहां गोपी सब पुलिन में बैठी हैं । तहां मध्य में श्रीस्वामिनीजी विराजति हैं । तहां श्रीठाकुरजी आपु अचानक पधारे । सो तहां सखीयन कों समस्या तें बरजी हैं । और पाछे श्रीहस्त कमल करि के श्री-स्वामिनीजी के नेत्र मूंदे हैं । और दोइ हस्त सों वेनुनाद किये हैं । सो याही प्रकार सों रसमय लीला है सो श्रीद्वारिका-नाथजी में है ।

अब श्रीगोकुलनाथजी श्रीगोवर्द्धनधारन किये हैं । और सब ब्रजभक्तन की रक्षा किये । वाम श्रीहस्त करि श्रीगोवर्द्धन कों उठायो है । ता पाछे जेमने श्रीहस्त में धारन कियो है ।

और दोऊ श्रीहस्त गों वेनुनाद करत हें । गो मव व्रज कों सुधा कौ पान करावत हें । कवहक वेनु की फूंक पर श्रीगोवर्द्धन कों राखत हें । और वाम भाग के नीचे के श्रीहस्त में मंग्व है । सो आधिदेविक जलरूप है । सो इह लीला गोवर्द्धनधर श्रीगोकुलनाथजी में प्रगट हें ।

अब श्रीगोकुलचंद्रमाजी कौ स्वरूप माझान मनमथ-मनमथ है । सो जब 'पंचाध्याई' में आप अंतर्धान भए । ता पाछे श्रीगोपिकान ने रुदन कियो । तहां प्रगट भये । सो ललितत्रिभंगी कौ स्वरूप हें । ता पाछे राम भयो है । तब आप दोऊ हस्त करि मुरली बजाई है । और सब व्रजभक्तन को रसदान करत हें । सो तहां लह धर्म एक धर्मी । सो ताके ऊपर अंगुली धरी हें । सो तो यह व्रजभक्तन कौ समाधान करत हें, जो - तुम्हारी भक्ति के मैं बस हूं । मैं तुम्हारे रनिया सदा हूं । सो ऐसे श्रीगोकुलचंद्रमाजी में रासादि लीला हें । सो ताको प्रादुर्भावो होत है ।

अब श्रीमदनमोहनजी कौ भाव कहत हें, जो - निकुंज-दिक के भीतर है, सो नाना प्रकार की लीला करत हें । तहां कोटि-कोटि कामदेव लज्जा पावत हें । तहां भांति-भांति की लीला करत हें । अरु 'रासपंचाध्याई' में मुरली बजाई के सब व्रजभक्तन कों बुलाये । ता समे उद्दीपन भावरूप आप भए । सो स्वरूप श्रीमदनमोहनजी कौ हें । या प्रकार सातों स्वरूपन की भावना है । ताते उनके दरसन करे, ता समे या प्रकार भावना करनी, ऐसे श्रीगुसाईजी आप आज्ञा किये ।

और श्रीगोवर्द्धननाथजी निकुंज-नायक हें । सो निकुंज के

द्वार पर ठाढ़े होई स्वकीय जन को उंची भुजा करि बुलावत हैं।  
या प्रकार श्रीगोवर्द्धननाथजी के स्वरूप की भावना करनी।

सो सुनि कै विरक्त वैष्णव वोहोत प्रसन्न भयो। ता पाछे  
श्रीगुसाईजी श्रीगोवर्द्धननाथजी के दरसन को पधारे। तव  
विरक्त वैष्णव हू संग हुतो। सो श्रीगुसाईजी गोपालपुर पधारे।  
पाछे स्नान करि कै श्रीगोवर्द्धननाथजी के मंदिर में पधारे।  
तव भोग कौ समय हुतो। सो पधारि कै भोग समर्थो। पाछे  
भोग सरायो। राजभोग-आरती करी। तव या विरक्त वैष्णव ने  
श्रीगोवर्द्धननाथजी के दरसन किये। और अपने मनमें विचार  
कियो, जो - श्रीगुसाईजी ने श्रीमुख तें वचन कहे तेसेई दर-  
सन श्रीगोवर्द्धननाथजी के भए। ता पाछे श्रीगुसाईजी अनोसर  
करि कै अपनी बैठक में पधारे। तव वह विरक्त वैष्णव हू  
श्रीगुसाईजी के पास आयो। ता पाछे श्रीगुसाईजी भोजन  
करिवे को पधारे। तव वा विरक्त वैष्णव की पातरि धराई।  
सो भोजन करिवे को बैठयो। ता पाछे श्रीगुसाईजी पोढ़े।  
पाछे वह विरक्त वैष्णव महाप्रसाद ले कै उठयो। तव श्री-  
गुसाईजी को पंखा करन लाग्यो। पाछे दूसरे दिन श्रीगुसाईजी  
की आज्ञा मांगि ब्रजयात्रा को गयो। सो कहूं स्वस्थ होइ कै बैठे  
नाहीं। सो श्रीगोवर्द्धननाथजी इनको सानुभावता जनावते।  
पाछे वा विरक्त वैष्णव की देह छूटी। सो श्रीगोवर्द्धननाथजी  
के चरनारविंद में प्राप्त भयो।

भावप्रकाश—या वार्ता कौ अभिप्राय यह है, जो - भगवन्सेवा, भगवद्दर्शन  
भावपूर्वक करने। सो पुष्टिमार्ग में स्वरूप भावना, लीला भावना, भाव भावना  
मुख्य हैं। सो या प्रकार निरंतर भावना करनी। तातें मन अलौकिक होई। तव  
निरोध सिद्ध होई।

सो वह विरक्त वेणव श्रीगुसांईजी की गंगा परम कृपा-  
पात्र भगवदीय हतो । ताते उनकी वार्ता कहां तांडे कहिण् ।

वार्ता ॥ १६२ ॥



अब श्रीगुसांईजी की सेवक एक क्षत्री, पुरख की धारो, तिनकी धारा की  
भाव कहत हैं—

भावप्रकाश—ये मात्वरु भक्त हैं । लीला में उन की नाम 'कीर्ति' है ।  
ये 'मोहनी' तें प्रगटी हैं, ताते उनके भावरूप हैं ।

ये पूरव में 'पीपरी' तें उरे कोम टोड पर एक गाम हैं, तहा एक द्रव्य-  
मान क्षत्री के जन्म्यो । सो यह बालपने में वैराग्य दया में रहें । मन में रहें,  
जो - लौकिक सुख तो क्षणिक हैं । तब या देह में भगवान के साक्षात् दर्शन  
होई तब ही जीवन सार्थक जानतो । परि माता-पिता के डर तें यह अपने मनकी  
बात काहू में कहे नहीं । ऐमें रहत यह ब्रह्म तीम की भयो । तब याके माता-  
पिता मरे । सो याने व्याह कियो नाहों । सो यह क्षत्री सुंदरदाम गंगापुत्र की  
जजमान हतो । सो सुंदरदाम श्रीआचार्यजी महाप्रभुन के सेवक हैं । सो उनकी  
वार्ता आगे कहि आए हैं ।

सो एक समय सुंदरदाम वा क्षत्री के घर कुछ कार्यार्थ आए । तब या  
क्षत्रीने सुंदरदाम की बोहोत आदर मन्मान कियो । पाछे कयो, जो - प्रोहितजी !  
कुछ ऐसो उपाय बतावो, जाते याही देह में भगवान के साक्षात् दर्शन होई । तब  
सुंदरदास कहे, जो - तू श्रीगुसांईजी की सेवक होउ तो तेरो मनोस्थ सिद्ध होई ।  
आजकाल्हि तो ठाकुर श्रीगुसांईजी के आधीन हैं । तब यह क्षत्रीने पृच्छयो जो -  
प्रोहितजी ! श्रीगुसांईजी कौन हैं ? कहा रहत हैं ? तब सुंदरदास कहे, जो -  
श्रीगुसांईजी श्रीआचार्यजी महाप्रभुन के पुत्र हैं । श्रीगोकुल में रहत हैं । उनके  
आधीन श्रीगोवर्द्धननाथजी आप रहत हैं । सो श्रीगोवर्द्धननाथजी गोवर्द्धन पर्वत में  
सों प्रगट भये हैं । साक्षात् कृष्ण की स्वरूप हैं । सो जो कोउ उन के मर्नि जान  
है तापें ये कृपा करत हैं । तब या क्षत्री ने कयो, जो - प्रोहितजी ! अब तो  
मोको वेगि श्रीगुसांईजी की सेवक कराइए । मैं उनके सरनि जाऊंगो । तब सुंदर-  
दास कहे, जो - आजकाल्हि में श्रीगुसांईजी श्रीजगन्नाथरायजी के दर्शन को  
पधारे गे । तब तू पुरुषोत्तमपुरी में जाइ उनकी सेवक हजियो ।

घाना प्रसंग—१

सो वोहोरि श्रीगुसाईजी पुरुषोत्तमपुरी श्रीजगन्नाथरायजी के दरसन कों पधारे । सो वा क्षत्री ने सुनी, जो - श्रीगुसाईजी श्रीजगन्नाथरायजी के दरसन कों पधारे हैं । तव वह क्षत्री घर में जो हतो सो सब ले कै श्रीगुसाईजी के दरसन कों चलयो । सो पुरुषोत्तमपुरी आयो । पाछें श्रीगुसाईजी के पास जाँइ विनती कीनी, जो - महाराज ! कृपा करि कै मोकों सरनि लीजिए । तव श्रीगुसाईजी ने वाकी वहीत आरति जानि कृपा करि के वाकों सरनि लियो । वाकों नाम सुनायो । ता पाछें एक व्रत करवाय कै समर्पन करवायो । पाछें वा क्षत्री वैष्णव ने विनती करी, जो - महाराज ! मोकों कहा आज्ञा है ? तव श्रीगुसाईजी ने कही, जो - श्रीठाकुरजी की सेवा करो । तव वा क्षत्री वैष्णव ने श्रीगुसाईजी सों विनती कीनी, जो - महाराज ! मो तें इकले तें भगवत्सेवा कैसे वने ? तातें महाराज ! हों तो आप की सेवा करोंगो । और आप के संग व्रज कों चलंगो । श्रीगोवर्द्धननाथजी के दरसन कों । तव श्रीगुसाईजी कहे, जो - आछो । ता पाछें वा क्षत्री वैष्णव ने जो - कछू पास हतो सो सब श्रीगुसाईजी की भेंट कीनो । पाछें श्रीगुसाईजी के मंग रह्यो । और जो - सेवा देखे सो करन लाग्यो । मो मेवा भली भांति सों करतो । पाछें महाप्रसाद लेतो । पाछें श्रीगुसाईजी श्रीगोकुल पधारे । सो यह क्षत्री वैष्णव हू संग आयो । मो केतेक दिन श्रीगोकुल रहि कै ता पाछें श्रीगुसाईजी घोड़ा पर विराजि श्रीनाथजीद्वार पधारे । सो उह क्षत्री वैष्णव हू श्रीनाथजीद्वार गयो । सो श्रीगुसाईजी तो उत्थापन के समे पहंचे । मो श्री-

नाथजी के उत्थापन किये । और उह क्षत्री वैष्णव तो पाँवन चलतो । सो पाछे रहि गयो । सो मेन के दरसन हांड चुके पाछे आयो । सो देखे तो मेन हांड चुकी हे । तव उह क्षत्री वैष्णव अपने मन मे बोहोत ही पश्चाताप करन लाग्यो, जो - आज मैं प्रथम ही आयो । सो मोकां दरसन नहीं भए । और वह क्षत्री वैष्णव के मन मे ऐसी हती, जो - दरसन करि के महाप्रसाद लेनो । सो दरसन तो भए नहीं । तव उह क्षत्री वैष्णव श्रीनाथजी के मंदिर वाहिर ड्यौंटी पे बैठ्यो । सो दरसन न भये ताते वाके मन मे अत्यंत ताप भयो । सो ताप श्रीनाथजी सों सह्यो न गयो । तव आपु श्रीठाकुरजी मन्थरात्रि के ममय झारी वंटा ले के मंदिर के वाहिर वा क्षत्री वैष्णव के पास पधारे । सो वा ते श्रीगोवर्द्धननाथजी आपु ने कही, जो - वैष्णव दरसन करि ले । तव वा क्षत्री वैष्णव ने श्रीगोवर्द्धननाथजी आपु के दरसन किये । पाछे श्रीगोवर्द्धननाथजी आपु झारी वंटा वा वैष्णव कों सोपे । और आज्ञा किये, जो - यामें ते महाप्रसाद लीजियो । सो ऐसे कहि के आपु मंदिर में पधारे । और वा वैष्णव ने महाप्रसाद लीना । और झारी मे ते जल पियो । सो एक तो पंथ कियो, दूसरे भूखो, सो प्रसाद लेतही वा क्षत्री वैष्णव कों आलस आयो । सो उह झारी-वंटा उहांही धरि के एक ओर जाइ के पर्वत पे सोय रह्यो । तव प्रातःकाल संखनाद भए तव उठ्यो ।

और श्रीगोवर्द्धननाथजी वाहिर पधारे पाछे भीतर पधारे । सो मंदिर के किवार खुले परे हैं । सो जब श्रीगुसाईजी न्हाय के ऊपर पधारे तव देखे तो मंदिर के किवाड़ खुले परे हैं । तव श्रीगुसाईजी ने सेवकन सों कही, जो - वस्तू भाव सम्हारो । पाछे



श्रीगुसांईजी भीतर पधारि कै देखे तो झारी वंटा नहीं हैं। तव श्रीगुसांईजी तो मंगल भोग धरि कै वाहिर पधारे। तव उह वैष्णव श्रीगुसांईजी के दरसन कों आयो। तव श्रीगुसांईजी कों दंडवत् करि कै झारी वंटा श्रीगुसांईजी के आगे धरे। तव श्रीगुसांईजी ने वा वैष्णव सों पूछी, जो-ए तेरे पास कैसें आए? तव वा वैष्णव ने हाथ जोरि कै विनती कीनी, जो-महाराज! श्रीगोवर्द्धननाथजी राति कों धरि गए हैं। पाछें सब विधिपूर्वक समाचार कहे। तव श्रीगुसांईजी भीतरिया सेवकन कों आज्ञा किये, जो-यह वैष्णव जा समय महाप्रसाद मांगे सो ता समय देनो। और आप ने या वैष्णव सों आज्ञा कीनी, जो-जा समय तोकों भूख लागे ताही समय अनसखड़ी महाप्रसाद मांगि लीजो। और तोसों वने सो सेवा करियो। पाछें केतेक दिन रहि कै श्रीगुसांईजी आप श्रीगोकुल पधारे। और उह क्षत्री वैष्णव श्रीनाथजी द्वार में रह्यो। सो भली भांति सों स्नेहपूर्वक प्रेम चित्त लगाय कै सेवा करतो। श्रीगोवर्द्धननाथजी इनके ऊपर सदा प्रसन्न रहते। सो वा वैष्णव ने भली भांति सों सेवा करी। पाछें वाकी देह छूटी। तव श्रीगुसांईजी के अनुग्रह तें उन कौ नित्य लीला में प्रवेश भयो। अलौकिक देह पायो। लौकिक देह परयो रह्यो। अलौकिक देह तें नित्य लीला में प्रवेश कियो। सो भीतरियान ने श्रीनाथजी के मंदिर में वाकों देख्यो। सो श्रीगुसांईजी जब श्रीनाथजीद्वार पधारे तव आप यह बात भीतरियान के मुख तें सुनी। सो सुनि कै श्रीगुसांईजी वोहोत प्रसन्न भए। और श्रीमुख तें कहे, जो-प्रभु, थोरी सेवा करे तोऊ वोहोत मानत हैं। और देखो, या वैष्णव के भाग्य! थोरेंमे दिनन में

श्रीगोवर्द्धननाथजी ने अत्यंत कृपा कीनी ।

भावप्रकाश—या वार्ता की अमिप्राय यह है, जो प्रभु नाथ-आतुगना देखि वेगि प्रसन्न होत है । ताते वेणव को ताप गयतो । और श्रीनिपुर्वरु को उरंच हू सेवा करत है ताको प्रभु मोहोत मानत है, यह जताए ।

सो यह क्षत्री वेणव श्रीगुसाईजी की गंमो कृपापात्र भगवदीय हो । ताते इनकी वार्ता को पार नाही. सो कहां ताई कहिए ?

वार्ता ॥१६३॥



अब श्रीगुसाईजी की सेवक एक अन्यमारगी, जाने समान में येदि के गावों तिनकी वार्ता को भाव फात है —

भावप्रकाश—ये तामम भक्त है । लीला में इन को नाम 'कांता' है । ये 'मोहनी' तें प्रगटी है, ताते उनके भावरूप है ।

वार्ता प्रसंग—१

सो एक समय वेणव दोइ चारि श्रीगोकुल में इकठारे होइ के निरधार करत हुते । जो - भाई ! आज के समय में तो श्रीगुसाईजी की प्रताप ऐसाही है । जो - कोई पापी दुष्ट कर्म करिवे वारो होइ, पाखंडी होइ, परि जो सरनि आवे तिन सवन के पाप दूरि करत हैं । सो उन वेणवन में एक अन्यमारगी बैठयो हतो । सो वाने कही, जो - वेणवजी ! तुम कहत हो सो साँची बात होइ तो मैं हू ऐसे दुष्ट कर्म कीने हैं । सो अब मोकों श्रीगुसाईजी की सरनि लिवावो और मेरे पाप दूरि करवावो । तब में जानो, जो ठीक बात है । तब वेणवन कही, जो - आज तू हमारे संग चलि । पाछे उह वेणव अन्यमारगीय को संग ले के श्रीनाथजीद्वार श्रीगुसाईजी के पास आए । पाछे सवन ने दंडवत् करी । और उनन सब समाचार श्रीगुसाईजी आगे कहे, जो - महाराज ! यह अन्यमारगी है । सो आपु सो

बिनती करत है, जो - मोकों कृपा करि कै सरनि लीजे । तव श्रीगुसाईजी आज्ञा किये, जो - स्नान करि आउ । तोकों हम नाम दे सरनि लेइंगे । फेरि तेरे मन में आवे सो करियो । हम तोकों कवहू छोरेंगे नहीं ।

भावप्रकाश—यह कहि यह जताए, जो - पुष्टिमार्ग में जीव सरनि आबत हैं, ताकों प्रभु आप सर्वथा छोरत नहीं । काहेतें, यह प्रमेयमार्ग है । तातें जीव की कृति देखत नहीं । सो श्रीगुसाईजी आप साक्षात् पूरन पुरुषोत्तम हैं । तासों या प्रकार कहे ।

तव उह स्नान करि कै आयो । और बिनती करी, जो - महाराजाधिराज ! मोकों नाम दीजिए । तव आपु वाकों नाम दियो । पाछें श्रीगुसाईजी आप स्नान करि कै श्रीनाथजी के मंदिर में पधारे ।

ता पाछें राजभोग के दरसन खुले । तव सब वैष्णवने श्रीनाथजी के दरसन किये । पाछें याहू ने दरसन किये । पाछें श्रीगुसाईजी श्रीनाथजी की सेवा तें पहोंच कै श्रीगिरिराज तें नीचे अपनी बैठक में पधारे । सो गादी तकियान के ऊपर विराजे । तव सब वैष्णव श्रीगुसाईजी के दरसन करि कै अपने घर कों गए । तव वा वैष्णव ने दरसन करि दंडवत् करि भेंट कीनी । तव श्रीगुसाईजी आज्ञा किए, जो - तू आज महाप्रसाद यहांही लीजियो । पाछें श्रीगुसाईजी भोजन कों पधारे । सो श्रीगुसाईजी भोजन करि कै बीड़ा आरोगि कै श्रीगुसाईजी आपुने श्रीहस्त सों जूठनि की पातरि धरी । पाछें वा वैष्णवने महाप्रसाद लियो । ता पाछें आज्ञा माँगि अपने घर श्रीगोकुल कों गयो । सो उन घर आइ विचार कियो, जो - अब परीक्षा करिए । पाछें वह स्मसान में जाँइ रह्यो । सो उहां मुरदा की आंच में दारि चाटी

करि खाँतो । और मन में अहर्निग यही कहें. जो - देखां.  
श्रीगुसाईजी मेरो केंग उद्धार करत हं ?

वार्ता प्रसंग—

सो एक राजा और कोई देग में रहत हुतो । सो वाकें गलित कोढ़ हुतो । सो वा राजा ने अनेक औषधि कीनी, परि वाकौ कोढ़ न गयो । तव काहू ने कही. जो - तुम तीर्थयात्रा करो तो तुम्हारो कोढ़ जाँड़ । और लाग्यन रूपया खर्चें परि वाकौ कोढ़ न गयो । तव उह राजा तीर्थ यात्रा करिवे निकस्यो । सो तीर्थयात्रा करत करत कतेक दिन में श्रीगोकुल आयो । परि यात्रा करि के ह वाकौ रोग न गयो । सो तव वा राजा ने श्रीगुसाईजी के दरसन किये । सो दरसन करि के विनती कीनी. जो - महाराज ! मैंने लाग्यन रूपया खर्चें और सब तीर्थन में स्नान किये । परि मेरो रोग न गयो । और आप ईश्वर हो । सो यह विचारि के मैं आप के पास आयो हं । सो आपु मेरो रोग न खोवोगे तो मेरो रोग और कौन खोवोगा ? तातें आपको छोरि के और कौन के पास जाऊं ? सो ऐसी वा राजा की दीनता देखि के श्रीगुसाईजी आप ता परम दयाल सो आज्ञा किये, जो - यह तेरो रोग ता यहां स्मसान में हमारा मेवक रहत है, सो उनके पास जाँड़ के उनकी जूठनि ले के खाईयो तव तेरो रोग जाइगा । परि उह वैष्णव जूठनि देइगा नाही । तातें तू जोरावरी सो लीजियो । मन में ग्लानि मति ल्याइयो । तव उह राजा आप की आज्ञा प्रमान स्मसान में जाँड़ के वा वैष्णव सो जूठनि माँगी । सो बाने न दीनी । तव वा राजा ने जोरावरी ले के खाई । सो जूठनि भीतर गई । तव तत्काल

वाकौ कोढ़ निवृत भयो । सुंदर दिव्य नौतन सरीर भयो । ता पाछें उह राजा बहोत ही प्रसन्न भयो । पाछें वा वैष्णव ने राजा सों कही, जो - तुमने मेरी जूठनि क्यों खाई ? तव राजाने वा वैष्णव सों कही, जो - मोकों श्रीगुसाईजी की आज्ञा हती, जो - तू स्मसान में जाँड़ कै वा वैष्णव की जूठनि खाइगो, तव तेरो रोग जाइगो । सो मैं आपुकी आज्ञा मानि कै आयो हूँ । सो तुम्हारी जूठनि खाई । तव मेरो रोग गयो । तव वा वैष्णव ने कही, जो - अज हूँ श्रीगुसाईजी मेरी सुधी करत हैं ? पाछें वा वैष्णव ने अपने मन में यह निश्चय कियो, जो - श्रीगुसाईजी तो साक्षात् ईश्वर हैं । और मैंने दुष्टता बोहोत ही कीनी । परि प्रभु बड़े दयाल हैं । जो - मेरो दोष न विचारे, जो - उलटो गुन करि कै माने । तातें मोकों छोरे नाहीं । सो मेरो कृत्य आपु न देखे । तातें अब मैं आपु के पास जाँड़ प्रभुन की आज्ञा प्रमान सेवा करूंगो । सो उहां सों स्नान करि अपने घर आय बस्त्र पहरि कै श्रीगुसाईजी के पास आयो । पाछें विनती करी, जो - महाराज ! आप तो पूरन पुरुषोत्तम हां और मैं तो दुष्ट स्वभाव करि कै दुष्ट जीव हों । और दुष्ट कर्म बोहोत ही किये हैं । परि आपु तो परम दयाल हां । तातें अब मेरे ऊपर कृपा अनुग्रह करिये । तव श्रीगुसाईजी आपु कृपा करि कै आज्ञा किए, जो - काल्हि एक व्रत करि ब्रह्मसंबंध करियो । तव श्रीगुसाईजी की आज्ञा प्रमान वह व्रत करि कै दूसरे दिन स्नान करि अपरस बस्त्र पहरि कै श्रीगुसाईजी के पास आयो । और विनती करी, जो - महाराज ! कृपा करि कै मोकों ब्रह्मसंबंध करवाइए । तव श्रीगुसाईजी आपु वा वैष्णव

कों ब्रह्मसंबंध करवायो । और वाकी नाम 'वैष्णवदास' धरयो । ता पाछें आपु वा वैष्णव के माथे सेवा पधराये । और सेवा की रीति भांति सिखाये । तातें उह वैष्णव श्रीठाकुरजी को पधराय के पाछें नयो मंदिर सिद्ध करवाय के अपरम ब्रह्म काटि मुद्ध करि वासन पलटाय श्रीगुमांडजी आप की आज्ञा प्रमान सेवा करन लाग्यो । पाछें श्रीगुमांडजी कों घर पधराय श्रीठाकुरजी की आरति करवाई । पाछें श्रीगुमांडजी आपु कों यथासक्ति भेंट करी । ता पाछें वा दिना श्रद्धा प्रमान वैष्णवन को बुलाय के महाप्रसाद लिवायो । पाछें उह वैष्णव श्रीमहाप्रभुजी की प्रनालिका सों सेवा करन लाग्यो । सो कितनेक दिन में श्रीठाकुरजी सानुभावता जनावन लागे । जो - चहिए सो मांगि लेते । सो उह भलो भगवदीय भयो । तब गेये करत कितनेक दिन में याकी देह असक्त भई । तब याने अपने श्रीठाकुरजी तथा घर में जो - कछु द्रव्य हतो सो सब श्रीगुमांडजी के घर पहाँचाए । पाछें वाकी देह छूटी । सो भगवल्लीला में प्रवेग भयो । ता पाछें वैष्णवन ने याकी अग्नि संस्कार कियो ।

भावप्रकाश--या वार्ता कौ यह अभिप्राय है, जो - वैष्णव को श्रीगुमांडजी के वचन ऊपर विस्वास राखनो । सो या राजाने श्रीगुमांडजी की आज्ञा कौ विचार करि वैष्णव की जंठनि खाई, सो राजा कौ कोढ़ निवृत्त भयो । तातें विस्वास बड़ो पदार्थ है । विस्वास होंड तो सर्व वस्तु की सिद्धि होंड । और वा वैष्णव ने परीक्षा में हू श्रीगुमांडजी कौ अहर्निश स्मरण कियो, तो श्रीगुमांडजी वाकी बुद्धि फेरे ।

सो वह वैष्णव श्रीगुमांडजी कौ ऐसो कृपापात्र भगवदीय हतो । तातें इन की वार्ता कहां ताई कहिए । वार्ता ॥१६४॥



अब श्रीगुसांईजी के लेखक एक राजा, पूरव कौ. जाने स्मसान में जूठनि खाई, तिनकी घाती कौ भाव कहत हैं —

भावप्रकाश—ये राजस भक्त हैं। लीला में इन कौ नाम 'सुव्रता' है। ये अंतर्गृहगता में है। ये 'मोहिनी' तें प्रगटी हैं, तातें इनके भावरूप हैं।

वार्ता प्रसंग—१

सो उह राजा पूरव कौ हतो। सो वाकों गलित कोढ़ हतो। सो राजाने घने घने वैद्यन कों बुलाइ कै औपधि करवाई। और वोहोत इलाज करवायो। और जोतिसीन कों बुलाइ पून्यदान वोहोत किये। और लाखन रुपैया खर्चें। परि वाकौ रोग न गयो। तव एक ब्राह्मन ने कही, जो - राजा ! तीर्थ-यात्रा करिवे कों निकसो। तव वह तीर्थयात्रा कों निकस्यो। सो तीर्थयात्रा करत केतेक दिन में श्रीगोकुल आयो। सो तीर्थयात्रा किये, परि रोग न गयो। ता पाछें श्रीगोकुल में आइ कै श्रीगुसांईजी कों दंडवत् करी। पाछें उह राजा श्रीगुसांईजी के आगें हाथ बांधि कै ठाढ़ो रह्यो। तव श्रीगुसांईजी तो परम दयाल अंतरजामी। सो वा राजा के ऊपर दया आई। तव खवास सों आज्ञा करी, जो - तू यासों पूछि, जो - तू काहे कों हाथ बांधे ठाढ़ो है? तव वा खवास ने राजा सों कही, जो - तुम काहे कों हाथ बांधे ठाढ़ो हो? तव राजा ने दंडवत् करी, पाछें विनती कीनी, जो - महाराज ! मैं पूर्व में अमूक गाम है तहां रहत हों। और महाराज ! मेरे सरीर में वोहोत रोग उत्पन्न भयो है। और वोहोत वैद्यन कों बुलाए और औपधादि करवाई। तथा ग्रहन कौ दान-पून्य हू वोहोत कियो। लाखन रुपैया खर्चें। और वोहोत उपाय किये। जो - जाने कह्यो सो सब कियो। परि मेरो रोग न गयो। तव एक ब्राह्मन ने कही, जो - तुम

तीर्थयात्रा करो तो तुम्हारे रोग जाँड़ । सो महाराज ! मैं तीर्थ-यात्रा करत करत तुम्हारे पास आया हूँ । और महाराज ! मैं दोई-चारि बार जहर खाया । कहतें, जा-मैं जान्यो, जा-ऐमें तीर्थनमें मरी मृत्यु होइ तो आछौ । परि मरे काल आया नहीं । तातें महाराज ! मैं बांहात कायर होइ रह्यो हूँ । और यहां आया हूँ । ताते अब आपु की इच्छा में आवे सो करिये । और अब आप कों छोरि के कहां जाऊं ? ऐमें राजा ने कह्यो । सो सब स्ववास ने श्रीगुसाईजी के आगे कह्यो । और विनती करी. जो - महाराज ! ऐसैं राजा विनती करत हें । तब श्रीगुसाईजी आपु वा राजा कौ दुःख सहि न सकें । तब स्ववास सां कह्यो, जो - तू राजा सां कहियो । जो - तुम हाथ छोरि देऊ. हाथ बांधे काहेको ठाढ़ हों ? तुम स्मसान में जाऊ । उहां हमारे एक सेवक रहत है । सो ताकी जूठनि तुम खावो । तब तुम्हारे रोग जाँड़ । परि उह जूठनि देइगो नहीं । सो तुम जोरावरी सां लीजियो । मन में ग्लानी मति लाइयो । तब राजा तें स्ववास ने कह्यो । पाछें उह राजा अपने मन में निश्चय करि के श्रीगुसाईजी आपु कों दंडवत् करि स्मसान में गयो । तब वा राजाने वा वैष्णव सां जूठनि मांगी । तब वाने जूठनि दीनी नहीं । तब राजा ने जोरावरी सां ले के खाई । सो भीतर उदर में पहुँचत ही तत्काल वा राजा कौ कोढ़ निवृत्त भयो । और सुंदर आछौ सरीर भयो । तब राजा ने मन में जान्यो, जो - श्रीगुसाईजी आप साक्षात् ईश्वर हैं । तब ऐसैं मन में निद्धरि करि के श्रीगुसाईजी आप के पास आयो । सो श्रीगुसाईजी अपनी बैठक में गादी-तकियान पर विराजे हतें । और श्री-



सुवोधिनिजी की कथा कहत हते । और सब वैष्णव सुनत हते । तव वा राजा ने आय के हाथ जोरि कै श्रीगुसांईजी सों विनती कीनी, जो - महाराज ! मैं श्रीभागवत में सुन्यो हतो, जो - श्रीठाकुरजी ने अवतार लीनो । सो मैंनें आज देख्यो है । और आप साक्षात् श्रीठाकुरजी कौ अवतार हो । सो प्रभु ! मेरे ऊपर कृपा कीजिए । नाम निवेदन कराईए । तव श्रीगुसांईजी आज्ञा किये, जो - हमारो धर्म वोहोत कठिन हैं । और तुम अभक्षाभक्ष करत हो । सो तातें नाम कैसें दियो जाई ? तव राजाने विनती करी, जो - महाराज ! अब तैं अभक्षाभक्ष न करुंगो । अब आपु आज्ञा करोगे सोइ मैं करोंगो । अब आप के पास रहूंगो । देस कों न जाउंगो । पाछें श्रीगुसांईजी आज्ञा किये, जो - स्नान करि आऊ । तव वा राजा स्नान करि आइ कै विनती कीनी, जो - महाराज ! मेरे ऊपर कृपा करिये । तव श्रीगुसांईजी आपु ने वा राजा कों वैठारि कै नाम सुनायो । पाछें श्रीगुसांईजी आपु आज्ञा किये, जो - तुम काल्हि व्रत करियो । परसों ब्रह्मसंबंध करवावेंगे । ता पाछें व्रत करि कै स्नान करि कै अपरस वस्त्र पहारि कै वह राजा श्रीगुसांईजी आगें आय ठाढ़ौ भयो । कह्यो, जो - महाराज ! मेरे ऊपर कृपा करि कै ब्रह्मसंबंध करवाईये । पाछें श्रीगुसांईजी श्रीनवनीतप्रियजी कौ राजभोग सरायो । तव राजा कों श्रीनवनीतप्रियजी के सन्निधान ब्रह्मसंबंध करवायो । पाछें राजाने दरसन किये । ता पाछें श्रीगुसांईजी राजभोग-आर्ति करि अनोसर करि अपनी बैठक में पधारे । सो गादी-तकियान के ऊपर विराजे । तव या राजाने आय के दंडवत् कीनी. पाछें भेंट

धरी । तब श्रीगुसाईजी वा राजाकों आज्ञा किये, जो - आज महाप्रसाद यहां ही लीजो । ता पाछे आपु भोजन करि के मुख सुद्धार्थ आचमन करि के बीड़ा आरोगि के वा राजा कों अपने श्रीहस्त सों जूठनि की पातरि धरी । तब राजा ने महाप्रसाद लीनो । पाछे राजा ने विनती करी. जो - महाराज ! अब आज्ञा होइ तो मैं यहां रहों । तब श्रीगुसाईजी आज्ञा किये, जो - तुम राजा लोग हो । ताते अपने घर जाऊ । अब तुम्हारे कष्ट निवर्त भयो । तब राजा ने विनती करी. जो - महाराज ! मेरी बुद्धि न फिरे । आपु के ऊपर रहे । ऐसी कृपा करिये । तब श्रीगुसाईजी आपु ने वस्त्र मँगाय के अपने चरन रोगी सों छाप दिये । और वा राजा कों आज्ञा किये, जो - तुम नित्य इन कों भोग धरि के महाप्रसाद लीजियो । तुम्हारी बुद्धि ठिकाने रहेगी । और वैष्णव के ऊपर ममत्व राखियो । जो - वैष्णव आवें सो तिनकी भली भांति सों सेवा करियो । ता पाछे वा राजा कों ले के श्रीगुसाईजी आपु श्रीजीद्वार पधारे । तब राजाने श्रीनाथजी के दरसन किये । ता पाछे राजा आज्ञा मांगि के ब्रज-यात्रा कों गयो । सो कितनेक दिन में संपूरन ब्रजयात्रा करि के आयो । तब श्रीगुसाईजी आपु कों दंडवत् करी । तब कितनेक दिन ताई श्रीनाथजी के दरसन किए । ता पाछे श्रीगुसाईजी आपु सों विदा होइ के अपने देस कों चल्यो । सो कितनेक दिन में जाँइ पहुँच्यो । तब आपु की आज्ञा प्रमान त्योही सेवा करन लाग्यो । और वैष्णवन की सेवा करतो, महाप्रसाद लिवा-वतो । वैष्णव के ऊपर वोहोत ममत्व राखतो और श्रीगुसाईजी तथा श्रीनवनीतप्रियजी की प्रतिवर्ष भेंट पठावतो । श्रीनाथजी

ऊपर वोहोत ममत्व राखतो । सो जीवन पर्यंत या भांति कियो ।  
सो उह राजा भलो भगवदीय भयो ।

भावप्रकाश—तातें भगवदीय कौ संग ऐसो पदार्थ हैं । जो वैष्णव की जूठनि तें वा राजा कौ कोढ निवृत्त भयो । और वैष्णव ह भयो । तातें भगवदीय कौ संग करतो ।

सो उह राजा श्रीगुसांईजी कौ ऐसो कृपापात्र भगवदीय भयो । तातें इनकी वार्ता कहां ताई कहिए । वार्ता ॥१६५॥



अब श्रीगुसांईजी कौ सेवक रूपा पोरिया, सो श्रीगोवर्द्धननाथजी की सिंघ-पोरि पै रहतो, तिनकी वार्ता कौ भाव कहत है —

भावप्रकाश—ये राजस भक्त हैं । लीला में इनकौ नाम 'रामो' गोप है । ये श्रीनंदरायजी के घर की रखवाली करत हैं । ये 'रसात्मिका' तें प्रगट्यो हैं, तातें उनके भावरूप हैं ।

ये गोपालपुर में एक सनाढ्य ब्राह्मन के जन्म्यो । सो बरस बीस कौ भयो । तब इनके माता-पिता मरे । पाछें घर में कोऊ रख्यो नाहीं । तब यह श्रीगुसां-ईजी पास आइ विनती कियो, जो - महाराज ! मोकों सेवक कीजिए । और कृपा करि कै कछु टहल दीजिए । तब श्रीगुसांईजी रूपा कौ नाम दे सेवक कियो । पाछें श्रीनाथजी की सिंघपोरि की सेवा सोंपी । और कह्यो, जो - रूपा ! तू श्री-नाथजी की सिंघपोरि की रखवारी करियो । और श्रीनाथजी की प्रसादी रमोई में तें महाप्रसाद लीजो ।

वार्ता प्रसंग—६

सो उह रूपा पोरिया श्रीनाथजी के मंदिर की द्वारपाल की सेवा करे । सो एक समय दुपहरि कौ श्रीनाथजी ने रूपा पोरिया कौ लात मारि कै जगायो । और श्रीमुख तें कहे, जो - मोकों भूख लगी है । तब रूपा पोरिया तुरत ही उठि कै श्रीगुसांईजी की सिज्या के पास आयो । सो श्रीगुसांईजी के चरनारविंद दावि कै जगाये । सो आप जागे । सो देखे तो श्रीगोवर्द्धननाथजी कौ सिंघपोरिया ठाढ़ो है । तब श्रीगुसांईजी

धरी - ... विरियाँ क्यों आयो है ?  
 ... विनती करी, जो - महाराज !  
 ... जो - श्रीगोवर्द्धननाथजी आपु भृग्वे  
 ... श्रीगोवर्द्धननाथजी के  
 ... श्रीगोवर्द्धननाथजी को फेरि राजभोग ममार्यो ।  
 ... श्रीगुसांईजी  
 आप अपनी बैठक में पधारे । सो पोहे । तब रूपा पोरिया  
 अपनी द्वारपाल की सेवा किये । सो रूपा पोरिया में श्रीगोव-  
 र्द्धननाथजी ऐसे सानुभाव हते । सो जो कळू चहिण्, सो रूपा  
 पोरिया सो कहते । और रूपा पोरिया में उष्णकाल में पंखा  
 करावते । ऐसी कृपा श्रीनाथजी रूपा पोरिया के ऊपर करते ।  
 सो ऐसी रूपा पोरिया की कितनिक वार्ता हं । सो ऐसे करत  
 पाछे केतेक दिन में वा रूपा पोरिया की देह छूटी । तब वृष्णव  
 मिलि के अग्नि-संस्कार कियो । ता पाछे उह बात श्रीगुसां-  
 ईजी सुनि के श्रीमुख ते कहे, जो - भगवद् ईच्छा होइ सो  
 होइ । जो - श्रीगोवर्द्धननाथजी की ईच्छा प्रवरु है । सो वे  
 रूपा पोरिया श्रीगुसांईजी को ऐसे कृपापात्र भगवदीय हतो ।

वार्ता प्रसंग—२

पाछे एक समै श्रीगुसांईजी श्रीगोवर्द्धननाथजी के दरसन  
 को पधारे हते । सो श्रीनाथजीद्वारा ... । सो गोविंदकुंड पे  
 स्नान करि के ... सांईजी श्रीगोव ... के मंदिर में पधा-  
 रत हते । ... मे ... की को देखि के  
 सन्मुख ... करत हु  
 तब सब ... मारयो

वा स्नान के रुधिर निकस्यो । परंतु उह स्नान जाँइ नहीं । तव श्रीगुसाईजी कहे, जो - याकौ मारो मति । तुम दूरि रहो । ता पाछें श्रीगुसाईजी ज्ञानदृष्टि सों मन में विचार कियो, तव पहचान्यो । पाछें श्रीगुसाईजी आप वा स्नान कों चरन-स्पर्श करवाए । और वाके मस्तक के ऊपर चरन धरे । सो श्रीगुसाईजी आप वा स्नान के ऊपर बोहोत प्रसन्न भए । ता पाछें श्रीगुसाईजी आप सब वैष्णवन सों कहे, जो - यासों दूरि रहो । इतने ही में वा स्नान की देह छूटी । तव वा स्नान के मुख में तें तेज कौ पुंज निकस्यो । सो श्रीठाकुरजी आप के चरनारविंद में लीन भयो । ता पाछें श्रीगुसाईजी श्रीमुख तें वैष्णवन कों आज्ञा किये, जो - तुम याकौ संस्कार करि आओ । तुम कों कछू बाधक नहीं । यह मेरी आज्ञा है । ता पाछें वैष्णवन ने याकों अग्निसंस्कार कियो । ता पाछें फेरि कै श्रीगुसाईजी आप स्नान करि कै श्रीगोवर्द्धननाथजी के मंदिर में पधारे । सो सब सेवा सों पहोंचि कै श्रीगुसाईजी अपनी वैठक में पधारे । सो गादी-तक्रियान के ऊपर विराजे । तव वैष्णवन ने विनती करी, जो - महाराज ! पूर्व जन्म में यह स्नान कौन हतो ? और कौन अपराध तें यह स्नान की जोनि प्राप्त भई ? सो कृपा करि कै हम सों कहिए ? तव श्रीगुसाईजी वैष्णवन प्रति श्रीमुख सों कहे, जो - यह पूर्वजन्म में श्रीगोवर्द्धननाथजी कौ सिंघपोरिया हतो । रूपा पोरिया । सो श्रीगोवर्द्धननाथजी की राजभोग-आरती की वाती करत हतो । सो उह वाती भेली भई हती । तव भंडार में जाँइ कै घृत लेइ कै तातो करि कै तामें वाती हाथ में भी-जोय कै ता पाछें रूपा पोरिया ने मृत्तिका सों हाथ धोय डारें ।

रूपा पोरिया सां पूछे. जो - तू या विरिया क्यां आयो हे ? तव रूपा ने श्रीगुसांईजी सां विनती करी, जो - महागज ' में तो याके लिये आयो हूं. जो - श्रीगोवर्द्धननाथजी आपु भ्रम्व हैं । तव श्रीगुसांईजी तुरत ही उठि के श्रीगोवर्द्धननाथजी के मंदिर में जाई के श्रीगोवर्द्धननाथजी कां फंगि गजभोग ममायां । ता पाछे भोग सराय के मव मेवा तं पहांचि के श्रीगुसांईजी आप अपनी बैठक में पधारे । सो पांटे । तव रूपा पोरिया अपनी द्वारपाल की मेवा किये । सो रूपा पोरिया सां श्रीगोवर्द्धननाथजी ऐसे मानुभाव हते । सो जो कळु चहिण, सो रूपा पोरिया सां कहते । और रूपा पोरिया सां उष्णकाल में पंखा करावते । ऐसी कृपा श्रीनाथजी रूपा पोरिया के ऊपर करत । सो ऐसी रूपा पोरिया की कितनिक वार्ता हं । सो गंगे करत पाछे केतेक दिन में वा रूपा पोरिया की देह छटी । तव वैष्णव मिलि के अग्नि-संस्कार कियो । ता पाछे उह बात श्रीगुसांईजी सुनि के श्रीमुख तं कहे. जो - भगवद् ईच्छा होइ सो होइ । जो - श्रीगोवर्द्धननाथजी की ईच्छा प्रवळ है । सो वे रूपा पोरिया श्रीगुसांईजी को ऐसो कृपापात्र भगवदीय हतो ।

वार्ता प्रसंग—२

पाछे एक समै श्रीगुसांईजी श्रीगोवर्द्धननाथजी के दरसन कां पधारे हते । सो श्रीनाथजीद्वार पधारे । सो गोविंदकुंड पे स्नान करि के श्रीगुसांईजी श्रीगोवर्द्धननाथजी के मंदिर में पधारत हते । सो ताही समै एक स्वान श्रीगुसांईजी कां देखि के सन्मुख आयो । सो आय के चरन-परस की ईच्छा करत हुतो । तव सब वैष्णव लाठी ले के मारन लागे । सो ऐसो मारयो सो

वा स्नान के रुधिर निकस्यो । परंतु उह स्नान जाँड़ नहीं । तव श्रीगुसाईजी कहे, जो - याकौ मारो मति । तुम दूरि रहो । ता पाछें श्रीगुसाईजी ज्ञानदृष्टि सों मन में विचार कियो, तव पहचान्यो । पाछें श्रीगुसाईजी आप वा स्नान कों चरन-स्पर्श करवाए । और वाके मस्तक के ऊपर चरन धरे । सो श्रीगुसाईजी आप वा स्नान के ऊपर वोहोत प्रसन्न भए । ता पाछें श्रीगुसाईजी आप सब वैष्णवन सों कहे, जो - यासों दूरि रहो । इतने ही में वा स्नान की देह छूटी । तव वा स्नान के मुख में तें तेज कौ पुंज निकस्यो । सो श्रीठाकुरजी आप के चरनारविंद में लीन भयो । ता पाछें श्रीगुसाईजी श्रीमुख तें वैष्णवन कों आज्ञा किये, जो - तुम याकौ संस्कार करि आओ । तुम कों कछू बाधक नहीं । यह मेरी आज्ञा है । ता पाछें वैष्णवन ने याकों अग्निसंस्कार कियो । ता पाछें फेरि कै श्रीगुसाईजी आप स्नान करि कै श्रीगोवर्द्धननाथजी के मंदिर में पधारे । सो सब सेवा सों पहाँचि कै श्रीगुसाईजी अपनी बैठक में पधारे । सो गादी-तकियान के ऊपर विराजे । तव वैष्णवन ने विनती करी, जो - महाराज ! पूर्व जन्म में यह स्नान कौन हतो ? और कौन अपराध तें यह स्नान की जोनि प्राप्त भई ? सो कृपा करि कै हम सों कहिए ? तव श्रीगुसाईजी वैष्णवन प्रति श्रीमुख सों कहे, जो - यह पूर्वजन्म में श्रीगोवर्द्धननाथजी कौ सिंघपोरिया हतो । रूपा पोरिया । सो श्रीगोवर्द्धननाथजी की राजभोग-आरती की वाती करत हतो । सो उह वाती भेली भई हती । तव भंडार में जाँड़ कै घृत लड्ड के तातो करि कै ताम वाती हाथ में भीजोय कै ता पाछें रूपा पोरिया ने मृत्तिका सों हाथ धोय डारें ।

परंतु अनजाने नख में घृत रहि गया होता । पाछें उह महा-प्रसाद लेवे कों बैठयो । तव रमोडया ने ताती कटी परीगी । सो उह नखन कौ घृत ताती कटी में आयो । सो श्रीनाथजी कौ अनप्रसादी द्रव्य पेट में गया । तातें या अपराध तें यह स्वान भयो । सो श्रीठाकुरजी कौ द्रव्य तंगोई हे ।

भावप्रकाश—या वार्ता में यह जताए, जो - ठाकुर की अनप्रसादी नखन मामग्री द्रव्यादिक सो वैष्णव कौ सर्वथा मावधान रहना । काहेतें, जो - अनजाने ह वह काह भांति सो उदर में जाट तो यह गति होइ । सो वात रूपा पोरिया के मिए करि मव वैष्णवन कौ श्रीगुसांईजी आप जताए, नानक रूपा पोरिया जेसन की ऐसी गति सर्वथा न होइ । परि स्वकीय मिश्रायें यह प्रभुन कौ कौतुक है ।

पाछे केतेक दिन में रूपा पोरिया की मृत्यु आई । तव उह मनुष्य-देह छोरि के स्वान के उदर में आयो । पाछें जन्म भयो ।

परि जाने भगवत्सेवा बोहोत करी हती । सो याकों पूर्व-जन्म कौ ज्ञान रह्यो होता । तातें अपनी जाति कौ देह संबंधी माता-पिता आदि सब कौ अभाव करि के उन कौ मंग छोड़ि के पर्वत के नीचे उतरि के, श्रीनाथजी की ध्वजा के सन्मुख यह स्वान बैठयो होता । ताते मरे चरन-स्पर्श के निमित्त इतना यत्न कियो । और इतना मार खायो । तव वे वैष्णव इतना अपराध कौ वचन सुनि के शिक्षा मानत भए । और कहन लागे जो - भाई ! आपुन ऐसं वैष्णव कों ऐसो मारयो ? अनजाने भई सो बुरी भई । परि आपुन तो विचार कियो होता, जो - यह श्रीगुसांईजी कों छूवेगो । ता पाछें श्रीगुसांईजी आपुन यह बात उन वैष्णवन के मन की जानी । तव श्रीगुसांईजी ने उन वैष्णवन सो कह्यो, जो - तुम अपुने मन में चिंता-कलेस मति करो । यह तो जो कछू भयो है सो तो ईच्छा तें भयो है । सो



यह इतना मार खायो है, सो तो अपराध को दंड भयो है ।  
और कह्यो, जो - याकों पूर्व जन्म में कोऊ वैष्णव श्रीनाथजी के  
दरसन की पूछतो, सो यह वाकों तामस करि के उत्तर देतो ।  
या अपराध तें यह इतना मार खायो है । परि अब याकों कछु  
बाधक रह्यो नाही है । सो अब यह श्रीगोवर्द्धननाथजी के चर-  
नारविंद में लीन भयो । याही तें वैष्णव को विचारि के बोलनो ।  
जैसे उज्ज्वल वस्त्र होइ सो तुरत ही दाग लागत हैं और मलीन  
को दाग नाही है । ऐसे आपन वैष्णव प्रति कह्यो ।

सो ऊह रूपा पोरिया श्रीगुसाईजी को ऐसो परम कृपा-  
पात्र भगवदीय हतो । तातें इनकी वार्ता को पार नाही, सो  
कहां ताई कहिए ? वार्ता ॥१६६॥



अब श्रीगुसाईजी को सेवक एक चूहडा हतो, सो श्रीगोवर्द्धन में रहतो,  
तिनकी वार्ता को भाव कहत हैं —

भावप्रकाश—ये तामस भक्त हैं । लीला में इन की नाम 'वन-रानी' है ।  
ये 'कुसुम' वन में रहति हैं । सो ये पुलिदिनी के वृथ में हैं । ये 'रसात्मिका' तें  
प्रगटी हैं, तातें उन के भावरूप हैं ।

सो एक समै श्रीठाकुरजी आप गाइ चरावन को सखान सहित वन में  
पधारे हे । सो एक गाँई टोला में सो विछुटी । सो कुसुम वन में गई । सो  
श्रीठाकुरजी ने जानी । तब सखान को कहे, जो - तुम यहां गाँइन को देखत  
रहियो । मैं अब ही वा गाँइ को ले के आवत हूं । यह कहि आप तो कुसुम  
वन में पधारे । तहां वनरानी को श्रीठाकुरजी के दरसन भए । ता समैं 'वन-रानी'  
ने विनती कीनी, जो - महाराज ! मैं आप के लिये बोहोत दिनन तें या वन  
को सेवन करति हूं । सो आज आप एकांत में मोकों मिले हो । तातें आप ये वन  
के सुंदर फल-फलादि आरोगिए । और मेरो मनोरथ पूरन कीजिए । तब श्रीठाकुर-  
जी कहे, जो - मोकों अवेर होइगी तो यहां सब मग्वा आवेंगे, हूँदन को । तातें  
तू मोकों रोके मति । और 'ज्यामलाजी' हूं याही वन में हैं । तातें वे जाने  
तो हूँ ठीक नाही । या प्रकार श्रीठाकुरजी वनरानी को ममझाय कहे । परि

‘वन-रानी’ हठ परी। क्यो, जो - महागज ! ये वन के सुदूर फल आगेगिए श्री मेरो मनोरथ पूरन कीजिए। एमो समय फेरि कहाँ मिलेगो ? मो श्रीठाकुरजी तो आप भक्तवत्सल हैं। मो नाना भांति के मेवा वनरानी ल्याटं या बोटान प्रसन्नता-पूर्वक हास्य-विनोद मो आगगे। पाछें आप वनरानी की रंज में पधारें। मो बोहोत भांतिन मो वनरानी को मुग्ध दिये। मो बात एक मर्गी ने देखी। मो उः स्यामलाजी मो जाड कही। तब स्यामलाजी उहां पधारि। मो देखे तो वनरानी श्रीठाकुरजी के साथ एकान्त में बैठी हास्य-विनोद करति है। मो स्यामलाजी नेरु दूरि ओट में ठाढ़े रहे। मो ताही सम श्रीठाकुरजी की दृष्टि उन पर परी। तब श्री-ठाकुरजी वनरानी मो कहे, जो - हो तो जात हूं। श्रीस्यामलाजी यहां पधारि है। तातें तू सावधान रहै। पाछें श्रीठाकुरजी आप पाछिले द्वार रहै वन को पधारें। और वनरानी बस-सिगार सेंधारि उठी। तब स्यामलाजी उहां पधारि। पाछें वनरानी मों कहे, जो - श्रीठाकुरजी तेरे उहा कवके पधारें है ? तब वनरानी कहे, जो - यहां तो श्रीठाकुरजी पधारें है नाहीं। तुम कहा कदन हो ! तब वनरानी मों स्यामलाजी कहे, जो - झूठ काहे कों बोलत है। मैंने अपनी आग्नि तें देखे है। तब वनरानी कहे, जो - ये तो गाँड हूँदिये को वन में आवे हते मो गाँड हूँदिये के ताही सम पधारें। तब स्यामलाजी कहे, जो - तू मो आगे असत्य बोलति है। तातें भूतल पर गिरि। हीनयोनि को प्राप्त होऊ।

सो ये गोवर्द्धन में एक चूहडा के जन्म्यो। सो ये बस्य दस कौ भयो। तब एक समै ये गोवर्द्धन की गेल में जात हुतो। सो उहां एक मर्पने वाकों काट्यो। सो वह गेलही में गिरयो। मो ताही सम श्रीगुसाईजी आप घोड़ा पै विराजे श्रीगोकुल तें पधार रहे हे। मो श्रीगुसाईजी गेल बीच में या लरिका कों देखि खवास सों पूछे, जो - यह कौन है ? गेल में कैसे परयो है ? तब स्वाम ने पास जाड देख्यो। पाछें क्यो, जो - महाराज ! काहू कौ लरिका है। सो कोई प्राणी काट्यो दीसत है, तातें ये मरयो परयो है। तब श्रीगुसाईजी आप घोड़ा तें नीचे उतरि वाके पास पधारें। पाछें वाके ऊपर वेदमंत्र पढि जल छिरके। तब वह लरिका जागृत भयो। तब श्रीगुसाईजी पूछे, जो - तू कौन है ? तब इन क्यो, जो - महाराज ! मैं चूहडा हूं। सो मोकों स्याँपने काट्यो हो। सो आप कृपा करि जिवायो। अब मैं आप के सरनि आयो हूं। तब श्रीगुसाईजी वाकों देवी-जीव जानि अष्टाक्षर मंत्र सुनाइ सेवक किये। पाछें वासों क्यो, जो - तू यह मंत्र कौ नित्य जप करियो। ता पाछें श्रीगुसाईजी तो आप गोपालपुर पधारें। पाछें

वह लरिका अपने घर आयो । परि काहू सों कह्यो नहीं । पाछें श्रीगुसांईजी कौ नित्य ध्यान करे और अष्टाक्षर मंत्र कौ जप करे । या प्रकार गहे । और कछु कार्य करे नहीं । ऐसैं करत कछु दिन में माता-पिता मरे । तब यह खेती कर्म लाग्यो । सों श्रीगुसांईजी की कृपातें श्रीनाथजी वाक्यों दरसन देन लागे । या सो वार्ता करन लागे ।

वार्ता प्रसंग—१

सो उह चूहडा श्रीगोवर्द्धन में रहतो । सो वह श्रीगुसांईजी कौ सेवक हुतो । सो वा चूहडा की ऐसी लगन हती । सो उह चूहडा श्रीगोवर्द्धननाथजी के दरसन विना रहि सकत नहीं हतो । सो वा चूहडा कौ श्रीगोवर्द्धननाथजी वाहिर पधारि के दरसन देतै । सो एक दिन श्रीगोवर्द्धननाथजी वाके पास ठाढ़ श्रीगुसांईजी ने देखे । सो वा चूहडा सों श्रीगोवर्द्धननाथजी वार्ता करत देखे । ता पाछें चूहडा सों श्रीगुसांईजी ने पूछी, जो - श्रीगोवर्द्धननाथजी तोसों कहां वात करत हते ? तब चूहडा ने श्रीगुसांईजी सों विनती करी, जो - महाराज की कृपा तें नित्य मोकों श्रीगोवर्द्धननाथजी दरसन देत हैं । और जो - कछू वन में खेलिवे की, गायन की, ग्वालन की वार्ता भई होई सो वार्ता करत हैं । पाछें वा चूहडा ने श्रीगुसांईजी सों विनती करी, जो - महाराज ! आप की कृपा तें मोकों दरसन दिये विना श्रीगोवर्द्धननाथजी आप रहि सकत नहीं । और काहू दिन भगवदु ईच्छा तें दरसन न होई तो ता दिन में अन्न-जल हू नहीं लेत हों । ऐसैं भूखो रहत हों । ऐसैं मेरे नित्य नेम है । ता पाछें दूसरे दिन श्रीगोवर्द्धननाथजी आपु वाहिर पधारि के मोकों दरसन देत हैं । तब हो अन्न-जल लेत हों ।

तब श्रीगुसांईजी आपु श्रीमुख तें कहें, जो - राजभोग के समय माला बोले तब मंदिर के किवाड़-दरवाजे पर बैठियो ।

तव सवन तें पहिले दरसन करवाय देंगे । ता पाछें श्रीगुगार्डजी आपटिया कों बुलाय के आज्ञा दिये, जो - या चूहडा कों सवन तें पहिले दरसन करवाय दियो करो । तव वाने कही, जो-महाराज ! जो - आज्ञा । ता पाछें एमी कृपा वा चूहडा के ऊपर करते । सो नित्य श्रीठाकुरजी की कृपा तें माल्य के समय नित्य दरसन कों श्रीगिरिराज ऊपर जातो । सो मंदिर के द्वार सन्मुख नेक दरि. न्हाय के मुद्ध वस्त्र पहरि बैठतो । पाछें सवन तें पहिले आपटिया याकों बुलाय के दरसन करवाय देंतो । सो उह श्रीनाथजी के दरसन नित्य नेम मां करतो । सो एमें कितनेक दिन भए । सो तव कबहूक एक समे भगवद् इच्छा मां कामकाज में अटक रह्यो । ता पाछें वह आय के देख्यो तो तारा मंगल भयो हे । और कोऊ वैष्णव तहां नाहीं हे । सो उह मंदिर के पिछवारे आय के परचो रह्यो । सो वोहोत ही आतुर भयो । और ज्वर होइ आयो । सो महा कष्ट भयो । तव श्रीगोवर्द्धननाथजी आपु सिंघासन तें उठि के चले । सो पिछली ओर एक मोखा करि के वा चूहडा कौ नाम ले पुकारे । सो उह सद्द सुनत मात्र ही उठि के ठाढ़ो भयो । वा दिन मोखा में तें श्रीगोवर्द्धननाथजी कौ दरसन भयो । ता पाछें श्रीनाथजी ने वा चूहडा कों दोई लडुवा दिए । और श्रीगोवर्द्धननाथजी ने वासों श्रीमुख सां कहे, जो - ये हमारे प्रसादी लडुवा तू खाँय ले । तव वा चूहडा ने एक लडुवा तो खायो । ता पाछें एक लडुवा चादर में बांधि के अपने घर आयो । ता पाछें श्रीगोवर्द्धननाथजी कौ उत्थापन कौ समै भयो । तव संखनाद भये । ता पाछें श्रीगोवर्द्धननाथजी के मुखिया भीतरिया स्नान करि के श्रीगिरि-

राज ऊपर मंदिर में गए। सो उहां देखे तो पिछली ओर मोखा है। तब सब महा सोच करन लागे। ता पाछें भीतरिया ने सब वस्तु श्रीगोवर्द्धननाथजी की देखी। सो सब वस्तु श्रीगोवर्द्धननाथजी की ज्यों के त्यों हैं। तब ए समाचार भीतरिया ने श्रीगुसांईजी सों कहे। जो - महाराजाधिराज ! आज श्रीगोवर्द्धननाथजी के मंदिर के पिछवारे काहू ने मोखा कीना है। यह सुनि कै श्रीगुसांईजी आप महा खेद करन लागे। सो यह बात चूहडा ने सुनी। सो श्रीगुसांईजी की बैठक के द्वारे आइ कै चूहडा ने श्रीगुसांईजी सों विनती करी, जो - महाराज ! इन सबन कों दूरि करो तो एक बात कहनी है। तब श्रीगुसांईजी ने कह्यो, जो - कहो ! कहा कहत है ? तब वा चूहडा ने श्रीगुसांईजी सों विनती कीनी, जो - महाराज ! आज आप अनमने से क्यों हो ? तब श्रीगुसांईजी कह्यो, जो - आज श्रीगोवर्द्धननाथजी के मंदिर के पिछवारे काहू ने मोखा कीना है। तातें हम तो उदास है। तब श्रीगुसांईजी सों वा चूहडा ने विनती करी, जो - महाराजाधिराज ! ऐसी बातन कों आप भले उदास बैठे हो ? तुम अपने लरिका कौ सुभाव जानत नाहीं ? जो - आज काहू कार्यार्थि में 'गोवर्द्धन' गयो हतो। ता पाछें द्वार पै आय के देख्यो ता तारा-मंगल है। पाछें मंदिर के पिछवारे परयो रह्यो। सो सोकों विरह-ताप बोहोत भयो। सो ताही समे श्रीगोवर्द्धननाथजी हाथ में लकुरिया ले कै मोखा कियो। पाछें मेरो नाम ले कै पुकारे। सो मैं अरवराय कै उठि बैठ्यो। और अपने मन में विचार कियो, जो - श्रीगोवर्द्धननाथजी पुकारत हैं। तब फेरि कह्यो, तू दर-

सन करि । तव मैं दरसन किये । और श्रीगोवर्द्धननाथजी श्रीमुख तें कहं, जो - लडुवा तू खाय ले । सो एक लडुवा तो मैंने खायो हे । और एक मेरी चादर में बंध्यो हे । ता पाछे वा चूहडा ने कह्यो, जो - महाराज ! आप ऐसी बात में मले उदास बैठे हो । तव श्रीगुसाईजी आप ऐसे वचन सुनि के वोहोत प्रसन्न भए । तव श्रीगुसाईजी पोरिया, आपटिया कां बुलाय के कहं, जो - यह चूहडा कवहू दरसन विनु रहि न जाँइ । और चूहडा आठों बेर जब आवे तव दरसन करवाय दियो करो । सो सवन तें पहिले वा चूहडा कां दरसन करवाय देत । ता पाछे दूसरे दिन कारीगर बुलाय के वा मोखा कां मूदन लागे । तव श्रीगोवर्द्धननाथजी आज्ञा किये, जो - यह मोखा तुम मति मूंदो । ऐमेही रहन देउ । ता पाछे वेमेही रहन दियो । सो अब हू श्रीगिरिराज पर मोखा हे ।

भावप्रकाश—या वार्ता में यह जतायो, जो - जाकों प्रेमभक्ति स्फूर्त भई होंई ताके विषे जाति-मर्यादा तथा और हू मर्यादा रहन नाही । सो जीव को श्रीगुसाईजी को दृढ आश्रय होंई तव ऐसी प्रेम स्फूर्त होंई । ताते वंणव को श्रीगुसाईजी को दृढ आश्रय कर्तव्य है ।

सो वह चूहडा श्रीगुसाईजी को ऐसी कृपापात्र भगवदीय हतो । सो वाकों श्रीगुसाईजी की कृपादृष्टि तें प्रेम स्फूर्त भयो हतो । ताते श्रीगुसाईजी वासों मर्यादा राखे नाही । सो इनकी वार्ता कहां ताई कहिये । वार्ता ॥१६७॥



अब श्रीगुसाईजी के सेवक स्त्री-पुरुष राजनगर में रहते, जाके पैसा की गिनती में पांच रत्न निकसे, तिनकी वार्ता को भाव कहत है—

भावप्रकाश—ये सात्विक भक्त हैं । लीला में ' पीतवर्णी ', ' कुंकुमवर्णी ' दोऊन के नाम हैं । सो पीतवर्णी तो यहां पुरुष भयो और कुंकुमवर्णी स्त्री भई । ये दोऊ ' रसात्मिका ' तें प्रगटी हैं, ताते उनके भावरूप हैं ।

वार्ता प्रसंग—६

सो एक समय श्रीगुसांईजी राजनगर पधारे हते । तव भा-  
इला कोठारी के घर उतरे हते । तव इन स्त्री-पुरुषन ने श्री-  
गुसांईजी के दरसन किये । तव इन ने विनती करी, जो -  
महाराजाधिराज ! हमकों कृपा करि कै नाम दीजिए । तव श्री-  
गुसांईजी आज्ञा किये, जो - तुम स्नान करि आवो । तव वे  
स्नान करि आए । ता पाछें हाथ जोरि कै विनती करी, जो -  
महाराज ! कृपा करि कै सरनि लीजिए । तव श्रीगुसांईजी आ-  
पुने कृपा करि कै नाम दोऊन कों सुनायो । पाछें एक व्रत करवाय  
ब्रह्मसंबंध करवायो । तव इन स्त्री पुरुष ने विनती करी, जो -  
महाराज ! अब कहा कर्तव्य है ? तव श्रीगुसांईजी ने आज्ञा  
करी, जो - तुम दोऊ भगवत्सेवा करो । तव इन कही, जो -  
महाराज ! कृपा करि कै हमारे माथे सेवा पधराइ दीजिए । तव  
श्रीगुसांईजी ने श्रीठाकुरजी की सेवा पधराई । पाछें सब सेवा  
की रीति भांति सिखाई । पाछें आज्ञा कीनी, जो - नित्य एक  
वैष्णव कों प्रसाद लिवाय कै प्रसाद लीजो । ता पाछें श्रीगुसां-  
ईजी आपु तो श्रीरनछोरजी के दरसन कों पधारे । तव वे स्त्री-  
पुरुष श्रीठाकुरजी की सेवा भली भांति सां करन लागे । और  
नित्य एक वैष्णव कों महाप्रसाद लिवाय कै आप महाप्रसाद लेते ।  
सो कितनेक दिन में श्रीठाकुरजी सानुभावता जतावन लागे ।  
जो चहिए सो माँगि लेते । और बहोत कृपा करते ।

सो ऐसैं करत कितनेक दिन बीते । पाछें उह वैष्णव तो  
परदेस गयो । सो वाने अपनी स्त्री सां कही, जो - जा भांति  
नित्य एक वैष्णव कों महाप्रसाद लिवावत हैं ता भांति लिवाय

कै पाछे महाप्रसाद लीजियो । और गिनती गवियो । तब कयो.  
 जो - एमेही करुंगी । तब उह वैष्णव तो परदेस गयो । तब  
 वह स्त्री सो कही तेंगेही नित्य वह एक वैष्णव को महाप्रसाद  
 लिवावे । और एमें नित्यही ता भांति एक पैसा धरत जांड । तब  
 ऐसे करत बरग दिन में वैष्णव आयो । तब अपनी सीमां कही,  
 जो - तें कितने वैष्णव को महाप्रसाद लिवायो ? सो मोको  
 उह गिनती करवाय । तब स्त्रीने कही, जो - पैसा गिनो । तब  
 वाके पति ने पैसा गिनो । सो तिनमें माठ निकसे । और पांच  
 रत्न निकसे । तब पुरुष ने प्रछयो, जो - यह कहा ? यह रत्न  
 कैसे हैं ? तब स्त्रीने पति मां कही, जो - मैंने तो पैसा छोर  
 हैं । पाछे सब ले के वह स्त्री-पुरुष श्रीगुरुमांडजी के  
 पास आए । तब श्रीगुरुमांडजी मां गिनती करी, जो - महागज !  
 यह कहा कारन हे ? जो - स्त्री तो नित्य एक पैसा धरती और  
 एक वैष्णव को महाप्रसाद लिवावती । और इन में तो पांच  
 रत्न निकसे ह । ताको कारन कहा हे ? तब श्रीगुरुमांडजी आप  
 कहे, जो - ए पांच भगवदीय ताहसी आए हे । पाछे श्रीगुरुमां-  
 डजी आप कहे, जो - वैष्णव को यही चहिए ।

भावप्रकाश—सो या वार्ता में यह सिद्धांत भयो, जो - नित्य एक वैष्णव  
 को महाप्रसाद लिवाय कै पाछे आप महाप्रसाद लेई । सो वैष्णव को यही धर्म हे,  
 जो - वैष्णव को महाप्रसाद लिवाये पाछे आप लेई तो मारग को सिद्धांत हृदया-  
 रुह होई । प्रभुन के ऊपर रुचि होई । तब प्रभुन की भली भांति सो सेवा होई ।

सो वे स्त्री-पुरुष श्रीगुरुमांडजी के ऐसे कृपापात्र भगवदीय  
 हे । ताते इनकी वार्ता को पार नाही । सो कहां ताई कहिए ।

वार्ता ॥१६८॥

द्वितीय खण्ड समाप्त



